

Ex Bibliotheca
majori Coll. Rom.
Societ. Jesu

4815.15.

48

48
5

14-16. C. 21



PHILOSOPHIA SCOTI

A prolixitate, & subtilitas eius ab
obscuritate libera & vindicata:

S E V

OPVS PHILOSOPHICVM STVDENTIBVS

Sic attemperatum, vt in illo habeant ad manus;
Philosophiæ Scoti integritatem,
& profunditatem planam.

A V T H O R E

V. P. IOANNE GABRIELE BOYVIN

In Prouincia Franco-Parisiua strictioris Obseruantię
Lectore Theologiæ Iubilato.

*Et apud FF. Minores Virienses emerito Professore
ex eadem Vrbe oriundo.*

T O M V S S E C V N D V S .


P R I M A P A R S P H I S I C Æ .



V E N E T I I S , M . D C . X

Apud Gasparem de Stortis.

Superiorum Permissu, ac Priuilegio.





I N D E X³

G E N E R A L I S

Omniū quæ continentur in hac
Phyfica.

In uniuersam Aristotelis Physicam Præfatiuncula. pag. 17

BREVE ET ACCVRATVM

P H Y S I C Æ

P R Æ L V D I V M.

- | | |
|--|-----|
| 1. Quid importet nomen Physica. | 10 |
| 2. Existētia physica. | ib. |
| 3. Qui inuētores physica, & quo actū. | ib. |
| 4. Vtilitas physica. | 11 |
| 5. Ordo physica inter scientias. | ib. |
| 6. Ordo scientiarum speculatiuarum. | 12 |
| 7. An physica sit propriè scientia. | ib. |
| 8. An physica sit scientia speculatiua. | 13 |
| 9. An physica sit vna simplex qualitas, &c. | ib. |
| 10. An subalternetur Physica Metaphysica, & Medicina Physica. | 14 |
| 11. Obiectum physica. | 15 |
| 12. An ens mobile, aut corpus mobile sit obiectum proximum & adæquatum Physica. | 15 |
| 13. An corpus generabile & corruptibile sit Physica obiectum, &c. | 16 |
| 14. Vtrum ens infinitum & limitatum, aut substantia finita naturalis non sit obiectum physica. | 17 |
| 15. An ens naturale ut naturale sit obiectum adæquatum physica. | ib. |

PHILOSOPHIÆ NATVRALIS

VNIVERSA DISPVTATIO.

Hæc Physica siue Philosophia Naturalis diuiditur in tres partes vltius diuidendas per Disputationes, Sectiones, & Capita. Prima agit de corpore naturali in communi spectato: secunda de corpore naturali inanimato; tertia de corpore naturali animato.

PRIMA PARS

P H Y S I C Æ

De corpore Naturali generatim sumpto.

Hæc pars diuiditur in tres Disputationes, de principijs scilicet rerum naturalium, de ipsarum natura, de causis & illarum proprietatibus.

DISPVTATIO PRIMA

De Principijs rerum Naturalium.

Hæc Disputatio distribuitur in tres Sectiones, de principijs rerum Naturalium in genere, de principijs rerum Naturalium in specie, & de toto composito resultante ex illis principijs.

- Sectio I. *De principijs rerum Naturalium in genere.* 28
 Quæst. I. *Quid sint principia rerum Naturalium.* 29
 II. *Quid censuerint veteres Philosophi de principijs.* 22
 III. *An Atomī dici debeant prima rerum naturalium principia.* 24
 IV. *Quot sint verè principia rerum naturalium.* 28

V. *An*

I N D E X

V. <i>An principia sint contraria.</i>	32
Sect. II. <i>De principijs rerum naturalium in specie.</i>	
33	

Hęc Sectio habet tria Capita, quę sunt de Materia, de Forma, & de Priuatione.

Cap. I. <i>De Materia.</i>	34
Quęst. I. <i>An decur Materia.</i>	ibid.
II. <i>Quotuplex sit Materia.</i>	36
III. <i>Quid sit Materia prima.</i>	38
IV. <i>Quanam mens fuerit veterum Philosophorum de Materia prima.</i>	39
V. <i>A quo sit Materia prima.</i>	42
VI. <i>An Materia prima omnium sit una vel diuersa.</i>	44
VII. <i>Vtrum Materia prima sit pura potentia, vel habeat actum entitatum.</i>	48
VIII. <i>Vtrum Materia possit existere sine forma.</i>	53
IX. <i>Vtrum potentia Materia sit illi essentialis.</i>	58
X. <i>Quomodo Materia appetat formas, & quales.</i>	60
XI. <i>An Materia prima sit per se cognoscibilis.</i>	66
XII. <i>Vtrum Materia sit ingenerabilis & incorruptibilis.</i>	68

Cap. II. <i>De Priuatione.</i>	72
Quęstio. I. <i>Quid sit priuatio.</i>	74
II. <i>An priuatio sit ens reale.</i>	75
III. <i>Quotuplex sit priuatio.</i>	77
IV. <i>An priuatio sit principium rerum naturalium.</i>	79
V. <i>Et vltima. Quanam sint proprietates priuationis.</i>	82

Cap. III. <i>De Forma.</i>	84
Quęst. I. <i>An decur Forma substantialis.</i>	ibid.
II. <i>Quid sit forma substantialis.</i>	87
III. <i>Quotuplex sit Forma.</i>	91
IV. <i>Vtrum forma substantiales educantur de potentia materiae.</i>	93
V. <i>Vtrum forma possit existere sine materia.</i>	100
VI. <i>Vtrum plures formę substantiales dentur in una & eadem materia.</i>	102
Sect. III. <i>De Composito Naturali.</i>	108
Quęst. I. <i>An compositum ex materia & forma sit compositum per se.</i>	ibid.

I N D E X.

II. <i>Vtrum Materia & Forma uniantur seipsis in constitutione totius.</i>	110
III. <i>An totum realiter distinguatur à partibus unitis.</i>	114
IV. <i>An totum integrale & totum per accidens distinguantur realiter à suis partibus.</i>	120
V. <i>An compositum substantiale includat essentialiter materiam & formam.</i>	123
VI. <i>An accidentia subiectentur in composito.</i>	128

D I S P U T A T I O II.

<i>De Natura & Causis rerum Naturalium.</i>	134
---	-----

*Hæc subdividitur in tres Sectiones, de Natura & Arte;
de Causis per se; & de Causis per accidens.*

<i>Seçtio I. De Natura & arte.</i>	134
<i>Quæstio. I. Quid dicendum sit de Natura.</i>	ibid.
II. <i>Quid dicendum sit de Arte.</i>	144
III. <i>Quid dicendum sit de Violentia.</i>	150
<i>Seçtio. II. De causis per se rerum naturalium.</i>	154
<i>Cap. I. De causis in genere.</i>	ib.
<i>Quæst. I. Quot modis usurpetur causa.</i>	ibid.
II. <i>Quid & quoduplex sit causa.</i>	147
III. <i>Vtrum due cause totales possint producere eundem effectum.</i>	161
IV. <i>Vtrum idem numero effectus possint produci diuissim à duabus causis totalibus</i>	164
V. <i>De proprietatibus causa in communi,</i>	167
<i>Cap. II. De causis Materiali & Formali.</i>	177
<i>Quæst. I. Quid sit causa Materialis, & an influat in compositum naturale.</i>	ibid.
II. <i>Quid sit causa Formalis, & an influat in effectum.</i>	179
III. <i>Quis sit causalitas materia & forme.</i>	181
IV. <i>An locus possit supplere causalitatem causa materialis & formalis.</i>	184
<i>Cap. III. De causa efficiente.</i>	186
<i>Quæst. I. Quid & quoduplex sit causa efficiens.</i>	ibid.
II. <i>In quo consistat causalitas causa efficientis & quodnam sit principium agendi in efficiente.</i>	189
III. <i>De</i>	

I N D E X

III. De causa prima efficiente ut est creans.	191
IV. De causa prima efficiente ut est conservans.	200
V. De causa prima efficiente ut est ad omnes actiones creaturarum concurrans.	204
VI. De causa secunda ut principalis est.	215
VII. De causa secunda ut instrumentalis est.	226
VIII. De causa secunda ut est exemplaris.	230
Cap. IV. De causa Finali.	241
Quæst. vnica : Quanam dicenda sint de causa finali.	234
Sectio. III. De causis per accidens rerum naturalium.	245
Quæst. I. Quid sint Casus & Fortuna.	ibid.
II. Quid dicendum sit de Fato.	249
III. Quid dicendum sit de Monstris.	250

DISPUTATIO III.

De Proprietatibus rerum Naturalium.

254

Hæc diuiditur in sex Capita, quorum primum agit de Quantitate; secundum de Infinito; tertium de loco; quartum de Vacuo; quintum de tempore; & sextum de Motu.

Cap. I. De quantitate.

ibid.

Quæst. I. An quantitas realiter distinguatur à substantia.

255

II. An in continuo sint Indivisibilia realia positiua.

260

III. An continuum componatur ex Indivisibilibus.

263

IV. Vtrum continuum sit in infinitum diuisibile.

265

Cap. II. De Infinito.

260

Quæst. I. Quid & quotuplex sit infinitum.

171

II. An detur in rerum natura Infinitum actu.

273

III. An dari possit in creatis Infinitum actu in essentia.

275

IV. Vtrum possit dari Infinitum in magnitudine.

277

V. An possit dari Infinitum actu in multitudine.

279

VI. An possit dari Infinitum actu in qualitate.

283

I N D E X.

Cap.III.De Loco.	287
Quæst.I. Quid sit Locus.	ibid.
II. Quotuplex sit Locus.	290
III. Vtrum idem corpus possit esse simul in pluribus locis.	293
IV. Vtrum duo corpora possint esse in eodem loco.	302
Cap.IV.De Vacuo.	306
Quæst.I. An detur vel dari possit Vacuum, & qua virtute.	ibid.
II. Dato quod Deus efficeret Vacuum, possetne motus localis fieri in illo, & qualis.	314
Cap.V.De Tempore.	318
Quæst. I. Quid & quotuplex sit Duratio in communi.	ibidem.
II. Quid sit Aternitas.	320
III. Quid sit Annum.	322
IV. Quid sit dicendum de Tempore.	324
Cap.VI.De Motu.	334
Seçt.I. De natura Motus in genere.	335
Quæst.I. An detur Motus, & quid sit.	ibid.
II. Quotuplex sit Motus.	339
III. An successio sit essentia Motus.	342
IV. Ad qua Predicamenta detur Motus.	336
V. A quo desumatur unitas Motus.	347
VI. Quomodo distinguatur Motus à momento, mobili & termino ad quem.	351
VII. Quomodo distinguantur & opponantur termini Motus.	353
VIII. An quod mouetur, ab alio moueatur.	358
IX. An graua & lenia moueantur à seipsis.	361
X. An necessaria coniunctio requiratur momentis & mobili, vt efficiatur Motus.	362
A quo moueantur proiecta.	372
Seçt.II. De speciebus Motus in particulari.	376
Quæst.I. Quid dicendum sit de Generatione, & Corruptione.	377
II. Quid dicendum sit de Augmentatione & Diminutione.	388
III. Quid dicendum sit de alteratione.	397
IV. Quid dicendum sit de motu locali.	406
V. Quid dicendum sit de actione, qua est communis ad præcedentes quinque Motus.	410



IN VNIVERSAM
 ARISTOTELIS
 PHYSICAM,
 PRÆFATIVNCVLA.



EXPLICATIS in præcedenti codice arduis
 & spinosis difficultatibus , quæ primas
 philosophia partes concernunt , Logicam
 videlicet & Metaphysicam , iucundioris
 materia examen suscipimus in præsentī ,
 quæ haud dubiè scholarium mentes ex ru-
 deribus ante dictis fatigatas recreabit , ap-
 plicando animum ad rerum naturalium contemplationem , de
 quibus agitur in physica , & ad cognitionem actuum humano-
 rum , quos explicandos aggreditur philpsophia moralis . Quan-
 tum ad physicam , sub felicioribus auspicijs haberi non potest ,
 quàm Aristotelis omnium physicorum antesignani , qui se-
 quendo methodum compositionis & non resolutionis procedit à
 simplicioribus ad composita , & à partibus ad totum , seu à
 principijs ad compositum . Hanc , inquam methodum Phi-
 losophi sequemur in decursu Physicæ , quæ cum habeat
 corpus naturale pro obiecto , agere primò debet de prin-
 cipijs & causis communibus corporis naturalis , & de
 ipsiusmet affectionibus , quæ sunt Motus , Quies , Tem-
 pus , Locus , & similia , de quibus extabunt octo libri
 Physicorum . Agemus secundò de quinque corporibus
 simplicibus , nimirum de cælo & quatuor elementis .
 Tertiò de certis quibusdam corporibus mixtis , sed
 imperfectis , quæ vocantur meteora , vti sunt Gelu ,

Nix, Glacies, Pluuia, Ventus, Cometa, Fulgur, & Tonitru.
 Quartò denique loquemur de anima & de eiusdem specie-
 bus, nimirum vegetante, sentiente, & rationali; & sic
 vniuersa, Deo dante, absoluetur physica.

BREVE ET ACCRA TVM

P H Y S I C Æ

P R Æ L V D I V M.



Vi cum ordine aliquam scientiam pertra-
 ctare cupiunt, quædam de ea in genere
 prælineare solent, quod vocant *proæmium*,
 vbi agitur communiter de scientiæ pertra-
 ctandæ Existentiâ, Vtilitate, Definizione,
 & Obiecto ipsius. Ne ergo à solito disce-
 dere videamur, cum breuitate

Dicam *primò Physica nomen idem importare ac scien-
 tiam naturalem*, quandoquidem *φύσις* græcè, naturam
 significat latinè: & sic physica seu physiologia idem est
 ac sermo seu scientia de natura, cum physica contem-
 pletur corpus naturale, eius principia, causas & pro-
 prietates, vt diximus, & ampliùs videbitur postea.

Dicam *secundò existentiam physica notiozem esse*,
 quàm in ea demonstranda diutiùs immoremur, multa
 enim cognoscuntur de natura & rebus naturalibus, puta
 de cælis, plantis, arboribus, & elementis, quæ ad
 physicam cognitionem seu scientiam pertinent. Aristo-
 teles in aperiendis physicæ secretis, cæteros philoso-
 phos longè superauit, præ cæteris autem physicæ tra-
 ctatibus instituit octo libros physicorum, qui inscri-
 buntur libri de Naturali Auditu seu de Auscultatione;
 qui sic denominati sunt, quòd maximam attentionem
 desiderent; ita quòd per libros de naturali Auscultat-
 ione intelligantur ij, qui sunt de rebus naturalibus exi-
 gentibus auditores valdè attentos, & hoc, quia tales li-
 bri difficultates non minimas continent.

Dicam *tertiò inuentorem primarium physica fuisse
 Deum*, vt testatur Scotus lib. 1. de rerum omnium prin-
 cipio, vbi docet Deum esse omnis scientiæ fontem prima-
 rium

rium, uti diximus de logica. Quoad secundarium physicę authorem, præsumitur esse Thales Milesius, vnus ex septem Græcię sapientibus, uti notat Aug. 8. de Ciuit. 2. Physicam valdè locupletauit Pythagoras, sed accuratiori & faciliori ordine eam disposuit Aristoteles. Si quæratur autem, per qualem actum intellectus inuenta fuerit physica; colligi potest ex Aristotele 1. Metaph. cap. 2. eam fuisse inuentam per actum rectum; physica enim speculatur sensibilia, quę attinguntur directè à sensibus nostris vndè de facili colligi potest, quod physica ortum suum duxerit ab actu recto intellectus.

Dicam quartò, *negari non posse, quin Physica sit maxime perutilis*; quoniam cognitione rerum naturalium intellectus noster perficitur, & inde eleuatur ad cognitionem Dei, iuxta dictum D. Pauli ad Rom. 1. *inuisibilia Dei per ea quę facta sunt intellecta conspiciuntur*: Vnde D. Aug. 8. de Ciuit. 6. perbellè ait, *ex mobilibus ad vnum immobile, ex mutabilibus ad Deum, immutabilem, ex corporeis ad supremum incorporeum & ex visibilibus creatis, ad inuisibilem creatorem cognoscendum peruenimus*. Quòd si nos arcere videatur Paulus à philosophię studio 2. Coloss. dicens *ne quis vos decipiat per philosophiam*, quod ipsius inutilitatem ostendit: respondendum est Paulum non intelligi de omni philosophia; sed de inani & sophisticà; vndè addit & *inanem fallaciam*. Deinde, licet prohiberi possit abusus philosophiæ; hoc tamen non impedit, quin philosophia in se benè ordinata multum profuit ad acquisitionem felicitatis æternę, iuxta dictum Aug. 1. de Trinit. cap. 2. dicentis, *verbis & rebus corporeis utitur sacra pagina, ut quasi gradatim ad diuina & sublimia intellectus noster ascendat*.

Dicam quintò pro ordine quem tenet physica inter scientias, quòd si spectetur *ordo nature* qui desumitur ab obiecto, quòd Metaphysica sit omnium scientiarum prima: quia obiectum eius, quod est *ens in communi*, præcedit omnia entia particularia, quę sunt obiecta aliarum scientiarum. Post Metaphysicam sequitur physica, quę occupatur circa *substantiam corpoream*. Post Physicam succedit Moralis, quę *actus humana voluntatis* dirigit. Post Moralem venit Mathematica, quę perlustrat *quantitatem*, quam substantia præcedit. Vltimum denique locum tenet Dialectica, quę cum habeatur *per actum reflexum intellectus*, supponit alias

scientias quæ per actum directum habentur. Si tamen spectetur *ordo naturæ*, primò logica tradenda est, vt potè necessaria ad alias scientias. Mathematica postea doceri debet ante Physicam, vt inquit Aristoteles 6. *Ethic. c. 8.* quia *accidentia sunt notiora substantijs*. Physica succedit mathematicæ, & addisci debet ante Moralem; quia *actus intellectus præcedunt actiones voluntatis*. Metaphysica demum omnibus scientijs debet postponi *ordine doctrinæ* quia occupatur circa ea quæ longissimè distant à sensu, suntque *transcendentia*, & maximè vniuersalia.

Dicam sextò, *ordine dignitatis*, scientias speculatiuas præcedere practicas, vt inquit Aristoteles 1. *Metaph. cap. 2.* & Scotus ibidem, & *quest. 4. Prolog.* Quia scilicet speculatiua est gratia sui, & se ipsa experitur, practica verò est gratia operis, & vsus; sed nobilius est esse per se, quàm ad aliud ordinari; cum istud dicat dependentiam, illud verò non: ergo scientiæ speculatiuæ ordine dignitatis, & nobilitatis præcedunt practicas. Inter scientias speculatiuas maiorem dignitatem indult Metaphysica, quæ speculatiuas nobilissimum obiectum, nempe *ens in communi*, sub quo comprehenduntur Deus, & substantiæ spirituales. Metaphysicæ ordine dignitatis succedit Physica ex Aristotele, & Scoto 6. *Met. cap. 1.* vbi dicunt quòd, si nulla foret substantia spiritualis, quæ spectat ad metaphysicam, naturalis philosophia inter scientias inueniretur prima. Mathematica denique vltimum locum tenet inter speculatiuas cum Mathematica agat simpliciter de corpore *quanto*, *trina dimensione constante*, quod est animæ expers; vbi Physica agit de corpore *animato*: & sic maiori pollet dignitate quàm mathematica.

Dicam septimò *physicam esse verè*, & propriè scientiam ex Aristotele 3. *physic. cap. 4.* & aliis locis, vbi scientiam speculatiuam diuidit in physicam, mathematicam, & metaphysicam, Sic etiam Scotus *quest. 3. Vniuers. & in 3. dist. 2. quest. vn.* Ratio huius rei est quòd in Physica reperiantur demonstrationes euidentiores, ver. gr. *corpus naturale moueri*, quia habet naturam, quæ est principium motus. *Corpus esse diuisibile*, quia est continuum. *Animam esse formam corporis*, quia est principium effectuum operationum illius; nempe diuisionis, nutritionis, & aliarum actionum. Quòd si corpus naturale dicatur *corruptibile*, & de ente corruptili non possit dari scientia, quæ est cognitio certa

certa rei necessariæ: hoc verum est de quolibet corpore naturali singulariter sumpto, quod reuera est corruptibile secundum existentiam; corpus tamen naturale in communi, & secundum essentiam, seu connexionem prædicati cum subiecto est summè necessarium.

Dicam octavo *Physicam esse scientiam speculativam*, ex Aristotele 6. *Met. cap. 1.* & Scoto *ibidem* & in 3. *dist. 34.* Ob hoc omnes philosophi approbant diuisionem scientiæ speculatiuæ in *Physicam*, *Mathematicam*, & *Metaphysicam*. Ratio communis est, quèd illa scientia reputari debeat *speculatiua*, *quæ manet in contemplatione sui obiecti in qua quiescit*: sed *Physica* solummodo contemplatur corpus naturale, & eius proprietates: ergo non debet negari, quin sit *speculatiua*. Quod si *physicus* aliquando operetur, vt faciunt *chymici*; hoc est per accidens, & sola speculatio rerum naturalium est finis proximus *physicæ*. Quod si etiam *physicus* ex cognitione naturalium ducatur ad amorem creatoris, quod est praxim dirigere; hoc adhuc intelligi debet per accidens fieri. Si denique *medicina*, quam dicunt aliqui *subalternari Physicæ*, sit *practica*; quia tendit circa curationem ægrotantium: Responderi debet *medicinam* propriè non *subalternari physicæ*; quandoquidem obiecta formalia harum scientiarum sunt diuersa, cum *physica* occupetur circa corpus naturale sub ratione *naturalitatis*, quæ est *quid speculabile*; vbi *medicina* respicit corpus naturale sub ratione *sanabilitatis*, quæ est ratio *practicabilis à naturalitate distincta*.

Dicam nono, *Physicam non esse vnā simplicem qualitatem*, quæ tota gignatur in prima demonstratione *physica* quoad intensionem, & postea extendatur ad alias conclusiones; vt voluerunt Thomistæ, quia ex hoc sequeretur, quòd cognoscens vnā demonstrationem *physicam*, totam haberet *physicam* intensiue, quod videtur absurdum. *Physica* etiam non est *vnā scientia per aggregationem*, cum sit vnā qualitas reposita in prædicamento qualitatis; sed entia per accidens, qualis protunc foret *physica*, non reponuntur in prædicamento, vt dictum est in *logica*: ergo *physica* non est vnā per aggregationem. *Physica* vlteriùs non est tantum vnā unitate ordinis, qualiter domus dicitur vnā, & naui vnā vocatur. Quia ea quæ sunt vnū unitate ordinis, sunt diuersi generis, & diuersæ speciei, vt patet in domo & in naui; sed *Physica* est de genere qualitatis, cum sit
scien.

scientia, & de specie habitus; ergo physica non est vna unitate ordinis. Vna verò debet dici unitate generis remoti, quæ desumitur ab obiecto; scientia enim desumit suam unitatem extrinsecam ab unitate obiecti: sed corpus naturale, circa quod versatur Physica, est vnum unitate generis remoti, quandoquidem corpus naturale in se consideratum habet sub se plura corpora naturalia, quæ genere differunt, puta corpus simplex, & corpus mixtum: ergo physica est vna unitate generis remoti.

Dicam decimò, physicam nec subalternari Metaphysicæ, nec sibi subalternare propriè medicinam. Primæ pars assertionis est contra Suarez disp. 1. Metaph. sect. 5. num. 48. & nonnullos, qui existimant omnes reliquas scientias metaphysicæ subalternari. Ratio Scoti in contrarium quest. 3. prol. sumitur ex hoc, quòd illa scientia non subalternatur alteri, si habeat distinctum obiectum essenziale ab illa; sed obiectum formale physicæ, quod est corpus sub ratione formali naturalitatis, diuersum est ab obiecto formali metaphysicæ, quod est ens sub ratione communi entis: ergo physica non subalternatur metaphysicæ. Deinde physica gaudet principijs proprijs quæ sunt per se euidencia, v. gr. quòd *detur motus*, quòd *compositum ex elementis sit corruptibile*, & similia: proinde physica non subalternatur metaphysicæ. Quòd si Aristoteles 4. met. cap. 3. asseueret metaphysicam præstare principia ceteris scientijs, & illa corroborare; non proinde illæ scientiæ subalternantur propriè metaphysicæ, sed tantùm impropiè, ob rationem antè allatam, quòd scilicet obiecta scientiarum inferiorum distinguantur formaliter & essentialiter ab obiecto metaphysicæ.

Secunda pars est adhuc Scoti q. 4. Prol. vbi ait medicinam totam esse practicam, & lib. 6. Met. quest. 1. docet physicam esse speculatiuam; sed scientia practica, & effectiua non subalternatur propriè scientiæ speculatiuæ; quandoquidem subalternans, & subalternata sunt eiusdem rationis: ergo physica non sibi subalternat propriè medicinam. Adli potest ratio communis superius allegata, quòd scilicet illæ scientiæ non sibi subalterneantur, quæ habent obiecta formaliter diuersa; sed obiecta physicæ, & medicinæ sunt formaliter diuersa; quandoquidem physica contemplatur essentiam, causas, passiones, & species corporis naturalis, absque illo ordine ad effectiorem, vbi medicina fertur ad corpus

pus naturale *ut sanabile*, tenditq; ad effectiōem talis *sanabilitatis inducendæ in corpore*: & sic medicina propriè non subalternatur physicæ. Quòd si Aristoteles *l. de sensu & sensibili* dicat physicam cognoscere prima principia sanitatis, & infirmitatis tradatque hoc axioma, *vbi incipit medicina, æfinit physica*; ex hoc tantum colligi debet quòd medicina subalternetur impropriè physicæ, non verò propriè: quia licèt physica aperiat primas causas sanitatis, & ægritudinis, de illis tamen non agit, quatenus sunt sanitatis, & infirmitatis capaces; sed quatenus sunt res naturales. Quantum ergo ad dictum Aristotelis, intelligi debet de medicina *latè sumpta*, quæ circa vniuersalia, & cognoscibilia versatur, & protunc coincidit cum physica: si verò sumatur propriè, & strictè, pro ea quæ laborat circa singularia, circa exercitium, & experientiam, protunc medicina, quæ est practica, & potius ars quàm scientia, non subalternatur physicæ.

Dicam *undecimò quæstionem de obiecto Physices debere prolixius extendi cæteris*, ob diuersitatem opiūionum, quas varij authores habuerunt circa hanc materiam. D. Thomas *1. physic.* asserit in *proæm'io*, & *1. met.* ens mobile esse obiectum totale physices. *Lib. autem 1. de cælo lect. 1.* affirmat corpus mobile esse obiectum illius adæquatum; vndè Thomistarum aliqui stant pro prima opinione, alij pro secunda. Galenus *1. de elementis simplicibus* existimat corpus generabile, & corruptibile esse physicæ obiectum; quod idem à parte rei sentiunt qui dicunt substantiam sensibilem esse obiectum physiologiæ. Scotistarum aliqui pro obiecto adæquato philosophiæ naturalis in tota sua latitudine consideratæ agnoscunt ens finitum naturale, ut Tartaretus *1. phys. quæst. vn.* Alii hoc reducunt ad substantiam finitam naturalem, vt Trombeta *6. met. quæst. 1.* Scotus verò *6. met. quæst. 1.* obnixè sustinet, corpus naturale vt naturale est, esse obiectum formale, & adæquatum totius physicæ. *Naturale* autem non sumitur hic prout opponitur supernaturali, aut violento, aut voluntario, sed prout distinguitur ab artificiali: vnde *naturale* dicitur id quod continet in se principium motus, & quietis; vbi *artefactum* est id quod non mouetur nisi per principium extrinsecum.

Dicam *duodecimò, nec ens mobile, nec corpus mobile esse obiectum proximum, & adæquatum physica*. Primum est Scoti *6. met. quæst. 1.* Quia subiectum proximum & adæ-

& adæquatum alicuius scientiæ debet constitui per *genus proximum* & per *differentiam proximam*, aliàs definitio eius esset vitiosa, ut diximus agendo in logica de definitione; sed mobilitas non est differentia proxima entis, quandoquidem priùs competit corpori quàm enti: ergo ens mobile non est subiectum formale & adæquatum physici. Adde quòd, si mobilitas esset differentia aut proprietas intrinseca entis, sequeretur quòd omne ens foret mobile; hoc tamen est falsum, quandoquidem *Deus* est ens, attamen est immobilis. Secundum colligitur ex eodem Doctore nostro loco præcitato, quia res aptius exprimitur [per suam] differentiam quam per proprietatem; sed mobilitas est tantùm proprietas corporis, ubi *naturalitas est ipsius differentia* per quam distinguitur ab *artificiato*: ergo corpus mobile non est obiectum physici. Adde quòd ens per accidens non est obiectum alicuius scientiæ; sed corpus mobile est ens per accidens, conflatum ex corpore, quod est substantia, & ex mobilitate, quæ est accidens ipsi proprium; & sic non potest esse obiectum physici. Quòd si dicat Aristoteles 6. *met.* 1. philosophiam naturalem occupari circa ens mobile; ens mobile confunditur cum ente naturali & corpus mobile cum corpore naturali; Aristoteles enim sæpiùs per *ens mobile* intelligit illud quod est compositum ex materia & forma: Si idem Aristoteles ibidem dicat mobilitatem distinguere obiectum physici ab obiectis aliarum scientiarum; proindèque ipsum constituere physici obiectum, quandoquidem idem est principium constitutivum ac distinctivum: responderi debet, per *mobilitatem* distinguatur obiectum physici secundariò ab alijs, sicuti homo per *risibilitatem* distinguitur secundariò à bruto; primariò tamen obiectum physici ab obiectis aliarum scientiarum distinguitur per *naturalitatem*.

Dicam tertiodecimò, quòd corpus generabile & corruptibile non sit physici obiectum, nec proinde substantia sensibilis, quandoquidem omnis sensibilis substantia est quid obnoxium ortui & interitui. Quòd corpus generabile & corruptibile non sit obiectum adæquatum physici, ex eo patet, quòd cælum pertineat ad physicam; sed cælum est substantia perpetua & incorruptibilis: ergo obiectum adæquatum physici non est corpus generabile & corruptibile. Quòd etiam substantia sensibilis non sit physici obiectum adæquatum desumi

potest ex eo, quòd multoties dixerimus *scientiæ obiectum debere esse quid per se unum*; sed substantia sensibilis non est quid unum per se, cum sensibilitas sit accidens, & ex accidente cum subiecto fiat unum per accidens; ergo etiam substantia sensibilis est formale & adæquatum obiectum physicæ.

Dicam *quarto decimò*, *ens finitum & limitatum, aut substantiam finitam naturalem non esse obiectum physicæ*: Ratio *primi* est, quòd ad metaphysicam pertineat inspectio *entis finiti*, ut patet ex Aristotele, qui 5. *met. text. 14.* diuidit ens finitum in decem categorias: ergo ens finitum non potest esse obiectum adæquatum physicæ, cum unum & idem non possit esse obiectum duarum scientiarum. Ratio *secundi* est, quòd si substantia finita naturalis esset obiectum physicæ, omnia entia quæ habent substantiam naturalem considerarentur à physica; sed physica non agit de Angelis, qui sunt substantiæ naturales: ergo substantia finita naturalis non est adæquatum physicæ obiectum.

Dicam *quinto decimò*, *ens naturale ut naturale est esse obiectum adæquatum physicæ*. Sic Scotus 6. *met. quest. 1.* & hoc conformiter ad Aristotelem, qui 6. *met. cap. 1.* ait scientiam naturalem speculari substantiam corpoream, in qua est principium motus & quietis: se 1 id quod habet principium motus & quietis est corpus naturale: ergo mens philosophi est quod obiectum adæquatum & formale physicæ sit *naturale ut naturale est*. Confirmari potest assertio ex hoc quòd tres conditiones requirantur ad obiectum formale alicuius scientiæ, nimirum *quòd de eo præsupponatur quòd sit*, *quòd habeat passiones de eo demonstrabiles*, & *quòd ad illud reducantur omnia quæ in scientia transeuntur*; sed hæc tria competunt corpori naturali: ergo corpus naturale ut naturale est, seu ut est subiectum motus & quietis, est obiectum formale & adæquatum physicæ. Ita quòd corpus naturale sit obiectum materiale illius, quatenus illi est commune sicuti ad medicinam, ut *naturale* Verò est obiectum formale physicæ, quia per talem formalitatem distinguitur ab obiecto medicinæ, quod consideratur ab ea sub ratione *sana-bilitatis*.

Quòd corpus naturale habeat primam conditionem obiecti, ex hoc patet, quòd Aristoteles 2. *Phys. cap. 1.* tradat quidem definitionem corporis naturalis, cuius

cuius existentiam præsupponit, cum nunquam quæ-
ratur *quid sit res*, nisi præsupponatur *an sit*. Quod
etiam corpus naturale habeat sec idam conditionem
obiecti nempe *proprietas*, hoc est euidens; quia mo-
bilitas, quantitas, locabilitas, finitas, & similes sunt
proprietas corporis naturalis, quæ de ipso demon-
strantur in physica. Quod denique *ad corpus natura-
le reducantur omnia quæ habentur in physica*, quod est
tertia conditio obiecti, patet: nam quæ tractantur in
initio physicæ sunt principia generalia corporis natu-
ralis, ut materia, forma, efficiens, & natura: quæ
postea tractantur sunt ipsius *proprietas*, nempe quan-
titas, motus, locus, & tempus. Quæ demum tractan-
tur in reliquis physicæ partibus sunt partes *subiectivæ*
seu *species corporis naturalis*, ut cælum, elementa,
meteora, & animæ, quæ sunt formæ corporum natu-
ralium viventium: & sic ex tribus conditionibus ob-
iecti quæ quadrant corpori naturali sufficienter euin-
citur, quod illud sit *obiectum formale, totale, & ad-
æquatum philosophiæ naturalis*.

Obijcies multa haberi in physica quæ non perti-
nent ad corpus naturale, ut sunt casus, fortuna, Deus
intelligentiæ, & vacuum: ergo dici nequit, quod
corpus naturale sit obiectum adæquatum physicæ cum
de pluribus agatur in illa quæ non respiciunt corpus
naturale: *Respondeo* de prædictis non agi in physica,
nisi per accidens: & sic talia reducuntur etiam per
accidens ad corpus naturale. Si enim physica agit de
fortuna & casu, hoc ideo fit, quia sunt causæ per ac-
cidens, quæ opponuntur causis per se; & causæ res-
piciunt corpus naturale tanquam suum causatum. Si
pariter physica agat de *vacuo*, hoc est, quia *vacuum*
consideratur tanquam aliquid pertinens ad locum, qui
caret corpore recipiente. Si denique agat de *Deo &
Angelis*, hoc est adhuc per accidens, quatenus scilicet
sunt causæ efficientes motus; Deus enim mouet
omnia & Angeli mouent cælos. Si dicatur ulterius,
quod aliæ scientiæ naturales agant de entibus natu-
ralibus, & proinde naturalitatem non esse rationem
formalem obiecti physicæ; quandoquidem talis for-
malitas naturalitatis est communis scientiis omnibus.
Respondendum est, quod aliæ scientiæ naturales reue-
rà agant de rebus naturalibus, sed eas non conside-
rant præcisè ut naturales sunt, seu ut sunt subiectum

motus & quietis : imò hoc præcisè spectat ad physicam, quæ ideo dicitur habere pro obiecto *ens naturale* quod naturale est.

PHILOSOPHIÆ NATVRALIS VNIVERSA DISPOSITIO.

Aristoteles, quem in philosophicis sequi meditamur, rerum naturalium explicationem suscipiens pro diuersitate temporum diuersas explicabat materias discipulis; *populares* nimirum tradebat tempore primæ meridiano, cuiusmodi erant historię animalium; & *auscultatorias* dictabat matutinis horis, & quæ sic nominabantur, vt prædiximus, quia cum magna attentione debeant audiri : & de istis vltimis componuntur octo libri physicorum, qui inscribuntur *de physico auditu*. In illis agitur de principijs corporis naturalis, de natura & arte, de causis, de quantitate; de loco, de continuo, de tempore, & de motu; licet alio ordine ab aliquibus disponantur hæ materię; sed quidquid sit, nil ad nos, quandoquidem physicam nostram per libros distribuere non intendimus, sed per tres partes, vt diuisas fecimus Logicam & Metaphysicam. Quia enim corpus naturale constituitur adæquatum physice obiectum ab illo iure possumus diuidere nostram physicam, in tres nimirum partes, subdiuidendas in disputationes & capita. Harum prima erit *de corpore naturali in communi spectato*. Secundaaget *de corpore naturali inanimato*, & tertia *de corpore naturali animato*.

PRIMA PARS P H Y S I C Æ

De Corpore Naturali generatim sumpto.



T cum ordine debito procedamus in explicanda prima parte nostræ Physices quæ est de *Corpore Naturali in se spectato*, congruum erit illam subdiuidere in tres Disputationes. In *prima* agetur de Principijs rerum naturalium. In *secunda* de ipsarum natura & causis. In *tertia* de Proprietatibus, quæ corpori naturali conueniunt.

DISPUTATIO PRIMA;

De Principijs Rerum Naturalium.



Via loqui intendimus de corpore naturali per methodum *Compositionis*, procedentes à partibus ad totum, ideo antequam agamus de corpore naturali *animato vel inanimato*, initium debemus sumere à principijs illius; quod fit in hac Disputatione, quæ vterius distribuetur in tres Sectiones; quarum prima erit de *Principijs Corporis Naturalis in genere*; secunda de *Principijs rerum Naturalium in specie*, & tertia de *toto composito ex talibus principijs resultante*.

SECTIO PRIMA.

De Principijs Rerum Naturalium in genere.

P *Principium* multipliciter sumitur. *Primò*, pro initio cuiuscumque actionis; sic in motu dantur principium

pium, medium, & finis. *Secundò*, sumitur pro eo à quo res incipit, non tanquam à sui parte, sed tanquam ab eo à quo incipit prima pars, sic punctum est principium lineæ, licet non sit pars illius. *Tertiò* sumitur pro eo quod est causa alicuius cum dependentia; sic Deus est principium creaturarum quæ ab illo dependent. *Quartò* sumitur pro eo quod dat esse alteri, siue dependenter, siue independenter; & sic in divinis pater est principium filij, licet filius non debeat dici ab eo dependere. *Quintò* principium sumitur pro eo omni vnde aliquid aut est, aut fit, aut cognoscitur; quæ verba indicant tria principia communia, quæ sunt, vel compositionis, vel generationis, vel cognitionis. Innotescunt, inquam, principia Compositionis quæ sunt materia & forma per hæc verba ex quibus res sunt. Innotescunt principia Generationis, quæ sunt privatio, materia, & forma, per sequentia ex quibus res fiunt. Innotescunt denique principia Cognitionis, nempe præmissæ respectu conclusionum per ultimam particulam ex quibus res cognoscuntur. Non sumus loquuturi hîc de Principijs Compositionis præcisè, nec de Principijs Cognitionis, benè autem de Principijs generationis, de quibus generatim sumptis instituitur hæc sectio explicanda immediatè per quæstiones.

QVÆSTIO PRIMA:

Quid sint Principia Rerum Naturalium.

EXistentiam principiorum in rebus naturalibus nemo est qui negare possit; quoniam enim excepto Deo, omnia entia producantur, & quidquid producit ex aliquo principio producit, proinde admittenda sunt prima principia rerum naturalium. Principium autem alicuius rei potest esse vel intrinsecum, vel extrinsecum; intrinsecum erit, si intra rem principiatam existat, & sic lapides ex quibus domus construitur sunt principia interna illius, sicut & literæ respectu syllabarum quas componunt. Principium verò erit extrinsecum, si sit extra rem quam principiat: Vt patet de architecto, qui est principium extrinsecum domus constructæ.

CONCLUSIO.

Pincipia sunt quæ nec ex alijs, nec ex se mutuo, sed ex ijs omnia fiunt. Sic Aristoteles 1. Phys. cap. 1. text. 42. Sic etiam Scotus 9. Metaph. quest. 14. Sic denique omnes Philosophi. Hæc definitio est quidem legitima, quia manifestè declarat definitum, non constat tamen proprio genere, nec propria differentia, quandoquidem genus definitionis præcedit aliquo modo definitum, & nihil præcedere potest prima principia, quæ aliàs non essent prima.

Dicitur primò quòd *principia non fiant ex alijs*; aliàs non essent prima principia; sed potiùs principiata. Dicitur secundò quòd *non fiant ex seipsis*; quia prima principia sunt quidem primordia omnis effectiõnis, ipsa tamen non fiunt; in quo prima principia distinguuntur ab elementis, quæ ex seipsis fiunt mutuà transmutatione: cum ex terra aqua fiat, ex aqua aer, & ex aere ignis. Dicitur tertio, quòd *ex ipsis omnia fiant*; id est, omnia alia corpora naturalia: & per hanc particulam excluduntur res spirituales & accidentia, quæ licet non fiant ex alijs, nec ex seipsis, non tamen sunt prima principia; quia ex illis nullum corpus naturale efficitur.

Obijciens. Prima principia fiunt *ex alterutris*; quandoquidem forma, quæ est vnum principium rerum naturalium, fit ex materia, quæ est aliud principium. Ad hanc obiectionem respondent plures vnum principium posse quidem effici ex alio, in diuerso genere principij nimirum forma ex materia; non verò in eodem genere, principij, ita quòd forma non possit fieri ex alia forma, nec materia ex alia materia, aut priuatio ex alia priuatione, & hoc modo intelligunt hanc particulam definitionis, quòd *principia non fiant ex seipsis*. Sed quia talis responsio videtur contradicere Aristoteli, qui dicit simpliciter *principia non fieri ex seipsis*; vt patet ex eius definitione præcedenti: proinde meliùs est si respondeatur formam non fieri, nec produci ex materia tanquam ex parte componente; tunc enim forma non esset principium primum, sed quid principiatum; benè autem ipsam formam educi ex potentia materiae, vt dicetur suo loco. Quòd autem forma non fiat, habetur ex Aristotele 7. Metaph. cap. 8. text. 26.

di-

dicente *forma non fit, nec generatur*. Quod vltèriùs confirmatur *lib. 8. cap. 3. text. 8.* Vbi dicit, *declaratum est quod formam nullus faciat, hoc autem fit, quod ex his id est compositum*. Quo sufficienter ostenditur formam esse purè & simpliciter primum principium; nec eam produci ex alio. Sic etiam Scotus 7. Metaph.

Obiicies 2. Materia & forma componuntur ex genere & differentia, ergo non sunt prima principia, sed principiata. *Respondeo* esse prima principia *Physica*, quia ex illis fiunt omnia corpora naturalia, & ipsa non fiunt ex aliis corporibus naturalibus; hoc tamen non impedit, quin sint principiata metaphysica quia reuerà constante genere & differentia. *Dices*. Causa efficiens & finalis sunt principia compositi, sed ex illis non fit compositum: ergo ex principiis non fiunt omnia. Minor patet ex hoc, quòd ex architecto non fiat domus, nec Medicina ex sanitate. *Respondeo* definitionem, allatam competere solis principiis intrinsecis, non verò extrinsecis; causa autem efficiens & finalis sunt principia tantum extrinseca: & sic illis non debet conuenire definitio præcedens, *Dices*. Cælum est corpus naturale, quod non agnoscit priuationem pro principio, quoniam materia eius nunquam fuit priuata sua forma. *Respondeo* quòd licet materia cæli non præcesserit tempore formam illius præcessit tamen natura; & sic, cum fuerit aliquod instans naturæ, in quo materia cæli præcesserit formam, proinde dici debet, quòd priuatio fuerit etiam vnum ex principiis cæli.

Q V Æ S T I O II.

Quid senserint Veteres Philosophi de Principijs.

PRIUSQUAM assignetur mens Aristotelis de numero principiorum, non iniucundum fortè videbitur, si referantur aliqua de mente Philosophorum qui præcesserunt Aristotelem, & quod ipsemet Philosophus adducit & relucit *cap. 2. lib. 1. Phys.* Pythagorici primò rerum omnium principia dicebant esse numeros, quod nullo modo sustineri potest; quandoquidem ea non possunt dici principia, quæ alia supponunt ex quibus resultant: sed numeri supponunt res numerabiles, quandoquidem numerus resultat ex diuisione rerum: ego numeri non possunt esse rerum naturalium principia.

Secundò Parmenides, & Melissus vnicum admitebant principium, quod Parmenides volebat esse *finitum*, Melissus verò contendebat esse *infinitem*: quam opinionem explicans D. Thomas *lib. 10. Phys.* dicebat tales philosophos pro suo vnico principio admisisse substantiam essentialiter vniformem, diuersam tantum in apparentia sensibili, ita quòd, ignis, aqua, & omnia alia corpora essent substantialiter idem, solisque qualitatibus sensibilibus differre; nempe penes calorem, colorem, frigus, leuitatem, raritatem, & similes.

Tertiò Empedocles quatuor existimabat esse principia rerum omnium, nempe *Iouem*, seu ignem, *Iunonem* siue aerem, *Neptunum* seu aquam, & *Plutonem* seu terram. Quod dicere est, *quatuor elementa* esse prima principia omnium entium naturalium; hoc autem sustineri non potest, quandoquidem *principia non componuntur ex alijs*, & elementa constant ex *materia*, & *forma*; vnde, cum ipsamet elementa sint hoc modo principiata, proinde dici nequeunt principia prima absolute sed tantum mixtorum, & compositorum principia.

Quartò Anaxagoras pro principijs *infinitas particulas diuersæ rationis* constituebat, ver. gr. particulas ignis, terræ, carnis, ferri, sanguinis, ligni, & reliquarum omnium rerum, quæ permixtæ essent in re qualibet, & constituerent vnica massam; ex qua massa cum cæteris latitantibus, particule ignis vel terræ prodebant *ad extra*, res fiebat ignis, vel terra, vel aliud simile: vnde volebat omnia esse in omnibus, nullamque admitti generationem substantialem; sed ex rebus delitescentibus fieri apparentes tantum. Volebat, inquam, quodlibet esse in quolibet, puta ignem in ligno, non tamen lignum appellandum esse ignem; quæ denominatio petitur ex prædominanti seu ex magis apparenti: vnde cum ex ligno fiat ignis, de nouo ignis non producit, sed ex delitescenti incipit apparere; proinde in hac opinione nihil propriè fit, quia præexistebat; sed incipit prædominari, & magis apparere.

Quintò, Platonici pro principijs Deum, materiam, & ideas constituebant; volentes Deum esse quasi mundianimam, materiam in minimas particulas distribuere pro compositione corporum, quæ postea de confusis distincta fiebant iuxta ideas. Thales Milesius pro primo omnium principio constituebat aquam, quæ opinio ortum ducebat ab *Ægyptijs*, qui cum pinguedinem, & abnu-

abundantiam suæ terræ viderent procedere ex inundatione Nili, vt gratiam referrent aquis pro beneficio ab illis accepto, ideò proclamabant *aquam esse primum principium*. Hoc idem dicebat Diogeues de aere, & Heraclitus de igne.

Sextò Democritus, Epicurus, & alij quidam, omnia ex atomis fieri asseriebant; per *atomos* intelligentes quædam corpuscula infinita & indiuisibilia eiusdem generis & naturæ, proportionem tamen differentia ex commixtione quorum omnia composita fiebant: sed de hac opinione, quam in hoc sæculo voluerunt resuscitare nouatores aliqui, dicetur expressius in sequenti quæstione. Quantum ad Chymicos, quinque substantias simplices admittunt pro principijs; nempe Sale, Sulphur, Mercurium, Aquam & terram, quia ex mixto quolibet hæc quinque educuntur beneficio ignis: unde inferunt has quinque substantias in omnibus corporibus mixtis reperiri, & proinde esse quinque principia rerum naturalium, Sed de facili hæc opinio rejci potest in hoc, quòd tales substantiæ, quas simplices vocant, resoluantur vterius per actionem ignis, quod indicat eas esse adhuc compositas, & proinde non esse prima principia rerum naturalium.

Q V Æ S T I O III.

An Atomis dici debeant prima Rerum Naturalium principia.

PER *Atomos* Leucippus, Epicurus, & alij cum Democrito intelligebant corpuscula quædam infinita, ex quibus omnia dicebant fieri, prout certo quodam modo congregarentur vel disgregarentur; ita quòd in illorum mente, aqua, ignis, plantæ, arbores, animantia, & cætera genera rerum nihil aliud essent, nisi commixtio quædam talium atomorum. Hanc opinionem à pluribus sæculis sepultam instaurare tentarunt aliqui hisce temporibus, & ideò hanc quæstionem breuiter soluendam volumus proponere, vt aliquorum curiositati satisfiat.

C O N C L V S I O .

Atomis non sunt prima principia rerum naturalium, quidquid pretendat Carthelius. Per prima enim principia Philof. R. P. Boyuin. To. II. Phys. Pars I. B ci

Principia rerum naturalium intelliguntur principia generationis & diuersitatis substantialis ; quia omnia , vel saltem plurima entia naturalia sunt substantialia , & diuersitatem substantialem habent inter se , vt patet de aqua , igne , arbore , leone , & alijs : sed atomi non sunt principia generationis & diuersitatis substantialis : ergo atomi non debent reputari esse principia rerum naturalium.

Probatur minor . Atomi , iuxta Carthesium , semper manent substantialiter in composito , nec per illarum unionem aduenit composito aliquid substantiale : ergo per commixtionem atomorum non fit generatio substantialis . Neque etiam resultat ex illis vlla substantialis diuersitas , quandoquidem tales *atomi* manentes in mixto diuersificantur tantum quoad motum , quietem , situm , & figuram : ergo *atomi* non sunt principia generationis & diuersitatis substantialis ; quandoquidem idem substantialiter homo est quiescens vel ambulans ; & eadem est cera , dum est rotunda vel angularis .

Probatur 2. *Atomi* sunt corpuscula quædam indiuisibilia in mente aduersariorum ; sed non dantur talia corpora indiuisibilia , quoniam omne corpus quantumvis minimum est quantum & diuisibile : ergo non dantur tales Atomi , quæ sint principia rerum naturalium . Si enim tales Atomi sunt indiuisibiles , quomodo possunt constituere composita naturalia , quæ diuisibilia sunt & quomodo etiam possunt habere figuras diuersas , vt contendunt aduersarij , qui volunt illorum corpusculorum alia esse quadrata , alia oblonga , longiora , vel latiora , quæ omnia important extensionem diuisibilem ? Adde quod tales Atomi , seu minima illa corpuscula , debent componi ex quadam materia & forma , quandoquidem sunt quid corporeum : ergo non sunt prima principia .

Probatur 3. per hoc quod talis assertio Atomorum videatur opposita veritatibus Fidei , quandoquidem negat dari accidentia , solosque modos astruit quibus Atomi coniunguntur , vt faciant composita naturalia : si autem reijciantur accidentia , quomodo stabit veritas Eucharistiæ , quæ docet accidentia panis remanere post transubstantiationem illius in corpus Christi ? In eadem sententia Atonistarum nulla datur forma substantialis , quoniam omne compositum nihil est aliud quam atomorum unio , quæ est accidentaria , quod est adhuc contra aliam veritatem Fidei , quæ docet animam rationalem esse formam substantialem corporis humani .

ni. Quod si respondeant Atomistæ hominem solum esse compositum substantiale constans ex corpore coalescente ex atomis, & ex anima rationali, quæ est forma substantialis illius: cur idem non poterit dici de alijs rebus, præsertim de animatis, eas scilicet constare ex materia & forma, & non ex solis Atomis temerario concursu volitantibus per inane spatium, & casu vnitis ad formanda composita. Si denique talis opinionis fautores astruant res corporeas non informari per corporeas qualitates ab ipsis distinctas, quomodo admittent cum Catholicis gratiam sanctificantem & virtutes supernaturales, quæ sunt qualitates ab anima distinctæ, illam informante?

Confirmatur vlteriùs conclusio. Principia rerum naturalium talia debent esse, vt ex ipsis omnia naturalia possint fieri, vt patet ex nomine principij, sed ex Atomis seu ex particulis quantitatis per figuras & motum localem variatis non possunt omnia naturalia fieri, quandoquidem rerum naturalium plures habent vitam, cognitionem, & appetitum sensitivum, vt patet in pecudibus, quæ viuunt, sentiunt, appetunt, discernunt, & percipiunt voluptates & dolos, quæ omnia non possunt esse effectus quantitatis aut localis motus, cum quantitas non sit cognoscitiua aut appetitiua: ergo Atomis non sunt prima principia rerum naturalium.

Hæ & similes rationes, quæ allegari possent in numero non mediocri; sufficienter probant reiiciendam esse opinionem Atomistarum, quæ eadem est cum opinione Epicuri ab omnibus Ecclesiæ Doctoribus explosa, & præsertim ab Aug. qui in *Psal.* 73. Epicurum vocat *delirum philosophum*; & *Epist.* 56. opinionem illius de corpusculis redarguit vt *portentum quoddam*. Si enim aliquis pertinacia hanc sententiam retinere vellet, timerem valde ne *eum Saduceis substantias spirituales negaret*, existimando omnia esse corpora: eò enim dementiæ deueniunt aliàs Epicurus, Democritus & Lucretius, vt Deos ipsos esse corporeos dicerent, ex atomis compositos, mundumque non esse à Deo conditum, nec dispositum per aliquam intelligentiam supremi ordinis: sed omnia fieri temerario concursu atomorum per inane spatium volitantium: vnde talis somniosa opinio à sapientibus Philosophis fuit proscripta, vt inepta & rudis; à Catholicis verò omnibus damnata, vt à fide prorsus discedens & à Christianis veritatibus aliena.

QVÆSTIO IV.

Quot sint verè Principia Rerum Naturalium.

Riectis veterum opinionibus circa principia rerum naturalium, nunc videndum est quid in rei veritate sentiendum sit de illorum numero; sed antea sciendum est principium, causam, & elementum in hoc differre, quòd principium latius pateat causa, & causa elemento; omnis enim causa est principium, & omne elementum est causa, non tamen omne principium est causa, nec omnis causa est elementum. *Principium* dicit simplicem processionem vnius ab alio, siue tanquam à termino, siue tanquam à producente cum dependentia, siue tanquam à producente sine dependentia. *Causa* dicit productionem vnius ab alio cum dependentia, in quocumque genere causæ producatur effectus. *Elementum* denique dicit productionem vnius ab alio per modum partis materialis intrinsecè componentis mixtum. Quia causa dicit *dependentiam* effectus à producente, ideò in creatis pater dicitur causa filij, qui à patre dependet. Quia verò *principium* non dicit *semper dependentiam*: sed aliquando simplicem productionem inuoluit vnius ab alio; ideò in diuinis Pater est quidem principium filij, non verò causa cum à Patre non dependeat filius. Hic non loquimur de numero causarum, aut elementorum de quibus suo loco agetur; sed tantùm de principiorum numero; quærentes, quot sint principia rerum naturalium, tum compositionis seu in facto esse, tum generationis seu in fieri.

CONCLUSIO PRIMA.

Tria sunt principia interna generationis in fieri, quæ sunt Materia, forma & priuatio. Sic Aristoteles 1. *Physic. cap. 6. & 7. & 12. Met. text. 12.* Sic etiam Scotus in 2. *dist. 12. quæst. 1.* Hoc non impedit tamen, quin sint alia principia externa generationis, nempe causa finalis, efficiens, & exemplaris. Principia intrinseca sunt ea, quæ intrinsecè & formaliter exiguntur ad esse vel fieri alicuius compositi; vt materia & forma, quæ requiruntur ad esse compositi cuiuslibet: & priuatio, quæ intrinsecè supponitur ad fieri illius. Principia

extrinseca ea sunt, quæ non requiruntur nisi extrinsecè ad effectiõnem compositi; vt causa efficiens & finalis, quæ ideo dicuntur principia extrinseca, quia sunt extra compositum. Principia intrinseca subdiuiduntur in principia Generationis quæ dicuntur in fieri, & in principia compositionis quæ dicuntur in facto esse. Principia generationis sunt ea, quæ requiruntur ad generationem totius, vnde dicuntur in fieri; & inter ea censetur esse priuatio, vt dicemus. Principia compositionis ea sunt quæ ita requiruntur ad existentiam compositi, vt in illo facto remaneant actus; & hæc sunt materia & forma.

Probatur conclusio. Tot sunt principia interna generationis in fieri, quot sunt ea sine quibus non potest explicari generatio; sed sine tribus principijs præallegatis explicari non potest generatio, nimirum sine materia, forma, & priuatione: ergo sunt tria principia generationis in fieri. *Probatur minor;* generatio naturalis est mutatio seu transitus à non esse tale ad esse tale; sed illa mutatio seu transitus non potest intelligi sine eo quod transit, & est *materia*; sine termino à quo transit, & est *priuatio*; & sine eo ad quod transit, & est *forma*. Exemplificari potest per generationem ignis, qui ex ligno producit; & transit à non esse ignis ad esse ignem. Illud quod transit est *materia*, quæ antea erat sub forma ligni & postea induit formam ignis: terminus à quo transit est *non esse ignis*, seu ignis priuatio; & id ad quod transit materia est *forma ignis*, quam induit de nouo: & sic non potest fieri generatio nec intelligi sine materia, forma, & priuatione, quæ sunt principia generationis seu rerum naturalium *in fieri*.

Obijcies. Priuatio est non ens; sed non ens non potest esse principium entis: ergo priuatio non est principium generationis entium naturalium. *Respondeo* distinguendo minorem; non ens non potest esse principium entis, principium *constitutiuum*, concedo, generatio enim non constituitur priuatione: principium *terminatiuum*, nego: à priuatione enim incipit generatio, tanquam à termino à quo. Hoc est quod alij dicunt ad eandem minorem, non ens non posse esse principium entis per modum partis componentis, bene autem per modum termini à quo procedit generatio. Si dicatur priuationem non principiare generationem, quia priuatio non est pro eo instanti quo aliquid generatur: ex hoc sequitur tantum quod priuatio non prin-

ciplet per modum partis constituentis genitum ; bene autem per modum termini directi , à quo *genitum* procedit .

Obijcies 2. agens seu generans est principium generationis , quia sine generante non potest intelligi generatio : ergo sunt quatuor principia generationis . *Resp.* agens esse quidem principium externum generationis , non verò principium internum ; hic autem loquimur tantum de internis , quæ tria solum diximus esse . Si quis instet *dicens* , generans non minus esse intrinsecum generationi , quàm priuationem : *Respondendum* erit generationem sumi dupliciter , vel ut est actio à generante proficiscens , & tunc non potest intelligi sine generante ; vel ut est transitus ab *esse* ad *non esse* , & tunc potest concipi generatio sine generante , modò concipiantur materia , forma , & priuatio : hic autem sumitur generatio hoc secundo modo ; & sic agens seu generans aut causa efficiens non est principium internum generationis . Si dicatur , quòd priuatio sit etiam principium extrinsecum , quandoquidem principiat tantum per modum termini exclusi . *Resp.* priuationem esse quidem extrinsecam genito , non tamen generationi ; quæ , cum sit *transitus* , intelligi non potest sine termino à quo , qui est priuatio , sine termino ad quem , qui est *forma* , & sine obiecto *transiente* , quod est *materia* .

Obijcies priuationem ex Aristotele esse tantum principium per accidens . *Resp.* esse principium per accidens generationis *in facto esse* , principium verò per se generationis *in fieri* . Si dicat philosophus principia semper manere ; loquitur ad huc de principiis compositionis seu *in facto esse* , non verò de principiis generationis seu *in fieri* . Quòd si dicatur cælum nunquam habuisse priuationem , quæ proinde non est principium omnium . *Resp.* cælum reuerà non habuisse actu priuationem suæ formæ , benè autem habuisse aptitudinaliter ; quia materia prima cæli potuit priuari cælesti forma . Si quis hoc neget , dicendo cælum esse incorruptibile , nec proinde posse priuari formam : hoc verum est quantum ad causam naturalem : potest tamen absolutè corrumpi ab agente supernaturali , nempe à Deo , qui materiam cæli potuit ponere sub alia forma , & illi dare postea formam cæli , respectu cuius habuisset priuationem .

CONCLUSIO SECVNDA.

Duo sunt tantum principia compositionis, seu generationis in facto esse, nempe materia & forma. Si: Aristoteles 1. phys. cap. 7. & Scotus loco præcitato. Ratio est hæc, quod tot sint principia compositionis & rei in facto esse, quot sunt ea quæ remanent in subiecto post factam generationem; sed materia tantum & forma remanent post generationem, priuatio autem desinit in materia statim ac accedit forma: ergo sunt tantum duo principia rerum naturalium in facto esse, quæ dicuntur principia compositionis, quia sunt partes constituentes compositum in quo remanent. Quod autem priuatio non sit principium rei in facto esse, ex hoc patet, quod eo instanti quo materia ligni recipit formam ignis in ligno, cesset ignis priuatio; & sic, cum solum remaneant in composito materia & forma, proinde sunt tantum duo principia compositionis.

Obijcies. *Principium est prius principiatio*; sed forma non est prior generatione, imò per generationem producitur: ergo forma non est principium generationis aut compositionis, *Resp.* generationem non sumi pro productione formæ substantialis, sed pro totius compositi productione; & sic forma est prior composito & generatione compositi. Quod si forma dicatur terminus generationis, & proinde videatur generari: Respondeo, formam dici terminum generationis minus præcipuum, quia prius debet produci quàm compositum; præcipuus tamen terminus generationis est ipsum compositum, quod vocatur terminus *qui*, id est, terminus qui simpliciter producitur; vbi forma vocatur terminus *quo*, quoniam est id, mediante quo, generatur compositum.

Quæres, an nomen principij conueniat vniuocè materiæ, formæ, & priuationi. Non desunt qui affirmatiuè respondeant etiam ex Scotistis. Poncius noster existimat principium esse tribus præmemoratis analogum. Communiter tamen responderi debet quod nomen principij conueniat vniuocè materiæ & formæ, æquiuocè verò priuationi. Ratio *primi* est, quod per principia intelligantur entia realia positiua, quæ realiter influunt in compositum, ipsumq; constituunt; sed materia & forma sunt talia entia constituentia intrin-

secè & realiter quodcumque compositum : ergo nomen principij conuenit vniuocè materiæ & formæ. Ratio secundi ex hoc sumitur, quòd *enti & non enti nihil sit commune vniuocum*; sed materiam & forma sunt entia realia positiua, quæ constituunt compositum intrinsecè; priuatio autem est non ens ex 1. *phys. text. 75.* ergo priuatio non conuenit vniuocè in ratione principij cum materia & forma : vnde Aristoteles ibidem & *tex. 66.* asserit, priuationem esse principium per accidens.

QVÆSTIO V.

An Principia sint Contraria.

Contrarietas duobus modis sumitur, propriè scilicet, & impropriè. *Contrarietas propria est repugnantia, duarum formarum mutuo se se expellentium à subiecto, & hæc solis primis qualitatibus conuenit, siccitati & humiditati, vel frigiditati & caliditati. Contrarietas impropria est oppositio eorum quæ habent rationes oppositas & repugnantes, licet mutuo non se expellent ab eodem subiecto, & hæc reperitur inter duas formas substantiales vltimas, vt inter formam equi & hominis vel inter duas differentias quæ diuidunt idem genus, vel inter rationale & irrationale; vel denique inter formam & priuationem eius.*

CONCLUSIO.

Prinicipia rei genita non sunt contraria; aliqua tamen principia generationis sunt contraria; non quidem propriè, sed latè. Probatur prima pars, quia materia & forma sunt principium rei genitæ; sed materia & forma non habent rationes oppositas, quandoquidem reperiuntur simul, & materia est receptaculum formæ: ergo principia rei genitæ non sunt contraria. Quando ergo dicit Aristoteles, *quòd principia rerum naturalium sint contraria*; hæc propositio est indefinita, non vniuersalis; quandoquidem non intelligitur de omnibus principijs.

Probatur secunda pars, *quod aliqua generationis principia sint contraria*, nempe forma & priuatio, quia illa sibi inuicem contrariantur, quæ in eodem subiecto nequeunt simul esse; sed in eadem materia non possunt esse

esse forma & priuatio formæ, quandoquidem forma simul esset, & non esset, & eadem materia esset simul informata & non informata: ergo aliqua principia generationis sunt contraria, quandoquidem priuatio recedit à materia, eo instanti quo forma accedit. Adde quod terminus à quo, & terminus ad quem mutationis sint contrarij, vt patet in motu locali, in quo terminus à quo & terminus ad quem opponuntur; sed terminus à quo generationis est priuatio, & terminus ad quem, saltem incompletus est forma: ergo aliqua principia sunt contraria generationis.

Tertia pars ex eo colligitur, quòd vera & propria contrarietas reperiatur tantum inter ea quæ se mutuò expellunt à subiecto; sed, licet forma à subiecto expellat priuationem, priuatio tamen non expellit positiuè formam, quia non est ens positiuum: ergo contrarietas quæ reperiatur inter principia generationis non est stricta & propria, sed tantum impropria & lata, quæ idem est ac oppositio & incompatibilitas.

Obijcies contra *tertiam partem*, principia sunt contraria primà contrarietate, vt ait Aristoteles, 1. *Phys. cap. 5. text. 42.* sed prima contrarietas est contrarietas proptia & stricta, quia quod est in aliquo genere primum est regula & mensura aliorum: ergo contrarietas quæ reperiatur inter principia prima est propria & stricta iuxta Philosophum. *Resp.* contrarietatem quæ est inter principia, idèd dici *primam*, quia non repetitur ex alijs qualitatibus quæ sibi opponantur, sed petitur ex natura ipsa principiorum, nempe priuationis formæ, quæ ex natura sua opponitur: cum enim sint omnium entium *prima*, proinde illorum contrarietas est etiam *prima* omnium contrarietatum, licet non sit vera & propria contrarietas, quæ reperiatur tantum inter qualitates.

SECTIO II.

De Principijs Rerum Naturalium in specie.

Explicatis concernentibus naturam principiorum in genere, quæ tria esse diximus, nimirum materiam, formam, & priuationem; ordo doctrinæ postulat, vt in hac Sectione descendamus ad examen horum principiorum in particulari, & hoc per tria Capita, quæ erunt de Materia, de Forma, & de Priuatione.

De Materia.

CVM materia sit primum ex principiis positiuè constituentibus compositum naturale, huius sectionis Caput primum debet esse de materia. Non quidem de materia artificiali, quale est lignum ex qua fit imago; nec de materia Metaphysica, quæ est pars compositi Metaphysici, & quæ idem est ac genus, quod idèd vocatur materia, quia determinatur per differentiam, sicut materia per formam: sed de *materia Physica, & Naturali*, quæ est pars compositi Physici, quale est corpus in homine, quod est materia ipsius hominis, ex qua componitur homo, ipsi adueniente anima rationali, quæ est forma substantialis eiusdem. De tali, inquam, materia nobis agendum est hoc loco, & in Disputatione sequenti agemus de artificiali materia, loquentes de natura, & arte.

QVÆSTIO PRIMÆ.

An detur Materia.

Materia, pro diuersis muneribus quibus fungitur, varias sortitur appellationes, metaphoricæ, & proprias. Quantum ad titulos metaphoricos quibus insignitur materia, hi præsertim reperiuntur apud Authores, à quibus primò vocatur *mater*; quia ex potentia materiz, tanquam ex utero matris, omnes formæ naturales educuntur. 2. Vocatur *fœmina*, quia sicut fœmina cum viro concurrit ad procreandam prolem, sic materia ab agente naturali recipiens formas concurrit ad generationem compositi. 3. Vocatur *turpis*, quia caret perfectionibus formarum, quæ pulchræ, & speciosæ vocantur. 4. Dicitur *hospes*, quia ab ea tanquam ab hospitio recipiuntur formæ. 5. Appellatur *sylua*, quia sicuti in sylua continentur potentialiter formæ artificiales, sic in potentia materiz virtualiter includuntur omnes formæ naturales. 6. Dicitur *chaos*, quia sicuti Poetæ finxerunt omnia fuisse in chao, sic omnes formæ, & priuationes continentur in Materia. Quantum ad nomina propria materiz, habentur in prænotatione quæstionis sequentis.

CON-

CONCLUSIO.

D*ari materiam constat apud omnes Philosophos. Quia* in omni mutatione datur aliquid, quod modò est sub termino à quo, & modò est sub termino ad quem; sed illud est materia, quæ primò est sub priuatione formæ introducendæ, tanquam sub termino à quo, & postea est sub illa forma introducta, tanquam sub termino ad quem: ergo datur materia. *Deinde*, dum ignis producit ignem in ligno, vel producit ignem secundum se totum, id est, secundum materiam, & formam, vel producit ignem tantum secundum aliquam sui partem, nempe secundum formam; sed non producit ignem secundum se totum, aliàs ignis productus crearetur, quoniam creari est ita produci secundum se totum, ut nihil materiæ aut formæ processerit: ergo ignis ille producitur tantum secundum formam substantialem ignis, & materia prima quæ erat sub forma ligni est adhuc sub forma ignis; ergo datur materia prima. *Tandem* datur materia secunda, quæ est affecta certis quibusdam accidentibus seu dispositionibus præuijs ad formam recipiendam; sed talis materia secunda præsupponit materiam primam, quæ sine illis dispositionibus præcessit: ergo *constat dari materiam primam*. Sicut enim ars præexigit materiam ad sua artificia conficienda; sic etiam natura, quæ nihil operatur ex nihilo: præsupponit materiam ad generationem suorum entium naturalium.

Quòd natura ex nihilo nihil possit producere; ita commune est apud Philosophos, ut inter illos commune sit istud axioma ab Aristotele traditum sexcentis in locis, & præsertim 1. *Phys. cap. 23. & 24. 1. de Gener. cap. 11. & 12. & 11. Metaph. cap. 4. ex nihilo nihil fit*: unde quidam, ne cogerentur admittere aliquid fieri ex nihilo, putabant Deum ex sua substantia omnia produxisse. Anaxagoras statuebat æternum chaos, in quo omnia erant confusè immixta; seu, ut ait Philosophus, *quodlibet erat in quolibet*. Democritus, & Epicurus contendebant omnia fieri ex Atomis, & ab æterno res moueri confusè, casuque, & fortuitò generari. Alii denique materiam dicebant esse *improductam, & ingenitam*, ex ipsaque omnia produci. Hæc autem omnia denotant, semper fuisse compertum apud Philosophos, *ex nihilo nihil fieri*, & proinde debet astrui

existentia materiæ primæ, quæ præsupponitur ad omnes formas, & ex qua omnia composita naturalia eruuntur virtute agentium naturalium.

Obijcies. *Non ens non datur*; sed materia est non ens ex Aristotele: ergo non datur materia. *Resp.* ad minorem; materia est non ens, completum & perfectum, concedo; quia non habet formam: est non ens incompletum, nego. *Dices*, quod caret forma nihil est, quia *forma dat esse rei*; sed materia caret forma, unde vocatur *chaos*, *confusa*, & *informis*; ergo materia non existit. *Resp.* distinguendo maiorem: quod caret forma, nihil est; si careat omni formâ, tum Physica, tum Metaphysica, concedo: si careat tantum forma Physica, & habeat formam Metaphysicam, nego. Ad minorem, sed materia caret forma; physica, concedo: Metaphysica, nego: nam materia prima independentem à forma physica habet existentiam, quæ est forma Metaphysica, seu ætus metaphysicus. *Dices*. Materia non reponitur in villo prædicamentorum, quandoquidem *non est quid, nec quantum, nec quale, nec aliquid eorum, quibus ens determinatur* 7. *Metaph. cap. 3.* Ergo materia non existit; aliàs vel esset Deus, vel reponeretur in prædicamentis, in quæ distribuitur ens infinitum. *Resp.* Materiam primam reponi reuerà in prædicamento substantiæ, non quidem *per se*, quia sola entia completa reponuntur in tali prædicamento; sed *reductivè*, ratone compositi quod constituitur tanquam pars essentialis.

QVÆSTIO II.

Quotuplex sit Materia,

Nomina quæ propriè adaptati possunt materiæ sunt sequentia. Primò, vocatur *Massa* apud Aristotelem 1. *Phys. text. 65.* quia ex ea in varias portiones distributa diuersa generantur composita. 2. Dicitur *Origo* ex eodem Aristotele: quia ex materia eradicantur per generationem cuncta naturalia. 3. Vocatur *Elementum* 12. *Metaph. 4.* quia ex materia componuntur omnia naturalia & in eam resoluuntur. 4. Vocatur *subiectum*, quia in materia subiectantur omnes formæ, sicut accidentia recipiuntur in subiecto 1. *Phys. text. 82.* 5. Vocatur *hyle* 1. *Phys. 56.* quia recipit formas, eas appetit, estq; propè nihil. 6. Deniq; vocatur *Materia*, quia ex ea sunt omnia materialia.

CON-

CONCLUSIO.

Materia diuiditur multipliciter . Primò , in materiam in qua , ex qua , & circa quam . Materia *ex qua* ea est , & qua fit aliquid ; vt imago ex marmore : Materia *in qua* est subiectum , ex quo forma educitur ; vt silex respectu ignis , qui eruitur ex eo . Materia *circa quam* est obiectum , circa quòd occupatur habitus , vel potentia : sic corpus naturale est materia circa quam oculi versantur .

Secundò , materia diuiditur in transeuntem & immanentem ; at inquit Doctor in 1. dist. 2. *quest. 2.* Materia *transiens* est ea , ex qua desinente fit aliud ; sic ex aere fit ignis , ex igne fit aqua , & ex aqua fit terra . Materia *immanens* est ea , ex qua remanente fit aliquid ; & sic ferrum est materia immanens gladij . Quòd si res fiat immediatè ex materia , talis dicitur materia *proxima* ; si verò fiat tantum mediatè , dicitur materia *remota* : vt quando dicitur circulum fieri ex ære , quia factus est per instrumentum æreum .

Tertiò materia , vt dictum est in annotatione questionis antecedentis , diuiditur in *Artificialem* , ex qua componitur aliquod artificiatum ; & in *naturalem* , ex qua constituitur compositum naturale . Diuiditur etiam in materiam *Physicam* : quæ est subiectum formarum , de qua nunc agimus : & in materiam *Metaphysicam* , quæ est genus , cuius differentia est forma .

Quartò denique materia *Physica* diuiditur in materiam primam & secundam . Materia *prima* est materia secundum se considerata , prout nullam ex se habet formam ; sed indifferens est & in potentia ad omnes . Materia *secunda* dicitur , quatenus est affecta certis quibusdam accidentibus & dispositionibus præuijs , per quas peculiariter ordinatur ad vnā formam : sic corpus humanum in ventre matris organisatum est *materia secunda* respectu animæ rationalis , quia habet certas dispositiones ad hanc formam recipiendam , & non ad quamcumque aliam . In hoc capite agimus , non de *materia secunda* , quia est quid principiatum ex materia prima & quibusdam accidentibus ; sed loquimur de *materia prima* , quæ est principium primum cuiuscumque corporis naturalis .

Q V Æ S T I O III.

Quid sit Materia Prima.

Aliquid potest definiri dupliciter, nimirum per *affirmationem*, dum illius naturam explicamus per aliquid positivum ipsi intrinsecè conueniens, dicendo quid sit; & per *negationem*, negando scilicet quidquid illi non competit, & dicendo quid non sit. Definitio negatiua sit, vel propter summam rei perfectionem, vel propter summam rei exiguitate; sic, cum Deus sit summè perfectus, & mentem nostram longè exuberet, ipsum definimus per negationem; dicendo potiùs, quid non sit Deus, quam quid sit, vt cum D. Dionysio loquamur. Materia prima ex opposito tantæ est exiguitatis, & entitatis tam paræ, vt intellectum nostrum penè effugiat, cum ex Aristotele sit *prope nihil*; ideo ipsam definimus negatiuè, dicendo potiùs *quid non sit* quàm positiuè dicendo *quid sit*.

C O N C L U S I O.

Materia prima negatiuè definitur ab Aristotele 7. Metaph. cap. 3. *Materia non est quid, nec quantum, nec quale, nec aliquid eorum quibus ens determinatur, sed horum omnium est commune subiectum*: Quod dicere est materiam primam non esse substantiam completam, nec formam, nec quantitatem, nec qualitatem, nec aliam formam accidentariam, siue absolutam, siue relatiuam; sed esse horum omnium subiectum, quandoquidem illis omnibus informatur. Positiuè verò sic definitur ab eodem Aristotele 1. Phys. cap. 9. textu 82. *Materia est subiectum primum vniuscuiusque, ex quo fit aliquid, cum nsit, & non secundum accidens, & si corrumpitur aliquid, in hoc abit ultimum*.

Explicatur hæc vltima definitio per particulas. Primo, dicitur *subiectum*: per quod distinguitur à forma, quæ in subiecto recipitur, tanquam perficiens in suo perfectibili. Dicitur 2. *primum*; per quam particulam differt à materia secunda, quæ est subiectum secundum formæ substantialis, vbi materia prima est subiectum primum accidentium, seu dispositionum quæ requiruntur in materia, vt recipiat formas substantiales.

Dici-

Dicitur 3. *vnuscuusque*; id est, vnuscuusque formæ substantialis; quandoquidem omnes formæ possunt recipi in materia prima. Additur, *ex quo fit aliquid*, id est, compositum. Adiungitur, *cum insit*; per quod distinguitur materia à priuatione, quæ non remanet in composito, sed recedit adueniente forma. Subditur, *& non secundum accidens*, quia ex materia, & forma fit *unum per se*: in quo distinguitur materia physica à materia artificiali, quæ respectu artificiati facit vnum per accidens. Apponitur denique, *& si corrumpitur aliquid, in hoc abit vltimum*; quod indicat omnia composita, quando corrumpuntur, resolui in materiam primam, quæ sicut est ingenerabilis, sic etiam est incorruptibilis.

Obijcies materiam primam non posse definiri, quia ex Scoto in 4. dist. 1. *quest. 2.* ens definibile debet esse ens reale, positium, per se, compositum, & vniuersale; quæ dici non possunt de materia prima, quæ nec est quid, aut quantum, aut quale, aut aliquid eorum quibus ens determinatur. *Resp.* Scotum, & Aristotelen hoc dicentes loqui de definitione rigorosè sumpta, quæ reuerà competit tantum illis entibus, quæ habent condiciones præallatas; hoc tamen non impedit, quin in materia prima possit explicari *latè* per definitionem præcedentem: ita quod *subiectum* teneat locum generis, in quo conueniunt materia prima, & materia secunda, quæ ambæ sunt subiectum formarum, & reliquæ particule tenent locum differentię. Quod si dicatur materiam esse quid absolutum, quæ proinde non potest definiri per respectum ad formas, vti est præfatæ definitio: *Resp.* absolutum totale, & completum non posse quidem definiri per relationem, quia ens absolutum definiri debet absolutè; absolutum tamen parziale & incompletum definiri potest per ordinem ad aliud, vt patet de anima rationali, quæ in sua entitate absoluta est, definitur tamen per respectum ad corpus, dicendo, quod anima sit actus corporis organici.

QVÆSTIO IV.

Quanam fuerit mens veterum Philosophorum de Materia Prima.

Non fuerunt inter veteres qui negarent existentiam materiæ primæ, vt vidimus post conclusionem pri-

max questionis ; natura tamen & quidditas illius eorum multos sane latuit : cum Hesiodus existimauerit terram esse rerum omnium materiam, ex qua cuncta entia naturalia formantur : Sed talis opinio non est verisimilis , quia cum terra sit valde densa & sicca non videtur apta ad facilem receptionem formarum & figurarum , qualis debet esse materia prima . Adde quod terra ipsa constet ex materia & forma ; & sic non potest esse materia aliorum . Quod si dicatur omnia in terram resolui , tum hominem, tum cætera animantia, potest colligi ex Gen. 3. *In sudore vultus tui vesceris pane tuo , donec reuerteris in terram , de qua sumptus es.* Responderi debet, talem resolutionem non esse vltimam , cum terra ipsa resolui debeat in materiam primam .

Thales Milesius pro materia prima & primo principio rerum naturalium constituebat aquam , vt ait Aug. 8. *de Cinit. cap. 2.* Sed ista pariter opinio refutatur per hoc , quod aqua præsupponat materiam tanquam eius partem , cum sit vnum ex quatuor elementis , quæ sunt corpora sensibilia , ex materia & forma composita . Quod si D. Aug. lib. 1. *de Gen. ad lut. cap. 1.* videatur dicere aquam esse omnium rerum principium, fundatus super textum Genesis cap. 1. *Spiritus Domini ferebatur super aquas:* Hoc ideo dicit , quia humiditas quæ reperitur in aqua est principium omnium ferme rerum quæ sunt in rerum natura .

Anaximandet Thaletis successor pro rerum naturalium principio materiali elementum indefinitè astruebat , quod Anaximenes eius auditor expressè affirmabat de ære in particulari , vt referunt Aristoteles 1. *Phys. cap. 6. & Aug. 8. de Cinit. cap. 2.* Hanc opinionem reijcit Aristoteles loco præcitato , tum ex ratione communi quod aer sit elementum ex materia & forma compositum ; tum ex hac ratione particulari , quod aer emineat aquæ & terræ : sed quod est superius est actiuius inferiore, vt patet de igne , qui cum sit eminentior cæteris elementis , maiorem habet actiuitatem super illa ; materia autem prima est ens passiuum & infimum : ergo non potest dici de ære quod sit materia prima . Quod si aer sit calidus & humidus , quæ sunt duo principia entis viuientis ; ex hoc tantum colligi debet, quod sine ære vita non possit conseruari . Si etiam aer vocetur spiritus Psal. 118. *Os meum aperui & attraxi spiritum ,* & spiritus existant in semine , seu in materia : ideo

ideò vocatur *spiritus*, qui est tenuis & subtilis ; non verò quia est *materia* omnium aliorum.

Hippasus & Heraclitus quidam , quorum meminit confusè Aristoteles 1. *Phys. cap. 2.* & explicitè 1. *Metaph. cap. 3.* tenebant ignem esse primum principium , seu materiam primam omnium. Sed quantum hæc opinio à verò deficiat , ex his patet , quòd ignis sit superior cæteris sublunaribus , & materia prima sit inferior . *Deinde*, ignis est maxime actiuus : materia verò prima est tantum passiva. *Tandem* ignis est siccus & calidus , sed siccitas & caliditas in causa sunt , cur animata pereant : ergo ignis non potest esse principium generatiuum , cum est destructiuum. Quòd si *dicatur* in contrarium ignem esse fontem caloris, & calorem esse principium vitæ , hoc verum est de calore moderato , qui admiscetur humido ; non verò de calore intenso & summe sicco , qualem ignis videtur habere .

Sicut præcedentium singuli statuebant aliquod elementum in particulari pro materia prima sic alij materiam primam faciebant medium quid inter ignem & aerem , vt ait Aristoteles 1. *Phys. cap. 4.* Alij verò aliquid medium inter ignem & aquam , ex eodem Philosopho 1. *Metaph. cap. 3.* Hoc autem non posse subsistere patet ex hoc , quòd materia prima, sit in se indeterminata ad omnes formas , quas indifferenter potest recipere ; & sic non debet limitari ad illud medium inter ignem aut aerem , aut inter ignem & aquam interpositam . *Deinde* illud intermedium , vel est compositum , vel simplex , si est compositum ; non est materia , quæ nequaquam componitur , sed componit , si est simplex , non magis mediat inter illa elementa : quam inter alia ; cum non habeat qualitates , quæ magis symbolisent cum illis elementis , quam cum alijs : ergo tale intermedium non potest institui pro materia prima. *Tandem* præfati Philosophi , quibus Aristoteles talem opinionem attribuit , non possunt explicare , quale sit illud intermedium , nec vllam de eo rationem afferunt , & sic sustineri non debet .

Empedocles voluit materiam omnium rerum non esse illud aut istud elementum , benè autem omnia quatuor elementa simul sumpta ; sed contrarium patet ex eo , quòd *materia sit in generabilis & incorruptibilis* ; cum ipsa incorrupta manens sit subiectum omnis generationis & corruptionis ; sed elementa sunt transmuta-

rabilia ad inuicem, quoniam ex aqua fit aer, ex aere ignis, &c. ergo illa quatuor elementa non possunt esse materia prima omnium. *Deinde*, prima principia sunt contraria ex Aristotele 1. *Phys. cap. 5.* sed contraria debent habere subiectum commune, in quo exerceant suam contrarietatem: ergo quatuor elementa præsupponunt materiam primam tanquam commune subiectum in quo sunt; proindeque ipsa quatuor elementa non sunt materia prima. *Tandem* si elementa essent materia prima, actu, & formaliter remanerent in mixto: cum materia sit pars componens, quæ in composito remanet: sed quatuor elementa non remanent formaliter in mixto, aliàs quodlibet mixtum esset diuersæ speciei, sicut, & quatuor elementa non sunt materia prima.

Quantum ad Pythagoricos, qui mathematicis disciplinis assueti unitatem siue numerum putabant esse materiam primam; ipsi refutantur ab Aristotele 1. *Met. cap. 5.* Quia nimirum substantia corporea non componitur ex accidente, aliàs omne compositum esset ens per accidens: sed unitas, & numerus sunt accidentia de genere quantitatis, ubi materia prima est de prædicamento substantiæ; quoniam est pars compositi substantialis: ergo numerus non potest esse materia prima entium naturalium. *Deinde* substantia est prior accidente ex Aristotele 7. *Metaph. cap. 1.* numerus verò supponit res numerandas: ergo non potest esse principium illarum, cum principium debeat principiatum præcedere. *Tandem* si numerus esset materia prima seu principium rerum physicarum, mathematica quæ agit de numero non differret à Physica, quod est contra Aristotelem, & omnes Philosophos, qui scientiam speculatiuam diuidunt in Metaphysicam, Mathematicam, & Physicam.

QVÆSTIO V.

A quo sit Materia Prima.

Materia prima non potuit habere esse per generationem, quandoquidem ipsam diximus esse principium generationis omnium entium naturalium. Non est etiam *ingenita*, & *creata*, ut sibi finxerunt aliqui, dicentes materiam primam esse quoddam chaos impro-

factum, ex quo omnia essent facta; si enim hoc esset verum, sequeretur materiam primam esse Deum, quando, quidem solus Deus est increatus. Remanet ergo, ut materia prima sit aliquid creatum, seu natura quædam substantialis creata, ex qua fit quælibet substantia naturalis, virtute agentium naturalium.

CONCLUSIO,

Materia prima fuit à Deo creata initio temporum & ut deduci potest ex Gen. 1. In principio Deus creavit cælum & terram; ubi per cælum intelligitur res omnes spirituales fuisse à Deo productas; & per terram indicatur res omnes corporeas à Deo suum esse accepisse; si non omnes quantum ad formam, omnes tamen quantum ad materiam; ita quod successivè postea virtute agentium naturalium, formæ educæ fuerint de sinu & potentia materiæ. Materia ergo prima rerum omnium pro illo tempore creata fuit, tanquam theatrum aliquid, in quo mirabilis ille generationum & corruptionum substantialium successio perageretur; quod maximè cedit in pulchritudinem vniuersi tanta rerum varietate diversificati, & in laudem supremi artificis, quod in eius officina apparerent tot entium genera, quæ lapsu temporum generarentur & interirent.

Quod materia prima à Deo creata fuerit, deduci potest ex Aug. lib. 12. Confess. cap. 7. ubi Deum alloquens ait, tu eras & aliud nihil, unde fecisti cælum & terram, duo quadam, unum prope te, & aliud prope nihil; Sed illud quod Augustinus vocat prope nihil est materia prima, inquit Scotus in 4. dist. 12. quest. 6. ergo materia prima à Deo facta est. Hoc confirmare videtur idem Aug. eodem lib. Confess. cap. 8. tu enim Domine fecisti mundum de materia informi, quam fecisti de nulla re; quod vltèriùs repetit lib. de vera religione cap. 18. si de aliqua informi materia factus est mundus, hæc ipsa facta est omnino ex nihilo. Ratio conclusionis est, quia illud quod fit, vel fit per creationem, vel per generationem, cum non sit alius producendi modus, quàm ex præexistenti subiecto, vel absque subiecto præexistenti; sed materia prima effici nequit per generationem, quandoquidem ipsa est principium & subiectum generationis: ergo materia prima habet esse per creationem. Hoc adhuc insinuat Aug. lib. 1. de Gen. ad

ad litt. cap. 15. *non est dubitandum, ita esse istam informem materiam propè nihil, ut non sit facta nisi à Deo.*

Obijcies. Ex communi proloquio Physicorum *ex nihilo nihil fit*; sed quod est creatum fit ex nihilo, quandoquidem creatio est productio rei ex nihilo, ubi generatio est productio rei ex præiacente subiecto: ergo materia prima non est creata. *Resp.* ex nihilo nihil fieri, virtute agentis naturalis, concedo; virtute Dei, nego; cum enim Deus sit omnipotens, *vocat ea quæ non sunt, sicut ea quæ sunt*, inquit Propheta. Præcedens ergo axioma *ex nihilo nihil fit*, potest intelligi tripliciter; nempe materialiter, causaliter, & terminatiuè. Ex nihilo nihil fit *materialiter*, quia nihil non potest esse materia factionis alicuius rei; quoniam materia ex qua fit aliquid est ens reale, & nihil est pura negatio. *Causaliter* etiam *ex nihilo nihil fit*, quia nihil non potest esse causa alicuius rei efficiendæ, quandoquidem omnis causa per se influens in effectum debet esse ens verum, reale, & positium, quod opponitur nihilo, *Terminatiuè* tamen aliquid ex nihilo fieri potest, quando scilicet Deus ex nullo subiecto præexistente produxit omnia initio temporum; tunc enim *nihil*, seu *privatio* erat terminus à quo talium entium productorum.

QVÆSTIO VI.

An Materia Prima omnium sit una, vel diuersa.

DVplex est vnitas, *transcendentalis* scilicet, quæ competit omni enti, quandoquidem omne ens est vnum, & vnitas est passio entis ex Aristotelo 4. *met. tex. 3.* & *Prædicamentalis*, quæ competit illis entibus quæ collocantur in aliquo decem prædicamentorum; & ista vnitas est triplex, nempe generica, specifica, & numerica, ut dictum est in logica. Vnitas diuidi potest adhuc in vnitatem *positiuam*, quæ consequitur entitatem positiuam rei: quæ vnitate homo est vnus, quia per animam rationalem censetur entitatem positiuam habere: & *negatiuam*, per quam illud quod est ens tantum in potentia dicitur esse vnum negatiuè; quod dicunt Thomistæ de materia prima, quam fatentur quidem esse vnam, sed tantum negatiuè, non verò positiuè. Nostra quæstio intelligitur tum de materia corporum sublunarium, tum de materia corporum cele.

DE CORPORE NAT. IN COMM. 45
cælestium, & quaeritur, vtrum tales materiae sint quid
vnum, & qua vnitare.

CONCLUSIO PRIMA.

OMnia corpora sublunaria habent materiam numero
distinctam, & eadem specie. Primum euidenter
colligitur ex hoc, quod illa materia sint numero di-
stincta, quarum una destrui potest, alia remanente;
sed Deus potest annihilare vnum hominem, seu illum
reducere in purum nihil, altero homine remanente: er-
go materia prima illius hominis annihilati differt nu-
mero à materia prima hominis remanentis, aliàs eadem
numero materia simul annihilaretur, & non annihila-
retur. Sic Scotus in 2. dist. 14. quaest. 1. & multis alijs in
locis, & hoc conformiter Aristoteli 12. met. tex. 26.
contra Gandauensem, & aliquos existimantes mate-
riam primam omnium corporum sublunarium esse ean-
dem numero.

Secundum sumitur pariter ex hisdem locis præcita-
tis, manifestèque patet ex hoc, quod materia prima
Petri, & materia prima Ioannis, quæ sunt numero di-
stinctæ, conueniant in ratione eadem specifica, & par-
ticipent eandem specie naturam, sicut habent eandem
specie humanitatem. Deinde, materia prima definitur
apud Aristotelem, & ceteros philosophos, sed defini-
tio non est singulare, bene autem vniuersale, &
præsertim specierum, ex 7. met. tex. 13. ergo materia
prima sublunarium est vna specie, Tandem idem nume-
ro non potest simul esse in diuersis, & distantibus locis,
quia idem nequit esse diuisum à seipso; sed si materia
sublunarium foret vna numero, reperiretur eadem in
locis distantibus; cum materia prima Petri posset esse
Parisijs, & materia prima Pauli posset esse Lugduni:
ergo materia prima sublunarium non est eadem numero
sed eadem specie.

Obiicies contra primam partem, vna, & eadem ma-
teria numero potest esse sub forma hominis, dum homo
viuit; sub forma cadaueris, postquam mortuus est, &
sub forma vermis, postquam vermes progenti sunt ex
cadauere: ergo licet in corporibus sublunaribus perci-
piantur diuersæ formæ, hoc non impedit, quin vna, &
eadem materia numero sit in omnibus compositis sublu-
naribus. Quod conforme videtur Aristoteli 1. Phys.
tex.

text. 60. Vbi ait materiam esse vnum numero subiectum transmutationum rerum naturalium, quod manet sub utroque extremo. *Resp.* vnam & eandem numero materiam posse quidem successiue remanere sub diuersis formis, vt patet per exemplum præcedens; non potest tamen actu permanentes esse sub pluribus formis: imò proleō instanti quo est sub vna forma vltima, non est amplius sub alia; & sic pro diuersitate formarum vltimarum, materię etiam sunt diuersę numero. Sic intelligi debet Aristoteles præcitatus, quod scilicet eadem materia successiue sit subiectum plurium formarum; licet hoc non fiat permanenter & actu.

CONCLUSIO SECVNDA.

Materiam corporum cœlestium & sublunarium est eadem species. Sic Scotus in 2. dist. 44. quæst. 1. sanctus Bon. dist. 1. quæst. 1. Ockhamus & plures alij contra Alensem 2. p. quæst. 44. D. Thomam 1. p. quæst. 66. art. 2. & alios. Ratio nostra est, quod materia cœlestium & sublunarium habeat apud Aristotelem & alios philosophos eandem definitionem, cum vtraque sit subiectum formarum, siue corruptibilium, siue incorruptibilium; sed quę habent eandem definitionem, eandem participant naturam: ergo tales materię non differunt specis. Materia enim est fundamentum nature, & in fundamento nature nihil est distinctum. Deinde accidentia communia & eadem species arguunt commune subiectum seu communem materiam ex Aristotele 1. de anima cap. 11. sed corpora cœlestia & sublunaria habent eandem accidentia, nimirum quantitatem, perspicuitatem, densitatem, raritatem, lumen, & similia: ergo materia, quę est subiectum commune talium accidentium, est vna specie. Tandem certum est Deum vnam duntaxat materiam creasse, ex qua omnia constant, vt colligitur ex Sap. 11. qui creauit orbem terrarum ex materia innisa: ergo corpora cœlestia & sublunaria ex eadem specie materię compacta sunt, conformiter ad Aug. 2. Gen. cap. 11. dicentem ex corporali materia iam factum cælum narratur.

Confirmatur conclusio nostra. Si esset fundamentum aliquod diuersitatis inter materiam cœlorum & materiam sublunarium, vel esset formę nobilitas, vel incorruptibilitas illius; sed formę cœlestis nobilitas non

non impedit, quin eadem sit *specie* materia sub forma cælorum & inferiorum corporum: quandoquidem anima rationalis longè præstat omnibus alijs formis sublunariis, etiam ipsa cælorum formà; at tamen materia est eadem specie sub homine & sub equo: ergo nobilitas formæ cælestis non ponit distinctionem specificam materiæ inter cælestia & sublunaria. Ex incorruptibilitate etiam cælorum non debet argui distinctio essentialis materiæ, quia cælorum incorruptibilitas non petitur ex eorum materia, sed ex illorum forma, quæ tam perfecta est, ut non possit corrumpi ab agente creato. Et hoc est quod philosophi dicunt communiter *cælos esse corruptibiles ab intrinseco*; nempe à materia, quæ est principium corruptionis: sed *esse incorruptibiles ab extrinseco naturali*, quatenus non est agens naturale, quod possit illorum destruere formam.

Obijcies ex Aristotele 8. *met. cap. 4.* non esse eandem materiam in perpetuis, veluti sunt cæli & in caducis, quod idem videtur repetere pluribus in locis. *Resp.* Aristotelem intelligendum esse de distinctione accidentali materiæ, non verò de distinctione specifica & essentiali; licet enim materiæ cælestium & sublunarium sint eiusdem speciei, differunt tamen plusquam *numero* accidentaliter: quia in cælorum materia non reperiuntur eadem dispositiones proximæ naturales ad alias formas recipiendas, quæ reperiuntur in materia sublunarium; & ob hoc dicit Aristoteles diuersam esse materiam in æternis & temporaneis, in caducis & perpetuis. *Dices* corruptibile & incorruptibile differunt plusquam *numero*; sed materia cæli est incorruptibilis, & materia sublunarium est corruptibilis. ergo *specie* differunt. *Resp.* negando minorem, tales enim materiæ non differunt penes corruptibilitatem & incorruptibilitatem; quandoquidem omnis materia prima est incorruptibilis, ut dicetur postea. Incorruptibilitas ergo cælorum procedit ex præstantia formæ, quæ tanta est, & tam indissolubili nexu coniungitur cum materia ut non possit ab ea separari per virtutem cuiuscunque agentis naturalis.

CONCLUSIO TERTIA.

Vnitatis specifica materia sublunarium & cælestium est unitas positiva, sicut & distinctio numerica, quæ
est

est inter talium materias, est etiam positiva, non verò tantum negativa: ut volunt Thomistæ. Ratio illorum est, quòd materia prima non sit ens in actu, sed tantum in potentia; cum ergo unitas, & distinctio, quæ sunt proprietates entis, sequantur naturam entis, ideò colligunt unitatem, & distinctionem vnius materiæ ab alia non esse positivam, sed tantum negativam. Nos verò, qui iuxta mentem Scoti probandam in sequenti quæstione, tenemus materiam ex se esse ens actuale, positivè distinctum ab entitate formæ, habemus dicere, quòd unitas, & distinctio materiæ sit unitas, & distinctio positiva, non verò tantum negativa. Talis enim est unitas, & distinctio rei, qualis est ipsiusmet rei entitas; sed materia est ens in actu positivo, seu entitas positiva, etiam prout à forma distinguitur, ut mox probaturi sumus: ergo unitas specifica quæ est inter corpora sublunaria, & cœlestia est positiva, sicut, & distinctio numerica quæ intercedit inter illa corpora. Quia probatio huius veritatis pendet à quæstione sequenti, non longius protendetur.

Q V Æ S T I O VII.

Virum Materia Prima sit pura potentia, vel habeat actum entitativum.

Dupliciter aliquid intelligitur *esse in potentia*, & dupliciter dicitur *habere actum*. Aliquid inquam est in potentia, vel obiectiva, vel subiectiva. Illud est in potentia *obiectiva*, quod non existit quidem, sed potest existere: ut Antichristus, qui quia non existit nunc, dicitur esse in potentia obiectiva ad existendum cum possit existere. Illud autem est in potentia *subiectiva*, quod existit reuerà, sed ulterius potest aliquam formam recipere, siue substantialem, siue accidentalem. Materia prima erat in potentia obiectiva antequam crearetur à Deo, & postquam creata est dicitur esse in potentia subiectiva ut formas qualescumque recipiat.

Dupliciter etiam aliquid dicitur habere actum, nempe physicum, vel metaphysicum. Actus *metaphysicus* est id quo res existit, vel est, vel subsistit, & sic actus metaphysicus est triplex, nempe essentia, existentia, & subsistentia: Actus verò *physicus* est forma quædam quæ recipitur in subiecto. Sic paries existens dicitur habere

bere actum metaphysicum, paries verò albus dicitur actum physicum habere, nempe albedinem, quæ est forma accidentalis.

Quantum ad statum quæstionis præsentis constat quidem, materiam primam non habere actum *physicum* seu *formalem*, quia ex se priuatur omni forma, sed quærimus, an habeat actum *metaphysicum*, seu existentiam essentiam, & subsistentiam, quæ vocantur actus entitativus à forma independens. In hac difficultate grauius controuertuntur duæ scholæ; quoniam D. Thomas 1. p. quæst. 66. art. 1. cum suis existimat materiam ita esse puram potentiam, vt nullum includat actum entitativum. Scotus verò 7. met. quæst. 5. & in 2. distr. 12. quæst. 1. & in 4. distr. 11. quæst. 3. cum sectatoribus suis docet materiam non esse puram potentiam sed actum entitativum habere.

CONCLUSIO.

Materia est quidem pura potentia physica, quia nullum habet actum physicum seu formam physicam; sed habet actum metaphysicum seu actum entitativum, quandoquidem habet ex se essentiam, & subsistentiam realem, positivam, distinctam ab entitate forma. Hæc conclusio quoad secundam partem, quæ sola nunc in quæstionem descendit, est conformis Aristoteli, qui 1. Phys. tex. 56. asserit materiam esse per se principium rerum naturalium 2. phys. text. 7. dicit materiam esse naturam 5. met. tex. 2. de materia ait quod sit per se causa. Et 7. met. tex. 28. quod sit pars substantiæ compositi; sed hæc omnia non posset esse, nec exercere materia prima, nisi esset entitas realis, actualis, independentem existens à forma: ergo materia prima ex Arist. debet censeri habere actum entitativum.

Probatur conclusio nostra sequentibus rationibus. Primò quod nullam habet existentiam actualem, seu actum entitativum, non est ens actuale; sed materia prima est ens actuale, quandoquidem concurret actualiter ad constituendum compositum, cuius est, pars essentialis: ergo materia prima habet ex se actum entitativum. 2. Quæ diuersis actionibus producuntur habent diuersas existentias: sed materia producitur à Deo per creationem, & forma per generationem agentium naturalium: ergo materia prima habet existentiam di-

distinctam ab existentia formæ. 3. Quando producitur compositum, quod constat ex materia & forma unitis, generatur forma & non materia; quando etiam corrumpitur compositum, sola forma corrumpitur & non materia: ergo existentia formæ & materiæ differunt: & sic forma habet suum actum *entitativum*, & materia suum. 4. Quod ex se est ens in actu, habet actum entitativum: sed materia est ens in actu, quandoquidem est principium constitutum actuale omnium rerum, quæ sunt in mundo: ergo materia prima habet actum *entitativum*.

Confirmatur conclusio. Materia prima in se considerata, vel est nihil & intra suas causas, vel est aliquid extra illas existens, quandoquidem *essenihil & aliquid opponuntur*, & non datur medium inter esse intra & extra causas; sed materia prima non est nihil, quandoquidem ex materia fit partialiter compositum, & ex nihilo nihil fit; non est etiam intra suas causas, quia non causaret compositum actuale, nisi ipsamet extra suas causas existeret: ergo materia prima est aliquid actu existens, quoniam componit actu; & sic dici debet habere actum entitativum. Respondent Thomistæ secundum rem non dari medium inter esse intra & extra suas causas; sed dari medium secundum præcisionem, ut adducit Goudinus. Sed planè elusoria est hæc responsio. Illud enim quod præscindit & est medium intra nihil & aliquid, vel est à parte rei, vel per opus intellectus, sed materia prima, quam dicunt præscindere inter aliquid & nihil, est quid à parte rei existens: ergo illud habet actum *entitativum*, seu existentiam.

Addi potest ulterius hæc ratio. Quod inexistit actu composito, debet actu existere, quia *prius est existere, quam inexistere* sicut *prius est esse quam inesse*; sed materia prima composito inexistit, quia est pars essentialis illius, ex qua simul cum forma constituitur: ergo materia prima actu existit & habet existentiam actualem ab existentia formæ actualiter distinctam. Veritati nostræ conclusionis subscribit August. lib. 12. Confess. cap. 7. Imò & D. Thomas *quæst. 5. de verit. art. 5. ad 1*, fatetur esse materiam habere imitationem primi entis; sed aliam convenientiam habere non potest materia cum Deo, nisi in hoc, quòd ipsa sit actu, sicut Deus est actualissimus, quomodo enim materia prima Deum aliquaviter imitaretur, si materia prima esset in statu purè potenciali, &

Deus

Deus in statu actualissimo omnem potentialitatem excludendi? Nec est quod ad hoc respondeant Complutenses materiam habere esse debile & in finem; hoc enim cum illis fatemur: sed illa debilitas & infirmitas entis non tollit absolute actualitatem materię primę, in qua Deo assimilatur.

Obijcies. *Materia non est quid, nec quantum, nec quale, nec aliquid eorum quibus ens determinatur, ut inquit Aristoteles definiendo materiam primam: ergo materia non habet actum entitativum. Resp.* Materia non est quid distinguo; non est quid determinatum & completum, concedo: non est quid indeterminatum incompletum, nego: determinatio enim & complementum rei venit à forma, quę in materia non reperitur. *Dices.* Actus distinguit; sed materia non distinguit, quandoquidem omnia entia corporalia in materia conveniunt: ergo materia non est actus, nec habet actum. *Resp.* distinguendo maiorem; actus formalis distinguit, concedo: actus entitativus, nego: omnia enim in actu entitativo conveniunt. *Si dicat* Aristoteles materiam esse in pura potentia: in pura potentia *subiectiva*, concedo, quia nullam habet formam physicam: in pura potentia *objectiva*, nego: quia habet existentiam, quę est actus metaphysicus. *Si dicatur*, quod forma det *esse* rei, & sic materia non habeat *esse*, cum formam non habeat. *Resp.* forma dat *esse* rei, completum & physicum, concedo: incompletum & metaphysicum, nego. *Dices;* materia est ens physicum: ergo si haberet *esse*, haberet formam physicam. *Resp.* distinguendb antecedens; est ens physicum, quatenus concurret cum forma ad constituendum corpus physicum, concedo: est ens physicum, prout ens physicum sumitur pro ente constante ex forma physica; nego.

Obijcies 2. Si materia haberet actum entitativum, esset ens in actu; sed si esset ens in actu, ex ea cum forma adueniente fieret ens per accidens, quidquid enim aduenit enti in actu facit ens per accidens: & sic omnia composita essent entia per accidens, *Resp.* quidquid adueniat enti in actu facit ens per accidens, dist. si adueniat enti in actu completo & specifico, concedo: si adueniat enti in actu incompleto & entitativo, nego: quando autem forma aduenit materię, aduenit tantum enti in actu incompleto & entitativo, ex quo fit ens completum & per se, per interventionem formę. Si

dicat Boetius omne esse deriuari à forma : & proinde materiam nullum habere esse, cum nullam habeat formam. Distinguitur Boetius, omne esse desumitur à forma; omne esse completum, concedo : incompletum nego: licet enim materia ex se habeat esse metaphysicū, illud tamen esse incompletum est physicè, cum nullam habeat formam physicam. Nec dicant Thomistæ, sicut in mundo datur actus purus, qui nullam habet potentiam, sic debet etiam reperiri pura potentia, quæ nullum habeat actum, & est materia prima. Negatur consequentia; aliàs sicut in mundo datur summum bonum, sic etiam in mundo deberet dari summum malum, quod Manichæismum redolet. Deinde talis pura potentia non esset materia prima; sed potentia obiectiua, quæ nullum prorsus habet actum, sicut Deus nullam habet potentiam.

Obijcies 3. Si materia haberet propriam existentiam, duplicem existentiam haberet, vnā à se, & aliam à forma. *Resp.* reuerà posse admitti duplicem existentiam in materia coniuncta formæ: sed vna est illi intrinseca quam à se ipsa habet; & alia est extrinseca, quam habet à forma. *Si dicatur* quod Aristoteles nunquam asseruerit actum entitatum reperiri in materia. *Resp.* ipsum pluribus in locis hoc dixisse multoties, saltem implicite, asserendo 1. *phys. tex. 82.* materiam esse subiectum formarum; quod non posset dici, si ipsa non existeret. Idem habetur in locis allegatis statim post conclusionem. Tot & tantis philosophi autoritatibus pressi fuerunt Thomistæ, vt inter eos Ruuius *tract. de materia quest. 3.* confessus fuerit materiam habere propriam existentiam independentem ab existentia formæ & compositi; quod dicit deduci ex principijs Aristotelis, qui tria docet de materia quod scilicet sit entitas realis & actualis extra suas causas distincta à quacumque forma & composito, quod sit primum subiectum cuiuslibet generationis, & quod destructis omnibus formis & compositis eadem perseneret; sed hæc tria non possunt dici pura potentia, cum competant re actuali & existenti: ergo manifestum est, quod materia prima habeat actum entitatum, seu existentiam distinctam ab existentia formæ.

Cum asseritur autem, quod materia habeat ex se existentiam, sic dicendum est quod habeat essentiam distinctam ab essentia formæ, cum essentia actualis idem sit

fit cum existentia : vnde materia prima habet suam definitionem distinctam à definitione formæ . Dicitur etiam debet , quòd materia habeat ex se subsistentiam , cum materia sit substantia , saltem incompleta , vt postea dicemus . Quia tamen possunt reperiri aliqui etiam ex Scotistis , qui dicunt materiam primam ex se non habere subsistentiam ; ideo notandum est , quòd tripliciter nomen subsistentiæ vsurpetur . *Primò* pro perfectitate seu pro existentia alicuius , absque coexistentia alterius ; & sic albedo & alia accidentia , quæ in sacramento Eucharistiæ non inhærent subiecto , dicuntur non habere subsistentiam . *Secundò* sumitur pro perfectitate & existentia alicuius sine inhærentia actuali vel aptitudinali in subiecto ; & hoc modo subsistentia conuenit tantum substantiæ . *Tertiò* subsistentia sumitur pro existentia rei quæ alteri est incommunicabilis , nec ad alterum potest ordinari , & subsistentia hoc tertio modo sumpta competit tantum personæ , supposito , vel hypostasi . Si ergo Scotistarum aliquid dixerint *materiam primam non habere ex se subsistentiam* ; hoc verum est de subsistentia tertio modo sumpta , quam materia prima non habet , cum sit ordinabilis ad formam recipiendam & compositum constituendum : duobus autem primis modis materia prima dicitur per se subsistere , quia non inhæret subiecto , & potest existere , saltem diuinitus , sine ea existentia formæ , vt mox sumus dicturi .

Q V Æ S T I O VIII.

Vtrum Materia possit existere sine forma .

HÆc quæstio intelligi potest , vel de potentia naturali , *utrum scilicet agens naturale possit spoliare materiam omni prorsus forma* ; vel de potentia supernaturali , *utrum Deus possit denudare materiam omni forma* . Quantum ad *agens naturale* , potest quidem denudare materiam hac vel illa forma , vt patet de igne , qui lignum spoliatur sua forma substantiali ; introducendo scilicet formam cinerum ; sed *utrum possit spoliare materiam omni forma* , hoc est quod quarimus .

CONCLUSIO PRIMA.

Materia non potest naturaliter separari ab omni forma. Sic Scotus in 2. dist. 12. quest. 2. quod est iuxta mentem Aristotelis 4. phys. text. 17. ubi ait generatio unius est corruptio alterius, & vice versa. Cum ergo secundum legem communem naturæ, corruptio unius sit generatio alterius, proinde agens naturale destruens unam formam, aliam introducit, & sic naturaliter non potest reperiri materia, quin aliquam formam habeat. Ratio nostra est, quod agens naturales non possit intendere malum naturæ; spoliare materiam omni forma est malum naturæ, quia forma est naturale bonum: ergo materia non potest naturaliter spoliari omni formâ, imò, cum agens naturale tantummodò in naturæ bonum operetur, ideò si corrumpit unam formam, loco illius aliam substituit: & ex hoc sequitur veritas axiomatis philosophici, corruptio unius est generatio alterius.

Deinde debilitas & imperfectio materiæ & formæ naturaliter petunt esse simul, quia sunt duæ entitates partiales, ex sua natura tendentes ad tertiam faciendam materia scilicet ut perfectibilis essentialiter, & forma ut essentialiter perfectiua; sed nihil potest existere naturaliter sine sua perfectione essentiali: ergo naturaliter materia non potest esse sine sua forma. Tandem materia non minus dependet à forma, quàm subiectum ab accidente, cum utrumque sit subiectum, illud formæ substantialis, & istud formæ accidentalis, sed subiectum non potest esse sine accidente aliquo, v. g. sine quantitate, qualitate, & similibus: ergo materia non potest esse sine aliqua forma substantia'i, qualiscumque sit.

Obijciens. Quando quis interficit hominem, separat animam rationalem à corpore, & nullam aliam introducit formam: ergo falsum est, quod diximus antea, agens naturale destruendo unam formam introduce-re aliam; & sic materia remanet sine forma. Resp. quod licet anima rationalis deficiat, non propterea materia prima remanet sine omni forma; quia superest forma corporeitatis, & forma cadaueris substituitur. Dices quando in ultimo iudicio formæ substantiales mixtorum destruentur virtute ignis, materia mixtorum manebit, & non sequetur generatio alterius formæ; & sic

materia mixtorum manebit naturaliter sine forma. *Resp.* quòd ex forma mixtorum generabitur forma ignis & aliorum elementorum. *Dices.* Ex antecedenti quæstione materia habet existentiam distinctam ab existentia formæ: ergo materia poterit naturaliter existere sine forma. *Resp.* negando consequentiam, quia naturaliter materia ordinatur ad formam sustentandam, sicut substantia ordinatur ad accidens recipiendum: sicut ergo substantia non potest naturaliter esse sine accidentibus, sic materia non potest esse sine forma. *Si dicatur* quòd Deus initio mundi potuerit creare materiam sine forma, *Resp.* ex hoc tantum concludi, quòd materia virtute diuina possit denudari omni forma, non verò naturaliter ob legem ordinatam à Deo, quòd materia & forma simul coniungerentur ob perfectionem vniuersi.

CONCLUSIO SECUNDA.

Diuina virtute materia potest spoliari omni forma: Sic Scotus in 2. dist. 12. quæst. 4. Non magis enim repugnat quòd materia existat sine forma, quàm accidens sine subiecto, sed accidens per potentiam D. existit sine subiecto in Eucharistia: ergo eadem virtute materia prima potest esse sine forma. *Deinde* quando aliqua duo sic se habent, vt vnum creetur à Deo, & aliud producat à natura, id quod creatur à Deo potest existere sine eo quod à natura producit, quia Deus potest denegare suum concursum causæ secundæ, ne generet; sed materia prima à Deo creatur, forma verò producit à generante, cui Deus potest denegare concursum, ne generet: ergo materia prima potest esse sine forma. *Tandem* omne prius absolutum, realiter distinctum ab alio, & essentialiter ab illo non dependens potest diuinitus existere separatim ab eo: sed materia prima est entitas absoluta, realiter distincta à forma, & ab illa non dependens essentialiter: ergo materia prima potest D. virtute existere sine forma.

Obijcies. Effectus formalis non potest esse sine causa formali, cum non possit esse album sine albedine; sed forma est causa formalis materiæ: ergo materia absolute non potest esse sine forma. *Resp.* maiorem esse veram, quia Deus non potest supplere causam materiale & formalem, quæ sunt intrinsecæ; vnde negari debet minor; quòd forma sit causa formalis materiæ: illud

enim non est causa formalis alterius, sine quo habet suam essentiam & existentiam, sed materia prima sine forma habet suam essentiam & existentiam, ut probatum manet ex antecedenti quæstione: ergo forma non est causa formalis materiæ, sed tantum compositi.

Obijcies. Non potest dari aliquod indiuiduum, quod sit sub genere aliquo, nisi etiam ad aliquam speciem pertineat, non potest enim aliquid esse animal, quin sit brutum vel homo; sed si materia vnius indiuidui conseruaretur sine forma, tale indiuiduum pertineret ad genus, nempe ad substantiam, & non pertineret ad speciem, quia distinctio specifica habetur per formam: ergo non potest absolutè materia denudari omni forma. *Resp.* maiorem esse veram, & minorem esse falsam: in tali enim suppositione, quod indiuiduum aliquod spoliaretur omni forma, tunc ipsum pertineret ad genus, nempe ad substantiam; quia materia prima est substantialis: pertineret etiam ad aliquam speciem substantiæ, nempe ad speciem substantiæ informis; quatenus substantia illa materiæ primæ non haberet ullam formam particularem.

Obijcies. Materia & forma sunt magis vnum quam natura & proprietas, cum ex materia & forma fiat vnum per se, ex natura verò & proprietate fiat vnum tantum per accidens: sed virtute D. non potest natura spoliari sua proprietate: ergo nec materia denudari omni forma. *Resp.* distinguendo maiorem; materia & forma sunt magis vnum, vnitatem vnionis seu compositionis, concedo: vnitatem identitatis realis, nego: natura enim & passio realiter identificantur, materia verò & forma distinguuntur realiter; & sic natura & proprietas sunt magis identificate, materia verò & forma sunt magis vnitæ, quia faciunt vnum per se. *Dices* si plures materiæ essent sine forma, non essent sine numero, qui est forma: ergo non essent absolutè sine forma. *Resp.* plures illas materias fore protunc sine numero, quantitativo & predicamentali, qui petitur à distinctione formæ; essent verò cum numero transcendentali, qui sequitur ens: cum enim plures illæ materiæ essent entia, esset in illis transcendentalis numerus.

Quæres an materia per virtutem D. separata ab omni forma haberet vnum esse, & indigeret speciali influxu Dei ad existendum. Ad hanc quæstionem affirmatiuè respondent Henricus & Conimbricenses; Scotus verò
in

in utroque opere Oxoniensi & Parisiensi in 2. dist. 12. *quæst.* 2. Respondet negatiuè : ita quòd , si materia ab omni forma separaretur nouum esse non acquireret , nec peculiari influxu indigeret . Ratio primi est , quia materia prima habet suam essentiam , suam existentiam , & suam subsistentiam partialem , distinctam ab essentia , existentia , & subsistentia formæ : ergo , si materia separaretur à forma , retineret suum esse , existere , & subsistere , non enim mutaretur nisi de statu coniunctionis ad statum separationis , qui nihil tollit nec inuehit nouum : ergo materia separata à forma non haberet nouum esse , sicut nec anima rationalis , cum separatur à corpore , nouum esse acquirit ; nec etiam accidentia separata à subiecto in Eucharistia . Hoc vltimum est contra D. Thomam , qui in 4. dist. 12. *quæst.* 1. art. 3. vult accidens in Eucharistia existens sine subiecto exposcere nouum esse sibi à Deo elargitum .

Secundum etiam probatur , quòd scilicet materia sine forma non indigeret nouo concursu Dei , ut conseruaretur ; eadem enim est actio , quæ Deus conseruat materiam iunctam in forma , cum ea per quam illam conseruaret sine forma . Si enim fieret noua actio & nouus concursus , seu influxus particularis , deberet esse nouus terminus ; sed , cum materia conseruatur per se existens sine forma , non est nouus terminus talis actionis , quia est eadem numero materia ; ergo siue materia sit cum forma , siue omni forma denudetur , erit semper idem concursus Dei , qui conseruabit materiam utroque modo se habentem . Dices naturaliter materia non potest existere sine forma , propter exigentiam vtriusque , ad faciendum compositum ex naturæ præscripto : ergo ut materia subsistat sine forma , indiget concursu particulari . Resp. negando consequentiam , quia eodem concursu quo Deus conseruaret materiam vnitam formæ , conseruaret adhuc materiam denudatam omni forma : unde , quia remaneret idem terminus actionis conseruantis , nempe eadem materia ; sic etiam remaneret idem concursus . Quia verò in tali suppositione modus existendi materiæ esset diuersus , quandoquidem vnus esset naturalis , & alter supernaturalis ; sic etiam modus concursus esset diuersus , naturalis scilicet respectu materiæ cum forma conseruatæ , & supernaturalis respectu materiæ denudatæ forma ; sed talis diuersitas se

teneret tantum ex parte modi, non ex parte concursus qui idem remaneret entitatiuè.

QVÆSTIO IX.

Verum Potentia Materia sit illi essentialis.

Loquimur de potentia materiæ ad formam physicam, non autem ad formam metaphysicam; diximus enim in penultima quæstione, quod materia prima respectu actus entitatiui nō sit in potentia, quandoquidem talem actum entitatiuum habet ex se: est verò in potentia ad formam physicam, quandoquidem materia prima ex se nullam formam physicam habet; & idēd hic quærimus *an potentia materia sit ipsi materia essentialis*. Illa autem potentia, seu appetitudo ad formas, est duplex, uempē *generalis*, per quam omnes formas respicit; & *particularis*, qua ad hanc formam in particulari potius inclinatur quā ad illam.

CONCLUSIO.

Potentia generalis materia ad omnes formas non est illi essentialis, sed est tantum ipsius proprietas: potentia verò particularis ad hanc formam potius quā ad illam est tantum accidentalis. Hæc conclusio, quantum ad primas partes, intelligitur de potentia materiæ formaliter sumpta, non verò de potentia eius fundamentaliter spectata. Per potentiam formalem materiæ intelligitur ex Scotto *dist. 43. quæst. 3.* relatio potentialitatis realiter inhærens materiæ, per quam ipsa materia dicitur *formaliter* potens recipere formam. *Fundamentalis* autem potentia est radix seu principium potentialitatis à qua emanat *formalis* potentia, sicut risibilitas resultat ex rationalitate. Quantum ad hanc potentiam fundamentalem materiæ, affirmat Scotus loco præcitato eam esse de eius essentia; & hoc conformiter Aristoteli 2. *de anima cap. 2.* dicenti materiam esse potentiam, & formam esse actum; quod dicere est, sicut forma essentialiter est actus, ita materia fundamentaliter sumpta est potentia.

Probatur prima pars conclusionis, quod potentia generalis materia ad omnes formas non sit illi essentialis. Nulum enim relatiuum est de essentia absoluti, cum abso-

absolutum & respectuum opponantur, tanquam modi qui diuidunt ens; sed entitas materiæ est ens absolutum, & potentia est relatio transcendentalis receptiui ad receptibile, ut ait doctor præcitatus: ergo potentia formalis materiæ ad formas, non est illi essentialis.

Probatur secunda pars, quod potentia generalis materiæ sit proprietas illius. Omne perfectibile habet ordinem intrinsecum ad sui perfectum; sed materia, quæ de se est imperfecta, perficitur per formas: ergo materia habet ordinem intrinsecum ad formas. Ordo autem ille intrinsecus seu potentia, vel est essentialis, vel proprietas materiæ: non est autem essentialis, ut mox probatum est: ergo superest, ut sit materiæ proprietas.

Probatur tertia pars, quod potentia particularis materiæ ad hanc formam potius quàm ad aliam, sit tantum accidentalis. Inclinator seu potentia quam habet materia ad formam particularem procedit ex certis accidentibus & dispositionibus præuijs, quæ præparant materiam ad talem formam in particulari recipiendam; sed illæ dispositiones, cum sint accidentales, quandoquidem materia est indifferens ad illas vel ad alias, possunt separari à materia: ergo inclinatio particularis materiæ ad vnā formam potius quàm ad aliam est purè accidentalis.

Objicies in primam partem, illud sine quo non potest concipi materia est illi essentialis; sed sine potentia generali ad formas non potest concipi materia prima, quandoquidem talis aptitudo definitionem ipsius ingreditur: ergo potentia est essentialis materiæ. Resp. distinguendo minorem: materia non potest concipi sine potentia: non potest concipi conceptu *extensiuo*, qui terminetur ad omnia quæ pertinent ad materiam, siue sint essentia illius, vel tantum proprietas, concedo: conceptu *intensiuo*, qui terminetur præcisè ad entitatem materiæ, nego: licet enim conceptu extensiuo non possit concipi homo sine rationalitate, conceptu tamen intensiuo potest concipi cum sola rationalitate; sic etiam de materia, quæ cum habeat entitatem absolutam distinctam ab entitate formæ, proinde potest intelligi sine forma & sine potentia ad illam.

QVÆSTIO X.

Quomodo Materia appetat formas, & quales.

Appetitus triplex est, naturalis videlicet, sensitivus, & rationalis seu intellectivus. *Appetitus naturalis* est inclinatio quædam naturalis ab authore naturæ indita singulis rebus ad suos fines acquirendos; qui tamen non præsupponit cognitionem in re: sic graua dicuntur habere appetitum naturalem ad tendendum deorsum, & leuia sursum; quia centrum appetunt. *Sensitivus appetitus* est inclinatio in id quod per sensus bonum esse videtur; sic equus appetit fœnum appetitu sensitivo. *Appetitus intellectualis* est inclinatio rationalis creaturæ in id quod ab intellectu iudicatur esse bonum; sic omnes homines appetitu rationali desiderant beatitudinem. *Appetitus autem in se* est inclinatio rei in bonum conueniens appetenti. Porro appetitus potest adhuc dici triplex, primus est *appetitus amoris*, qui nihil aliud est quàm inclinatio in id quod nobis conuenit, siue sit præsens, siue absens. Secundus vocatur *appetitus desiderij*, qui est propensio in bonum absens. Tertius est *appetitus complacentia*, seu *delectationis* quo aliquis delectatur in bono quod possidet.

CONCLUSIO.

Materia appetit formam appetitu naturali, & non tantum unam in particulari, sed omnes indifferenter; cum hoc tamen discrimine, quod præsentis, præteritis, & futuras, appetat appetitu amoris; præsentis appetitu complacentia; absentes verò, appetitu desiderij; siue sint præteritæ, siue sint futura. Hæc conclusio quinque habet partes quarum

Probatur prima, quæ est Scoti in 4. diff. 49. quest. 10. & Aristotelis 1. phys. cap. 9. tex. 61. materia appetit formam, sicut turpe pulchrum, & fœmina marem. Ratio communis est, quod omne perfectibile appetat naturaliter suum perfectiuum, cum unumquodque propendeat in id quod est sibi conueniens; sed materia prima est perfectibilis, cum sit substantia infima, omni ornatu carens, significata Gen. 1. per terram inanem & vacuum; ergo materia appetit naturaliter formas, quæ potentia-

lita-

litem suam determinent, actuent, & quasi ornent suo splendore.

Probatur secunda pars, *quod omnes formas indifferenter appetat materia*; hoc enim tradit Doctor noster in 1. dist. 1. *quest. 1.* Quod confirmat Philosophus 1. *phys. tex. 82.* dicens materiam esse subiectum primum vniuscuiusque, id est, vniuscuiusque formæ. Cum enim quælibet forma in particulari perficiat potentialitatem materiæ, & omnes indifferenter hoc faciant, consequenter materia appetit omnes formas in communi tanquam perfectiuias suæ potentialitatis.

Probatur tertia pars, *quod appetitu amoris materia appetat formas præteritas, præsentis, & futuras*. Amamus enim communiter quæ afferunt nobis perfectionem; sed omnes formæ, præteritæ, præsentis, & futuræ materiam perficiunt, ipsam exornando, eam ad operandum disponendo, & illam deducendo ad suum finem, nempe ad compositionem corporis naturalis ex materia & forma coalescentis; ergo materia prædictas formas appetit indifferenter appetitu amoris.

Probatur quarta pars, *quod materia appetat formas præsentis appetitu complacentiæ*. Quia materia, naturaliter inclinata ad sui perfectionem, habet aliquem appetitum circa formam quam actu possidet; sed ille appetitus non est appetitus desiderij, qui tantum fertur circa bonum absens: ergo appetitus ille materiæ ad formam præsentem erit appetitus complacentiæ, sibi enim complacere videtur materia, quod formam habeat, per quam tollatur sua potentialitas, quæ imperfectionem redolet.

Probatur quinta pars, *quod materia appetitu desiderij appetat formas absentes*, ut tradit Doctor noster, in 4. dist. 49. *quest. 4.* Desiderium enim est appetitus rei non habitæ, ut colligitur ex Aug. in *psal. 118.* dicente *desiderium esse rerum absentium concupiscentiam*, gaudium verò & complacentiam esse de re presenti & possessa, qua quis fruatur & potitur. Quando ergo materia non habet formam, illam appetit appetitu desiderij, siue illam habuerit antea siue non: & sic desiderium materiæ fertur circa formas præteritas & futuras.

Obijcies 1. Quod caret cognitione nihil appetere potest; sed materia prima caret cognitione sensitiva & rationali: ergo nihil appetit. Resp. distinguendo maiorem, nihil appetit appetitu sensitivo aut intellectuivo, con-

concedo : appetitu *naturali*, nego. Vel, nihil appetit appetitu *elicito*, concedo : appetitu *innato*, nego. Dices si materia appeteret indifferenter omnes formas, appeteret eas quas habet, & eas quas non habet : sed non appetit eas quas habet, quia *non optat quod possidet* ? nec etiam eas quas non habet, quia esset in statu violento sub forma quam possidet actu, quod dici nequit, cum omnes appetat, & proinde illam non habet de presenti : ergo materia non appetit indifferenter omnes formas. Resp. materiam ut diximus appetere formas, tum presentes, tum absentes, sed differenter : presentes nimirum appetitu *complacentia*, & absentes appetitu *desiderij*. Licet autem materia appetat formas absentes, non tamen est violenter sub forma presenti ; quia non habet appetitum determinatum & particularem ad formam absentem, quod tamen requiritur, ut aliquid dicatur esse in statu violento ; ut patet de lapide, qui motus sursum violentatur, quia habet inclinationem determinatam ad tendendum deorsum.

Obijcies 2. Materia non potest appetere formam absentem, nisi appetat destructionem formæ præsentis ; quandoquidem sunt impossibiles : ergo vel non complacet in forma præsentis, quod est contra superius dictum, vel absentem non appetit. Resp. ad antecedens, materiam non appetere corruptionem formæ præsentis, nisi tantum per accidens ; considerat enim suo modo formam absentem tanquam sui perfectionem, non attendendo, utrum alia debeat destrui, vel non. Nec in hoc dici debet, quod materia appetens formam absentem intendat *malum natura*, nempe destructionem formæ præsentis, talem enim destructionem non intendit nisi per accidens. Nam materia per se fertur in formam, quod est sibi bonum connaturale & perfectiivum ; quia tamen forma absens non potest introduci, nisi præsens destruat, quia scilicet agens non potest introducere novam formam in materia, nisi destruat præsentem ; idèo tantum accidentaliter materia tendit in destructionem præsentis formæ, & quasi præter intentionem suam. Nec hoc purè est malum, quandoquidem cedit in bonum uniuersi, cuius pulchritudo consistit in ea varietate rerum quæ modò nascuntur, & modò intereunt.

Obijcies 3. Materia non appetit id quod non potest obtinere ; sed potest obtinere formas præteritas, quæ

que corruptæ sunt, cum à *privatione ad habitum non* detur regressus: ergo non rectè dictum est in quinta parte conclusionis, quòd materia appetat formas absentes, præteritas, & futuras. *Resp.* materiam non appetere formas præteritas, ut sunt impossibiles, sed ut sunt formæ sui ipsius perfectiuræ. Quòd autem potentia materiæ extendatur ad formas habitas & iam amissas, hoc defendit Scotus in 4. dist. 43. quæst. 3. Anima enim rationalis, quæ est forma corporis humani, separata à corpore, naturaliter inclinatur ad idem corpus informandum: ergo materia appetit formas præteritas & corruptas.

Dices inclinatio illa animæ ad corpus, aut corporis ad animam, non est naturalis; quia talis reunio non est possibilis per virtutem naturalem & creatam, & nihil potest appeti naturaliter, nisi naturaliter obtineri possit. *Resp.* talem inclinationem animæ esse naturalem ex Aug. 12. ad *Gen. de litt. cap. 35.* Quod confirmat Scotus in 4. dist. 49. quæst. 3. ubi apertè tradit animam rationalem à corpore seiunctam suapte naturâ propendere ad unionem corporis prius informati. Ut salvetur autem naturalitas talis inclinationis, sufficit, quòd illa reunio sit possibilis, siue ab agente creato, siue ab agente increato; materia enim semper respicit illam formam & perfectiuram sui, siue possit illam obtinere ab agente creato, vel increato; ergo qualitercumque restitui possit, semper inclinationem habet ad illam; quandoquidem ad talem restitutionem nulla est impossibilitas aut contradictio.

Quæres quòduplex sit appetitus materiæ. Non desunt qui existiment, tot esse appetitus particulares in materia, quot sunt formæ particulares, quibus potest informari; verisimilius tamen est, quòd vnico appetitu materia tendat in omnes formas in communi, & singulas formas in particulari, nedum penes gradum genericum & specificum; sed etiam penes gradum singularem, ut docet Scotus 5. met. quæst. 7. & postea in 1. dist. 1. quæst. 1. ac denique in 4. dist. 43. quæst. 3. Ratio huius responsionis sumitur ex Arist. 1. *Phys. text. 81.* dicente, quòd *materia appetat formam, sicut turpe appetit pulchrum*: sed turpe nedum appetit pulchrum in communi, v. g. bonum in se, sed etiam pulchrum in particulari, nempe bonum hoc, pulchrum scilicet: ergo appetitus formarum quana
ha-

habet materia est vniuersalis tendens ad formas genericas, specificas, & numericas.

An autem materia æquali appetitu appetat omnes formas; Ruuius & Ariaga existimant materiam appetere æquali appetitu omnes formas, tam nobiles, quàm ignobiles: Scotus verò in 4. dist. 49. quæst. 10. docet materiam magis appetere nobiliores. Quia, sicut *perfectibile appetit perfectiūm*, sic magis perfectibile magis perfectiūm, & maximum perfectibile, maximum perfectiūm. Hoc non impedit tamen, quin materia habens formam nobiliorem appetat subesse formæ ignobiliori, vt docet doctor; quia materia tendit in quodcumque perfectiūm sui, & proinde in quamlibet formam etiam ignobiliorem, quia ab illa perficitur; & per accidens est, quòd non possit obtinere ignobiliorem sine nobilioris destructione: vnde dicit nequit, quòd appetendo imperfectiorem tendat in malum, nempe in destructionem perfectioris formæ; quia hoc fit tantum per accidens, vt prædiximus. Quòd si materia gauderet formā perfectissimā virtualiter comprehendente reliquas omnes formas, tunc appetitus materiæ terminaretur, vt innuit expressè Doctor in 1. dist. 1. quæst. 1. Nec contra istud dici debet, quòd appetitus non possit satiari, nisi per adeptionem boni infiniti omne bonum continentis, nec proinde appetitum materiæ posse compleri per formam perfectissimam naturalem, quæ semper remanet finita: antecedens enim non est verum de appetitu *naturale*, vel *animali*, qui infinitum appetere non potest; sed tantum de appetitu *rationali*, qui est capacitati, infinitæ.

QVÆSTIO XI.

An Materia Prima sit per se cognoscibilis.

Aliquid potest tripliciter cognosci, *per se*, *per accidens*, & *per argumentationem*. Id quod ingerit sensibus speciem sui est *cognoscibile per se*, vt albedo parietis. Illud quod est cognoscibile per accidentia, seu per formas, dicitur *cognoscibile per accidens*, vt substantia & materia prima. Illud denique quod est cognoscibile tantum per illationem, & quatenus infertur ex alio, dicitur *per argumentationem cognoscibile*, vt Angeli, qui cognoscuntur per effectus; & Deus, per

per creaturas. Hoc tamen intelligi debet pro hoc statu, quo utimur sensibus ad cognitionem spiritualium; non verò pro statu animæ separatæ, quæ Deum, Angelos, & substantias cognoscet *per se*, & *intuitivè*.

CONCLUSIO.

SI Materia consideretur ut est entitas absoluta, cognoscibilis est *per se*; à nobis tamen non cognoscitur nisi per formas. Prima pars est Scoti in 2. dist. 12. quæst. 1. & 2. Metaph. quæst. 2. contra Thomam, qui volens materiam non habere existentiam à forma distinctam, tenet illam non esse *per se cognoscibilem*. Ratio nostra est, quia omnis entitas absoluta est de se cognoscibilis, quandoquidem cognoscibilitas est passio entis, ex Arist. 2. Metaph. text. 4. sed materia est ens reale positivum, & absolutum; cum ex eodem Philosopho 12. Metaph. cap. 2. sit substantia: ergo materia prima est cognoscibilis *per se*. Deinde, omne ens est obiectum intellectus, cum sit *verum*; sed materia est ens, quamvis exile, & imperfectum; ergo. Tandem si materia non esset *per se cognoscibilis*, non esset etiam definibilis, cum definitio sit instrumentum cognitionis scientificæ; sed materia prima definitur ab Aristotele: ergo materia prima est *per se cognoscibilis*.

Secunda pars est eiusdem Doctoris nostri præcitati. Quia pro hoc statu non possumus cognoscere res, nisi sint sensibiles in se, vel in suis effectibus; sed materia non est sensibilis in se, quia nec est quid, nec quantum, nec quale, &c. Ergo non potest cognosci, nisi per effectus quos habet circa formam; quatenus illam sustentat, est subiectum ex quo educitur, & est principium corruptionis formæ: ergo non est à nobis cognoscibilis pro hoc statu, nisi per effectus, & formas. Hoc confirmat Aristoteles 2. de Generat. text. 53. dicens. quod sicut se habet statua ad artem, sic se habet forma ad materiam; sed non cognoscimus materiam aris ex qua fit statua, nisi per formam statuæ: Ergo nec possumus cognoscere materiam rerum naturalium, nisi earum per formas.

Obijcies illud non est *per se cognoscibile*, quod nec est actus, nec actum habens; sed materia talis est: ergo. Resp. dist. min. materia non est actus, nec habens actum; formalem, & physicum, concedo; entitativum, & nec.

& metaphysicum, nego. *Dices*, omnis potentia est occulta: sed materia est potentia: ergo. *Resp.* materia est potentia, *subiectina*, concedo: *obiectina*, nego. Materia enim est actus entitativus, qui per se est cognoscibilis, quoniam omne ens reale, cum sit *verum*, est per se cognoscibile; siue sit substantia, siue sit accidens; siue sit ens completum, siue sit ens incompletum; cum hoc tamen discrimine quod illud ens, quod habet maiorem actualitatem, sit magis cognoscibile; quia cognoscibilitas sequitur veritatem, & veritas entitatem. *Si dicat Aristoteles 7. Metaph. text. 35.* materiam esse per se ignotam; hoc ideo dicit, quia materia non est prima ratio cognoscendi, sed forma; quæ in causa est, cur materiam pro hoc statu cognoscamus.

Quæres utrum materia prima sit pura potentia Physica. Hoc negant aliqui cum *Auicenna lib. 1. Sufficientia* ubi in materia prima dicit esse formam quamdam substantialem, ipsi congenitam, per quam materia habet, quod sit corpus indeterminatum, & determinabile ad alias formas; quæ forma corporeitatis indeterminata facit, ut materia alias formas appetat, per quas determinatur ad tale vel tale corpus determinatum, ver. gr. equi, lapidis, arboris, &c. Vnde in illorum mente quodlibet compositum habebat duas formas substantiales, vnam generalem, incorruptibilem, & ingenerabilem, semper in materia manentem, per quam materia habet ut sit corpus indeterminatum, & aliam particularem, de potentia materiæ educibilem, per quam habebat, ut sit tale vel tale corpus. *Aristoteles tamen 1. Phys. cap. 5.* longè verisimilius respondet materiam esse puram potentiam Physicam, nec habere formam corporeitatis sibi coquam; ibi enim dicit materiam esse informem, seque habere ad omnes formas substantiales, sicut materia artis ad formas artificiales; sed materia artis nullam includit formam artificialem sibi congenitam: ergo nec materia prima ullam formam substantialem. Si hoc enim foret, ut voluit *Auicenna*, corpus illud materiæ primæ esset simplicius quatuor elementis, contra *Aristotelem*, qui *2. Metaph. cap. 3.* reprehendit illos Philosophos, qui admittebant corpus aliquod quatuor elementis prius, & simplicius.

Si dicatur in fauorem *Auicennæ*, quod sicut ex non substantia non potest fieri substantia, sic ex non corpore non possit fieri corpus: ergo quando educitur corpus
de

de materia, vel materia erat corpus, vel non: si erat corpus, habetur intentum Avicennæ, si verò materia non erat corpus, ex non corpore corpus fit, quod dici non potest. *Resp.* Materiam dici corpus, & corpoream in potentia, quæ potest recipere formam corporeitatis ex seipsa educendam; non verò erat corpus actu, propter rationes præallegatas. Nec mirum videri debet, quòd ex non corpore actualiter fiat corpus actuale, quia omnes formæ includuntur virtualiter in potentia materiæ, quæ est fons, & radix omnium formarum substantialium. Nec dicatur etiam quòd talis forma corporeitatis crearetur, si non præexistit in materia; licet enim fiat ex *nihilo sui*, fiat tamen ex præexistenti subiecto, nempe ex materia prima, quæ est subiectum omnium formarum.

Quæres, utrum materia sit tantum passiva. Quia multipliciter potest intelligi hæc quæstio, multipliciter etiam debet responderi ad illam. *Dico ergo primo*, Materiam esse suarum passionum causam, ut innuit Scotus in 4. dist. 12. q. 3. A natura enim specifica profluunt proprietates; sed materia est natura specifica, licet imperfecta, incompleta, & partialis, diximus enim quæst. 6. quòd materia sit una specie: ergo ipsa est causa suarum proprietatum, quæ sunt præsertim *Ingenerabilitas, Incorruptibilitas, perpetuitas, Possibilitas, Apperibilitas formarum, & Cognoscibilitas illius per easdem formas.* *Dico secunde*, Materiam in suo genere materiali concurrere ad educendam formam, ex eodem Doctore præcitato, & 4. *Metaph. ad titulum 20.* Materia enim ex Arist. 2. *Phys. text. 28.* est id, ex quo aliquid fit cum inest; si ergo ad generationem compositi cooperatur materia; ergo, & ad educationem formæ concurrit materialiter, cum forma dependeat à materia *in esse, & in fieri*; ob hoc enim forma dicitur materialis. Nec dicatur ex hoc sequi unum principium fieri ex alio, nempe formam ex materia; quia, ut diximus, agendo de principiis, forma non propriè fit, sed educitur 3. compositum verò id est, quod propriè dicitur fieri. *Dico 3.* Materiam exercere aſtuitatem partialem in generatione totius compositi, ex Doctore in 3. dist. 2. quæst. 2. Compositum enim ab Arist. 7. *Metaph. text. 7.* dicitur causatum ex forma, & materia, tanquam ex duabus causis partialibus, unam totalem integrantibus: unde materia dicitur una ex causis.

Dico quarto materiam non concurrere ad operationes, quas elicit compositum; sic Doctor noster, qui distinguens totum à suis partibus simul sumptis, dicit actiones eius procedere à toto, & nequaquam à partibus eius, præsertim à materia, quæ est passiva, Quod confirmat Arist. 1. de Anima text. 64. ubi negat actiones quæ toti conveniunt, vt adificare, texere, & alia quæ homini tribuuntur, competere animæ ipsius: ergo materia non concurrat ad illas actiones. Deinde si materia concurreret actiue ad effectus compositi, non foret distinctio inter agentia naturalia quandoquidem eandem participant materiam, quæ esset commune instrumentum agendi. Tandem per solam analogiam ad formas materia est à nobis cognoscibilis, vt probatum est antea; sed si materia esset principium actionum compositi, per tales actiones cognosceretur: ergo materia non concurrat ad actiones totius, Sic ergo intelligendi sunt philosophi, qui dicunt materiam esse tantum passivam; quod scilicet materia non cooperetur ad actiones compositi; licet in precedentibus possit dici activa; quatenus est causa suarum passionum, quatenus concurret materialiter ad educationem formæ, & quatenus in suo genere causæ materialis concurret partialiter ad generationem totius.

Q V Æ S T I O XII.

Verum Materia sit Ingenerabilis, & Incorruptibilis.

HÆc est differentia inter Generare, & creare, quod *creare* sit producere aliquid ex nihilo; vt quando Deus produxit mundum, & Angelos; *generare* autem sit producere aliquid ex præexistenti subiecto, & sic forma dicitur generari; quia educitur de potentia materiæ, tanquam de subiecto. In hoc etiam differunt annihilare, & corrumpere, quod *annihilare* sit aliquid reducere in nihilum, ita vt nihil remaneat de materia aut de forma rei annihilatæ; *corrumpere* verò est resolvere compositum, non in nihilum, sed in aliud subiectum; ita vt materia primæ rei corruptæ remaneat sub alia forma: sic quando de ligno fiunt cineres, lignum dicitur corrumpi virtute ignis, & non annihilari; quia materia prima, quæ erat sub forma ligni, rema-

remanet post combustionem ipsius, & induit formam cinerum.

CONCLUSIO.

Materia prima est *Ingenerabilis*, & *Incorruptibilis* *formaliter*, *sen terminatiue*, licet possit dici *Generabilis*, & *Corruptibilis* *subiectiue*, vt tenet Scotus 7. *Metaph. quæst.* 10. & innuit Aristoteles 8. *Metaph. text.* 4. vbi materiam sublunarium vocat generabilem & corruptibilem. Idè autem materia dicitur generabilis, & corruptibilis *subiectiue*, quia est commune subiectum generationis, & corruptionis ex Aristot. 1. *Phys. text.* 82. sed forma inexisteris subiecto denominat subiectum in quo existit, vt patet de albedine, quæ parietem in quo est denominat album: ergo materia *subiectiue* potest dici generabilis, & corruptibilis. Adde quòd, quidquid mutatur à non subiecto ad subiectum, est generabile, cùm ex Arist. 5. *Phys. text.* 7. generatio sit mutatio à non subiecto in subiectum; sed materia prima mutatur de non subiecto in subiectum, vt à non aqua ad aquam; transit etiam de subiecto ad non subiectum, & de aqua ad non aquam; ergo materia prima est generabilis, & corruptibilis *subiectiue*.

Quòd materia prima sit *ingenerabilis*, & *incorruptibilis* *terminatiue*, & *formaliter*. Docetur similiter à Scoto 7. *Metaph. quæst.* 8. & ab Aristotele 1. *Phys. text.* 82. Primò est *Ingenerabilis*, quia id quod non sit ex *præexistente* subiecto est ingenerabile; sed materia prima non sit ex præexistente subiecto, aliàs non esset primum principium, sed esset principiatum: ergo materia prima est ingenerabilis. Secundò est *Incorruptibilis*, quia illud est incorruptibile, quod non potest resolui in subiectum post corruptionem remanens; sed materia prima non potest resolui in subiectum, quod post corruptionem remaneat, aliàs reuerteretur in seipsam, cùm ipsa sit subiectum ex quo omnia fiunt, & in quod omnia resoluuntur: ergo materia prima est incorruptibilis, sicut ingenerabilis. Ob hoc diximus antea materiam primam non habuisse *suum esse*, nisi per creationem; nec proinde potest destrui, nisi per annihilationem. Quòd si aliquando dictatur *generabilis*, & *corruptibilis*, ibi generatio, & corruptio sumuntur late, Vide

videlicet pro creatione, iuxta id quod habetur Ioan. 1. *Omnia per ipsum facta sunt*, & proinde materia, quæ facta dicitur, vel potius creata.

Obijcies 1. compositum substantiale est corruptibile; ergo, & omnes eius partes, & proinde materia. *Resp.* negando consequentiam: ut enim compositum sit corruptibile, sufficit quod vna pars possit corrumpi, nempe forma; imò satis est quod partes separentur, ut patet de homine, cuius anima, & corpus remanent, sed dissoluta. *Dices*, Propter materiam compositum est corruptibile: ergo ipsa est magis corruptibilis, iuxta effectum commune, propter quod unum est tale, & illud magis. *Resp.* negando consequentiam. Axioma verò allegatum intelligitur; ut diximus, quando id in quo sit comparatio conuenit utrique; ita quod, si corruptibilitas conueniret materiæ, sicuti conuenit composito materia esset magis corruptibilis quam compositum, si propter illam compositum esset corruptibile; sed quia corruptibilitas non potest conuenire materiæ, ideò licet propter materiam compositum sit corruptibile, ipsa tamen non est corruptibilis, ut probatum est.

Obijcies 2. agens naturale potest agere in compositum, ipsum generando, & corrumpendo: ergo partes eius potest generare, & corrumpere; *quidquid enim potest maius, potest & minus*. *Resp.* negando consequentiam; axioma autem verificatur tantum in illis quæ sunt eiusdem rationis, non verò in illis quæ diuersam habent rationem: unde non bene sequitur, quod homo possit generare canem, quia potest generare hominem qui est perfectior. Quandoquidem ergo compositum est alterius rationis à materia, licet agens naturale possit agere in compositum quod generat, & corrumpit, quia de se est generabile, & corruptibile; non propterea sic agere potest in materiam, quæ est ingenerabilis, & incorruptibilis, & proinde extra sphaeram actiuitatis agentium naturalium. *Dices* forma potest corrumpi: ergo, & materia, quæ forma indiget ut existat. *Resp.* Ex ordine quem præfixit Deus rebus creatis materia non possit quidem esse absque forma naturaliter; attamen cum propriam existentiam habeat, Deus potest concursu suo generali conseruare materiam sine forma; & sic licet forma corrumpatur, materia tamen incorruptibilis est.

Si quærat autem ex quotuplici capite res possit dici;
incor-

incorruptibilis: Respondebitur res tripliciter dici incorruptibiles. *Primò* quando non habent principium corruptionis, nempe materiam primam, & propter hanc rationem Angeli sunt incorruptibiles. *Secundò* quando aliquid non habet contrarium corrumpens, quod possit formam vincere; sic cœli sunt incorruptibiles, quia nullum est agens naturale tantæ virtutis, vt possit destruere formam cœlorum: vnde diximus illos esse incorruptibiles ab *extrinseco*, & corruptibiles ab *intrinseco*, nempe materia prima. *Tertiò* aliquid dicitur ingenerabile, quando non potest educi de potentia alterius, & propter hanc adhuc rationem materia prima, quæ non potest educi ex potentia alterius, cum ipsa sit primum principium, est ingenerabilis. *Quod materia prima priuatione induta sit radix corruptionis rerum materialium*, innuitur ab Aristotele 1. *Phys. text. 80.* dicente materiam formam priuatam machinari maleficium; id est, destructionem compositi: & hoc, quia habet semper appetitum ad formas, quarum vna non potest introduci, nisi per definitionem alterius.

Quæres an materia sit substantia. *Resp.* affirmatiuè, quia ipsa non est accidens; deinde materia per se subsistit, quoniam est ens quod ex se habet essentiam, existentiam, & subsistentiam independentem à forma. *Tandem* idè composita plurima dicuntur substantialia, quia eorum materia est substantialis. *Dices* materia non reponitur in prædicamento substantiæ: ergo non est substantia. *Resp.* non reponi per se, & directè, benè autem indirectè, & per compositum, cuius est pars essentialis. Solæ autem substantiæ completæ sunt directè in prædicamento substantiæ, vt genera, species & indiuidua, quæ componuntur ex materia, & forma. *Quod materia sit substantia*, deducitur ex Scoto in 2. *dist. 12. quæst. 1.* & probatur ex Arist. qui 1. *Metaph. cap. 3.* diuidit substantiam in materiam, formam, & compositum. Materia, inquam, est substantia partialis & incompleta, vt patet ex eodem Philosopho ibidem dicente materiam esse partem compositi substantialis: vnde compositum ex materia, & forma est vnum per se constans ex perfectibili, & perficiente, seu ex determinabili, & determinante. Quod si ex Ang. materia dicatur esse propè nihil, 12. *Confess. cap. 32.* non idè dicitur propè nihil, quasi non sit ens verum, reale, pos-

tium, & substantiale; sed quia inter substantias tenet locum infimum, cum careat omni formâ, & omni perfectione.

Quæres. *utrum materia sit corpus*. Aliqui Respondent affirmatiuè, dicentes quòd si materia sit substantia, debeat proinde esse corpus; cum substantia adequatè diuidatur in spiritualem, & corporalem; & sic cum materia non sit substantia spiritualis, volunt illam esse corpus. Resp. tamen negatiuè, quòd materia non sit corpus actu, aliàs materia prima haberet formam corporeitatis, & daretur aliquod corpus quod esset simplicius elementis, nempe ipsa materia prima: quod est contra Aristotelem, vt probauimus quæst. 11. Licet tamen materia prima non debeat dici corpus *actu*, dici tamen potest corpus *in potentia*, quatenus materia prima nata est apta recipere formam corporeitatis. Ad id quod dicunt *substantiam adequatè diuidi in spiritum, & corpus*, hoc verum est de substantia completa quòd distribuitur in spiritualem, & corpoream; vnde cum materia non sit substantia completa, ideo non est de se corporea aut spiritualis *actu*, quia nullam ex se habet formam; sed est corporea potentialiter quatenus forma corporeitatis educi potest de eius potentia.

Quæres, *utrum materia ex se habeat quantitatem*, seu vt alij dicunt, *utrum quantitas sit coena materia*. Resp. negatiuè, quia materia in sua definitione nec est quid, nec quantum, nec quale. Deinde accidentia habent pro subiecto substantiam completam, & sic quantitas non recipitur in materia; nisi post formam substantialem, quæ ipsam compler, & reddit capacem accidentium. Tandem substantia præcedit accidens natura, & tempore: Ergo priùs debet esse completa, quàm recipiat quantitatem: vnde dicendum est; quòd ex potentia materiæ educatur immediatè forma substantialis, & postea illi adueniat quantitas, quæ est subiectum aliorum accidentium. Si dicatur compositum esse diuisibile, & proinde quantitatem, qua redditur diuisibile, præcedere formam substantialem eius. Resp. compositum, vt resultat præcisè ex materia, & forma substantiali, nondum esse diuisibile; licet habeat partes substantiales: sed dum immediatè, post vnionem formæ cum materia, quantitas educitur ex toto composito; protunc redditur diuisibile, & habet partes quantitatuas. Si dicatur quòd compositum non possit

possit denudari quantitate, hoc ideo est, quia non potest denudari omniforma. Adde quòd per potentiam D. possit spoliari quantitate.

Ad hoc quod dicitur Henricus & quidam alij, in materia praeexistere formam ipsi coaevam, coagentem agentis extrinseco ad compositum generandum; hoc communiter negatur ab alijs, conformiter ad Aristotelem 1. *Phys. text. 82.* dicentem solam materiam esse ingenitam, quod non esset verum, si materia haberet aliquam formam. Idem confirmat Philosophus 7. *Metaph. text. 29.* dicens, sicut domus solum à principio extrinseco fit, puta ab agente intellectuâli, sic ignis generatur, non à principio intrinseco, sed ab extrinseco duntaxat: & sic in materia nihil reperitur ingenitum, quod concurrat ad productionem novae formae, nec ad generationem compositi; nec proinde inter formam & priuationem eius existit alia inchoatio formae, nisi potentia ipsius materiae, ex qua omnes formae educuntur: Quando ergo Aristoteles 7. *Metaph. text. 29.* ait in materia præcedere partem rei generandae, per talem partem intelligi debet potentia quam habet materia, ut ex seipso educatur forma per generationem. Si dicatur formam ergo creari, si nihil illius præcedat in materia, quod sit ipsi coaevum, negatur consequentia, quia forma illa non producitur ex nihilo, sed ex præexistente materia educitur.

C A P V T II.

De Priuatione.

QVI ordinem dignitatis sequeretur, loquendo de principijs rerum naturalium, prius agere deberet de forma, quam de Priuatione, quoniam forma, quæ est ens positivum, & nobilior pars compositi, longè excedit priuationem, quæ ab Arist. vocatur *maleficium natura*, non quòd procedat à malo principio, sed quia dicit carentiam formae, quæ est *bonum naturæ*, & perfectio vniuersi: nos autem qui ordinem naturæ sequi meditamur, prius habemus agere de priuatione, quam de forma. Cum enim debeamus loqui de generatione rerum naturalium, quæ ad Physicam pertinent; & generatio sit transitus à non esse tale ad esse tale, & terminus à quo, qui est non esse formæ, præ-

cedat terminum *ad quem*, qui est forma ipsa; idèd nobis primò loquendum de priuatione, sed breuiter; & querendum tantùm *quid sit priuatio, an sit ens reale, & utrum debeat dici principium rerum naturalium.*

QVÆSTIO PRIMA.

Quid sit Priuatio.

Admitti Priuationem à parte rei negant Soncinas & alij Thomistæ. Affirmat verò Scotus astruens priuationem in rerum natura independentem ab opere intellectus in 1. dist. 23. *quæst. vn. & 5. Metaph. cum Arist. cap. 22.* Habetur enim Gen. 1. *Tenebra erant super faciem abyssi*; & per tenebræ intelliguntur priuationes lucis, vt insinuat Aug. lib. de Gen. ad litt. cap. 5. *Aliud est lux, aliud sunt priuationes lucis, quas in tenebris ordinauit Deus.* Ratio huiusce veritatis est, quòd *opposita sint à parte rei*, priuatio autem & forma opponuntur. Deinde à parte rei homo cæcus dicitur priuari visu, & surdus auditu; & sic priuatio est quid à parte rei existens, & nullo cogitante intellectu. Quid sit autem illa priuatio, dicet

CONCLUSIO.

Priuatio est carentia formæ naturalis in subiecto apto ad illam recipiendam. Sic Scotus in 1. dist. 5. *quæst. 21* cum Arist. 5. *Metaph. cap. 22.* vbi sic definit priuationem propriè dictam. Dicitur primò *carentia formæ*; & est veluti genus definitionis, in quo conuenit priuatio cum negatione pura. Dicitur secundò *naturalis*, cum enim loquimur hic de priuatione, vt est principium rerum naturalium, loquimur etiam tantummodò de priuatione naturali; non verò de priuatione formæ artificialis, qualis est statua; nec de priuatione formæ supernaturalis, qualis est gratia. Dicitur tertiò *in subiecto apto ad formam*; quia si subiectum non possit illam formam recipere, non est propria priuatio, sed pura negatio; vt carentia visus in lapide. Priuatio enim dupliciter sumitur, *latè* scilicet, & *strictè*. Prima dicit carentiam formæ, siue subiectum si capax illius, siue non; & tunc est negatio, priusquam priuatio. Secunda dicit carentiam formæ in subiecto apto ad illam

iam, & sic homo surdus dicitur habere priuationem auditus, quia auditionem recipere potest.

Obijcies. Si priuatio definiretur, esset aliqua res positiua, quia definitio est explicatio rei; sed priuatio non est res positiua: ergo definiri non potest. *Resp.* distinguendo maiorem; si definiretur definitione *positiua*, esset res positiua, concedo: si definiretur definitione *negatiua*, esset res positiua, nego: talis enim debet esse definitio, quale est definitum; vnde quia priuatio quam definiuimus est quid negatiuum, definitionem tantum negatiuam potest habere. *Dices.* Priuatio non potest definiri per *genus*, quia genus est quid positiuum. *Resp.* priuationem non definiri reuera per *genus proprium*, quia nullum tale habere potest cum non sit quid prædicamentale; sed aliquid ponitur in præcedenti definitione, quod tenet locum generis, nempe carentia formæ; in quo conueniunt priuatio, & negatio, vt diximus. Vbi

Notandum est priuationem propriè sumptam duo dicere, *unum* pro formali, quod est carentia formæ; & *aliud* pro materiali, quod est subiectum ad formam accipiendam idoneam. Quantum ad *primum*, inter se conueniunt priuatio & negatio; quia vtrumque dicit carentiam formæ. Quantum verò ad *secundum*, distinguuntur, quia priuatio poscit subiectum idoneum ad formam, quod negatio non requirit: ob hoc D. Aug. 3. de *Libero Arbitrio* cap. 24. ait: *Cacitas in catulis nascentibus propriè cacitas dici non potest, nec infans dicitur imprudens, quia nondum est capax prudentiæ.*

Q V Æ S T I O II.

An Priuatio sit Ens Reale.

EX hoc quod diximus in annotatione præcedentis quæstionis, priuationem existere à parte rei in rerum natura, nec esse purè ens rationis à solo intellectu dependens, non debet intelligi quòd admittamus priuationem esse ens reale positiuum propriè sumptum: licet enim ens latissimè acceptum, prout abstrahit à passiuo & negatiuo sit æquiuocum, vt insinuat Doctor in report. in 1. dist. 42. quæst. 1. & possit diuidi ens reale sic sumptum in positiuum, priuatiuum, & negatiuum

quo sensu omnis priuatio potest dici realis, & ens reale improprie, quia est de facto & independenter ab intellectu: attamen, si ens sumatur *proprie*, vt illud accipere intendimus, non debet dici quod priuatio sit ens reale.

CONCLUSIO.

P*riuatio non est, nec debet dici, ens reale; quia ex Arist. 1. Phys. text. 75. priuatio est non ens: vnde in definitione sua dicitur carentia formæ. Deinde negatio & priuatio sunt eiusdem generis; sed negatio non est quid reale, aliàs non daretur oppositio contradictoria, quæ est inter ens & negationem entis, seu inter ens & non ens: ergo negatio non debet dici ens reale, nec proinde ens positium, benè autem ens priuatiuum, vt innuit Doctor noster 4. Metaph. cum Philosopho ibidem text. 2. vbi priuationes & negationes affirmantur esse entia, & proinde entia priuatiua cum entia positiua non sint.*

Obijcies 1. si priuatio sit ens independentens ab intellectu, vt prædictum est in quæst. antecedenti, erit vtique ens reale; si autem priuatio est ens reale, erit ens reale positium, quandoquidem res, à qua ens dicitur reale, perinde est ac positium: & sic ruit tota conclusio, in qua dicitur, quod *priuatio non sit ens reale, nec ens positium*. Resp. quod priuatio sit ens, non quidem *proprie & strictè* sumptum, quia ens sic acceptum sumitur pro solo ente realis positio, qualis non est priuatio, quæ est tantum ens latissimè acceptum: quo sensu diximus, ens reale independentens ab intellectu diuidi equiuocè in ens positium, priuatiuum, & negatiuum. Quando autem infertur *quod priuatio foret ens positium, si esset ens reale*, hoc debet negari: quia *positium* non dicitur nisi de ente reali *proprie* sumpto, quod non conuenit priuationi, quæ est tantum ens reale sumptum *improprie*; vnde diximus meritò, quod priuatio sit realis; quia cæcus à parte rei cæcus, & quod etiam sit ens reale largè sumptum, non quidem positium, sed priuatiuum.

Obijcies 2. quod sensu percipitur est aliquid reale ex Arist. 2. de Anima cap. 2. sed silentium auditur, & tenebræ percipiuntur visu: ergo priuationes sunt quid reale & positium. Resp. distinguendo minorem, si-

len.

lentium & tenebræ percipiuntur à sensibus *præiatiuè*, in quantum sensus cognoscunt se nihil percipere; concedo: percipiuntur *positiuè*, quasi sensus exerceant actus vitales circa silentium aut tenebras: nego. Si priuationes dicantur ens positium, quia creatæ sunt, Isaia 45. *Ego Deus qui feci lucem, & creavi tenebras. Resp.* priuationes non esse creatas: vnde Aug. *quæst.* 106. *nomi & veteris Testam.* per *lucem* intelligit cælum, & per *tenebras* terram: & hoc iuxta dictum Moy- sis Gen. 1. *In principio Deus creauit cælum & terram.* Deinde intelligi potest Propheta de creatione impropria: ita quod Deus creauerit tenebras non faciendo lucem, quâ illuminarentur.

Obijcies 3. terminus *ad quem* motus est realis positius; sed priuatio est terminus ad quem corruptionis, quando enim forma corrumpitur, accedit priuatio illius formæ: ergo priuatio est quid reale positium. *Resp.* terminus ad quem est realis, in motu quo aliquid acquiritur, vt generatio: concedo: in motu quo aliquid deperditur, nego. *Dices*, in hymno trium puerorum *priuaciones* inuitant ad laudandum & benedicendum Domino, *benedicite lux & tenebra Domino*, ergo sunt quid positium. *Resp.* *tenebras* Deum benedicere metaphoricè & occasionaliter, quatenus inuitant ad laudandum Deum, qui tam mirabiliter omnia disposuit, noctem scilicet post diem ad quietem animalium. Si etiam Gen. 1. *Tenebra dicantur esse super faciem abyssi*, quasi essent quid positium. *Resp.* per hæc verba; *tenebra erant super faciem abyssi*: denotari nondum creatam fuisse lucem ad chaos illuminandum.

Q V Æ S T I O II.

Quotuplex sit priuatio.

Priuatio duplex est, nempe remota & proxima. Quia materia potest recipere omnes formas præter eam quam actu possidet, ideo respectu omnium formarum absentium dicitur habere priuationem *remotam*. Quia autem non potest illas formas recipere, nisi mediantibus quibusdam dispositionibus præuijs, quæ materiam præparant ac receptionem vnius formæ, potius quàm alterius, talis priuatio dicitur

proxima, quando dispositiones illæ in materia existunt. Qui *privationi* negant omnem entitatem; habent etiam illi negare omnem unitatem aut distinctionem; quandoquidem unitas & distinctio sunt proprietates entis: nos autem, qui in præcedenti quæstione diximus privationem esse ens reale improprie & latè sumptum, quandoquidem à parte rei cæcus est cæcus; proindè non immeritò quærimus, *quæplex sit Privatio*.

CONCLUSIO.

Priatio non est una, sed multiplex pro multiplicatione formarum, quibus opponitur. Ita Scotus in 2. dist. 12. quæst. 2. Huius veritatis probatio desumi potest ex Arist. 1. *Peri herm. cap. 5.* ubi repetit numerum negationum à numero affirmationum quod desumere est multiplicationem privationum ex multiplicatione formarum, quibus opponuntur privationes; sed formæ quibus priuatur materia sunt in multiplici numero, ut patet: ergo privatio in materia existens non est una; sed multiplex pro multiplicitate formarum. Oppositorum enim eadem est ratio 1. *Top. cap. 14.* privatio autem & forma sunt privatiuè opposita; proindèque quot sunt formæ recipiendæ in materia, tot sunt etiam privationes in ipsa materia respectu talium formarum.

Si quærat autem *per quid distinguantur privationes*; responderi debet, quòd distinguantur eodem modo quo distinguuntur formæ oppositæ; ut tradit Scotus, in 2. dist. 37. ita quòd si formæ distinguantur *specie*, ut cæcitas & surditas; privationes etiam *specie* distinguantur: si formæ verò seu habitus distinguantur tantum *numero*, ut duæ visiones: duæ illæ cæcitates distinguantur *solo numero*. Quòd si dicatur privationem esse quid vnum numero cum materia, ex Arist. 1. *Phys. text. 79.* & sic privationes non multiplicari peues multiplicationem formarum: Philosophus loquitur de unitate subiectiva; quo sensu, quia materia est subiectum privationis, materia & privatio sunt quid vnum subiectiuè; hoc non impedit tamen, quin privatio formaliter sumpta multiplicetur ad multiplicationem formarum: alia enim est privatio specifica humanitatis, & alia privatio equinitatis.

Obij-

Obijcies , vna est tantum potentia numero in materia ad omnes formas : ergo est tantum vna priuatio omnium formarum . *Resp.* esse vnam potentiam vniuersalem in materia ad omnes formas vniuersaliter consideratas ; hoc non impedit tamen , quin illa potentia vniuersalis possit subdividi in tot particulares potentias , quot sunt formæ particulares : nedum enim materia inclinatur naturaliter ad formam in genere , sed etiam ad quamlibet formam in specie , & in numero ; & sic materia debet censi habere in particulari priuationes huius & illius formæ qua caret : Cum hoc tamen discrimine , quod si habeas materia dispositiones præuias ad hanc formam potius quam ad illam , tunc priuatio illius formæ debeat vocari priuatio *proxima* ; si verò materia denudetur , talibus dispositionibus , & maneat in statu indifferenti ; tunc priuatio debet dici *remota* . His addi potest quod ad multiplicationem formarum possibilium , debeant multiplicari priuationes materiæ , quia *ad multiplicationem terminorum , relationes debent multiplicari* , vt habetur in Logica .

Q V Æ S T I O IV.

An Priuatio sit Principium rerum naturalium .

Questio hæc solutionem videtur habere per hoc quod diximus agendo de principijs rerum naturalium ; vbi probauimus illa esse in triplici numero , quæ sunt Materia , Priuatio , & Forma . Quia tamen Plato videtur facere materiam , & priuationem vnum tantum principium generationis , idè ob hanc occasionem examinari debet hæc difficultas denuò , in qua recurrendum est ad ea quæ iam dicta sunt loco præallegato .

C O N C L V S I O .

Priuatio est verum principium per se generationis naturalis , non quidem in facto esse , sed in fieri ; vt aliàs diximus ; Sic Arist. 1. *Phys.* text. 67. & 12. *Metaph.* text. 12. Sic etiam Scotus super illa loca . Illud enim est principium per se aliquius , ex quo illud oritur ; sed res naturales oriuntur à priuatione , tanquam à termino à quo , & per modum originis ; ergo priuatio est princi-

pium per se generationis naturalis. *Deinde* generatio definitur transitus à non esse ad esse; sed ille transitus exigit duos terminos, qui per se concurrunt ad generationem, nempe terminum à quo, qui est priuatio, & terminum ad quem, qui est forma; sicuti, & subiectum transiens à non esse tale ad esse tale, quod est materia: ergo priuatio est principium per se generationis *in fieri*, quia concurret ad illam ut terminus à quo. *Tandem* quando aet à tenebris transit ad lucem, principium, & terminus à quo illuminationis, est priuatio lucis: ergo principium generationis est formæ substantialis priuatio. *Quod si* Aristoteles 1. *Phys. text. 81.* dicat priuationem esse principium *per accidens*. Respondet Doctor in *commentario 12. cap. 4. Metaph. text. 12.* Philosophus loqui de principio rei genitæ, ut aliàs diximus loco præcitato; ad quem recurrendum est, ut habeatur solutio obiectionum, quæ in hanc veritatem fieri solent,

Obijcies 1. principia per se generationis sunt ea, ex quibus fiunt omnia composita naturalia; sed ex priuatione nihil fit, quia est non ens, & ex nihilo nihil fieri docet axioma philosophicum: ergo priuatio non est principium generationis, *Resp.* ad minorem, ex priuatione nihil fit, tanquam ex parte *componente*, concedo; tanquam ex *termino à quo* generationis, nego. *Dices.* Principium est nobilius principiato; sed priuatio non est nobilior composito: ergo. *Resp.* maiorem esse veram de principio *completo, & adæquato*, falsam vero de principio *partiali*; forma enim non est nobilior composito, nec à fortiori priuatio, quæ tamen concurret ad compositum faciendum, non tanquam pars componens, & influens, sed tanquam terminus à quo proficiscitur generatio, licet ad eam non influat positivè, sicut nec punctum, quod est principium linearæ, in lineam influit.

Obijcies 2. Priuatio ex antiquis Philosophis est vnum cum materia: ergo priuatio non est principium generationis à materia distinctum. *Resp.* hoc tenuisse Platonem, ut inquit Arist. *Phys. text. 79.* Ipse tamen philosophus ibidem priuationem à materia secernit: unde dici debet cum Scoto in 2. *dist. 12. quasi. 1.* priuationem à materia distinguì realiter priuativè. Ea enim quorum vnum manet, & alterum recedit, realiter distinguuntur; sed materia semper manet, quia est ingenerabilis, & incorruptibilis; priuatio verò recedit,

acce-

accedente forma : ergo distinguuntur realiter ; non quidem positiuè , quia priuatio non est ens positium , & distinctio positiua est tantum inter entia , quæ sunt positiua ; sed negatiuè , quatenus materia est quid positium , & priuatio quid negatiuum .

Si quæzratur , *quisnam sit ordo inter principia generationis* : Respondebitur , quod materia præcedat alia principia ; postea sequitur priuatio , cum materia ante accessum formæ sit priuata illa forma , quam postea recipit : tandem sequitur forma , quæ est vltima pars constituens corpus naturale . *An autem in materia priuatio præcedat duratione formam , qua per generationem educitur & inducitur* : Hoc affirmat Doctor noster in 3. dist. 7. quæst. & in 4. dist. 43. quæst. 5. post Aristotelem 1. Phys. text. 43 & 44. Ratio enim est , quod agens naturale finitæ virtutis existens non agat nisi successiuè , disponendo scilicet primò subiectum , nempe materiam , per dispositiones præuias ad inductionem formæ . Deinde expellit pristinam formam , ut accedat noua , quæ cum præcedente est impossibilis , ac postea introducit nouam formam : ergo priuatio in materia præcedit tempore & duratione formam , & non tantum natura . *Quod si generatio dicatur instantanea* , hoc verum est , quantum ad præcisam introductionem formæ in materia ; falsum verò quantum ad totā progressionem , quæ ad generationē requiritur .

Si quæzratur ulterius *quandonam priuatio concurrat ad generationem* . Respondeo tunc actu esse principium , quando desinit esse ; & immediatè post succedit forma . Sic Scotus 12. *Metaph.* Priuatio enim tunc principiat , cum forma educitur de potentia materiæ , inquam tunc generatio incipit ; sed cum forma educitur de potentia materiæ , tunc priuatio non est , quia cedit formæ aduenienti , sicut tenebræ fugiunt accedente luce : ergo priuatio tunc principiat , quando esse desinit : & hoc est quod dicit Doctor noster , *priuationem principiare per suum non esse* .

Si dicatur contra hanc responsionem , principiationem non posse esse absque principiante , & sic priuationem non posse principiare , quando non est : hoc verum est de principio intrinseco & influente realiter in principiatum : falsum verò de principio , quod causat per modum termini à quo , qualiter priuatio principiat , per desitionem sui scilicet , ad quam sequitur positio formæ .

QVÆSTIO VLTIMA.

Quanam sint Proprietates Priuationis.

EX præcedentibus constat priuationem esse principium generationis *in fieri*, quod intelligi debet de priuatione antecedente formam; non verò de priuatione quæ formam consequitur: hæc enim vltima est tantummodò corruptionis principium. Priuatio, inquam, antecedens formam est principium *generationis*; quia ex tali priuatione formæ materia illam appetit naturaliter, & ex tali appetitu oritur, quòd sit principium generationis. Priuatio autem consequens formam, dicitur principium corruptionis; quia materia induta tali forma ob suam insatiabilitatem appetit incessanter nouas formas, vt illis perficiatur; & sic priuatio consequens formam, est principium corruptionis. Quando etiam diximus, quòd *priuatio in materia existens sit generationis principium*; hoc debet intelligi tum de priuatione *remota*, quæ nullam habet dispositionem ad vnā formam plusquam ad aliam; tum de priuatione *proxima*, quæ aliquas in se admittit dispositiones ad vnā formam in particulari. Ratio huius est, quia ex vtraque priuatione remota & proxima oritur in materia appetibilitas formarum, quæ appetibilitas materiæ est causa, cur priuatio dicatur principium generationis. His explicatis, videndum est quanam proprietates habeat priuatio.

CONCLUSIO.

Prima priuationis proprietas est, quòd sit mala & turpis. Vnde ab Arist. *cap. ult. 1. Phys.* dicitur *malefica*. Non quòd sit effectrix alicuius mali, sed quia est absentia formæ, quæ est excellens bonum: & vt loquitur Aristoteles *quid diuinum*: Sicut enim Deus est actus purus expers omnis potentiæ, sic forma est actus, licet incompletus, perficiens materiam, cuius potentialitatem tollit. Secunda proprietas est quòd *priuatio suscipiat magis & minus*; non quidem positiuè, quia priuatio non est ens positiuum; sed negatiuè ratione scilicet qualitatis quā priuat & cui est opposita; ita quòd priuatio maioris caloris vel minoris sit maior pri-

privatio vel minor . *Tertia* denique proprietas privationis est, quòd à privatione ad habitum non detur regressus, ut docet Arist. in post predic. cap. de Oppositis . Quia tamen hoc non est vniuersaliter verum, cum aliquando à privatione ad habitum detur regressus, v. g. à tenebris ad lucem; & aliquando non detur, ut à morte ad vitam : ideo

Dicendum est cum Scoto ad locum præcitatum, & quest. 41. *Prædicam.* quòd si forma, quæ opponitur privationi, proveniat à principio intrinseco, sitque innata subiecto, cuius est forma, ut visus in homine, cuius privatio est cecitas; tunc à privatione ad habitum non detur regressus, saltem naturaliter, ut aliàs diximus: Si verò forma, quæ opponitur privationi, oriatur à principio extrinseco, ut lux à sole, cuius tenebra sunt privatio; tunc à privatione ad habitum datur regressus, & aer de tenebroso potest fieri lucidus per solem illuminantem denuo aerem ipsum. Quia sicut agens extrinsecum non operans in subiecto privat illud eà formà quæ est capax; sic idem agens iterum accedens ad subiectum & in eo operans restituit illi eandem formam quam abstulerat ab eo per suam absentiam, vel per desitionem suæ operationis.

Alij ad explicationem effati præcedentis dicunt privationes aliquando negare solum actum, ut patet in dormiente, qui privatur visu durante somno, aliquando verò negare actum & potentiam simul, ut evenit in cæco, qui amisit videndi potentiam. Quantum ad priores privationes, concedunt quidem à privatione ad habitum dari regressum, non verò in posterioribus, quæ potentiam negant cum actu; sicut enim potentia ablata non potest restitui naturaliter, sic nec actus recuperari potest: vnde in talibus privationibus à privatione ad habitum non datur regressus naturaliter.

Quia tamen aliquando ex pluvia in terram cadente surgunt vapores, ex vaporibus gignuntur nubes, & ex nubibus re. lit pluvia, cuius antea forma fuerat amissa; ideo dicendum est quòd duplex sit regressus: nempe *immediatus*, si per vnicam mutationem vnum verteretur in aliud quod antea erat, v. g. aer in aquam, & eadem aqua in aerem; & *mediatus*, quando ex pluvia fiunt vapores; ex vaporibus nubes, & ex nubibus iterum pluvia. Si sermo fiat de regressu immediato, talis regressus non datur naturaliter à privatione ad habitum;

regressus tamen *mediatus* naturaliter fieri potest, ut patet per exemplum allatum, in quo per multas rerum mutationes idem regreditur quod prius extiterat: sed Scotus notat talem regressum non fieri ad idem *numero*. Quod si dicatur aquam calefactam immediatè reduci ad pristinam frigiditatem naturaliter; & sic à priuatione ad habitum dari regressum *immediatum*: Responderi debet tale axioma debere intelligi, ut supra, de priuatione negante simul actum & potentiam, qualis non est priuatio antecedens; quandoquidem aqua calefacta priuatur quidem actu frigiditate, non autem potentia; & sic aqua in se relicta redit ad pristinam frigiditatem calore expulso.

CAPUT III.

De Forma.

Quandoquidem forma perficit materiam à qua tollit priuationem, quæ est imperfectio, & ab Aristotele vocatur maleficium naturæ; ideo postquam in primo capite huius sectionis egimus de materia, & in secundo de priuatione, nunc agere debemus de forma, ut ordinem sequamur naturæ, quæ ab imperfectioribus ad perfectiora tendit.

QVÆSTIO PRIMA.

An detur Forma Substantialis.

Non sumus loquuturi in hoc capite de forma ita generaliter sumpta, ut ipsius nomen conueniat formæ substantiali & accidentali; quæ vltima subdiuidi potest in artificialem ex industria artificis procedentem, & in naturalem, quæ ortum ducit à natura: Cum enim physicus respiciat tantum compositum substantiale, proinde agere tantum debet ex professo de forma substantiali. Sic quando dicitur, *homo est corpus vel animal*, hæ formæ sunt *substantiales*, ubi verò enunciat *quod homo sit albus vel doctus*, istæ formæ dicuntur *accidentales*, vel potius sunt accidentia hominis, quam formæ illius propriè dictæ. Ante Aristotelem vix inveniuntur inter veteres Philosophos qui formam substantialem agnoscant, post Aristotelem verò pauci re-

periuntur, qui negent formæ substantialis existentiam: unde ad istorum mentem erit nostra.

CONCLUSIO.

Dari formam substantialem ita certum est, ut oppositum eius videatur absurdum, inquit Scotus, in *Comm. super 7. Metaph. cap. 7.* Primò enim omnes ab Aristotèle admittunt materiam & formam, tanquam principia substantialia compositi substantialis; sicut ergo datur *materia substantialis*, quæ est primæ pars talis compositi; sic etiam *forma substantialis* admitti debet, quæ ultimæ compositum constituit. *Secundò* si non daretur *forma substantialis*, res substantiales, v. g. *homo & brutum*, non differrent substantialiter; quia non differunt per materiam, quæ est eadem specie in omnibus corporibus; nec differunt substantialiter per accidentia, quæ sunt extrinseca substantiæ: ergo debet admitti *forma substantialis*: quæ res diuersæ differant substantialiter, quales sunt forma equi, forma leonis, & hominis. *Tertiò* quando aliquid generatur non acquirit formam accidentalem duntaxat, aliàs aqua, quæ de frigida fit calida, generaretur; sed acquirit formam substantialem, ut patet de materia ligni, quæ per combustionem acquirit formam ignis: ergo datur forma substantialis. *Quartò* accidentia contraria in mixtis corporibus cum pace conseruantur, saltem in gradu inæquali, v. g. in *homine*; sed hoc non posset fieri, nisi admitteretur aliqua forma superior & substantialis, quæ ipsa accidentia conseruet; ergo. *Quintò* ex materia & forma fit compositum, quod est vnum *per se*; quia sunt entia incompleta eiusdem generis substantialis, quorum vnum est potentia, & aliud est actus; sed si forma compositi esset tantum accidentalis, ex ipsa cum materia sic ret vnum *per accidens*, quia ex subiecto & accidente *vnũ per accidens* resultat: ergo datur forma substantialis.

Confirmatur vterius nostra conclusio. Per diuersas operationes à diuersis agentibus prodeuntes debent colligi diuersæ formæ substantiales, quandoquidem in *Scoto 7. Metaph. quest. 6.* formæ cognoscuntur per operationes sensibiles, sicut materia per transmutationem; sed nemo dubitat, quin ignis & aqua habeant diuersas operationes, quandoquidem ignis pro-

ducit ignem & aqua aquam : ergo in igne , aqua , & similibus sunt diuersæ formæ substantiales . Si dicatur quòd differentia formarum accidentalium sufficiat ad saluandas diuersas operationes in agentibus ; quandoquidem ignis calefacit per calorem , & aqua frigidat per frigiditatem , quæ sunt formæ accidentales . Responderi debet quòd ignis non producat ignem per calorem , cum per eum tantummodo calefaciat , quæ est actio accidentalis ; sed per principium ignituum , quod est forma substantialis ignis : sic dicendum est de aqua , & proinde salua manebit nostra ratio , in qua concludimus diuersas formas substantiales ex diuersis actionibus substantialibus ; proindeque sufficienter stabiliata est existentia formæ substantialis : Conformiter ad determinationem fidei in Concilio Laternensi sub Leone decimo sess. & in Vienn sub Clem. V. de summ. Trin. paragrapho 2. in quibus determinatum est animam rationalem esse per se & essentialiter formam hominis . Quod idem dicendum est de reliquis animantibus , & alijs corporibus mixtis , iuxta id quod habetur Gen. 1. Producat terra animam viuentem .

Obijcies 1. ex Galeno formam rerum naturalium esse temperiem quatuor qualitatum , quæ ingrediuntur mixtorum compositionem ; sed illud temperamentum est quid accidentale , quod modò adest , & modò abest : ergo non est admittenda forma substantialis . Quod confirmare videtur Aristoteles 2. de Gen. cap. 7. & 8. ubi scribit formas elementorum esse primas qualitates . Quod idem debet dici de formis mixtorum . Resp. negari debere Galenum , ob rationes quas attulimus . Quando autem dicit , in probationem suæ opinionis , illam esse formam rerum naturalium , quæ posita res ponitur , & quæ ablata tollitur res , quod verificatur de qualitatum temperie : neganda est talis allegatio , quia posita ligni approximatione ad ignem fit combustio ; & ea ablata tollitur , nemo tamen dixerit , combustionem esse formam comburentem lignum . Adde quòd sæpius muteretur temperies , attamen res naturales non pereunt ; ut patet de aqua , quæ perseverat etiam cum calore intenso . Quantum ad Aristotelem , usurpat primas qualitates , quæ sunt proprietates elementorum , pro formis substantialibus , quæ nos latent ; sicut frequenter quantitatem desinit per diuisibilitatem , quæ est illius proprietas .

Obijcies 2. forma quæ est in subiecto & in subiecto dependet *in fieri & in conseruari*, debet dici accidentalis; sed omnes formæ mixtorum sunt in materia, & ab illa dependent in fieri & conseruari: ergo non debemus illas vocare *substantiales*, quandoquidem *substantia non est in subiecto*, vt docet Arist. *in antepred.* Resp. quod est in subiecto *inhesionis* non esse substantiam; quod autem est in subiecto *informationis* potest esse substantia; sed forma, quam vocamus substantialem, est quidem in subiecto *informationis*, quia materiam informat: non est verò in subiecto *inhesionis*, quia, vt aliquid sit subiectum *inhesionis*, debet esse completum in se, quod dici non potest de materia, quæ cum sit ens incompletum exigit formam per quam, perficiatur: vnde ex materia & forma sic vnitis resurgit vnum *per se*, quia pertinent ad idem prædicamentum, nempe ad categoriam substantiæ. Quod si Aristoteles 1. *phys. tex. 69.* comparet formas naturales artificialibus quæ sunt accidentales; paritas in hoc stat, quod sicut artifex educit formas artificiales de subiecto præexistenti, nempe de ligno, sic agens naturale educit formam *substantialem* naturalem de materia.

Obijcies 3. Si datur forma substantialis in composito, quæ per generationem producat; aut præexistit in materia, aut non; si præexistit, non fit generatio; existens enim non generatur denudò; si non præexistit, ergo creatur; quia producit de nihilo; cum ergo neutrum dici possit de forma substantiali, proinde non datur forma substantialis. Resp. quod formæ substantiales non præexistunt actu in materia, aliàs non dicerentur generari; sed præexistunt in potentia, nec dicendum est quod creentur tales formæ; quia licet producantur ex *nihilo sui*, non tamen producantur ex *nihilo materia*, ex cuius sinu educuntur virtute agentium naturalium: vt alibi iam ante dictum est. Adde quod forma propriè non generetur, sed compositum.

Q V Æ S T I O II.

Quid sit Forma Substantialis.

Forma in communi describitur *id quod res determinatur ad certum essendi modum*, quæ descriptio adaptari potest formis artificiali, accidentali & substantiali;

si enim ex industria artificis ex marmore producat^{ur} effigies Cæsaris, talis forma, quæ marmor determinat ad certum modum repræsentandi, vocatur *forma artificialis*. Si paries aliquis dealbetur, dicitur recipere *formam accidentalem*, qua paries determinatur ad *esse album*. Si denique materia prima, quæ dicitur primum principium rerum naturalium, recipiat formam hominis aut equi, tunc equinitas, vel humanitas, dicuntur *forme substantiales*; quia determinant materiâ primam ad *esse substantiale* equi vel hominis: & sic forma in genere benè describitur *id quo res determinatur ad certum essendi modum*. Quia autem nobis loquendum est de *forma substantiali rerum naturalium*, accuratiorẽ de illa debemus asserre definitionem.

CONCLUSIO.

Forma *substantialis* est *actus primus, simplex, formalis, substantialis, unum per se cum materia constituens*, ex Scoto in 4. dist. 11. *quæst.* 3. dicitur primo *actus*; id est, *physicus*, ad distinctionem materiæ, quæ est quidem actus metaphysicus, sed potentia physica. Per eandem particulam distinguitur forma à composito, quod non est actus, sed quid ex actu & potentia constitutum. Dicitur 2. *actus primus*; ad differentiam existentie, quæ est actus ultimus entis; & ad differentiam formarum accidentalium, quæ sunt actus secundarij præsupponentes formam substantialem, quæ cum materia facit compositum, quod accidentia recipit. Dicitur 3. *simplex*; quæ particula formam distinguit à composito, quod ex partibus unitis componitur. Dicitur 4. *formalis*; per quod forma secernitur à materia, quæ licet sit pars substantialis compositi, illi tamen non dat esse formale & specificum, vti facit forma. Additur *substantialis*, quod ulterius distinguit formam ab accidentibus, quæ subiectum afficiunt tantum extrinsecè. Adiungitur denique *unum per se cum materia constituens*; in quo forma distinguitur à Deo & Angelis, qui sunt actus simplices & substantiales, sed non ingrediuntur compositionem corporis naturalis. Per hoc etiam distinguitur forma substantialis ab artificiali, quæ non facit unum per se cum materia, sed unum per accidens; quoniam ipsa est accidentalis & extrinseca. Distinguitur insuper per eandem particulam forma sub-

substantialis à forma *assistente*, qualis est Angelus; quò aliquando possidet corpus mortuum, & illud facit operari: protunc enim talis forma *assistens* non facit vnum per se cum corpore cui assistit, & quod mouet, sed vnum per accidens.

Alij aliter definiunt formam substantialem, sed omnes illæ definitiones conueniunt substantialiter cum præcedenti. Notari tamen debet præ cæteris ea, quam affert Aristoteles 2. *phys. tex. 28.* Vbi docet quòd forma sit ratio quidditatis, & essentia: nam quælibet res est talis per suam formam substantialem, quæ est fons & radix totius quidditatis, seu omnium proprietatum, & actionum rei. Id enim quod est primum in aliquo est causa omnium proprietatum, & actionum accidentalium, quæ sunt quid secundarium, & minus principale in illo. Cum autem operari sequatur esse, & in tantum aliquid agat in quantum est actus; ideo sicut forma est actus primus essendi, ita est primum, & radicale principium operandi. Huius ratio ex sublimiori principio repeti potest, nempe ex eo quòd per formam substantialem, quæ est actus simplex, quælibet res participet naturam diuinam, ipsaque forma sit deriuatio, & imitatio purissimi actus, qui Deus est; cum autem Deus non solum sit in se perfectus per suam entitatem, sed etiam per suas operationes: sic forma substantialis debet habere hanc conuenientiam cum illo, quòd det rei quam componit, tum modum essendi, tum modum operandi.

Cum autem sunt duo operationum genera in Deo, vnum principalius *ad intra*, quo se cognoscit, & amat, & alia omnia in se, & aliud minus principale *ad extra*, quo producit suas creaturas, quibus suas diffundit perfectiones, vt eas sibi assimilet, quantum patitur earum conditio: hanc duplicem operandi rationem ita distribuit formis substantialibus, vt primam operationem, quæ est nobilior, & immanens, conferat formis nobilioribus, & spiritualibus, quales sunt Angeli; quæ licet non possint se diffundere *ad extra*, producendo alios Angelos, possunt tamen se, & alia, imò, & Deum ipsum cognoscere, quod est nobilissimum operandi genus; quod etiam communicatur à Deo animæ rationali. Quantum ad aliam operandi rationem, quæ est minus principalis, & imperfectior, illam tribuit Deus formis ignobilioribus, & corporeis, quæ licet cognitione careant, vtrumque tamen hoc participant à Deo,

Deo, quòd in se seu in sua entitate perfectè sint, & quòd hanc perfectionem possint diffundere *ad extra*, producendo sibi simile; vnde Athanasius serm. 3. gestorum concilij Nicæni dicit *Deum dedisse omnibus naturam similitum propagativam*. Virtute huius concessionis Deus quâ Deus fecit formis substantialibus; agentia corporea suam formam substantialem diffunduntur; dum ignis v. g. sibi simile, producit per combustionem, planta se ipsa propagat per semen, animal multiplicat suam speciem per generationem, & quòdlibet agentium corporum naturalium generat sibi simile: quod sufficienter probat formam substantialem, nedum dare rei quam constituit peculiarem essendi modum, sed etiam illi tribuere operandi virtutem, & vim sibi assimilandi effectus, quantum possibile est; proindèque *iure diximus formam substantialem esse radicem essendi, & operandi*.

Quòd si videamus solem non producere solem, neque lunam generare iunam, nec astra causare astra, licèt habeant suas formas substantiales, quas diximus esse assimilativas effectuum: *Respondendum* est nos consulto dixisse hoc fieri *quantum possibile est*, quia enim causæ secundæ non possunt agere nisi in materiam, quæ dispositionem habeat ad recipiendam talem vel talem formam similem suæ causæ; idè corpora sublunaria producant effectus sibi similes, quoniam materia supra quam agunt potest recipere similem formam, & idè quercus potest generare quercum, planta plantam, & homo hominem; quia materia horum effectuum, ut potè sublunaris, est capax talis alterationis & generationis, & fieri potest arbor, planta, homo, & aliud simile; Materia autem circa quam agunt sol, luna, & alia sidera, non est capax talium formarum cœlestium, & idè, licèt talia agentia possint operari, & sibi assimilare effectus productos, iuxta vim sibi inditam à forma substantiali; non tamen illos sibi assimilant *formaliter*, defectu materiæ aptæ ad tales formas, sed tantum *analogicè*, producendo aliquid simile sibi, non in substantia, sed in qualitatibus; vnde sol producit aurum, ut aliquid imperfectè accedens ad suam similitudinem ratione lucis, luna argentum similis candoris, & stellæ lapides pretiosos qui accedunt ad illarum fulgorem: & sic redeundo ad formam substantialem, apparet quòd sit *radix omnium proprietatum, & operationum rei, cuius est forma*.

Obijcies *esset actus materia*, est quid relatiuum; sed forma, quæ est ens absolutum, non legitimè definitur per relationem: ergo non benè definitur forma, dicendo quòd sit actus materiæ. *Resp.* relationem non debere ingredi definitionem entis absoluti, si ens absolutum sit quid completum; si verò sit quid incompletum, vt in proposito, vbi materia, & forma sunt entia incompleta, nil vetat, si respectus materiæ includatur in definitione formæ, & vicissim: quia licet materiæ, & formæ entitates sint quid absolutum in se, connotant tamen relationem ad se se inuicem, & ad compositum. *Si dicatur* formam substantialem esse quid simplex, & ens simplex non posse definiri. *Resp.* formam esse quid simplex, simplicitate *physica*, quia non componitur physice; non est tamen simplex simplicitate *metaphysica*, quandoquidem constat genere, & differentia saltem improprie, quæ sunt partes metaphysice: pro genere enim habet substantiam, cuius est species incompleta, & pro differentia habet alias particulas definitionis, quæ formam faciunt differre à materia, à composito, à forma accidentali, ab artificiali, & ab Angelis.

QVÆSTIO III.

Quotuplex sit Forma.

Non sumus hic loquuturi de diuisione formæ substantialis specialiter sumptæ, quia cùm in definitione illius dixerimus eam esse quid simplex, proinde non potest diuidi in species; cùm simplicitas distributionem impediat: sed intendimus distribuere formam vniuersaliter sumptam in inferiores scilicet formas, quæ illi subsunt.

CONCLUSIO.

Forma multipliciter diuiditur. Primò in extrinsecam & intrinsecam. *Extrinseca* est ea ad cuius imitationem res extrinseca efficitur; talis est idea in mente architecti existens, ad cuius imitationem construitur domus. Forma *intrinseca* ea est, quæ tribuit effectui *sui esse* per communicationem propriæ entitatis, & non per nudam imitationem; sic homo generans com-

muni-

municat homini genito suam formam intrinsecam eandem specie .

Secundò forma intrinseca diuiditur in subsistentem, & informantem. Forma *subsistens* est ea, quæ de se potest sustinere suam entitatem, & existere sine subiecto; sic Angeli sunt formæ subsistentes, quæ per se, & sine commercio subiecti existunt. Forma *informans* est ea, quæ requirit subiectum in quo inhæret; vt virtus, quæ inhæret animæ tanquam subiecto, & reddit seu constituit hominem virtuosum .

Tertiò forma informans subdiuiditur in naturalem & artificialem. Forma *artificialis* ea est, quæ producitur ab agente artificiali, vt forma statuæ à statuario. Forma *naturalis* est illa, quæ ab agente naturali producitur; vt forma vermis à sole, ignis ab igne, & hominis ab homine .

Quartò forma naturalis diuiditur in substantialem, & accidentalem. *Substantialis* est ea, quæ dat *esse substantiale* rei cui inest, & constituit vnum *per se* cum materia; tales sunt formæ corporeitatis, & humanitatis, quæ dant *esse* corpori, & homini, & quæ faciunt quid *per se vnum*. Forma *accidentalis* ea est, quæ dat *esse accidentale* rei, quam afficit, & facit vnum *per accidens* cum ea; vt albedo; quæ parieti dat *esse album*, quod est ens per accidens .

Quintò forma substantialis diuiditur in informantem & assistentem. Forma *informans* est ea, quæ dat *esse* rei, & mouet ab intrinseco subiectum in quo est, vt anima rationalis, quæ dat *esse* homini, & mouet corpus quod informat. *Assistens* est ea, quæ non dat *esse* rei, sed tantum illi assistit, & operatur aliquid circa illam; vt quando Angeli mouent cælos, vel possident corpus, vocantur *forma assistentes*; sicut nauta, & auriga, qui dirigunt nauim & currum, dicuntur esse assistentes illorum formæ .

Sextò formarum substantialium alia est *separabilis à materia*, vt anima rationalis, quæ cum à materia non dependeat *in fieri*, non pendet etiam ab illa *in conseruari*; vnde à corpore separata existere potest: aliz sunt *inseparabiles à materia*, quæ ab illa dependet *in fieri*, & *in conseruari*; vt omnes formæ materiales brutorum, arborum, metallorum, elementorum, & similibus .

Perro formarum aliz dant *esse tantum*, vt lapidum me-

metallorum, & elementorum formæ. Aliæ dant *esse*, & *vitam vegetatiuam*, vt formæ arborum, & plantarum. Aliæ dant *esse*, *vitam vegetatiuam*, & *vitam sensitiuam*; vt animantium formæ, denique dant *esse*, *vitam vegetatiuam*, *vitam sensitiuam*, & *insuper intellectuam*; vt anima rationalis, quæ est hominis forma.

Has celebriores diuisiones formæ vna voce admittunt omnes philosophi, excepto vno Carthesio, qui Epicuri phantasticas deliraciones restaurare tentans hoc sæculo, *gratis*, imò *ineptè*, reiiicit formæ substantialis existentiam, sibi fingendo omnia entium genera distingui tantum, & constitui per diuersam atomorum congeriem, non verò per vllas formas essentialiter. Quasi verò contra communem, & ordinariam sensatorum mentem liceat phantastico cuidam hominè medio tollere distinctionem essentialem rerum, generationem substantialem corporum, & eorum corruptionem, sicut, & operationes internas omnium animantium, quas contendit non esse à motu proprio illorum, sed à motu externo, quem Deus aut Intelligentiæ illis impresserunt: quæ tamen omnia sequuntur ex opinione Carthesij, cuius *somnia* ex se ipsis ita de facili euanescent, vt inutile, & frustraneum foret terere tempus in allegatione rationum, quæ *falsi*, & *erronei*, conuincerent talem atomorum restauratorem; cuius sanè opinio omnibus videbitur, ni fallor, parum conformis veritatibus nostræ fidei, vt ostendimus in capite de principijs rerum naturalium.

Q V Æ S T I O IV.

Verum Forma Substantiales corporum educantur de Potentia Materia.

DE formarum origine tres reperiuntur opiniones apud philosophos. Anaxagoras enim primò cum sectatoribus suis voluit omnes formas esse *ab extrinseco*, & præexistisse in materia, occultas tamen, & confusas, & virtute agentium naturalium ex delitescentibus fieri apparentes, & distinctas. Platonici, iuxta magistræ mentem in Phædone, existimarunt formas particulares quorumlibet entium promanare *ab extrinseco*, nempe ab ideis, tanquàm à causis vniuersalibus, ad quarum imitationem producuntur, Peripatetici autem eat vo-
lunt

lunt oriri *partim ab intrinseco, & partim ab extrinseco*. Ab intrinseco quidem dicunt eas procedere, quia supponuntur contineri potentialiter in materia ante generationem; ortum verò ducere ab extrinseco, quatenus vi agentium naturalium de materiæ sinu educuntur. Hoc ut clariùs pateat

Notandum est, quòd *eductio* sit actio opposita creationi; sicut enim creatio consistit in productione rei ex nihilo, & independenter à subiecto, ita eductio est actio qua res producit ex subiecto à quo dependet *in fieri, & in conseruari*. In eductione ergo tria considerantur, nempe *id quod educitur, & est forma; id ex quo educitur, & est materia. & illud à quo forma educitur, & est agens naturale*, quod formam ex materia educit. Ad eductionem duæ conditiones requiruntur, *primò ut forma quæ educitur dependeat in fieri, & in conseruari à materia, & secundò ut potentia quam habet materia ad illam formam sit naturalis, & non obedientialis tantùm*.

Potentia naturalis ea est, qua respicit virtutem naturalem agentis, & eiusdem ordinis; sic lignum dicitur habere potentiam naturalem ad recipiendam formam ignis: quia illam recipit ab agente naturali, quod est eiusdem ordinis, nempe ab igne. Potentia obedientialis est, qua respicit agens supernaturale, vel superioris ordinis, à quo recipit formam; sic potentia quam habet anima ad recipiendam gratiam à Deo, est obedientialis; quia Deus est agens supernaturale: sic etiã potentia quam habet lignum ad recipiendam formam statuz est obedientialis, quia statuarius non est agens naturale, sed artificiale, & superioris ordinis ad statuum. Hæc præsens quæstio procedit de formis substantialibus omnium corporum, tum sublunarium, tum cœlestium, sicut etiã de forma hominis, & de formis accidentalibus: quæ omnia resolventur per conclusiones diuersas.

CONCLUSIO PRIMA.

Forma substantiales mixtorum corporum educuntur de potentia materiæ. Sic Scotus in 2. dist. 12. quæst. 1. & in 4. dist. 12. quæst. 3. Notanter dixi *forma substantiales corporum mixtorum* quia, maioris distinctionis causa, loquimur tantùm in quæstione de formis materialibus sublunarium corporum, quæ mixta vocantur,

tur, utpotè composita ex quatuor elementis. Ad sequentem verò questionem remittimus examen faciendum de corporibus simplicibus, quæ sunt cæli & elementa, quæ componuntur quidem ex materia & forma, sed non constituuntur per commixtionem elementorum.

Probatur conclusio nostra. Illæ formæ educuntur de potentia materiæ, quæ pendent à materia *in fieri & in conservari*; sed formæ materiales mixtorum dependent à materia *in fieri & in conservari*: ergo educuntur de potentia materiæ. Dependent, inquam, primò à materia *in fieri*, quia materia concurret ad earum productionem, ut causa materialis subiectiva; & dependent à materia *in conservari*, quia *ablata materia auferuntur omnes formæ substantiales materiales*; & sic dependent à materia *in fieri & in conservari*. Deinde ita ratiocinari debemus de forma naturali, sicuti de forma artificiali, ut docet Aristoteles 1. *phys. text. 69.* forma artificialis educitur de præiacente materia, ut forma regis ex auro vel argento: ergo forma naturalis producitur etiam ex subiecto, seu educitur ex materia. Tandem res quælibet non potest produci, nisi per creationem, quæ fit ex nihilo: vel per educationem, quæ supponit subiectum; sed forma non fit per creationem, quod competit soli materiæ: ergo fit per educationem de potentia materiæ.

Obijcies. Quod continet aliud est actus in illo, ut patet de crumena continente pecuniam: ergo, si materia contineat formam, quæ ex illa educitur, erit actus in materia, ergo formæ substantiales corporeæ sunt *ab intrinseco*, contra id quod diximus in annotatione questionis, & aduersus conclusionem. *Resp.* quòd continetur in aliquo est actus in illo, si contineatur *actualiter*, ut vinum in dolio, vel argentum in crumena; non verò est actus, si contineatur tantum *potentialiter & virtualiter*, ut forma in subiecto, vel ignis in silice. *Dices* præstantius non educitur ex ignobiliore, sed forma est præstantior materiæ: ergo ex materia non educitur forma. *Resp.* neg. mai. cum aurum ex terra, corallium ex aqua, & frumentum vivum ex grano frumenti mortuo producantur. *Dices* formæ substantiales non dependent à materia, sed solæ accidentales, ut innuit Scotus quodlib. 9. *Resp.* formæ substantiales non dependent à materia, tanquam à subiecto *inhabitationis*; concedo; tanquam à subiecto *informationis*, nego: for-

formæ enim substantiales corporeæ ita dependent à materia, vt sine illa nec fieri nec conseruari valeant.

CONCLUSIO SECVNDA.

Forma cælorum & elementorum educta fuerunt de potentia materia, in prima rerum productione. Hæc conclusio est contra D. Thomam 1. p. quæst. 65. art. 4. vbi inquit quod in prima productione creaturæ corporalis non consideretur aliqua transmutatio de potentia in actum: ita, quod, licet rerum genitarum formæ educantur de potentia materiæ, attamen illa composita quæ à Deo immediatè creatæ sunt, vt cæli & elementa, habeant suam materiam & suam formam ab ipso Deo creatas, iuxta id quod habetur Gen. 1. in principio Deus creauit cælum & terram; vbi per cælum intelliguntur corpora cælestia, & per terram intelligitur massa elementaris.

Quod forma cælorum in mundi principio educta fuerint de potentia materia docet Scotus in 2. dist. 17. quæst. 1. Illud enim quod dependet à materia in fieri & in conseruari, educitur de potentia materiæ, cum in hoc consistit taliseductio: sed formæ cælorum dependent à materia in fieri & in conseruari, si enim forent à materia independentes, essent incorruptibiles, velut anima rationalis, quod erroneum est dicere: ergo formæ cælorum eductæ fuerunt de potentia materiæ, ita quod materia cælorum priùs natura fuerit creata, quàm ornaretur sua forma, vt tradunt Aug. 12. Confess. cap. 7. & 8. & Scotus in 2. dist. 12. quæst. 1.

Quod forma etiam elementorum in prima sui productione educta fuerint etiam de potentia materia, colligitur ex eodem Scoto præallegato; quandoquidem pari ratione formæ elementorum censeri debent eductæ ad potentia materiæ, quod dependeant à materia, tum in fieri, tum in conseruari. Quando ergo de cælis & de elementis dicitur Gen. 1. in principio Deus creauit cælum & terram; ibi creare sumitur non strictè, pro productione rei ex nihilo; sed latè, pro formatione rei, quo sensu postquam dictum est de homine, creauit Deus hominem, post modum cap. 2. subiungitur formauit Deus hominem de limo terra. Quia ergo Deus eodem instanti temporis simul produxit cælos & elementa, quæ creata sunt secundum materiam, ideò de cælo & ele-

elementis dicitur simpliciter, quòd *creavit cælum & terram*. Est tamen hæc distinctio inter materiam & formam cælorum & elementorum, quòd materia ipsorum producta fuerit *ex nihilo*; forma verò fuerit educta *de potentia materia*.

Obijcies. Corpora cælestia & elementaria vnica actione producta fuerunt secundum materiam & secundum formam, simpliciter enim vocantur *cæli & terra*; quod denotat eorum materiam & formam *simul*: ergo, si actio Dei fuerit creatiua respectu materiæ cælorum & elementorum, fuit etiam talis respectu illorum formæ; & sic tales formæ *creata* fuerunt, non verò *educta*. Resp. negando antecedens, fuerunt enim duæ actiones Dei in prima productione rerum, quarum vna fuit *creatiua* materiæ, & alia fuit *eductiua* formæ. Licet inquam hæ actiones fuerint in eodem *instanti temporis*, non fuerunt tamen in eodem *instanti natura*, quia prius natura materia producta fuit, deinde forma educta est de potentia materiæ, ac denique totum compositum ex illis partibus resultauit; de quo dicitur quidem, quòd fuerit *creatum*: sed hoc intelligi debet præcisè quantum ad materiam, non verò quantum ad formam. Si *quæ* ratur autem an eductio formæ sit idem cum vnione ipsius ad materiam; respondendum est negatiuè, quia eductio præcedit vnionem, & extrema vnibilia supponuntur esse antequam vniantur.

CONCLUSIO TERTIA.

Anima rationalis, quæ est hominis forma substantialis, non educitur de potentia materia, sed suum esse habet per creationem à Deo, qui eam in mente Augustini infundendo creat, & creando infundit. Ratio Ecclesiæ est anima non dependet à corpore, cum è corpore separata subsistere possit, vt docet fides catholica. Deinde quælibet res maximè cognoscitur ex suis operationibus, quandoquidem *ad esse sequitur operari*; sed anima rationalis habet operationes, quæ excedunt potentiam materiale corporis, nempe *intelligere & velle*, quæ sunt actiones substantiarum immaterialium: ergo anima rationalis non dependet à materia, nec proinde de eius potentia educitur.

Obijcies. Producens vltimam dispositionem ad aliquam formam introducendam dicitur illam formam

producere; sed homo producit vltimam dispositionem ad introducendam animam rationalem, nempe organisationem corporis: ergo animam producit, quæ proinde non habet à Deo *esse* per creationem. *Resp.* distinguendo maiorem, si vltima dispositio illa sit necessitans ad introducendam formam: concedo: si non sit necessitans, nego. Nulla autem est dispositio, quæ Deum necessitet ad infundendam animam rationalem; quoniam posita quacumque organisatione corporis, Deus potest animam non infundere & sic homo illam organisationem producens non debet dici producere animam. *Dices.* Si homo non producat formam hominis, non debet dici generare hominem, qui constat ex anima & corpore. *Resp.* dici generare hominem, quia producit corpus, & in corpore perfectam organisationem, quæ posita Deus de lege communi suæ voluntatis infundit animam. Nec propterea dici debet hominem esse peioris conditionis quàm agentia naturalia, quæ producunt formam: hoc enim non procedit ex imperfectione hominis agentis, sed ex perfectione animæ rationalis, quæ tanta est, ut à solo à Deo possit produci.

Obijcies 2. animam rationalem vñiri materiæ, quod denotat illam dependere à materia; & sic ab illa educi. *Resp.* animam rationalem vñiri reuerà materiæ, sed hoc non procedit ex dependentia illius à materia, quandoquidem Deus posuit illam creare & non infundere corpori; sicut separata existit postquam informauit corpus: si ergo corpori vniatur, hoc prouenit tantùm ex voluntate Dei, qui decreuit animam rationalem esse corpori communicabilem, ut Deus coniungeret extrema per media quædam proportionem habentia, inquit D. Dionys. ita quòd sicut reperiuntur formæ purè spirituales; quæ nec à materia dependent, nec ipsi possunt vñiri, quales sunt Angeli; & formæ purè materiales, quæ materiæ vniuntur, & ab illa dependent in *suo esse*, ut formæ corporum: sic etiam reperirentur formæ quædam mediæ, animæ scilicet rationales, quæ possent esse sine materia, & ab ea non dependerent ut Angeli, quæ tamen possent informare materiam, sicut & aliæ formæ corporales.

Obijcies educi de potentia materia, est fieri *actu* in materia, ubi antea non erat; sed anima rationalis fit *actu* in corpore organisato; ergo educitur de potentia

illius. Resp. *educi de materia*, non esse fieri in materia, sed ex materia: licet ergo anima rationalis fiat in corpore, non tamen sit ex corpore: cum nullam causalitatem habeat corpus circa animam rationalem. *Dices* materia corporis humani habet potentiam passivam ad animam rationalem, quæ ipsi naturalis est: ergo potest illam recipere ab agente naturali, & consequenter non est à Deo per creationem. *Respondes*, materiam corporis humani non habere potentiam naturalem ad receptionem animæ rationalis, sed obedientialem tantum; quia non potest talem animam recipere ab agente naturali, sed à solo Deo, qui est supernaturalis ordinis.

CONCLUSIO QVARTA.

Forma accidentales educuntur de potentia materia, vel potius de potentia subiecti, quod est totum compositum, in quo subieciuntur forma accidentales. Sic Scotus in 4. dist. 1. quæst. 2. Omnis enim forma accidentalis pendet in fieri & in conservari à subiecto cuius est accidens, in quo consistit ratio educationis. Aliter tamen, ratiocinandum est de accidente naturali, ut de albedine, quantitate; & aliter de accidente supernaturali, ut de fide, spe, & charitate, gratia, & similibus, priora enim illa accidentia educuntur de potentia subiecti, à quo naturaliter prodeunt, aut ab alio extrinseco produciuntur dependenter à subiecto, ut patet de quantitate, quæ resultat ex corpore; & de calore quem ignis producit in aqua, qui calor educitur de potentia ignis, & transmittitur in aquam, quæ est in potentia, ut transmutetur à frigiditate ad caliditatem. Posteriora verò accidentia, quæ supernaturalia sunt, non educuntur de potentia animæ, sed immediatè produciuntur à Deo per creationem; cum ab illo sint independentes à materia & subiecto, iuxta id quod habetur Psal. 83. *gratiam & gloriam dabit Dominus*, quod si dicatur in assertum præcedens, habitus supernaturales, cum sint accidentia, quorum totum esse est ad aliud se habere, non creari à Deo, sed à subiecto dependere, & proinde educi de potentia animæ: Respondendum est talia accidentia supernaturalia pendere quidem à subiecto, quatenus extra subiectum non possunt esse aut conservari; non verò sic subiecto dependere, quod ex eius potentia educantur, imò, non alia ratione di-

cuntur supernaturalia , nisi quia à Deo solo sunt per creationem.

Quantum ad formas artificiales , educuntur similiter de potentia subiectorum, ex quibus extrahuntur , & in quibus subiectantur . Aristoteles enim *1. phys. tex. 69.* comparat formas artificiales naturalibus ; sed formę naturales educuntur de potentia subiecti : ergo & artificiales . Ars enim nihil potest moliri , nisi ex præiacente subiecto ; vt experienciã communi probatur . *Quantum denique ad formas accidentales intentionales* , eodem modo respondendum est ac de formis accidentalibus realibus ; quòd scilicet forma intentionalis educatur de potentia subiecti , v. g. lumen de potentia solis , quo illuminantur corpora illi exposita . In hoc autem distinguuntur accidentia realia ab intentionalibus , quòd realia sensibus percipiuntur , vt albedo parietis , aut calor ignis ; accidentia verò intentionalia non percipiuntur , sed sunt media quibus percipiuntur obiecta : licet enim per se non videatur lumen , est tamen ratio videndi corpus illuminatum . Lumen ergo in sole , est quidem accidens reale in ipso , e ductum , de potentia solis , est autem accidens intentionale in corporibus quæ illuminat .

Q V Æ S T I O V.

Vtrum forma possit existere sine materia .

Sicut diximus antea quòd materia sit actus metaphysicus habens essentiam, existentiam & subsistentiam; forma proinde, quæ longè nobilior est materiã, hæc omnia habere debet: vnde dicendum est quòd forma habeat suam essentiam; quandoquidem ipsa definitur : quòd habeat suam existentiam, quoniam est entitas positiua à materia independens: & quòd habeat subsistentiam, cum sit substantia saltem incompleta, & omnis substantia dicatur per se subsistere . Queritur autem hîc vtrum forma possit à materia separari , & separata existere , per potentiam naturalem, aut supernaturalem .

C O N C L U S I O .

Non potest forma materialis naturaliter existere sine forma, benè autem supernaturaliter . Dixi , forma

materialis; quia forma spiritualis, nempe rationalis anima naturaliter separatur à corpore. *Prima* pars huius conclusionis colligitur ex Arist. 8. *met. tex. 3.* ubi asserit formam esse tantum ratione à materia separabilem: ergo naturaliter non potest actu separari à materia. *Deinde*, quod pendet ab alio *in fieri & in conservari*, non potest existere sine illo; sed iuxta mentem omnium, forma *materialis in fieri & in conservari* dependet à materia: ergo non potest sine illa existere naturaliter. *Tandem generatio unius est corruptio alterius*: ergo, quando una forma accedit per generationem compositi, alia perit naturaliter; & sic forma non remanet naturaliter, nec existit sine materia. Dixi, quod forma recedat per generationem compositi: quia non est ipsa forma quæ generatur, sed totum compositum, quod transit de non esse tali ad esse tale, de hac scilicet forma ad illam.

Probatur *secunda* pars, quia per potentiam D. materia potest esse sine forma, ut probauimus: ergo diuinitus etiam forma poterit esse sine materia, habent enim entitates distinctas, licet incompletas & imperfectas. *Deinde* non minus dependet accidens à subiecto, quam forma à materia, sicut enim recipitur accidens in subiecto, sic forma in materia; sed accidens separatur à subiecto in Eucharistia: ergo per potentiam D. poterit similiter forma esse sine materia. *Tandem* si forma non posset esse sine materia, hoc repugnaret, vel ex parte formæ, ut forma est; vel ex parte formæ, ut est materialis & corporea; vel ex parte formæ, ut est substantialis; sed ex illis capitibus non repugnat formam esse sine materia: ergo talis separatio est possibilis *supernaturaliter*. Probatur *primò* nullam esse repugnantiam ex parte formæ, ut forma est, quia accidentia Eucharistie sunt formæ, attamen existunt sine subiecto. *Secundò* non est repugnantia ex parte formæ, ut est corporea & materialis; quia eadem accidentia Eucharistie quæ separata existunt, sunt corporea, nec denique repugnat ex parte formæ, ut est forma substantialis, quoniam anima rationalis, quæ forma substantialis est, separatur à corpore, & separata conservatur.

Obijcies contra primam partem. Forma habet essentiam, existentiam, & subsistentiam ex se independentem à materia; sed entitates diuersæ & independentes possunt separatim existere naturaliter: ergo natura-

liter potest esse forma sine materia. Resp. distinguendo minorem, entitates diuersæ possunt separatim existere, si sint ultimo completæ & perfectæ, concedo, si sint incompletæ & imperfectæ, nego: materia autem & forma habent quidem entitates diuersas, quia entitas materiæ non est entitas formæ, sed entitates illæ sunt incompletæ & imperfectæ, quæ vniri debent ad generationem compositi, & sic ex dispositione D. & ex præscripto naturæ vnum non potest esse sine alio. Adde quod forma educatur de potentia materiæ, & proinde naturaliter pendet à materia *in fieri & in conseruari*, & consequenter forma non potest existere naturaliter sine materia.

Obijcies contra secundam partem. Ratio formarum materialium est *inexistere*, sed formæ non possunt inexistere nisi habeant subiectum in quo sint: ergo formæ materiales non possunt diuinitus existere sine materia. Resp. esse formarum materialium est *inexistere*, de lege communi & ordinaria, concedo, quia naturaliter existunt in subiecto: de lege extraordinaria & supernaturali, nego, quia Deus potest loco materiæ sustinere formam. Si enim in sacramento Eucharistiæ possit sustentare formas accidentales, quæ sunt minoris entitatis, à fortiori poterit sustentare formas substantiales materiales, quæ fortiolem & firmiorem habent entitatem. *Dices*, forma illa sic separata diuinitus deberet esse vel materialis, vel spiritalis, inter vtramque enim non datur medium, sed neutrum esset: ergo nec posset separata existere. Primò non esset materialis, quia esset separata ab omni materia, nec spiritalis, al à non esset eadem forma ac antea erat, quando existerat in corpore. Resp. in tali suppositione formam sic separatam debere adhuc dici materialem, quia educta est de potentia materiæ, & naturaliter ordinatur ad componendum totum corporeum & materiale.

Q V Æ S T I O VI.

Vtrum plures Formæ Substantiales dentur in vna & eadem materia.

Formæ substantiales vel sunt *subordinate*, quarum vna supponitur & ordinatur ad aliam, vt forma
cor-

corporis in homine, forma viuentis, forma sensibilis, forma animalis, ac denique ipsa hominis forma, quæ omnes præcedentes supponuntur ad hanc vltimam, qua vltimò completur & perficitur homo. Vel sunt *disparata* seu *ultima*, quarum vna nullo modo ad aliam ordinatur; vt forma ligni, ignis, hominis, equi, & similes; quæ ideò *disparata* dicuntur, quatenus sunt incompossibiles inter se; & ideo vocantur *ultima*, quia vltimò complent & perficiunt hæc composita: quandoquidem homo completè non perficitur, nisi habeat formam corporis, sensitui, animalis, & hominis: Quæstio proposita triplicem sensum habere potest, nempe de actu, de potentia naturali & de supernaturali potentia. Quærendo scilicet primò *utrum in vna & eadem materia sint plures forma substantiales subordinata*. Secundò *nn plures forma substantiales ultima eandem numero materiam informare possint materialiter*. Tertiò denique *an saltem supernaturaliter tales forma substantiales disparata possint informare eadem numero materiam, seu idem compositum*. Ad tres illas quæstiones totidem conclusiones respondebunt.

CONCLUSIO PRIMA.

DVa forma substantiales subordinata existere possunt in eadem materia numero, ita quod homo v.g. habeat simul formam corporis, viuentis, sensitui, & animalis, cum ipsa hominis forma. Hæc conclusio ex hoc patet, quòd anima rationali desinente informare hominem per interitum ipsius, materia eius maneat sub aliqua forma substantiali, nempe sub forma corporis: sed illa forma præfuit in materia: ergo eadem numero materia habet plures formas substantiales subordinatas. Deinde quando homo sumit alimentum, illud alimentum induit aliquam formam substantialem quando digeritur, quandoquidem nutritio est conuersio alimenti in substantiam aliti; sed non induit immediatè formam substantialem animæ rationalis, licèt illam induat mediatè, quando scilicèt vnitum est corpori: ergo induit formam corporis, & sic sunt in homine plures formæ substantiales, quæ existunt in eadem illius materia. Tandem homo est homo per formam hominis, & non per formam animalis, & est animal per animalitatem, non verò per formam corporis: ergo in homine sunt plures formæ substantiales.

Obijcies contra primam rationem . Desinente anima rationali ab homine per mortem , producitur forma substantialis cadaueris : ergo materia hominis non manet sub aliqua forma , quæ præextiterit in homine cum anima rationali , contra id quod diximus . *Resp.* Quod si hoc esset verum , corpus Christi in sepulchro non fuisset idem numero corpus ac erat viuens , nec eadem caro ; quia , sicut formas dat esse , & vna forma vnum esse , ita diuersæ formæ dant diuersa esse , & sic , si corpus Christi ante mortem habebat vnum esse ab anima rationali , & post mortem haberet aliud esse à forma cadaueris illi aduenientis , non esset idem corpus Christi mortuum ac viuens ; proindèque non fuisset amplius vnitum cùm Verbo in triduo mortis , quod est contra fidem catholicam , quæ docet Verbum vnitum fuisse animæ in limbo & corpori in sepulchro .

Obijcies 2. *forma dat esse rei* ; sed vna res habet tantum vnum esse : ergo & vnicam formam . Distinguo minorem . Vna res habet tantum vnum esse completum , & vnam formam completam & ultimam , habet tamen plura esse incompleta , & plures formas incompletas & subordinatas : in homine enim aliud est esse corporis , animalis , & hominis ; sicque sunt in illo totidem formæ . Si dicatur , quod quælibet forma substantialis det esse completum : hoc verum est in suo genere , non verò in genere ultimi compositi . Licet enim corporeitas det esse completum homini vt corpus est , non tamen dat illi perfectum esse , vt homo . Dices si adueniret secunda forma alicui materiæ præexistentem habenti formam , resultaret vnum per accidens ; quidquid enim aduenit enti in actu , facit vnum per accidens . *Resp.* hoc verum fore , si forma adueniret enti in actu completo ; non verò cùm aduenit actui incompleto : vnde quia homo non est completus per formam corporis , aut animalis ; forma hominis illi adueniens non facit illum esse ens per accidens ; quia hæc vltima forma eum vltimatè complet & perit . Dices generatio vnius est corruptio alterius : ergo adueniente secunda forma desinit prima . *Resp.* axioma esse verum de generatione compositi , cui soli propriè competit generatio , non verò de educatione formæ : licet enim generato vno composito , corrumpatur aliud , vt patet ; educta tamen vna forma , non corrumpitur præcedens , vt apparet in homine , qui prius naturà recipit formam corporis , deinde

de formam Viuentis, sentientis, & hominis; quæ omnes formæ simul perseverant.

CONCLUSIO SECUNDA.

D*Uæ formæ substantiales ultimæ, & non subordinatæ eandem numero materiam naturaliter informare non possunt.* Ratio huius petitur tum ex eo quod una forma completa & perfecta sufficienter perficiat, & compleat materiam quam informat actu; tum ex eo quod adueniente nouâ formâ substantiali materiam iam constitutæ per primam formam, efficeretur unum per accidens; tum denique ex eo quod generatio unius sit corruptio alterius, ut legitur apud Arist. 1. de gener. cap. 3. tex. 17. & apud Scotum in 2. dist. 1. quæst. 5. quod nihil aliud indicat, nisi quod ad generandum nouum compositum, pristina forma expellatur ab agente naturali, ut introducatur recens in eandem materiam; quandoquidem ipsæ formæ ultimæ sunt impossibiles: & sic apparet quod naturaliter plures formæ substantiales ultimæ non possint informare eandem numero materiam.

Obijcies. In ferro candenti est forma ignis & ferri, quæ sunt duæ formæ substantiales completæ, & non subordinatæ. Est, inquam, forma ferri, quia ferrum candens est idem ac antea; est etiam forma ignis, quia in illo videntur omnia ignis accidentia, scilicet calor, splendor, & vis comburendi; quæ denotant formam substantialem ignis ibi subsistere: ergo in eadem materia sunt duæ formæ substantiales completæ, & non subordinatæ.

Respondeo in ferro candenti non tantum reperiri formam ignis, sed totam ignis substantiam in illo consistere; ita quod forma ignis informet materiam ignis, & forma ferri informet materiam ferri; non verò forma ignis ferrum informat: sic una materia non habet plures formas, sed sunt duæ materię & duæ formæ, quæ faciunt duo composita, nempe compositum ferri, & compositum ignis. Non quod ignis diffundatur per totam substantiam ferri, aliàs duo corpora sese inuicem penetrarent naturaliter; sed quod substantia ignis existat in superficie ferri & in poris illius: cum enim ignis per suam subtilitatem & tenuitatem sit valde penetratius, adhæret superfici ei ferri, & illius poros penetrat, sicut aqua spongiam.

CONCLUSIO TERTIA.

D*Væ forma substantiales vltimæ supernaturaliter nequeunt informare eandem numero materiam .* Hæc conclusio, quæ est Scoti in 4. dist. 49. quæst. 16. & in 2. dist. 2. quæst. 7. & *Quodlib.* 9. & cui refragatur Pontius disp. 33. quæst. 3. concl. 2. ex hoc probatur ; quòd inuoluat repugnantiam tum ex parte materiæ , tum ex parte formæ . *Primò* , inquam , videtur esse *repugnantia ex parte materiæ* ; quia , si eadem materia *numero* haberet plures formas vltimas, tunc ea pertineret ad duas diuersas species ; v. g. ad speciem lupi & leonis , si eadem *numero* materia informaretur formâ leonis & lupi, quæ sunt formæ vltimæ ; sed repugnat eandem materiam pertinere ad species diuersas, quia idem compositum esset simul lupo & leo ; quod vltèriùs implicat: ergo ex parte materiæ repugnat eandem materiam *numero* informari per duas formas substantiales vltimas . Probatur impossibilitas specierum in eadem materia & in eodem composito. Quia si vnus ens esset simul lupo & leo , esset lupo & non esset lupo : quæ implicat : esset, inquam , lupo, quia haberet formam substantialem lupi; non esset verò lupo, quia esset leo per leonis formam , quæ est essentialiter diuersa à forma lupi: & sic euidenter repugnat ex parte materiæ , quòd duæ formæ substantiales vltimæ informant eandem materiam .

Probatur etiam quòd hæc repugnet ex parte formæ . Quia si duæ essent formæ substantiales vltimæ eodem composito, v. g. leonitas & equinitas, vna in earum non haberet suum effectum formalem , qui est informare materiam : ergo non esset forma , quoniam non potest esse forma sine effectû formali . Vna inquam harum formarum non haberet suum effectum formalem ; quia si leonitas faceret leonem , cuius est forma ; equinitas nihil faceret : & sic vna formarum non haberet suum effectum formalem , quod repugnat . Si è contra equinitas faceret equum , leonitas esset sine suo effectû formali , quia nihil informaret ; quod similiter repugnat : ergo ex parte formæ implicat dari plures formas substantiales in eadem numero materia .

Dicendum ergo est , quòd forma vltima , cùm sit ad æquata materiæ, non possit illam excedere, nec ab illa
exce-

excedi; quia in hoc consistit adæquata ratio alicuius rei: proindeque vna materia vnam formam substantialem exigit, à qua determinetur vltimatè; & vna forma substantialis vltima petit habere vnam numero materiam, quam determinet, & faciat esse talis speciei, & non alterius; sicque euidenter repugnat, quòd plures forme afficiant eandem numero materiam.

Obijcies. Virtus D. quæ absoluta est potest facere quòd duo corpora existant simul in eodem loco: vt docet Scotus in 4. dist. 49. quæst. 16. Et quòd plura accidentia sint in eodem subiecto, 5. met. quæst. 7. ergo facere potest, vt duæ forme substantiales vltimæ sint in eadem materia. Resp. virtutem D. ideo dici absoluta quia omnia potest facere, quæ in se fieri possunt; non tamen se extendit ad impossibilia: vnde, cum duo corpora esse in eodem loco non repugnet, vt aliquando probabitur, bene autem duas formas vltimas informare eandem materiam, vt ostendimus; proinde hoc vltimum non potest fieri, bene autem priora: quia corpora locata sunt quid extrinsecum respectu loci, sicut & accidentia respectu subiecti; at forma substantialis essentialiter & intrinsecè constituit materiam, eamque determinat ad certam speciem; & sic non possunt multiplicari forme substantiales in vna & eadem materia. Dicitur. Appetitus materiæ non satiatur per adeptionem vnius formæ vltimæ, quoniam inclinatur adhuc ad alias: ergo plures forme vltimæ possunt haberi in eadem materia. Resp. materiam inclinari ad alias formas, & eas posse obtinere, sed non *permanenter & simul*; bene autem *successinè*: vnde non negamus, quin materia existens sub vna forma ad aliam aspiret, sed hoc est post destructionem præsentis, quæ est impossibilis cum alia.

Quæres an vna forma possit informare plures materias, saltem virtute D. hæc quæstio intelligi debet de pluribus materijs totalibus & adæquatis, vtrum v. g. eadem forma leonis possit informare duo corpora. Resp. negatiuè, per rationem quam antea attulimus de adæquatione materiæ ad formam, & formæ ad materiam, dicendo scilicet quòd talis adæquatio faciat, quòd vna materia debeat habere vnam formam, & vna forma vnam materiam; & sic quandoquidem plures forme vltimæ non possunt informare eandem numero materiam, sic vna forma non potest informa-

re plures materias , si sit forma totalis & adæquata non potest tamen dubitari , quin eadem anima rationalis informet plures corporis partes. Conclusio nostra est Scoti in 3. dist. 1. quæst. 2. contra Pontium disp. 3. quæst. 4.

S E C T I O III.

De Composito Naturali.

EX materia & forma , quæ sunt principia compositionis rerum naturalium , resultat totum , quod ex illis constituitur ; unde , cum in præcedenti Sectione , quæ erat de principiis rerum naturalium in specie , sufficienter dixerimus de materia & forma : nunc procedendum est ad examen compositi naturalis : & hoc fiet in præsentī sectione subdividenda immediatè per quæstiones .

Q V Æ S T I O PRIMA.

An Compositum ex Materia & Forma sit unum per se .

Antiquorum Philosophorum maior pars existimavit solam materiam esse de essentia compositi naturalis ; quia cum illi negarent existentiam formæ substantialis , omnia dicebant componi substantialiter ex sola materia ; formamque esse quid aduentitium , extrinsecum , & accidentale composito : sed contra tales probauimus formas substantiales dari . Alij è contra cum Auerroe voluerunt formam salam esse essentiam rerum naturalium , materiam verò esse tantummodo receptiuam essentiæ , sicut vagina est receptiua gladij non verò constitutiua illius . Hos præcessit Plato qui de composito humano loquens dicit ; animam solam esse totum hominem : quæ in corpore degeret tanquam captiua in carcere , cuius fenestræ erant sensus externi : unde Socrates , qui in eadem mente erat , cuidam sibi ignoto dixit , *loquere hospes , ut te videam* . Peripatetici verò , reiectis antiquatis illis opinionibus , pro certo tenent materiam & formam esse partes essentielles compositi , quæ sibi inuicem vniunt , faciunt compositum ex illis duabus resultans . Cum autem illud compositum

situm

fitum sit ens, & omne eos sit vnum; ideo hic queritur an
*compositum ex materia & forma sit vnum per se, vel vnum
 tantummodò per accidens.*

CONCLUSIO.

Compositum ex materia & forma est vnum per se.
 Sic Doctor noster pluribus in locis, & præsertim
 in 3. distr. 12. quæst. vn. & 8. Metaph. quæst. 4. con-
 formiter ad Arist. 2. de An. text. 7. & 8. Metaph. text. 17.
 Ratio huius desumi potest ex definitione totius per se:
 & totius per accidens. Totum per se est *compositum ex
 partibus eiusdem prædicamenti, quarum una est actus,
 & alia est potentia*; vbi totum per accidens, ex aduer-
 so, est *compositum ex partibus diuersi prædicamenti*,
 vt paries albus, quorum prius pertinet ad prædica-
 mentum substantiæ; & posterius ad prædicamentum
 qualitatis; sed materia & forma sunt partes eiusdem
 prædicamenti, nempe prædicamenti substantiæ, ad
 quod pertinent; & vna earum est potentia, videlicet
 materia, quæ est perfectibilis; & alia est actus, nempe
 forma, quæ est perfectiua: ergo *ex materia & forma resul-
 tat vnum per se.*

Obijcies 1. duæ entitates non faciunt vnum, quoniam
dualitas & unitas opponuntur; sed materia & forma
 sunt duæ entitates actuales in mente Scoti, qui actum
 entitatum tribuit materiæ primæ: ergo non faciunt
 vnum, & sic ex materia & forma non resultat vnum
 per se. Resp. duas entitates non facere *vnum per iden-
 titatem*, sed *vnum per unionem*; quatenus ex illis vni-
 tis resultat tertia entitas. Dices, illud tertium non po-
 terit esse vnum per se, quia forma adueniens materiæ
 aduenit enti in actu, & quod aduenit enti in actu facit
 ens per accidens: ergo totum resultans ex materia & forma
 non est vnum per se. Resp. quod aduenit enti in actu fa-
 cit ens per accidens; si adueniat enti in actu completo;
 non verò si adueniat enti in actu incompleto. Quando au-
 tem forma aduenit materiæ, aduenit enti incompleto,
 quandoquidem materia prima de se est potentialis &
 imperfecta, & proinde eget forma, per quam complea-
 tur & efficiat compositum.

Obijcies 2. *Quæ maximè distant nequeunt uniri*,
 simul, nec facere vnum per se; sed materia & forma
 maximè distant, quia sunt diuersæ rationis, quoniam
 mate-

materia est potentia, & forma est actus: ergo ex ipsis non potest effici vnum per se. *Resp.* distinguendo maiorem, quæ maximè distant non possunt facere vnum per se, *unitate identitatis*; quasi verò vnum euadat aliud, concedo, forma enim nunquam est materia, nec materia redditur forma: *unitate compositionis*, nego. Quia enim materia, tanquam perfectibilis, dicit ordinem intrinsecum ad formam, tanquam ad sui perfectiuum: proinde ex utroque fit vnum per se. Si dicatur ex hoc sequi, quòd ex subiecto & accidente fiet pariter vnum per se, quia subiectum perficitur per accidens, quod illi aduenit, v. g. paries, per receptionem albedinis, negatur consequentia, quia accidens non perficit subiectum *intrinsecè*, sed tantum *extrinsecè*; forma verò est perfectio intrinseca materiae: & sic facit vnum per se cum materia.

QVÆSTIO II.

Vtrum Materia & Forma uniantur seipsis in Constitutione Totius.

Thomistarum plurimi cum Ochamo & Nominalibus, affirmant materiam & formam ita immediate & seipsis vniri in constitutione Totius, vt nihil interponatur, quod sit vinculum & nexus materiae & formæ. Scotistæ ex aduerso cum Doctore in 4. dist. 1. quæst. 1. tenent materiam & formam vniri media quadam vnione ab eis distincta realiter; ita quòd agens, quod vnit materiam cum forma, producat aliquam entitatem actualem, qua materia dicitur vnita formæ, & forma vnita materiae, vt compositum efficiant; ita vt sicuti materia & forma sunt partes essentielles compositi, sic vnio sit conditio sine qua materia & forma, etiam si ponerentur simul, non constituerent compositum.

CONCLUSIO.

Materia & forma compositum efficiunt, mediante vnione, quæ ab illis realiter distinguitur, *Quod enim non est de se tale, debet fieri tale per aliud*; si enim paries de se non sit albus, redditur albus per albedinem; sed forma non est de se vnita materiae, nec anima

ma rationalis corpori, aliàs nunquam esset separata: ergo debet vniri corpori per aliquid aliud, nempe per vnionem ipsam, qua illæ partes dicuntur vniri. *Deinde*, res non mutatur, nisi aliquid de nouo in se recipiat; sed materia & forma mutantur, cum vniuntur, efficiendo compositum, quandoquidem materia de nouo informata redditur actu informata, & forma de nouo informante fit actu informans: ergo aliquid in se recipiunt de nouo, quod aliud non potest esse quàm vnio, per quam dicuntur vniri. *Tandem*, homo generans hominem non tantum producit corpus, sed etiam debet producere aliquid circa animam rationalem, qua formaliter est homo; sed non potest attingere entitatem animæ rationalis, quæ, cum spiritualis sit, superat actionem comparabilem: ergo saltem producit vnionem, per quam fit homo; & sic materia & forma efficiunt compositum mediante vnione. Et hoc est quod dicunt Theologi: *Verbum D. & humanitatem in Christo fuisse unita per unionem hypostaticam*, quæ vnio ablata fuit in triduo mortis, quo durante, Christus erat verè mortuus; licet Verbum remanserit vnitum cum anima & corpore:

Obijcies 1. Quando forma redditur presens materiæ, efficitur compositum immediatè, absque eo quod producatur vnio: ergo seipsis & non mediante vnione materia & forma efficiunt compositum. *Resp.* negando antecedens: aliàs Angelus posset corpus mortuum resuscitare, adducendo animam ad suum cadauer, quod nullus tamen asserere præsumpserit; cum omnes admittant soli Deo resurrectionem esse possibilem; & sic præsentia formæ ad materiam non sufficit ad effectum compositi, sed requiritur vnio vtriusquæ, per quam materia sustentat formam, & forma materiam informat.

Obijcies 2. Compositum substantiale non aliter distinguitur à composito accidentali, nisi quia partes illius vniuntur per se, & partes istius mediante vnione accidentali, quæ est accidens; sed ex materia & forma fit compositum substantiale & per se: ergo materia & forma vniuntur seipsis. *Resp.* negandum esse antecedens. Quia in vtroque composito, substantiali & accidentali, interuenit vnio accidentalis; sed in hoc distinguuntur, quod partes illius habeant inter se ordinabilitatem essentialem, quæ in hoc consistit, quod

vna pars sit potentia, & alia sit actus: partes verò compositi accidentalis non ordinantur ad se inuicem, nisi per accidens; cùm accidens adueniens subiecto adueniat enti in actu completo, & quidquid aduenit enti in actu completo facit ens per accidens; vt patet de pariete, qui accipiendo albedinem, fit compositum accidentale.

Obijcies 3. Generatio, quæ consistit in *unionè formæ cum materia*, est quid substantiale: sed terminus vnitionis actiuz est vnio formalis: ergo vnio materiæ & formæ non est accidens, & sic materia & forma vniuntur substantialiter & immediatè. *Resp.* Generationem dici substantialem, quia terminus *qui* illius est quid substantiale, nempe ens illud, quod per generationem producitur; hoc non impedit tamen, quin terminus *quo* generationis sit accidens, nimirum ipsa vnio, per quam fit compositum substantiale, & à quo generatio dicitur *actio substantialis*. *Dices*, si vnio requiratur ad efficiendum compositum tres partes habebit; videlicet materiam, formam, & vnionem. *Resp.* negando consequentiam. Quia *vnio* non componit, sed est conditio requisita, vt materia & forma component, tanquam partes essentielles, quas agens coniungit per *vnionem*, quæ est illarum veluti nexus.

Obijcies 4. Aristotelem 8. *Metaph.* arguere Veteres Philosophos, quòd vellent materiam & formam coniungi per medium vinculum, ergo non debet admitti vnio has partes coniungens. *Resp.* Philosophum ideo reprehendere antiquos, quòd ipsi admitterent vinculum quoddam per modum tertie rei coniungentis *in simul* partes compositi, sicuti calx coniungit lapides domus; nos verò non admittimus *vnionem* tanquam entitatem tertiam absolutam, quæ coniungat partes compositi; bene autem veluti accidens aliquod relationum, sine quo intelligi nequit, quòd materia & forma efficiant compositum, nisi prius vnitatur sibi inuicem.

Si quærat ergo *quid sit vnio illa*, quam exigimus in materia & forma, vt totum constituent. Respondendum est non intelligi reuerà cum antiquis Philosophis corpus aliquod subtilissimum materiam & formam coniungens. Nec etiam intelligitur modus substantialis materiam vel formam consequens, vt innuit Doctor hoster in 3. dist. 1. *quæst.* 1. Bene autem relatio extrinsecus adueniens, quæ sequitur entitates absolutas materiæ

teriarum, & formarum, per quam materia formam sustentat, & forma informat, actualiat & perficit materiam; ita quod ex materia, & forma unitis resultet compositum.

Quod unio, de qua loquimur, non sit corpus quoddam subtile uniens materiam, & formam, hoc patet per expressam refutationem talis opinionis, quam in Veteribus Philosophis reprobatur Aristoteles 8. Metaph. Adde quod tres essent partes essentielles cuiuslibet compositi naturalis, quod longè abest à communi mente sensatorum. Quod etiam prædicta unio non sit modus substantialis intrinsecus rei unita, ex hoc colligitur, quod talis modus vel esset corporeus, vel spiritualis, si esset corporeus, anima rationalis non posset per illum uniri corpori: si verò esset spiritualis, corpus per eum non posset uniri animæ: ergo unio illa non est modus substantialis, nec entitas absoluta, propter eandem rationem.

Remanet ergo, quod *unio materia cum forma sit relatio, iuxta mentem Aristotelis, qui 2. Phys. text. 25. materiam, & formam simul unitas vocat entia relatiua, propter unionem quæ illis aduenit, & quæ proinde est relatio consequens substantiam materiæ, & formæ. Cum autem non sit relatio intrinsecè adueniens, quæ necessariò resurgit ex positione extremorum, vbi unio materiæ ad formam non est talis, quoniam materia, & forma possunt separari, ut patet de anima rationali: proinde remanet, ut unio sit relatio extrinsecus adueniens, quæ non nascitur ex natura extremorum, sed requirit conditionem approximationis, præsentia, & informationis vnius ad alterum: quandoquidem ad faciendum hominem non sufficit, quod anima rationalis sit præsens corpori, sed requiritur quod actu informet corpus humanum, ut antea diximus.*

Si queratur ulterius *utrum unio inter materiam, & formam sit duplex, vel una. Respondendum est cum Doctore in 2. dist. 1. quæst. 5. & 8. Metaph. quæst. 4. quod duplex sit unio inter materiam, & formam constituens compositum, quarum una in materia existens illam coniungit cum forma, & altera residens in forma, eam unit cum materia. Relatio enim unionis fundatur super potentiam actiuam, & passiuam, quandoquidem forma informat, & perficit, materia verò informatur, & perficitur; sed inter agens, & patiens sunt duæ relationes, una in agente terminata ad passum, & alia*

& alia in patiente terminata ad agens : ergo in materia, & forma est duplex unio, seu duplex relatio unionis, quarum una est in materia, quæ unitur materiæ, sicut agens passio.

QVÆSTIO III.

An Totum realiter distinguatur à partibus unitis.

PER *compositum physicum* seu naturale intelligitur illud, quod constituitur ex materia, & forma ; quod idè vocatur *totum*, quia ex præfatis partibus componitur. Si illud totum compositum compareretur ad partes *diuisim* sumptas, fatentur omnes ipsum distinguere realiter à partibus ; quandoquidem una earum potest existere sine alia, & proinde sine *totò*. Si compareretur idem *totum* ad partes *coniunctim* acceptas, & sibi intimè præfentes, dici adhuc debet quòd *totum* distinguatur à partibus *simul* sumptis ; quia si anima rationalis esset præfens corpori, absque eo quòd ipsi uniretur, illudque informaret, tunc anima, & corpus non essent homo ; imò distinguerentur ab homine. Quæstio autem est de partibus *simul* sumptis, & unitis, an scilicet *totum* realiter distinguatur ab illis. Quod ut clariùs pateat.

Notandum est totum esse duplex, nempe totum per se, & totum per accidens. *Totum per se* est compositum ex partibus eiusdem prædicamenti, quarum una est potentia, & alia est actus, & sic ex materia, & forma fit *unum per se* : quia sunt duo entia incompleta prædicamenti substantiæ, quorum unum est *potentia*, nempe materia ; aliud verò est *actus*, nempe forma. *Totum per accidens* est illud, quod componitur ex partibus diuersi prædicamenti ; ut paries albus, vel homo doctus : paries enim, & homo sunt de prædicamento substantiæ, albedo autem, & doctrina ad prædicamentum qualitatis pertinent.

Totum per se triplex est, Potentiale, Essentiale, & Integrale. *Totum potentiale* est illud, quod habet partes subiectiuas ; ut animal, quod diuiditur in brutum, & hominem. *Totum essentiale* illud est, quod habet partes essentielles ; ut homo, qui diuiditur in corpus, & animam. *Totum integrale* illud est, quod diuiditur in partes integrantes, ut corpus humanum, quod distri-

bui-

buitur in caput, pedes, brachia, & similes. Totum integrale subdiuiditur in *homogeneum*, cuius partes sunt eiusdem rationis cum toto, ita quod nomen *totius* conueniat cuilibet parti; & sic quatuor elementa sunt corpora homogenea, cum pars quolibet aquæ, terræ, ignis, & aeris, sint aqua, terra, ignis, & aer: Et in *heterogeneum*, cuius partes sunt alterius rationis à toto, à quo denominationem non recipiunt: sic homo, equus, & similia animantia, sunt *tota heterogenea*, quoniam non dicitur de pede, aut capite equi vel hominis, quòd sint equus aut homo.

Quæstio præsens intelligitur præcisè de *toto essentiali Physico*, quod est totum per se; querendo scilicet, *an ver. gr. homo qui est totum essentiali physicum distinguatur realiter ab anima, & corpore simul unitis, ex quibus homo ipse non constituitur, tanquam ex partibus physicis essentialibus*. Auerroes, Toletus, Complutenses, Suares, & plerique Thomistarum cum Doctore Angelico negant, *totum* à suis partibus realiter distingui. Scotus verò in 3. dist. 2. quæst. 2. cum suis, & Conimbricensibus; sicut, & Thomistarum aliqui, etiam ex celebrioribus, contendunt *totum physicum* realiter à suis partibus unitis dissidere.

CONCLUSIO.

Totum essentiali realiter distinguitur à partibus unitis. Sic cum Doctore nostro, Capreolus, Caietanus, Ferrariensis, Iauellus, & præ cæteris Aristoteles, qui 2. de animæ text. 27. diuidit substantiam corpoream in tria membra, nempe in materiam, formam, & compositionem; sed membra diuisionis legitimæ sunt opposita, & distincta realiter; ergo, sicut materia, & forma distinguuntur realiter; sic etiam totum distinguitur realiter à materia, & forma simul sumptis. Quod autem debeat intelligi Philosophus de *materia, & forma unitis, & non separatis*; hoc intelligitur ex 8. Metaph. text. 15. ubi ait, *totum substantiale non esse simile acerno lapidum, qui præter partes simul unitas, & aggregatas, nihil aliud est; sed esse quid ab eis simul unitis dissitum*. Ex 7. Metaph. cap. 14. ubi inquit, *sex non esse bis tria, sed semel sex*; quod utique falsum esset, nisi totum ex bis tribus constitutum distingueretur à parte rei à bis tribus.

Probaturs conclusio per rationem. Omnis causa vera & realis, quæ verè & realiter influat, distinguitur verè & realiter à suo effectu; quia *idem nequit efficere seipsum*; ex Arist. 2. de Anima text. 47. sed materia & forma vnitæ sunt veræ & reales causæ, quæ realiter in compositum influunt, ipsum scilicet efficiendo: ergo totum realiter distinguitur à partibus unitis. Falsum est enim id quod respondent aduersarij, *partes uniendas facere compositum, non verò partes unitas*: intelligi enim nequit, quòd partes totum efficiant, nisi actu uniantur; & sic talis responsio est purè elusoria. Sicut & ea, quam alij afferunt, dicendo causas extrinsecas, quales sunt efficiens & finalis, distinguunt ab effectu; non verò causas intrinsecas, uti sunt materia & forma. Gratis, inquam, fingitur hæc responsio, quia causa intrinseca non potest seipsam causare, aliàs esset simul quid prius & quid posterius, quod absolute repugnat.

Confirmatur 2. Quando generatur vel corrumpitur homo, qui est *compositum essentiale*, non generatur materia, quia est *ingenerabilis*; non generatur etiam forma, quia anima rationalis à Deo producitur: ergo generatur *compositum* tanquam *aliquid à materia & forma distinctum*. Nec dicant aduersarij generari unionem corporis cum anima: nam ex hoc sequeretur quòd generatio hominis non esset substantialis, quandoquidem per eam produceretur tantum unio, quæ est accidentalis: & sic dici debet quòd generatur compositum distinctum realiter à materia & forma unitis. Idem dicendum est de corruptione, quòd scilicet non esset substantialis, si per eam corrumpereetur tantum unio, quæ est accidens.

Præcedentibus addi potest quòd proprietates alicuius subiecti censeantur emanare à *toto composito*, non verò à partibus illius, ut patet de risibilitate hominis, quæ non oritur à materia, nec à forma quæ non possunt ridere, sed à toto composito, quod est alia entitas ab entitate partium, quæ simul unitæ ipsum sic efficiunt. Primò materia existit, deinde in materia intelligitur priuatio formæ, postea priuatio recedit per formæ accessum, & sic uniuntur partes, ac denique resultat ex illis partibus unitis tertia entitas, nempe *entitas compositi*, quæ distinguitur ab entitate partium unitarum, tanquam effectus à causa, Ex quibus patet

Veritas conclusionis nostræ, quæ iure diximus *totum* *essentiale realiter distinguì à partibus unitis*.

Obijcies 1. Aristotelem asserere totum non distinguì à partibus simul sumptis, quia 4. *Phys. text. 23.* ait totum nihil aliud esse præter partes. Et 2. *de Anima text. 7.* dicit corpus, & animam esse unum. Quod idem repetit pluribus in locis: Quibus subscribere videntur Aug. 7. *de Trinit. cap. dicens, Corpus, & animam esse totum hominem.* Et Athanas. in *Symb. Sicut anima rationalis, & caro unus est homo, ita Deus, & homo unus est Christus.* Resp. Philosophum, & Patres intelligendos esse *causaliter*, non verò *formaliter*; ita quod mens eorum sit dicere, *solas partes causare totum, corpus & animam facere totum hominem; vel nihil aliud constituere vel integrare totum præter partes.* Quoad Athanasium, insinuare tantum prætendit; quòd sicut ex anima rationali, & carne fiat unum per *suppositum*; sic etiam ex Deo, & homine fiat tantum una persona per se. Quòd si Boetius lib. *de Trinit. cap. 3.* dicat, totum nihil aliud esse quàm partes unitas. Quod videntur confirmare D. Dionys. qui lib. *de Cal. hierarch. cap. 4.* mortem vocat in nobis, non substantiæ consumptionem, sed *separationem unitorum.* Et August. qui in *Psal. 38.* asserit mortem esse *separationem animæ, & corporis*: quasi illi Patres dicere intendant hominem nihil esse aliud præter partes unitas. Responderi debet, Boetium loqui non per prædicationem formalem, quasi verò nihil aliud sit homo, quàm corpus & anima; sed per continentiam: quod dicere est, hominem nihil aliud continere pro partibus essentialibus, quàm corpus, & animam. Quoad Dionys. & Aug. quia agebant contra illos qui existimabant animam perire cum corpore, iuxta id quod habetur *Ecclesiast. 3. Unus est interitus hominum, & iumentorum nil mirum, si dixerint mortem nihil esse aliud, quàm separationem animæ & corporis,* ut probarent animam non perire: non minus tamen admisserunt totum hominem esse aliquid aliud à corpore, & anima unitis.

Obijcies 2. Omne absolutum realiter distinctum ab alio potest ab illo separari virtute D. sed implicat totum, quod est quid absolutum, posse existere sine partibus, quæ etiam absolute sunt, hominem v.g. sine corpore, & anima: ergo totum non distinguetur realiter à suis partibus. Resp. distinguendo maiorem, absolu-

tum potest diuinitus existere separatum ab absoluto à quo distinguitur realiter; si nulla sit dependentia essentialis vnius ab alio, concedo: si sit essentialis dependentia, nego: in proposito autem totum essentialiter dependet à partibus, quæ sunt essentialia & intrinseca illius principia; & sic nil mirum est, si totum, quod realiter à partibus distinguitur, non possit existere sine illius: Licet enim creatura realiter distinguatur à Creatore, non potest tamen existere sine illo ob dependentiam essentialem quam ab eo habet. *Dices*, licet accidens dependeat essentialiter à subiecto, potest tamen separari ab illo, quia ab eo distinguitur realiter: ergo dependentia essentialis, quam habet totum à partibus, non impediret quominus posset separari ab illis, si ab eis realiter distingueretur. *Resp.* negando consequentiam, quia dependentia accidentis à subiecto, cum sit tantum extrinseca, potest à Deo suppleri; dependentia verò compositi à partibus cum sit intrinseca, ideo totum non potest à partibus separari. Adde quod, licet totum non possit separari à partibus, partes tamen possunt existere sine toto, vt accidit in morte Christi; vbi humanitas fuit destructa & Christus verè mortuus; partes verò remanserunt integræ, corpus in sepulchro, & anima in limbo: quod sufficit ad distinctionem realem.

Obijcies 3. Si totum esset entitas distincta à partibus vnitis, cum illis faceret vnum ens per accidens; quia *quidquid aduenit enti in actu facit ens per accidens*; ergo nullum daretur compositum, quod esset ens per se. *Resp.* negando consequentiam. Quia entitas compositi non aduenit entitatibus materiæ & formæ, aliàs in homine esset forma essentialis vltima præter animam rationalem, nempe forma totius; sed entitas materiæ & formæ vertuntur in entitatem compositam, quod causant intrinsecè, ita quod tertia illa entitas non faciat compositionem cum partibus, sed est quid compositum ex illis partibus. Quando autem dicimus, quod partes vnite faciant intrinsecè totum, non propterea dici debet cum Fabro nostro theor. 21. quod illæ partes sint transactæ inter tertiam entitatem; quia partes in tertiam entitatem transactæ non remanent *actu*, sed tantum *virtualiter*, in toto; vt patet de elementis, quæ non remanent in mixto *actu*, quoniam in illius tertiam entitatem transacta sunt; materia autem & forma,

ma, quæ sunt partes compositi, *actu* persistunt in composito, vt docet Arist. 1. *Phys. cap. 7.* ergo partes compositi non debent dici transactæ in entitatem illius, vt Fauentinus docuit. Nisi benignè sic intelligatur, quòd voluerit partes compositi ideò dici transactas in tertiam entitatem; quòd reuerà efficiant entitatem tertiam compositi, in quo tamen intelligantur *actu* remanere.

Obijcies 4. in generatione non possunt esse duo termini; sed si totum distingueretur à partibus, essent duo termini generationis, quia generaretur entitas formæ in rebus materialibus, & entitas compositi: ergo *totum* dicit entitatem realiter distinctam ab entitate partium. *Resp.* distinguendo minorem; in generatione essent duo termini, quorum vnum esset *partialis*, nempe forma, & alius *totalis*, nempe compositum, concedo; essent duo termini *totales*, nego. Non autem repugnat, quòd generatio habeat duos terminos, quorum vnus vocatur terminus *quo*, nempe forma, & alius vocatur terminus *qui*, nempe compositum. Adde quòd, vt diximus multoties, forma non dicatur propriè generari, sed solum compositum; vnde est tantum vnus terminus generationis. *Dices.* Ex dictis colligitur, quòd partes sint de essentia totius; sed essentia rei non distinguitur realiter à re cuius est essentia: ergo *totum* non distinguitur realiter à partibus. *Resp.* distinguendo maiorem, partes sunt de essentia totius; in *obliquo*, concedo; quia homo essentialiter constat corpore, & anima: in *recto*, nego; quia homo non est essentialiter corpus aut anima. *Instabis* compositum includit partes essentialiter: ergo ab illis non distinguitur. *Disting.* includit partes essentialiter, tanquam causas intrinsecas, concedo: tanquam essentiam, & quidditatem formalem, nego.

Quæres *utrum* partes unite inuoluant distinctionem realem positiuam mutuam à toto. *Resp.* 1. partes unitas positiuè distingui à toto, ex Scoto in 3. *dist. 2. quæst. 2.* contra Fauentinum theor. 21. admittentem distinctionem tantummodò negatiuam. Ratio nostra est, quia inter entia realia positia interuenit distinctio realis positia, ab eis suam entitatem accipiens; sed partes unite, & totum ab illis causatum sunt entia realia positia, quorum vnum dependet positiuè ab alio; ergo inter illa assignari debet distinctio realis positia.

Resp.

Resp. 2. partes vnitæ, & totum distingui distinctione mutua, ex eodem Scoto præcitato, Quia sicut partes vnitæ distinguuntur realiter à toto, & habent distinctas essentias ab illo; sic etiam totum distinguitur realiter à partibus vnitæ, & essentiam habet ab illis distinctam. Nemo enim dubitat, quin relatio *secundi generis*, quæ habetur inter causam, & causatum, sit mutua, ut docet Arist. 5. *met. cap. 15. tex. 20.* sed partes vnitæ causant totum; ergo relatio illis adueniens est *realis mutua*; cum maximè totum illud sit finitum, & limitatum, proindèque capax relationis mutue. Quòd si non possit totum esse sine partibus, sicuti partes possunt esse sine toto; hoc non impedit quin talis relatio sit mutua, cum Pater in diuinis non possit esse sine Filio, mutuo tamen distinguatur ab illo realiter.

QVÆSTIO IV.

An Totum Integræle, & Totum per accidens distinguantur realiter à suis Partibus.

IN annotatione quæstionis præcedentis diximus totum diuidi in totum per se, & in totum per accidens, totumque per se subdividi in Potentiale, quale est animal respectu hominis, & bruti; in Essentiale, qualis est homo respectu animæ, & corporis, & in integrale, quale est corpus humanum, quod diuiditur in caput, pedes, & brachia; aut qualis est aqua, quæ componitur ex partibus aquæ: vnde illud vocatur totum heterogeneum, & istud totum homogeneum nuncupatur; quia scilicet partes illius sunt diuersæ rationis, & denominationis à toto, & partes istius sunt rationis eiusdem cū toto. In conclusione præcedenti probauimus de toto essentiali quòd distinguatur realiter à partibus vnitæ: nunc videndum est *an totum integrale homogeneum, vel heterogeneum distinguatur etiam realiter à partibus coniunctis*. præcedens veritas ab omnibus Scotistis tenetur, non sic autem de præsentī, quandoquidem gemini Scotistæ Māstrius, & Bellutus negant totum integrale realiter à suis partibus distingui; quod etiam inficiatur Poncius *dist. 35. quæst. 2.* Alij verò communiter cum Sirecto, Valone, Mayronio, Tatareto, sequentes mentem Scoti *in 2. dist. 17. quæst. vn.* & ibidem *in report.* tuentur totum integrale distinguī realiter à suis partibus simul sumptis.

CON.

CONCLUSIO PRIMA.

Totum integrale realiter distinguitur à partibus unitis. Sic Arist. 7. *Metaph. text. 60.* ubi dicit syllabam *Ba* non esse *A & B*; sed quid distinctum ab utroque. Nec exponi debet Philosophus in his literis ab inuicem separatis; nihil enim noui proferret Aristoteles; imò hoc frustra diceret, cum nullus sit, qui dubiret, syllabam *Ba* distingui ab *A & B* separatis. Ratio conclusionis istius iam allata est in præcedenti questione. Si enim totum essentiale realiter distinguitur à partibus essentialibus unitis, quia faciunt totum quod debet distingui realiter à causa; proinde totum integrale etiam distinctionem importat realem à suis partibus integrantibus, quæ sunt etiam illius causæ materiales; ut innuit Scotus in 2. *dist. 16. quest. vn.* dicens partes integrales semper facere aliquod totum. Adde quòd totum integrale, vel est homogeneous, vel heterogeneous; sed totum homogeneous realiter distinguitur à partibus unitis, ut de carne exemplificatur Scotus cum Arist. 7. *Metaph. text. ult.* sicut & totum heterogeneous, ut homo de quo exemplum affert Doctor noster in 3. *dist. 22. quest. vn.* ergo omne totum integrale realiter distinguitur à suis partibus integrantibus.

Obijcies. Si totum integrale foret aliud à suis partibus, materia quæ constat partibus integralibus & entitatiuis, ut docet Doctor in 2. *dist. 32. quest. 2.* esset generabilis & corruptibilis. Si enim diuideretur in partes, corrumperetur eius *tertia* entitas, etsi partes eadem reunirentur postea, generaretur *tertia* entitas; quòd pugnat contra ea quæ aliàs diximus materiam esse ingenerabilem & incorruptibilem. *Resp.* materiam posse reuera generari & corrumpi, penes *tertiã* entitatem quam emendicat à partibus integralibus & entitatiuis; quia tamen partes illæ entitatiuæ & substantiales non possunt corrumpi, imò remanent post quamcunque diuisionem earum, ideò materia dicitur simpliciter ingenerabilis & incorruptibilis, *obiectiue* scilicet, quia partes eius non possunt destrui aut generari, licet dicatur generabilis & corruptibilis *subiectiue*, quatenus potest per diuisionem aut reunionem partium entitatiuarum amittere vel acquirere *tertiã* illam entitatem totius integrantis, distinctam ab entitate partium.

CONCLUSIO SECUNDA.

Totum per accidens non distinguitur realiter à suis partibus unitis. Sic Scotus in 3. dist. 2. quest. 2. ubi ait totum per se distinguì à toto per accidens in hoc, quòd totum per se dicat tertiam entitatem à partibus distinctam, quam non dicit totum per accidens. Ratio huius est, quòd si totum per accidens esset aliud à subiecto & accidente cui inhæret, illud esset substantia vel accidens, cum inter hæc non detur medium; sed illa *tertia* entitas non potest esse substantia, quia substantia esset pars accidentis; nec etiam potest esse accidens, quia accidens esset pars substantiæ: ergo non efficitur tertia entitas ex subiecto & accidente, nec proinde totum per accidens realiter distinguitur à partibus unitis, quæ sunt subiectum & accidens quo afficitur. Deinde quæ sunt completa & perfecta in suo genere, non tendunt ad causandum tertium quod ab eis distinguatur; hoc enim imperfectionem redolet, ut videri potest de materia & forma, quæ ideo causant compositum, quia sunt entia incompleta; sed subiectum & accidens sunt entia completa in suo genere, quia vnum non dicit ordinem essentialem ad aliud: ergo non ordinantur ad causandum totum ab illis realiter distinctum.

Obijcies. Tota ratio cur totum essentiale & integrale distinguantur realiter à partibus unitis, est quod partes unitæ essentiales & integrantes causent & efficiant totum, sed partes totius accidentales, quæ sunt subiectum & accidens, faciunt totum accidentale: ergo totum accidentale realiter distinguitur à partibus unitis. Resp. Ideo partes essentiales unitas distinguì à toto, quia efficiunt *tertiam entitatem per se*, quæ resultat ex unionem formæ ad materiam; partes verò accidentales non faciunt tertiam entitatem, quoniam totum per accidens non est quid vnum simpliciter, sed quid distinctum & diuisum, vel potius multiplex entitas, quoniam subiectum & accidens, quæ sunt entia completa in suo genere, non ordinantur ad faciendum vnum compositum per se. Quòd si totum accidentale ultra unionem partium addat actualem informationem, quæ accidens subiectum informat: non propterea ex illis fit vna tertia entitas, sed diuisa multiplicitas entitatum, quandoquidem, ut prædictum est, tales entitates, quæ
fa-

faciunt totum per accidens, non habent ordinem intrinsecum inter se, quo vnum efficiant: cum ergo totum per accidens non sit *tertia* entitas ab entitate partium vnitarum, proinde dici non debet, quòd totum per accidens realiter distinguatur à partibus accidentalibus vnitis.

QVÆSTIO V.

*An Compositum substantiale includat essentialiter
Materiam & Formam.*

Diximus quidem in annotatione primæ quæstionis sectionis huiusce, quòd veterum Philosophorum alij voluerint solam materiam esse de essentia compositi naturalis; cum & ipsi formarum substantialium negarent existentiam: alij verò negauerint materiam esse de quidditate compositi; dicentes ipsam esse tantummodò *vehiculum forma & receptivum essentia compositi*. Sed quia præter Veteres Philosophos, alii adhuc diuersas opiniones habuerunt circa propositam difficultatem, cum Durandus in 4. dist. 44. quæst. 1. admittat quidem materiam in communi esse de essentia compositi in communi: neget verò materiam in particulari esse de essentia compositi particularis. Magister sententiarum in 4. dist. 41. quæst. 1. concedat materiam primigeniam esse de essentia compositi substantialis, materiam verò quam nutritione acquirit homo nullo modo ad essentiam illius pertinere: sed tantum illam quam à parentibus acquisiuit; Et opinio communis velit materiam communem & particularem esse de essentia compositi communis & particularis, siue sit primigenia, siue sit acquisita per nutritionem; non inutile erit curiosius hanc difficultatem examinare.

CONCLUSIO PRIMA.

Materia & forma sunt partes essentielles compositi. Sic Doctor noster in 3. dist. 22. quæst. 1. cum Thomistis & ferè omnibus. Aug. enim lib. 16. de Ciuir. cap. 3. ait, *animum non esse totum hominem, sed partem meliorem eius*, quod denotat in homine essentialiter includi aliam partem ab anima rationali: quæ alia

pars non potest esse aliquid aliud præter materiam. Damascenus etiam probat *Christum habuisse veram carnem*, quia aliàs non fuisset verus homo; quod euidenter indicat materiam carnis esse de hominis essentia; & proinde *materia & forma sunt partes essentielles compositi cuiuslibet substantialis*, quoniam eadem rationes militant pro alijs compositis naturalibus, sicut pro composito hominis: Quod autem conformiter D. Aug. *anima non sit totus homo*, hoc euidenter colligitur ex eo quod homo nunquam interiret, cum anima illius nunquam intereat.

Conclusio nostra confirmatur. Quia quodlibet compositum coalescit ex duabus partibus, quarum una est potentia, & alia est actus; sed pars potentialis est materia, & pars actualis est forma, ex quibus constat intrinsecè compositum substantiale: ergo quo iure formam est pars essentialis compositi, sic etiam materia debet censerì pars essentialis eiusdem compositi; quod est contra Auerroistas, qui contendebant solam formam esse rerum corporearum essentiam, materiam verò esse quidem partem earum, sed non essentialem quod ridiculum planè videtur. Si enim materia est pars compositi, eodem modo est una pars, sicut forma est alia pars; quidquid enim est pars debet habere aliud cum quo sit pars: ergo sicut in mente Auerrois forma est pars essentialis compositi, sic etiam materia debet censerì pars essentialis illius. Nec dicere debent quod *materia sit vehiculum aut receptaculum forma*, non verò pars compositi; quia si compositum non includeret materiam ut partem, compositum non esset compositum, cum non constitueretur ex pluribus partibus: nec forma esset pars compositi, quia pars compartem exigit: quæ alia non potest esse, quàm materia: & sic materia & forma sunt partes essentielles compositi substantialis, unio verò est conditio sine qua, materia & forma non constituerent compositum.

Obijcies Aristotelem pluribus in locis insinuare, quod *forma sit quid rei, seu quidditas eius*, quod denotat materiam non esse partem essentialem rei compositæ. Resp. Arist. non loqui absolute, quasi verò voluerit formam esse totam quidditatem rerum; sed comparatè, indicando scilicet, quod forma sit pars nobilior compositi; quia forma compositum determinat ad hanc vel illam speciem. Dices. Homo & equus

equus distinguuntur in essentia; sed non distinguuntur in materia: ergo materia non est de essentia compositorum. *Resp.* hominem & equum distingui in essentia, id est, in præcipua parte essentia; non verò in tota essentia, seu in omnibus partibus essentia; quod sufficit ad distinctionem essentialem compositorum, ut patet de homine & bruto, quæ conveniunt in animali, & differunt in rationalitate.

CONCLUSIO SECUNDA.

NEdum materia communis est de essentia compositi in communi, sed etiam materia particularis est de essentia compositi particularis. Sic Scotus & D. Thomas 1. p. quæst. 75. contra Durandum præcitatum. Sicut enim se habet materia in communi ad compositum in communi, sic se habet materia particularis ad compositum in particulari; sed ex Durando materia communis est de essentia compositi communis: ergo materia particularis spectat ad essentiam compositi particularis. Deinde ideo compositum corporeum in communi dicitur compositum materiale, quia materia ingreditur essentialiter quidditatem illius; sed compositum particulare corporeum dicitur etiam materiale, ut patet de homine, de planta, & de lapide, in particulari sumptis: ergo materia particularis spectat ad essentiam illorum compositorum particularium. Tandem eodem modo ratiocinandum est de materia ac de forma, sed forma particularis est de essentia compositi particularis: ergo materia in particulari est de essentia compositi cuiuslibet in particularis.

Obijcies. Si hæc numero materia esset de essentia huius numero hominis, hic homo non esset idem homo in fine vitæ, qualis erat in principio illius; quandoquidem materia illius ita variatur per nutritionem continuam, quæ primigenitæ materiæ novam subrogat, ut nihil remaneat de prima materia à parentibus deriuata, quæ per actionem caloris naturalis destructa est: ergo licet materia in communi sit de essentia compositi in communi, attamen materia particularis non est de essentia compositi particularis. *Resp.* remanere eundem numero hominem toto tempore vitæ; quia semper manet aliquid de materia primigenia. Deinde ob variationem materiæ non variatur forma.

liter compositum, sed tantum *materialiter*; ut inquit D. Thomas 1. p. *quest. ult. art. 1. ad 5. & in supp. quest. 80. art. 4.* Quia manente eodem composito & eadem totali materia, quædam pars tantum abît, & noua eius loco substituitur; quæ cum continetur & perseueret cum alijs partibus præcedentibus sub eadem figura, dispositione, ordine, & officijs præexistentibus, propterea censetur efficere eandem *numero* materiam cum præcedente quæ remansit; & sic remanet idem homo in fine vitæ, ac in principio illius, licet fiat aliqua mutatio in materia: etiam si *successiue* variaretur tota materia per partes, antiqua enim sibi identificat aduentitiam.

CONCLUSIO TERTIA.

Non solum ea pars materia, quæ à parentibus in creatione accipitur, est de essentia compositi, sed etiam illa, quæ acquiritur *successiue* per nutritionem continuam. Hæc conclusio est contra Magistrum sententiarum loco præcitato, & contra Mastrium Scottistam. Eadem enim ratio urget de partibus materiæ acquisitis per nutritionem, ac de partibus primigeniis illius, quas proli tribuunt parentes: ergo sicut partes istæ spectant ad essentiam compositi substantialis, sic & illæ sunt de essentia eiusdem. Ratio enim cur primigeniæ partes sint de essentia compositi, sumitur ex hoc quod illæ partes per generationem acceptæ informentur per animam rationalem; sed pro eo instanti, quo partes per nutritionem acquisitæ uniuntur composito, informantur eadem anima: ergo sunt æqualiter de essentia compositi, & concurrunt per se ad totam entitatem compositi constituendam. Deinde si pars illa materiæ non faceret vnum *per se* compositum cum antecedenti materia, quam accipit proles à parentibus, homo qui constituitur ex tali materia esset quid vnum *per accidens*, sicut cumulus lapidum, quandoquidem noua illa pars materiæ non vniretur præcedenti, nisi per accidens, sed absurdum est dicere, quod homo quilibet sit quid vnum per accidens, & non vnum per se: ergo tum materia acquisita per nutritionem, tum per generationem accepta, est de essentia compositi.

Postquam enim natus est puer, nemo dubitat quin

materia corporis illius sit de essentia compositi; quando autem consumitur particula quædam talis materiæ, & noua succedit per nutritionem, ista pertinet adhuc ad essentiam compositi, quia facit vnum & idem cum antiqua; quando etiam alia pars deperditur & subrogatur noua, conuertitur denuò in illam, & sic deinceps: proindeque cum semper antecedens sit fortior, conuertit in se illam quæ de nouo accedit, sicque apparet quòd omnes illæ materiæ partes, tum antiquæ, tum recentes acquisitæ, sint de essentia compositi; quia, vt diximus, informantur ab anima, & per se includuntur *intrinsecè* in homine.

Obijcies 1. Illud non est de essentia hominis, sine quo manet essentialiter totus homo; sed ante nutritionem & conuersionem alimenti in substantiam hominis aliti, erat *essentialiter* totus homo: ergo illa pars materiæ, quæ acquiritur per nutritionem, non pertinet ad essentiam hominis. *Resp.* ad maiorem: illud non est de essentia hominis, sine quo manet essentialiter totus homo: nisi illud conuertatur in substantiam hominis, concedo; si verò illud adueniens recenter, conuertatur *intrinsecè* in substantiam hominis, nego. Cum ergo materia per nutritionem acquisita conuertatur in hominis substantiam, proinde illa pertinet ad quidditatem illius: estò absque illa foret totus homo metaphysicè sumptus: quia reuerà in tali suppositione, quòd alimentum non esset conuersum in substantiam hominis aliti, non minus ille homo esset animal rationale.

Obijcies 2. Si materia de nouo acquisita per nutritionem esset de essentia hominis, resurrectio foret impossibilis, quia contingere posset, vt eadem numero materia subiaceret formis plurium hominum, nec posset dici, cui eorum restitueretur. Ad hoc respondent aliqui, nihil ad resurrectionem referre, quòd noua entitas materiæ resumiatur; aut eadem quæ antea fuerat; dummodo maneat idem compositum. Sed melius est dicere, quòd eadem numero materia, quam gessimus ante mortem, reparetur; quoniam resurrectio est secunda resurrectio eius quod recedit, vt ex Damasceno insinuat D. Thomas in *Suppl. quæst.* 79. *art.* 1. In suppositione autem superiùs facta respondet Doctor Angelicus materiam in resurrectione dandam esse illi, qui illam primò habuit: alteri verò Deum esse substi-

tuturum, quantum necesse fuerit, ex ea materia, quæ vi caloris naturalis consumpta fuerat: suauitas enim D. Prouidentiz exigit, vt Deus decernens resurrectionem in eadem carne quam in vita possidemus, provideat casibus, qui talem resurrectionem impedirent.

QVÆSTIO VI.

An Accidentia subiectentur in Composito.

Accidentia alia sunt *relatiua*, vt potentialitas & vnio, quæ reperiuntur in materia antecedenter ad formam totalem compositi, quæ resultat ex ipsa vnione materiæ potentialitatem habentis cum forma, per quam actuatur; alia sunt *absoluta*, vt quantitas & qualitas. Accidentia relatiua subiectantur quidem in materia prima & in forma, quandoquidem ante effectiōnem compositi, materia habet vnionem & potentialitatem, forma verò habet vnionem & actualitatem. Quantum ad accidentia absoluta, & præsertim quantum ad quantitatem, altercantur inter se Philosophi; cum Auerroistæ, Nominales, Suares, & quidam alij, arbitrentur quantitatem proximè & immediatè subiectari in materia; vnde quantitatem dicunt esse materiæ *coamam*. Scotus verò in 2. dist. 3. *quæst.* 4. Et D. Thomas 1. p. *quæst.* 76. *art.* 6. cum D. Bonau. Durando, & pluribus alijs, docent quantitatem subiectari in composito; ita quòd quantitas nullo modo præcedat formam in subiecto, sed ex forma & materia prius fiat compositum, quod postea quantitatem & extensionem recipit.

CONCLUSIO.

Accidentia non recipiuntur immediatè in materia prima; vt voluit Auerroes 1. *Phys. Comm.* 63. sed in toto composito, quod proximè & immediatè recipit quantitatem & alia accidentia. Sic cum præcitatis Arist. 7. *Metaph. text.* docens substantiam esse priorem omni accidente prioritate temporis, durationis, & cognitionis. Vbi Aristoteles loquitur non de substantia incompleta, qualis est materia prima; sed de substantia completa, & perfecta qualem est compositum sub-

substantialia: ibi enim differit de substantia composita, & exemplum affert de elementis, de plantis, & de animalibus, quæ sunt substantiæ compositæ & integræ & sic ex philosopho patet, quod accidentia, quorum primum est quantitas, non inhæreant materiæ primæ, sed composito.

Ratio conclusionis est, quia *actus per se* materiæ debet prius coniungi cum illa, quàm actus illius per accidens: sed forma substantialis est actus per se materiæ, quantitas verò est *actus per accidens*: ergo forma substantialis præcedit in composito quantitatem & alia accidentia, & sic ex materia & forma substantiali prius fit compositum, quàm accidentia illi adueniant; proindeque accidentia inhærent immediatè subiecto. Respondebit Suares maiorem fore veram, si actus per accidens non requireretur ad receptionem formæ substantialis, quod tamen necessarium est in homine, v. g. qui non posset recipere animam rationalem, quæ est illius forma substantialis, nisi prius corpus illius esset extensum. Ad hanc responsionem dicendum est, quod nec etiam in homine requiratur quantitas ante receptionem formæ substantialis. Licet enim anima rationalis, quæ est forma hominis vltima, non recipiatur nisi in corpore quanto hominis; attamen quantitas non præcessit in homine omnem formam substantialem; & imò materia prima illius debuit prius habere formam substantialem corporeitatis, quàm accipere quantitatem, quæ corpus reddatur extensum: & sic, non obstante responsione quam adhibet Suares, quantitas semper recipitur in composito; quia *actus per se præcedit actum per accidens*.

Obijcies. Vt introducatur forma in materiam, materia debet disponi per accidentia præuia; sed illorum accidentium principalius est quantitas: ergo quantitas recipitur in materia ante aduentum formæ substantialis, & antequam fiat compositum, quod proinde non potest esse subiectum immediatum accidentium. *Resp.* alio modo ratiocinandum esse de formâ substantiali introducenda in materiam primam, & de introductione nouæ formæ substantialis in compositum præcedens. Licet enim non possit introduci noua forma substantialis in composito præcedenti, nisi dispositiones quædam præcedant introductionem nouæ formæ, quæ dispositiones non inhærent immediatè ma-

teriz primæ, sed veteri composito; attamen cum introducitur forma in materia prima, nulla accidentia prærequiruntur in illa ante receptionem formæ substantialis: sed ea primò & immediatè recipit formam substantialem corporeitatis, & mediante illa efficitur compositum substantiale, quod postea recipit illa vel illa accidentia.

Si quæzratur autem *quinam ordo seruetur in generatione alicuius compositi; quod ex alio composito efficitur*; v. g. in generatione ignis, qui producitur ex ligno. *Resp.* hunc interuenire ordinem, quòd primò ignis inducat qualitates suæ formæ conseruatiuas in lignum. *Deinde*, qualitates illæ ignis in lignum introductæ, per suum augmentum succèssiuum destruunt qualitates conseruatiuas formæ ligni. *Postquam* autem qualitates conseruariuæ formæ ligni destructæ sunt, forma ipsa ligni desinit, & compositum ligni dissoluitur, cessatque ipsius ligni quantitas. *Ac denique* corrupto ligno, forma substantialis ignis introducitur in materiam primam quæ antea erat sub forma ligni, fitque compositum substantiale ignis; cui aduenit quantitas; Et sic nunquam quantitas præcedit formam substantialem, nec proinde ipsa quantitas subiectatur in materia, sed semper in toto composito residet.

Quæres. Vtrum alia accidentia absoluta immediatè subiectentur in quantitate. Ante responsionem sciendum est, quòd accidentia absoluta sint vel *vitalia*, vt videre, audire, loqui, & similia; vel *spiritualia*, vt intellectiones, volitiones, & species intelligibiles; vel *purè corporea*, vt albedo, frigus, & aliæ similis naturæ. Notandum est etiam quòd subiectum accidentium sit duplex, nempe *inhesionis*, cui immediatè inheret accidens; ita quòd v. g. quantitas parietis dicatur esse subiectum *inhesionis* albedinis, quia albedo immediatè inheret quantitati illius. Et *denominationis* quòd tale denominatur ab accidente, cui tamen proximè non inheret, sed alteri ipsi coniuncto; sic albedo & cætera accidentia dicuntur *quanta*: non quòd quantitas albedini inheret, cum prius sit in subiecto; quàm albedo; sed ideò quantitas denominat albedinem, quia albedo aduenit subiecto, quòd est *quantum & extensum*. Hoc posito.

Respondes primò, quòd accidentia absoluta vitalia, vt visio, auditio, & loquutio, subiectentur immediatè in

in potentijs à quibus eliciuntur, sicut & habitus ad tales actus concurrentes; sicque potentia sunt subiectum immediatum *inhesionis* talium actionum, licet totus homo sit earum subiectum *denominationis*; quandoquidem totus homo dicitur *audire videre, & loqui*. Quod autem actus illi vitales subiecentur in potentijs à quibus eliciuntur, patet ex hoc, quod non ex alia ratione dicantur actus *immanentes*, nisi quia exigunt residere in illa potentia, quæ tales actiones elicit. Non minus tamen possunt dici *tales actus* subiecentur in composito *quantitatem habente*, quia ipsi resident in organo corporeo, quod extensionem habet necessario, ut possit prorumpere in suos actus: unde in Eucharistia corpus Christi habens aures & oculos, nec potest audire, nec videre; cum illius organa spoliata sint *sua quantitate & extensione externa*.

Respondet 2. Quod accidentia absoluta spiritualia, seu qualitates spirituales absolutæ, quales sunt intellectiones, volitiones, & omnes habitus intellectus & voluntatis, subiecentur immediatè in intellectu & voluntate, tanquam in subiecto *inhesionis*, & in toto homine, tanquam in subiecto *denominationis*. Ratio *primi* est, quia ipsa anima cum illis potentijs est subiectum sufficiens talium qualitatum, quæ remanent in voluntate & intellectu, quando anima separata est à corpore. Ratione *secundi*, totus homo dicitur *intelligere & velle*, denominaturque *intelligens & volens*, ex eo quod sit subiectum *denominationis*, *intellectionum*, & *volitionum*.

Respondet 3. Accidentia corporea immediatè subiecentur in quantitate. Sic Scotus cum D. Thoma & recentioribus communiter, contra Nominales ex una parte, qui volunt albedinem, nigredinem, calorem, frigus, & similia accidentia corporea subiecentur immediatè in eadem substantia, in qua quantitas subiecentur, siue illa substantia sit completa ut compositum, siue incompleta, ut materia prima: cum enim iuxta illos, quantitas non distinguatur realiter à substantia, proinde subiectum accidentium illorum non potest aliud esse quàm substantia. Contra etiam Caietanum ex alia, Soncinam, & quosdam alios contententes accidentia illa, sicut & quantitatem ipsam subiecentur immediatè, non in quantitate, aut in substantia, sed in quodam alio accidente prædicamento qualitatis,

quod ab ipsis vocabatur *potentia naturalis susceptiva accidentium*.

Quòd autem accidentia absoluta corporea immediatè subiectentur in quantitate, probatur ex hoc, quòd non alia ratio impedit corpus Christi in Eucharistia posse calefieri aut frigesieri, nisi quia quantitate externa priuatur, quod denotat illi deesse subiectum talium accidentium, nempe quantitatem, in qua proinde recipiuntur accidentia corporea. Deinde sicut paries dicitur subiectum inhæssionis albedinis, & nigredinis; quia variatis illis coloribus inuariatus remanet paries; sic etiam quia quantitas eadem remanet sub diuersis accidentibus, cum paries eandem quantitatem retinens diuersos colores recipiat; ideo dici debet esse subiectum talium accidentium. Tandem non repugnat, quòd vnum accidens absolutum subiectetur in alio accidente absoluto diuersæ rationis, quoniam ipsimet aduersarij admittunt cum Caietano quantitatem & alia accidentia non subiectari in substantia, sed in quodam alio accidente de prædicamento qualitatis; ergo probabilius est dicere in communiori sententia, quæ etiam antiquorum semper fuit; *quantitatem esse subiectum immediatum accidentium absolutorum corporum*.

Quòd si in contrarium nostræ assertionis vltimæ afferatur philosophus, dicens substantiam esse subiectum omnium accidentium: ergo non quantitatem. *Responderi* debet Aristotelem velle tantum, quòd substantia sit subiectum generale, & vltimum omnium accidentium; quod tamen non impedit, quin quantitas sit subiectum primum, & immediatum accidentium illorum, quæ ad quantitatem sequuntur in subiecto; vti patet de tabella, quæ dicitur subiectum omnium colorum quos illi opponit pictor, licet crassiores illi tantum immediatè inhæreant. *Si dicatur* vnum accidens non posse subiectari in alio, nec proinde albedinem in quantitate: hoc verum est de accidente *eiusdem rationis*, albedo enim non potest recipi in albedine: falsum verò de accidentibus *diuersæ rationis*: & proinde de *quantitate*, quæ alia accidentia sustentare potest. *Si dicatur* substantiam non posse inhærere, nec proinde accidens posse subiectare. *Resp.* accidens non posse subiectare reuera *primario*; quia hoc spectat ad substantiam; potest tamen subiectare *secundario*, & vltimatè;

tè; ipsa enim quantitas, quæ primario subiectatur in composito substantiali, est subiectum aliorum accidentium.

Quando dicunt aduersarij non potius subiectari albedinem in quantitate, quàm quantitatem in albedine; quoniam sicut dicitur quòd quantitas sit alba, sic etiam dicitur quòd albedo sit quantà. *Respondetur* non idèò albedinem subiectari in quantitate, quòd quantitas dicatur *alba*; sed quòd albedo & alia accidentia accedant quantitati inuariatè remanenti, & ab illa recedant; ex quo sufficienter colligitur albedinem inhaerere quantitati, non vice versa: solius enim quantitatis est disponere substantiam ad recipienda formas accidentales corporeas. *Si denique dicatur* quòd omne accidens sit forma, & quòd forma non possit recipere, sicut nec materia informare; proindeque nec quantitas suscipere valeat accidentia. *Responderi* debet quòd quantitas vtrumque faciat in proposito; informat enim accidentaliter substantiam, quam reddit quantam & extensam, & vltiora accidentia suscipit.

Hic forsam quæretur, *an in corruptione compositi fiat resolutio vsque ad materiam primam*. Hæc difficultas posset referuari ad illum locum, vbi agitur de generatione & corruptione; ne tamen ibi longius materias drotendere cogeremur, hic breuiter cum Doctore nostro *dicam*, quòd in compositis plures formas substantiales habentibus non fiat resolutio vsque ad materiam primam; cum destructa formà viuentis formæ corporeitatis remaneat: in compositis verò vnā tantū formam substantialem habentibus, si destruaturs illa forma substantialis; tunc sit resolutio vsque ad materiam primam. Cum enim nihil aliud remanere possit, quando forma substantialis destructa est, quandoquidem accidentia in solo composito subiectantur, proinde remanet, vt destructo composito per destructionem formæ substantialis, censeatur fieri resolutio vsque ad materiam primam. Non quòd destructa formà substantiali & composito, materia prima remaneat sine vlla forma; sed quod destructa formà substantiali compositi substantialis, nihil talis compositi remaneat, sed succedat immediatè forma substantialis noui compositi, quod recenter generatur: ita quòd in eodem instanti temporis, quo desinit vnum compositum, incipiat aliud; licèt desinitio illius præcedat inceptionem
istius

istius, per aliquod instans naturæ & præsuppositionis :
& in hoc iustificatur adagium commune philosopho-
rum, *corruptio unius est generatio alterius.*

DISPUTATIO

SECUNDA,

De Natura & causis Rerum Naturalium.



Ostquam Aristoteles in primo libro Physicorum, egit de principijs intrinsecis rerum naturalium tam in *facto esse*, quæ sunt materia, & forma : quàm in *fieri*, quæ dicuntur esse *materia, forma, & privatio* : In secundo libro agit de causis illarum, & talem librum distribuit in tres partes; in quarum prima differit de *natura*, quæ est principium motus & quietis compositi : in secunda loquitur de *causis per se rerum naturalium*, tam in genere, quàm in particulari : & in tertia discurret de *causis per accidens*, quæ sunt *casus & fortuna*. Eundem ordinem sequi contendentes, sicut in præcedenti disputatione egimus de principijs rerum naturalium ; sic etiam in præsentī loqui meditamur de causis illarum : & quia natura, materia, forma, efficiens, finis, fortuna, & casus dici possunt suo modo causæ effectuum ; cum alij sint à natura, alij à causis per se, & alij à fortuna & casu ; ideo hanc disputationem distribuemus in tres sectiones, quarum prima erit de *natura*, alia de *causis per se*, & tertia de *causis per accidens*.

SECTIO PRIMA.

De Natura & Arte.

QVoniā naturale opponitur artificiato, ideo philosophus agens de natura in secundo libro Physicorum discurret etiam de arte ; cum hoc ordine, quod prius de natura loquatur, quoniam ipsa præcedit artem quam ista imitari contendit : Pedibus Stagiritæ in celsura

furi loquemur in hac sectione tum de natura, tum de arte; imò & de violentia, quæ naturæ opposita est: vnde tribus quæstionibus expeditur hæc sectio, quæ erunt de natura, de arte, & de violentia.

QVÆSTIO PRIMA.

Quid dicendum sit de Natura.

NE aliquid lateat eorum quæ concernunt rationem *natura*, plura considerari debent; quot modis nimirum sumatur *natura*; quot modis accipiat *natura*; an *existencia natura* probari possit, quid sit *natura*; quotplex sit *natura*, & an sit principium passivum vel activum: quæ omnia per succinctas assertiones patebunt,

Dico 1. diuersis modis usurpari nomen *naturæ*. Primò enim sumitur *natura* pro Deo, quoniam Seneca lib. 4. de beneficijs dicit *naturam* nihil esse præter Deum, qui dicitur communiter *natura naturans*. Secundò sumitur pro tota rerum creaturarum collectione, & pro tunc vocatur *natura naturata*; quo sensu Arist. 11. Met. tex. 38. ait *naturam* perdere à primo principio: quo etiam sensu aliquid dicitur fieri aut esse in rerum *natura*. Tertiò accipitur pro causis naturalibus; vnde dicitur vulgò *naturā nil pati otiosum, nunquam deficere in necessarijs, vacuum non pati, nec aliquid moliri frustra*. Quartò idem sonat ac temperamentum, quo modo dicunt medici, aliquorum *naturam* esse biliosam, aliorum melancholicam, &c. Quintò sumitur pro proprietate rei alicuius, quoniam de igne dicitur, quòd sit ex *natura sua* calidus. Sextò idem est ac essentia rei cuiuscumque, cum Arist. 7. met. tex. 41. dicat definitionem esse orationem *naturam* rei explicantem distinctè. Eodem sensu dicunt Theologi vnam numero *naturam* esse in tribus Personis Diuinis. Septimò accipitur pro natiuitate & ortu, quo sensu primogenitus dicitur præcedere *naturā* fratres natu minores - Sic etiam Apostolus asseuerat nos esse *naturā* filios iræ, idest à tempore conceptionis & natiuitatis, à quo traximus peccatum. Octauò denique & accommodatè ad nostrum propositum, *natura* sumitur pro principio intrinseco motus & quietis, seu pro radice illorum motuum, quos naturaliter res ex se effundunt, & non extorquentur per vim agentis externi, sic casus grauium, sc-

leuium assensus, arteriarum palpitatio, germinatio arborum, noxiorum expulsio, appetitio vitulium, & similes actiones, dicuntur esse à natura; quia à principio interno & rebus ipsis insito eradicantur.

Dico 2. *naturale*, quod à naturà deriuatur, diuersimode etiam vsurpari pro multilici oppositione quam habet cum alijs. *Primò* enim sumitur pro eo quod opponitur *supernaturali*, & intra naturæ terminos continetur; & eo sensu opera naturæ & artis dicuntur *naturalia*. *Secundò* sumitur pro eo quod *voluntario & libero* opponitur, quo sensu equus fertur naturaliter ad aquam, ignis naturaliter calefacit, calor stomachi facit coctionem alimentorum, & quidquid fit sine consilio & deliberatione dicitur *naturale*. *Tertiò* sumitur pro eo quod opponitur *fortuito*, quo modo inuentio thesauri non est quid *naturale*, bene autem quod literę vigeant in republica. *Quartò*, pro eo quod opponitur *violento*; quo sensu dicimus *naturale* esse lapidi vt deorsum cadat, sicut & flammæ ignis vt ascendat sursum. *Quintò* denique, pro eo quod opponitur *artificiato*; quo sensu opera artis non sunt *naturalia*: vnde Aristoteles corpus naturale appellat id, cuius principium non est ars, sed natura; & in hac postrema acceptione sumitur *naturale* in physica. Quod si queratur, quo modo differant entia *naturalia*, *præternaturalia*, & *contranaturalia*; responderi debet, quod entia *naturalia* sint ea, quæ habent materiam, & formam, vel quæ sunt accidentia, affectiones, actiones, & proprietates rerum naturalium, vt leuitas in igne, grauitas in terra, & similes actiones. Entia *præternaturalia* ea sunt, quæ fiunt præter intentionem naturæ, vt monstra. Entia *contranaturalia* sunt ea, quæ aliquo modo naturam labefaciunt, vt morbus, aut vitium corporis.

Dico 3. *existentiam naturæ* ita esse euidentem, vt nullo modo ambigendum sit naturam *existere*; inquit Arist. 2. phys. cap. 1. Non potest tamen hæc veritas demonstrari à priori, cum natura sit primum principium physicum, quod aliud principium prius habere non potest; nec proinde medium, quo possit demonstrari à priori illius existentia. Quantum autem ad demonstrationem à posteriori, potest colligi euidenter ex hoc, quod experientia notum sit dari motum & quietum; sed natura est principium motus & quietis, vt dicetur in assertionem sequenti; ergo manifeste patet à posteriori, quod detur natura,

natura, cum dentur motus, qui non procedunt à causa externa, vt deambulatio hominis, fuga mali, & appetitus boni. Adde quòd nemo ibit inficias dari materiam & formam, vt probatum est cap. de principijs; sed materia & forma sunt *natura*, vt videbitur: ergo in dubium reuocari non potest *existentia natura*.

Dico 4. quòd *natura sit principium & causa motus & quietis eius in quo est*, primo & per se, & non per accidens. Sic Arist. 2. phys. cap. 2. tex. 3. Hanc naturæ definitionem recipit Doctor noster in 2. dist. 2. quæst. 10. Vox enim principium habet rationem proprii generis; reliquæ verò particulæ tenent locum differentiarum; & nihil superflui aut diminuti habetur in tali definitione, cuius partes sic explicantur. Dicitur primò *principium*, in quo natura conuenit cum causis & principijs rerum naturalium; Verè enim & realiter natura influit in motum, sicut principia in compositum, & causæ in effectus suos. Dicitur 2. & *causa*, vt excludatur *privatio*, quæ est quidem principium, non tamen est causa; nec proinde *natura* dici debet. Dicitur 3. *motus & quietis*, quod aliqui explicant *disiunctiue*, quatenus scilicet natura sit principium *motus* in corporibus quæ semper *mouentur*, vt cælum: & principium *quietis* in corporibus, quæ semper *quiescunt*, vt terra: licet verisimilius sit naturam esse principium *motus & quietis coniunctiue*: ita vt quælibet natura ex se sit causatiua motus & quietis: licet actu quædam solum moueantur, quædam tantummodò quiescant, & quædam aliquando moueantur, & aliquando quiescant. Si enim cæli perpetuò moueantur, hoc est illis accidentarium; quia non mouentur nisi propter bonum vniuersi. Quantum verò ad terram, taliter est mobilis ex sua natura, quòd si diuelleretur à centro, ab intrinseco moueretur, vt illud repeteret.

Quartò in definitione naturæ additur, quòd sit principium motus & quietis *eius in quo est*; per quam particulam distinguitur natura à causis externis, finali scilicet, & efficiente, quæ non sunt in rebus ipsis, quæ mouentur; vnde Angeli, qui mouent cælos, equi trahentes currum, & ignis produciens calorem in aqua, non sunt *natura*; quia non sunt *intrinsecè* in cælis, in curru, & in aqua. Adiungitur primò, & per hoc remouentur à ratione naturæ principia *secundaria & instrumentalia* motus, vt sunt qualitates, quæ sunt quidem

dem causa cur res moueatur, sed non sunt prima causa: licet enim ignis v.g. habeat *ferri* sursum à sua leuitate, hoc est tantum *secundariò*, vbi *primariò*, sursum fertur à forma sua substantiali, quæ est principium mouendi; licet vtatur accidentibus, vt operetur. Adiungitur vltimò *per se*, & non *per accidens*, in quo secernitur *natura* ab operibus artificiatibus, quæ licet habeant principium alicuius motus, vt statua marmorea habens principium motus deorsum; quia tamen ille motus non conuenit statuæ, vt est opus artificiatum, sed vt est compositum *naturale* habens grauitatem; ideo non dicitur habere *naturam*, quia non habet *per se* principium motus.

Si contra præcedentem definitionem dicatur eam competere causæ efficienti, quia Aristoteles 2. *Phys. text. 29.* ait causam efficientem esse id vnde est primum principium motus, & quietis: ergo non esse legitimam. *Respondeo* causam efficientem esse principium motus, & quietis externum, concedo; internum, nego: materia autem, & forma, quæ solæ sunt *natura*, dicuntur principium *internum* motus, & quietis. *Dices* idem non posse esse causam oppositorum, nec proinde *naturam* posse dici causam motus, & quietis, quæ priuatiuè opponuntur, quandoquidem quies est carentia motus. *Resp.* non sumi in definitione quietem pro priuatione motus, sed pro consistentia rei in statu, vel in loco. *Dices* vt antea, cælum non moueri, nec terram quiescere; quæ tamen habent *naturam*, nempe materiam, & formam: ergo prædicta definitio non est legitima, quoniam non conuenit omni definito. *Resp.* vt superius, quod licet cælum non quiescat ob utilitatem vniuersi, nec terra moueatur secundum se totam, ratione scilicet grauitatis suæ; vtrumque tamen est mobile in actu primo, & potentialiter, quia habet materiam, & formam: imò cælum actu quieuit temporibus Iosue, & non amplius mouebitur post diem iudicii: terra etiam est mobilis secundum partes, vt ex motibus terræ apparet, & si à centro diuelleretur, illico rediret ad illud, per formam suam substantialem.

Dico 5. quod duplex sit *natura*, nempe materia, & forma. Sic Aristot. 2. *phys. text. 4.* vbi diuidit *naturam* in eam quæ est in subiecto, quod intelligitur de *forma*: & eam quæ non est in subiecto, quod intelligitur de *materia*. Quod materia sit *natura*, probatur per rationem

Nem Aristotelis loco præcitato dicentis; quod constituit corpus naturale est natura, quandoquidem ex non naturale non fit naturale; sed materia concurrens partialiter ad effectum compositi naturalis, quod constat ex materia, & forma: ergo materia est natura, quidquid dicat Valesius intendens definitionem naturæ competere soli formæ, quæ est principium actuum motus, & quietis. Non videtur enim, quomodo negari possit materiam esse naturam, cum sit subiectum omnis transformationis naturalis, & primum principium cuiuscunque naturalis motus, in quo consistit definitio naturæ. Quod etiam forma sit natura, idem probat Arist., cui subscribit Scotus loco præcitato. Illud enim est natura per cuius præsentiam res sunt, & dicuntur naturales; sed à forma naturali res sunt, & dicuntur naturales, sicut à forma artificiali res appellantur artificiales; ergo forma est natura.

Quando autem dicimus quod forma sit natura; hoc intelligitur tam de forma viventium, quam de forma non viventium, imò etiam de anima rationali, quæ est forma hominis. Quod forma non viventium sit natura, omnes admittunt, & illud antea probauimus. Quod forma viventium sit etiam natura, docent Arist. 2. phys. text. 1. & 12. Scotus quodlib. 9. art. 2. & 3. cum reliquis contra Albertum, & Simplicium. Anima enim generatim sumpta, tum viventium, tum non viventium, est principium, & causa mutationum naturalium sibi convenientium, nempe nutritionis, accretionis, sensationis, & similium, quæ à natura procedunt: ergo forma viventium debet habere rationem naturæ. Quod denique anima rationalis, quæ est hominis forma, debeat etiam dici natura; asserit Arist. 2. phys. text. 12. ubi hominem numerat inter ea, quæ natura constant; sed homo est homo per animam rationalem, quæ est eius forma: ergo anima rationalis sortitur rationem naturæ. Cum enim natura sit principium motus, & quietis, & anima rationalis sit causa naturalium mutationum, & operationum vegetandi scilicet sentiendi, & intelligendi; ideo debet dici natura: non præcisè quatenus est principium actuum talium mutationum, sed quatenus est principium receptivum, & passivum illarum.

Si dicatur in assertum præcedens totum compositum seu formam totius esse etiam naturam, & sic non posse asseri, quod duplex sit tantum natura, quandoquidem

Scotus ipse formam, & essentiā totius vocat naturam. *Resp.* Scotum nunquam affirmasse formam totius esse naturam, nisi latè sumptam; prout ipsemet se explicat in comm. *super 5. met. cap. 4.* Ratio est, quòd natura sit primum principium motus, & quietis, & forma totius non sit primum principium, sed principiatum ex primis principiis: ergo non est natura propriè sumpta, sed quid constans ex naturis; *natura* enim est quid simplex, & toto non conuenit composito, quòd potius dici debet naturatum, quàm natura. Quantum ad illos qui dicunt accidentia, Angelos, & Deum esse *naturam*; quia talia sunt principium motus, hoc debet negari. Quia natura debet primò, & per se inesse entè naturali; accidentia autem non insunt primariò, & per se enti mobili; & sic dici nequeunt *natura*. Angeli etiam rationem naturæ non participant, quia *natura* debet esse principium motus physici; Angeli autem mouent quidem se localiter; sed non motu physico, cùm illorum motus non sit successiuus, & diuisibilis, sed indiuisibilis & instantaneus; non enim sunt in loco circumscriptiue, sed definitiue. Quoad Deum, non potest vllò modo dici *natura*, cùm cætera quidem moueat, sed immobilis perseueret. Non negamus tamen quin Deus, & Angeli possint dici entia naturalia, quia suas naturas, & quidditates participant; nihilominus non propterea dici debent *natura*, quia non habent principia interna motus physici.

Dico 6. maximam esse controuersiam inter philosophos, *an natura sit principium actiuum vel passiuum motus*. Valesius enim, & Vasques dicunt naturam ita esse principium actiuum motus, vt si aliquid moueretur passiuè, haberetque principium ad *taliter moueri*, nec tamen se moueret actiuè, aut haberet principium se mouendi taliter, illud non constaret materia. Mastrius & Bellutus gemini Scotistæ existimant *naturam esse principium actiuum, & passiuum motus*; quòd Arist. 2. *phys. cap. 1. de natura* dicens quòd sit principium motus, & quietis, comprehendat vtrumque principium motus. Scotus autem in 2. *dist. 2. quest. 1.* cum suis communiter docet *naturam* ita esse principium passiuum motus naturalis, vt si aliquid haberet principium passiuum motus, & non haberet actiuum, diceretur constare *natura*; & si haberet è contra principium actiuum, & non haberet passiuum, non deberet dici habere *natura*.

nam: Imò si aliquid haberet simul principium passiuum, & actiuum motus, ille motus non deberet dici naturalis, quia procedit à principio actiuo; sed præcisè quatenus esset à principio passiuo. Quando ergo Aristoteles de *natura* dicit quòd sit principium motus, hoc intelligi debet de principio *passiuo*, quòd scilicet *natura* sit principium, cur aliquid possit moueri.

Hanc sententiam, quam Scotus expressè habet loco præcitato, prælibauit Aristoteles 2. *Phys. cap. 1.* vbi ait naturam esse principium, & causam, *vt id moueatur, in quo est primo, per se, & non per accidens.* Cùm ergo Aristoteles dicat naturam esse principium vt aliquid moueatur, non verò vt moueat id in quo est, manifestè apparet definiri naturam per principium *passiuum* motus. Idem confirmat philosophus 2. *Phys. text. 61.* dicens *mouentia mota esse considerationis physica, mouentia verò non mota non esse physica considerationis*: ergo solum principium passiuum motus pertinet ad physicam, quæ non agit de corpore mouenti, sed de corpore mobili, vt omnes admittunt. Idem Stagiritæ 3. *phys.* rationem assignans cur elementa naturaliter moueantur ad sua loca, leuia scilicet sursum, & grauia deorsum; non aliam allegat, nisi quia sic apta nata sunt moueri: & sic motus elementorum ideò est naturalis, quia est passiuus, proindeque quando *natura* definitur ab Aristotele *principium motus*, hoc debet intelligi de principio *passiuo*.

Ratio assertionis nostræ est, quòd *natura* accipiatur à philosopho pro illo principio, à quo motus habet, quòd sit naturalis, & non violentus; sed à solo principio *passiuo*, & non ab actiuo, motus dicitur naturalis, & non violentus: ergo *natura* debet intelligi esse principium passiuum motus. Probatur minor ex eo quòd, si corpus habeat inclinationem naturalem ad aliquem motum, motus ille debeat dici naturalis, quamuis non haberet principium actiuum talis motus; vt patet de aqua, quæ naturaliter moueretur ad frigus, quamuis frigus non posset produci, nisi ab agente extrinseco non verò ab ipsa aqua; quod aliunde non procedit, nisi ex eo quòd passiuè inclinatur aqua ad frigiditatem, Quòd etiam motus non dicatur *naturalis* ab eo quòd principium eius actiuum sit naturale, colligitur ex hoc, quòd, quando homo se mouet sursum, motus ille est à principio intrinseco actiuo, non tamen est naturalis;

& sic

& sic principium actiuum non facit motum esse naturale, proindeque licet motus sit à principio actiuo & passiuo simul, vt patet de motu formæ, quæ est natura, & potest mouere & moueri, attamen motus præcisè dicitur naturalis à principio passiuo, non verò ab actiuo: & sic *natura est principium passiuum, non verò actiuum.*

Quantum ad obiectiones in nos fieri solitas, hæ principaliores sunt. *Quod nulla esset differentia internaturalia & artificialia*, quandoquidem artificialia habent principium passiuum sui motus, marmor scilicet, vt fiat statua Cæsaris, vel leonis effigies. *Quod forma qua est principium tantum actiuum, non esset natura*, contra Philosophum, qui dicit formam esse magis naturam, quam materia sit. *Quod denique non sit minus naturale igni calefacere corpus sibi applicatum, aut aqua se reducere ad pristinum frigus, quam graui tendere deorsum.* Resp. ad primum in hoc distingui naturalia ab artificialibus, quod illa habeant inclinationem naturalem passiuam ad perfectionem quam recipiunt, ista verò habeant indifferentiam ad formam leonis vel Cæsaris: naturale autem sumimus pro eo quod opponitur violento vel neutro. Resp. ad secundum formam reuera esse naturam, vt prædictum est, sed illa etiam est principium passiuum, quandoquidem forma substantialis compositi dat illi inclinationem ad recipiendas aliquas qualitates, potius quam alias, vt patet de forma substantiali aquæ, quæ dat illi inclinationem ad frigus. Quando ergo forma est principium actiuum simul & passiuum, non dicitur natura præcisè à principio actiuo, seu à principio passiuo; vt probatum est: vnde, licet intellectus & voluntas sint principia naturalia, potius dicuntur talia à receptione intellectuum & volitionum, quam ab earum elicitioe.

Resp. ad tertium, quod est fundamentum cur Aristoteli recesserit à mente ordinaria Scotistarum, quod calefactio actiua ignis sit quidem illi naturalis, & quod detineretur in statu violento, si non calefaceret corpora sibi applicata, vt euenit in fornace Babylonica, ab illa tamen calefactione non censetur habere naturam, prout natura definita est à philosopho, quoniam vt talis, debet esse principium passiuum, sed debet dici naturam habere ex eo quod recipiat motum eleuantem ignitionem, & calefactionem, quæ omnia dicuntur prin-

principium passivum . Si ergo talis actio , quæ ignis calefacit dicatur naturalis , ibi *naturale* sumitur prout opponitur supernaturali , & libero ; non verò prout opponitur violento , & naturali . Sic distinguendus est Aristoteles , quando pluribus in locis ait naturam esse principium activum ; quod scilicet loquatur de *natura* prout opponitur libero , & supernaturali ; non ut opposita est violento , de qua sic sumpta hic agitur .

Quæres *utrum materia , & forma conveniant univocè in ratione naturæ* . Resp. affirmatiuè , si enim in ratione partis compositi , & in ratione substantiæ incompletæ conveniant univocè materia , & forma , quandoquidem utraque denominatur , & est pars compositi , sicut , & substantia incompleta ; pari ratione conveniunt univocè in ratione naturæ : cum utraque dicatur *natura* à philosophis , & sit principium motus , & quietis . Quod si Scotus in 2. dist. 12. quæst. 1. dicat materiam , & formam esse *primò diversas* ; per hoc non intendit negare , quod univocè conveniant in aliquo conceptu positivo , alias non convenirent etiam in ratione quidditativæ entis ; quod tamen falsum est , quandoquidem materia & forma sunt ens . Scotus ergo dicens materiam , & formam esse *primò diversas* ; loquitur de illis reduplicatiuè sumptis , quod scilicet nihil materiæ , ut materia est , includatur in forma , & nihil formæ , ut est forma , sit de quidditate materiæ . Cum ergo à materia , & forma possit abstrahi aliquis conceptus quidditativus entis , & substantiæ incompletæ , in duo univocè conveniant ; sic potest abstrahi conceptus univocus naturæ , in quo conveniunt materia , & forma ; quandoquidem utraque est principium passivum , quo materia , & forma vel potiùs compositum potest recipere multas mutationes ipsi advenientes .

Quæres , quot sint motus quorum natura sit principium . Resp. sex communiter assignari , qui sunt Generatio , Corruptio , Augmentatio , Diminutio , Alteratio , & Motus localis . Generatio est transitus à non esse substantiæ ad esse substantiale ; ut à non esse hominis ad esse hominis . Corruptio est transitus ab esse substantiæ ad non esse substantiale ; ut ab esse hominis ad non esse hominis . Augmentatio seu accretio est mutatio quædam , per quam augetur quantitas subiecti ; ut cum baculus unius pedis per extensionem bipedalis redditur . Dimi-

mutatio vel decretio est mutatio illa, per quam deperditur quantitas; quando nimirum superficies bipedalis per compressionem pedalis efficitur. *Alteratio* est ille motus, per quem aliqua qualitas acquiritur; ut cum aqua ex frigida fit calida. *Motus* denique *localis* est illa mutatio, qua aliquis ab vno loco ad alium progreditur; utpotè, quando aliquis Lutetia Romam vadit.

QVÆSTIO II.

Quid dicendum sit de Arte.

Cum dixerimus in assertione secunda quæstionis præcedentis, naturam opponi pluribus, & præsertim artificiali, & violento; ut exactè sciantur quæ rationem naturæ concernunt, non erit perperam dicere aliquid de arte in quæstione præsentī, & de *violentia* in sequenti quæstione. Hic autem non loquuturi sumus de arte sumpta latè, & improprie, pro quolibet habitu vero, siue practico siue speculativo, quo sensu Arist. 1. *Met. cap. 1.* mathematicas disciplinas nuncupat artes, quas 10. *Met. sex. 44.* scientias nominat: Sed de arte sumpta proprie pro habitu factiuo, cuius opus transit in materiam externam, & exercetur per organum corporeum; qualiter sumitur apud Aristot. 7. *met. cap. 3.* & Scotum in 1. *dist. 3. quæst. 7.* De arte, inquam, sic accepta hæc in præsentī quæstione dicenda sunt præsertim, quid sit ars; in quibus conueniant ars, & natura, in quibus distinguantur, an ars possit efficere opera naturæ, quomodo formæ artificiales distinguantur à naturalibus, & an arte chymica possit fieri verum aurum.

Dico primò *artem* non immeritò definiri ab Aristotele *habitu verà cum ratione factiuum*, seu *rectam rationem factibilem*; ars enim est habitus in ratione residens, qui illam dirigit circa materiam externam, ut circa ferrum, ceram, lignum, marmor, & similia, vnde artificialia dicuntur, quæ ratio efficit in materia externa. Si *ars* sumatur diminutè pro habitu verà cum ratione, seu pro habitu apprehensiuo rectitudinis agendorum, attribui potest Deo, ut innuit Scotus in 1. *dist. 38. quæst. vn.* quandoquidem intellectus eius cognoscit rectitudinem, & ordinem operandorum. Si verò *ars* sumatur accuratè pro habitu dirigente potentiam aliam, cuius est operari secundum artem; tunc ars non

potest Deo competere ; cùm voluntas eius, quæ est potentia operatiua rerum, non possit dirigi, quoniam de se est summè recta, nec à rectitudine deflectere potest. Quantum ad multiplicitatem artium, in fine logicæ ostendimus agentes de scientia, quænam sint artes liberales, & quænam mechanicæ & illarum numerum attulimus.

Minus benè sentiunt de forma artificiali, qui negant eam esse quid reale & positium; quia formæ artificiales sunt per subtractionem materiæ, vt patet de figuris in marmore sculptis; & quæ sunt per subtractionem nihil habent positiui: sed illi longè meliùs ratiocinantur qui cum Doctore nostro 8. *Met. in comm. cap. 3.* asseuerant formam artificialem esse quid reale & positium, conuenienter ad mentem Philosophi, *lib. 2. Phys. tex. 11.* dicentis lignum esse quid artificiale in potentia, & fieri artificiale actu per formam artificialem de nouo illi aduenientem; Ratio huius ex hoc colligitur, quòd forma artificialis cadat sub sensus, & quòd sub sensus cadit, est reale & positium. Deinde forma artificialis est terminus actionis realis & positiuæ in artifice existentis, qui in præiacentem materiam agit; & sic realis censeridebet illius actio. Tandem *ars* definitur *habitus cum recta ratione factiuus* ex 6. *ethic. c. 4.* ergo opus ad quod inclinat talis habitus, habet formam realem positium. Quòd si dicatur in sculptis imaginibus nihil positiui aduenire, sed tantum demi; hoc verum est quantum ad primum terminum, nempe lignum, cui nihil noui accedit, falsum verò, quantum ad secundum terminum, seu *artefactum*, quod formam artificialem recipit, quæ realis est & positiua.

Si queratur autem *quid sit forma artificialis*, responderi potest conformiter ad Scotum *in comm. 12. met. tex. 15.* quòd sit *qualitas terminatiua quantitatis ab artifice elaborata per intellectum practicum & voluntatem*. In hac definitione *qualitas* tenet locum generis: quandoquidem forma reducitur ad quartam speciem qualitatis. *Terminatiua quantitatis* tenet locum differentię, per illam enim particulam differt à forma artificiali, quæ est materiæ terminus. Differt, inquam, forma artis à forma naturæ per distinctionem realem, vt innuunt Aristot. 2. *phys. text. 3.* & Scotus 6. *met. in comm. cap. 1.* Quia destructa formà artificiali manet forma compositi naturalis. vt patet de imagine Cęsar-

ris, quæ in marmore figurata destruitur aliquando, marmoris forma substantiali remanente. Adde quòd inter accidens & substantiam sit distinctio realis forma autem naturæ est substantia, & forma artis est accidens. Quòd si forma naturalis & artificialis videantur habere easdem proprietates, quandoquidem si forma naturæ sit levis, grauis, frigida, aut calida, talis erit forma artis; hoc verum est per accidens & ratione subiecti, quod sub vtraque forma retinet easdem qualitates; falsum verò per se & ratione sui, quandoquidem artefactum vt artefactum non est leue aut graue, calidum aut frigidum.

Dico 2. idèò artem dici imitari naturam 2. *phys. text. 22.* quòd in multis conueniant ars & natura, & præsertim in quatuor: scilicet, in ratione principij, in ratione subiecti, in ratione modi, & in ratione termini. *Primò*, inquam, ars naturam videtur imitari *ex parte principij*, quia sicut naturalia correspondent rationi D. quæ ob hoc dicitur *ratio vniuersalis agendorum*; sic etiam artificialia debent conformari rationi humanæ, quæ est *mensura & regula factibilium*. *Secundò*, ars imitatur naturam *ex parte subiecti*, quandoquidem sicut natura præsupponit materiam ex qua educit formas substantiales, sic etiam ars præexigit materiam suorum operum, ex quibus formas artificiales industriose educit. *Tertiò* ars imitatur naturam *in modo procedendi*, sicut enim *natura ab imperfectioribus ad perfectiora procedit*, vt experientia testatur, qua videmus virgulas præcedere arbores; sic etiam ars imperfectiora primò adhibet, ac deinde exquisitiora, vt videri potest in arte pingendi. *Quartò* denique, conueniunt ars & natura *ex parte termini*, quia sicut natura agit ad aliquem finem, ex quo pendet tota ratio operis; ita ars sibi constituit finem, ex quo desumit regulas suæ operationis: ita quòd sicut in natura adueniunt aliquando defectus, cùm natura deuiat à fine; sic vitia vtcumque accidunt in artefactis, quando propter inexperientiam artificis, vel defectum materiæ, à fine artis deuiatur. Non de sunt aliæ similitudines inter naturam & artem, quæ de se sufficienter apparent.

Dico 3. in sequentibus artem & naturam distinguui. *Primò* scilicet quòd *natura sit substantia*, ars verò accidens, de prædicamento qualitatis, & de specie habitus. *Secundò* *natura est principium internum motus*

& quietis ; *ars* verò est principium *extrinsecum* , quod artificem ad opus externum dirigit. 3. *natura* est opifex rerum , quæ sunt veræ & propriæ , vnde formæ naturales dicuntur *vina* ; *ars* verò producit restantummodò similitudinarias & apparentes , quæ ideo dicuntur *morta* , quia nulla agendi virtute pollent. 4. *natura* in *absconditis* elaborandis versatur , *ars* verò in *externis* & patentibus. 5. omnes partes rei *naturalis* sunt à *natura* , materia scilicet & forma ; partium verò rei *artificialis* vna est à *natura* , utpotè marmor ; alia ab *arte* nempe figura artefacti . 6. formæ *artificiales* afficiunt ut plurimum corporis superficiem ; sicut apparet in statuis & picturis ; formæ verò *substantiales* totum compositum informant. 7. res *naturalis* est similis suo agenti secundum esse ideale reale in agentibus scilicet à proposito ; *artificialis* verò est tantum similis agenti secundum esse ideale : vnde Arist. 7. *met. text.* 22. ait sanitatem & domum ad extra , effici à sanitate & domo quæ est ad intra , seu in mente artificis . Octavo denique *natura* est *perfectibilis* per artem , *ars* verò est *naturæ perfectiva* , ut habetur 2. *phys. text.* 79. *ars perficit naturam* ; quando scilicet ex rudi lapide speciosa efficitur statua , & ex permixtione colorum efformantur pulcherrimi vultus . Non propterea tamen *ars* debet dici naturæ perfectior , quia non perficit illam simpliciter & secundum suam entitatem ; sed tantum secundum quid , adiiciendo naturæ aliquas perfectiones extrinsecas .

Dico 4. *artem non posse attingere primò & per se effectus naturæ* , directe influendo in illos ; bene autem indirectè , applicando actiua naturalia passivis . Sic Scotus in 2. *dist.* 18. *quæst.* vn. & D. Thomas 1. 2. *quæst.* 77. *art.* 2. ad 2. contra Albertum & Henricum affirmantes artem posse opera naturæ moliri . Ratio primi est quia ea quæ fiunt directè per artem , vel efficiuntur per detractionem , ut statua lignea : vel per additionem ut pictura , vel per compositionem , ut domus , vel per transfigurationem , ut imago cerea , aut statua fusilis ; sed per hæc omnia nullum opus naturæ formatur , sed formatum figuratur & perficitur : ergo *ars* non producit per se opera naturæ . Deinde vera & propria causa effectum virtualiter continet , cum illum possit producere , sed *ars* , quæ est accidens , non continet effectus naturæ , qui sunt substantiæ ; quandoquidem accidens

non potest producere substantiam: ergo ars nequit directè attingere opus naturæ. Tandem ars non operatur nisi applicando & modificando opera naturæ: sed directio & modificatio sunt accidentia intentionalia, quæ non possunt producere opera naturæ: ergo. Quod si *Exod. 7. Sapientes Egyptiorum arte magica fecerint serpentes*, quos *Aug. lib. 2. qq. super Exod. quest. 21. dicit fuisse veros serpentes*. Respondet Scotus in 2. dist. 18. *quæst. vn.* tales serpentes effectos fuisse per artem, non per se & virtute propriâ artis; sed per accidens & per applicationem actiuorum passiuus. Si etiam arte magica & in virtute quarundam imaginum quædam fuerint patrata, quæ vires naturæ superant: hoc factum est, non virtute propriâ talium figurarum, sed ope dæmonum; qui per hoc voluerunt auertere homines à vero Dei cultu. Si denique vitrum, butyrum, & similia, quæ sunt effectus substantiales, efficiantur arte; hoc fit non per virtutem propriam artis, sed per virtutem rerum naturalium, adhibita iusta positione, permutatione, confusione, & applicatione actiuorum passiuus.

Secundum indicatur ex hoc, quod ars medica dirigat medicum in compositione pharmaci, quod haustum ab ægroto sanitatem producit, quæ est quid naturale productum directè per pharmacum, & indirectè per artem medicam. Sic etiam ars agriculturæ proijciendo grana in terram frumentum producit, quod directè germinatur à terra, & indirectè ortum ducit per agriculturæ artem. Sic denique nedum magici ope dæmonum diuersas animantium imperfectorum formas inferunt sed etiam in Ægypto, vt fertur, construuntur furni, in quorum superiori parte multa disponuntur oua, deinde accenditur ignis in inferiori parte illius, vis maior caloris exhalatur per foramen medium, & postea ex illis ouis, mediante calore superiori temperato, multi erumpunt pulli: ex quibus colligitur artem sepe sapius indirectè moliri opera naturæ.

Dico 5. non eodem modo respondere authores ad difficultatem, quæ proponitur de possibilitate confessionis veri auri per artem chymicam; cum Auerroes, Auicenna, & multi ex antiquis, sicut & ex recentioribus non pauci opinentur effectum veri auri esse impossibilem arti chymicæ. Tum quia virtus productiua auri est calor solis in loco determinato, vbi viget virtus mineralis, vnde Anaxagoras dicebat *fedinam esse veluti*

matrem respectu formationis auri, & solem veluti patrem; sed ista principia non subiacent industriæ artis cum non possimus disponere de virtute solis, nec efficere materiam dispositam ad susceptionem formæ substantialis auri: ergo in illorum mente verum aurum non potest effici per artem chymicam. Tum etiam quia nedum calor solis necessarius est ad productionem veri auri, sed etiam ad hoc requiruntur certæ quædam influentia eiusdem astri, quæ non percipiuntur sensibus; & quas ignis & ars non possunt supplere. Tum postea quia in locis naturaliter dispositis ad confectionem veri auri, integra ferè sæcula consumit natura ad talem effectiorem: ergo ridiculum est dicere hoc posse facere hominem in medio sui temporis spatio. Tum denique quia Ecclesia ob impossibilitatem auri conficiendi per artem alchymicam condemnat in extrauaganti, *spondet*, declaratque vendentes tale aurum ad restitutionem teneri; quod sanè non deberet fieri, si tale aurum esset verum & reale.

Alij verò quibus fauere videntur D. Thomas 2. 2. *quæst.* 77. *art.* 2. Scotus in 2. *dist.* 18. *quæst.* vn. Albertus Magnus cum multis, existimant *per artem chymicam verum aurum confici posse*. Multa enim difficiliora videmus fieri ab hominibus beneficio artis quandoquidem longè est difficilior producere formas substantiales animalium viuientium, quod faciunt Ægyptij quàm inducere formam substantialem auri, quod non est viuens: ergo cum istud sit possibile, à fortiori illud etiam tale erit. Deinde omnia metalla fiunt in visceribus terræ ex certa temperie elementorum: sed ars chymica longo vsu edocta talem temperiem agnoscere potest: ergo & imitari ex mixtione sulphuris, & mercurij, aut alterius similis rei; vnde plures afferuntur historiarum, quæ probant ab alchymistis verum aurum fuisse efformatum. Tandem si repugnaret quominus confectio veri auri esset possibilis, maximè, quia non possent suppleri influentia solis, nec locus in quo generatur aurum, qui est terra; sed non alia virtus requiritur ex parte solis, nisi calor, qui potest suppleri per ignis calorem temperatum; locus autem nihil per se confert ad generationem auri, sed tantum per accidens, quatenus temperamentum illius formam auri fouere & seruare potest; sed hoc potest suppleri per industriam artis; ergo nec ex parte agentis, nec ex parte

loci repugnat auri confectio, & multo minus ex parte materiæ, quæ est capax omnium formarum, & ex parte formæ auri, quæ cum sit corporea, educi potest de potentia materiæ; modò per industriam possibilem artis chymicæ præcedant dispositiones necessariæ in materia ut forma auri introducatur.

Quando ergo assertioni præcedenti opponitur materiam auri concoqui non posse, nisi calore cœlesti: *Responderi* potest, quòd ille calor suppleri queat per calorem ignis, qui est eiusdem speciei, & qui temperari potest, ne sit violentior & aptior ad corrumpendum quàm ad generandum. Nec afferri debet locum auri conficiendi esse in visceribus terræ: talis enim locus suppleri potest: cùm locus procreationis murium sit matrix, quæ tamen generari possunt in quisquilijs; Quantum ad *extravagantem præcitatem*, ideo Ecclesia eam edidit, nè in tali arte chymica se intromittat dæmon, qui optimè nouit applicare actiua naturalia passiuis; & sic de facili posset decipere homines. *Quando autem pena restitutionis infligitur tale aurum chymicum diuidentibus*; hoc ideo factum est, quia periculum esse presumitur de veritate talis auri, quòd ex hoc procedit, quòd Alchymistæ talem artem non benè calleant, vnde illis applicari potest dictum Pauli 2. Thimot. 3. *semper ad discentes & nunquam ad veritatis scientiam peruenientes.*

QVÆSTIO III.

Quid dicendum sit de Violentia

CUm naturæ opponatur *violentia*, quandoquidem motus violentus est naturali contrarius; postquam egimus de natura & arte, conueniens est ut aliqua subiungamus de *violentia*, quoniam ad eandem scientiam spectat disputare de contrarijs, ut patet de Ethica, quæ agit de virtutibus & vitijs, & de medicina, quæ tractat & de morbis & de sanitate.

Dico ergo primò *violentiam esse id cuius principium est extra, passio non conferente vim*; cùm enim oppositorum contraria sit ratio, sicut natura est principium intrinsecum motus & quietis, sic etiam violentia est principium extremum eiusdem motus. Violentia ergo duo
im-

importat, quæ exprimuntur in definitione eius; quorum primum est, quòd ab extrinseco procedat, seu inferatur à principio sibi inimico, quòd inclinationi rei repugnet, & rem vertat in oppositum illius, ad quod ex se inclinatur; & illud primum exprimitur in priorì particula definitionis, cùm dicitur, *cuius principium est extra*. Secundùm habetur in sequentibus verbis, *passo non conferente vim*, idest repugnante. Vt aliquid enim censeatur esse in motu violento, non sufficit quòd indifferenter passum se habeat ad talem motum, quia talis quieta subiectio censeretur tribuere aliquid actioni & agenti conuenire: sed requiritur, vt passum repugnet actiue nitendo in contrarium, vel saltem passiuè, se præbendo ineptum tali motui impresso ab agente. Si ergo quærat *quanam sit differentia inter naturale, artificiale, & violentum*; responderi debet quòd *naturale* sit cuius principium est intra; *artificiale* cuius principium est extra in ratione fabricantis, cum indifferentia ad hanc vel illam formam; *violentum* verò cuius principium non solum est extra, sed etiam opponitur naturali inclinationi: vnde violentum magis opponitur naturæ, quàm artificiale; quoniam *artificiale* naturam imitatur, & *violentum* aduersatur illius inclinationi.

- Dico 2. quòd motus ille, quem agens superius imprimit naturæ inferiori, *non debeat dici violentus, sed potius naturalis*, quamuis sit insolitus & diuersus ab illo, in quem natura prona est: vnde quando Angelus mouet corpus aliquod & eleuat sursum, non debet dici violentiam illi inferre; quia omnia corpora naturaliter subiecta sunt Angelis, vt corpus viuum suæ animæ. Ratio huius est quia aliquid non dicitur *violentum*, nisi quod sit passio resistente; sed res inferiores subordinatæ non resistunt, imò potius obediunt superioribus: ergo motus agentis superioris non est violentus inferiori rei quamuis sit contrarius motui, quem pro solito habet; vnde Translatio longinqua, quam fecit Angelus respectu Abacuch prophetæ, *violenta* propriè dici non debuit; si consideretur vt facta ab Angelo. Deinde res inferior maxime inclinatur ad obediendum superiori; cùm in tali subiectione reperiatur suam perfectionem, & consistat bonum totius vniuersi, quòd omnia maxime appetunt. Tandem sicut politica subiectio fundat politicam obedientiam ita subiectio naturalis fundat naturalem obedientiam; sed res inferiores naturaliter sub-

ijciuntur agentibus superioribus, quibus ob hoc dicuntur *inferiores*: ergo sicut boni ciues subiacent & spontè obediunt regi, in illis quæ concernunt reipublicę bonum; sic etiam res inferiores naturales naturaliter subeunt ordinem agentium superiorum: & quando mouentur ab illis, tales motus debent dici naturales & non violenti, quamuis opponantur motibus illis qui sunt conformes naturis particularibus, etiam si aliquando cedant in detrimentum & in destructionem talium rerum inferiorum, quæ cedere debent vtilitati vniuersitatis.

Dico 3. *motum, quem Deus imprimit creatura, non debere dici violentum, sed maximè naturalem*, propter rationes præallatas. Quas firmiter confirmat Aug. lib. 26. contra Faustum cap. 3. dicens, *Illud est cuiuslibet rei naturale, quod fecerit ille à quo est omnis motus, numerus, & ordo natura: Deus enim creator & conditor omnium naturarum nihil contra naturam facit*. Ratio sequens præcedentibus potest adijci, quòd scilicet ea omnia quæ Deus facit in creaturis sint iuxta principalem illarum inclinationem, quandoquidem *intimior creatura inclinatio est obedire creatori, cui connaturalius subijcitur, quàm corpus anima*: ergo, sicut naturalis est motus quo brachium se eleuat, non obstante pondere proprio, vt obediatur voluntati, cui subordinatur; sic etiam omnis motus, quem Deus imprimit creaturæ sibi totaliter subiectæ non debet reputari *violentus*, sed maximè naturalis. Deinde, non est contra naturam instrumenti, quòd moueatur à propria causa, sed omnes creaturæ ex natura sua sunt instrumenta Dei: ergo qualiscumque motus illis imprimatur à Deo, non debet censeri violentus, quamuis sit contra inclinationem naturalem rei consideratæ in particulari, & non vt subest imperio D. Tandem materia artis, quamcumque formam recipiat ab artifice, nunquam dicitur esse in statu *violento*, quia indifferentiam habet ad omnes formas, quas artifex vult illi imprimere, sed non minùs dependent naturæ inferiores à Deo, quàm materia artis ab artifice respectu formarum recipiendarum: ergo motus à Deo creaturę impressus, qualiscumque sit, nec debet dici *violentus*, sed naturalis.

Quando ergo sol stetit ad vocem Iosue, quando retrogressus est ad imperium Isaia tempore Ezechie regis, & quando aquæ steterunt vt facilis transitus præbe-

beretur filiis Israel, talia non debuerunt dici *violenta*, sed naturalia simpliciter, *quandoquidem* hac omnia operatus est Deus, ad cuius nutum omnes creaturæ naturaliter & sponte operantur. Quod si dicatur Deum concurrendo cum causis secundis inferre illarum effectui violentiam, quando v. g. concurrit cum manu proijciente lapidem sursum: ergo quando se solo agit & imprimit motus alicui creaturæ, mouendo v. g. Iordanem contra suos fontes, talis reuersio debet dici violenta, & sic motus à Deo creaturæ impressus non est naturalis. Debet negari consequentia, quia Deus concurrens cum creaturis se accommodat illarum agendi modo: vnde cum homo proijcit lapidem sursum, quia talis proiectio dicitur *violenta* respectu hominis, talis etiam dici debet respectu Dei concurrentis, qui eodem modo operatur ac creatura: quando autem Deus agit se solo, operatur iuxta modum suum, & cum sit naturæ Dominus, quælibet creatura illi liberè & sponte paret. Dices ergo detentio dæmonum in flammis infernalibus, quæ fit per simplicem actionem Dei, debet censeri naturalis & non violenta; proindeque dæmones non patiuntur in inferno, quoniam habent inclinationem naturalem subeundi inferni tormenta. Resp. Deum duplici modo agere in creaturis, aliquando scilicet per modum agentis vniuersalis, quod flectit quocumque vult creaturarum inclinationes, quas in manu habet; & tunc quidquid faciunt creaturæ ex imperio Dei, est illis naturale, quamuis fieret contra particularem inclinationem rerum, quam *actus* suspendit: Aliquando verò operatur per modum agentis particularis, quando imprimit creaturæ motum oppositum inclinationi illius, quam in ea conseruat; & protunc talis motus censetur creaturæ *violentus*, quia oritur contra inclinationem actualem talis creaturæ: & ob hanc rationem dæmones detenti in flammis patiuntur, & sunt in statu *violento*; quia habent *actus* inclinationem sese conseruandi & nullo modo patiendi: vnde cum tormenta, quæ illis infert Deus, sint contra illorum inclinationem, proinde illorum supplicia *violenta* dici debent.

SECTIO II.

De Causis per se Rerum Naturalium.

POSTquam Philosophus in principio *lib. 2. Physicorum* loquutus est de natura & arte, quæ aliquammodo dici possunt causæ, quandoquidem ab illis multa dimanant, differit postea de causis *per se rerum naturalium*, quas dicit esse quatuor, nempe Materiam, Formam, Efficientem, & Finale. Sic nos eandem affectamus methodum, & postquam in prima sectione sermonem habuimus de natura & arte, & quædam adiunximus de violentia; in præsentem intendimus examinare quæ scitu sunt necessaria de *causis per se*, quam sectionem distribuimus in quatuor capita, agentes in *primo de causis in genere*; in *secundo* agemus de *causis materiali & finali*, cum iam multa dixerimus de materia & forma in prima disputatione. In *tertio* loquemur de *causa efficiente*; et de *causa finali* in *quarto*.

CAPUT PRIMVM.

De Causis in Genere.

ALIE sunt *causa per se*, quæ scilicet ut *tales* influunt in effectum; & sic Architectus & Medicus dicuntur causæ per se: quia Architectus, ut Architectus, influit esse in domum, & medicus in sanitatem ægroti. Aliæ sunt *causa per accidens*, quæ ut *tales* effectum non produciunt, sed sub alia quadam ratione; ita quod, si aliquis sit simul medicus & architectus, dicitur quidem quod medicus sit causa domus; sed tantum per accidens, quandoquidem non ut medicus, sed ut architectus domum edificat. Aliæ sunt adhuc *causa per accidens*, quæ per se non influunt in effectum; ut *fortuna & casus*: unde effectus ad illas sequentes dicuntur *casuales & fortuiti*, & de istis loquemur in sequenti sectione.

QVÆSTIO PRIMA.

Quot modis usurpetur Causa.

CAUSARUM aliæ sunt *priores*, seu *uniuersaliores*, quæ concurrunt ad productionem plurium effectuum
di-

diuersæ rationis; vt Deus, Sol, & Astra: aliæ sunt *posteriores*, seu *particulares*, vt homo, & animalia perfecta. Dum concurrunt enim sol & homo ad productionem hominis, sol dicitur causa prima seu vniuersalior, & homo vocatur causa posterior seu minus vniuersalis, aut particularis.

Causarum aliæ sunt Primæ, & aliæ consequenter Secundæ. *Causa prima* dicuntur tales, vel primitate perfectionis; vt in hominis generatione, vbi sol & homo hominem generant, homo dicitur *prior*. Vel primitate indifferentiæ, & sic sol est *prima* causa respectu hominis generantis; quoniam sol est indifferens ad plures effectus, & homo est determinatus ad vnum: Vel primitate existentiae, quando vnum existit prius alio: quod intelligi potest tripliciter, nimirum tempore, naturâ, & origine. Deus v. g. dicitur prior creaturis prioritate quadam temporis, rationalitas est prior naturâ risibilitate, & in diuinis Pater est prior Filio prioritate originis; Quoad causas secundas supponuntur intelligi per respectum ad causas primas.

Causarum aliæ sunt *uniuoca*, quæ producunt effectum sibi similem in specie: vt leo, qui producit leonem, equus, equum, & homo hominem; aliæ *æquiuocæ*, quæ causant effectum in specie dissimilem: vt sol, qui producit hominem, ranas, arbores, & metalla, *Æquiuoca* confunditur cum vniuersali, & vniuoca cum particulari, quandoquidem causa vniuoca est ea, quæ determinatur ex sua natura ad certos & particulares effectus, æquiuoca verò se extendit ad plures effectus & indeterminatos; & sic frustra diuideremus causas vniuersales & particulares.

Causarum aliæ sunt Totales, aliæ Partiales. *Totalis* est ea, quæ producit totum effectum; vt quando vnus homo fert centum libras. *Partialis* verò est ea, quæ vnam tantum partem effectus producit, vt quando duo equi trahunt currum. Quod si causa totalis producat sola totum effectum, dicitur causa totalis totaliter effectum producens. Si autem producat totum effectum ad quem vlteriùs concurrat alia causa subordinans vel subordinata, quæ etiam in suo genere totum effectum producit homo, tunc sol & homo dicuntur causæ totales quidem eiusdem hominis, sed non totaliter producentes; quia sol non excludit causalitatem hominis, nec homo causalitatem solis.

Causa diuiditur quartò in Principalem & Instrumentariam. *Principalis* est ea, quæ propria sua virtute attingit effectum; sic ignis prouocit ignem, sol radium, & Deus gratiam, vt causæ principales. *Instrumentalis* ea est, quæ in sua operatione dependet à causa principali; sic calor ignis prouocit ignem instrumentaliter, sacramenta gratiam, calamus scripturam, & gladius mortem.

Causa diuiditur sextò, in causam *Propriam*, à qua verè & propriè dependet & producit effectus; & sic calor producit ab igne, tanquam à causa propria: & in *Impropriam*, quæ non influit propriè & per se in obiectum, sed est conditio sine qua effectus non produceretur à causa: & sic approximatō ignis ad stupam est causa combustionis impropria. Hic posset assignari etiam diuisio causæ in *causam in actu primo*, qualis est ignis, qui posset comburere lignum, si illi approximeretur, licet non comburat ex defectu approximationis: & in *causam in actu secundo*, quæ nedum effectum producere potest, sed etiam producit de facto. Vt idem ignis, qui actu lignum sibi applicatum comburit.

Causa diuiditur septimò in causam *primam simpliciter* & absolutè, qualis est solus Deus à quo ceteræ causæ suam desumunt virtutem causandi: & in causam *secundam*, quales sunt omnes causæ inferiores, quæ non influunt in effectus, nisi dependenter à causa prima, ex qua omnem vim producendi hauriunt. Hic addi possunt causa *Proxima* & *Remota*, causa *Mediata* & *Immediata*, causa *Naturalis* & *Supernaturalis*, causa *Ordinaria* & *Extraordinaria*, & similes. Causa *proxima* est ea, quæ proximè attingit effectum, vt pater filium; *Remota*, quæ remotè effectum attingit effectum, vt quando Rex gubernat omnes suas prouincias iuteruentu Proregum; *Immediata* verò est ea, quæ agit aut immedatione suppositi, quando v. g. ignis agit in lignum sibi applicatum; aut immedatione virtutis, vti patet de sole, qui aurum producit in visceribus terræ per suum calorem, qui immediatè ibi penetrat materiam ad hoc dispositam. Causa *naturalis* est illa, quæ innata virtute effectum producit, vt ignis calorem, vbi *supernaturalis* non producit effectum nisi miraculosè: & quatenus eleuatur à potentia D. & sic ignis inferni torquet demones, & aqua baptismi producit gratiam.

Ordinaria effectum causat secundum communem naturam & ordinem, ut quando homo generat hominem: *Extraordinaria* vero agit præter ordinem naturæ, cum v. g. canis ab homine producit. Potest insuper dici, quod causa sit, vel libera, vel necessaria, vel libera & necessaria simul. Angelus & homo sunt causæ *libere*, quia possunt agere & non agere; ignis est causa *necessaria*, quia necessario producit calorem; Deus autem respectu actionum *ad extra* est causa *libera*, quia potuit non producere creaturas; respectu vero actionum *ad intra* est agens *necessarium*, quia necessario se intelligit, se vult, generat Filium, & producit Spiritum Sanctum.

Tandem ut ad propositum deueniamus, causa subdividitur in *Moralem*, & *Physicam*. *Moralis* est ea, quæ moraliter influit in effectum: vel consulendo, vel præcipiendo, vel persuadendo: & sic aduocatus est causa moralis litigij quod consulit; rex est causa mortis respectu rei quem damnat ad capitale supplicium; & orator, qui suadet auditoribus ut faciant aliquid, dicitur causa moralis facti illius, quod eliciunt ministerio persuasionis. Causa *physica* seu *naturalis* est ea, quæ vero & reali influxu concurret ad effectum compositi; & hæc causa physica seu naturalis est, quadruplex, nempe *materialis*, *formalis*, *efficientis*, & *finalis*: Harum autem causarum duæ sunt *intrinsecæ*, quæ actumanent in composito, nempe *materia* & *forma*: duæ vero sunt *extrinsecæ*, quæ non ingrediuntur compositum, videlicet *efficientis* & *finalis*.

QVÆSTIO II.

Quid & quotuplex sit Causa.

Supposita causarum existentia, quam vniuersa Philosophia clamat, & quam euidenter demonstrant generationes & corruptiones rerum naturalium, quæ non à seipsis, sed ab agentibus causantur; videndum est *quid sit & quotuplex sit causa*. Non sumimus autem hic causam in latiori acceptione, in qua conuenit cum principio, & priuationem comprehendit; unde Patres Græci dicunt *Patrem Aeternum esse causam Filij*, causam pro principio usurpantes; quem modum loquendi repudiant Latini *negantes Patrem esse causam Filij, sed tantummodo principium*. Non sumimus etiam

nomen *causa* strictissimo modo, pro sola nimirum efficiēte; quæ est causarū princeps in executione, & ea quæ manifestius apparet inter causas; Sed *causam* accipimus medio quodam modo, quatenus scilicet sumitur pro eo omni, quod influit *esse* in effectum; & sic usurpata comprehendit quatuor communia causarum genera.

CONCLUSIO PRIMA.

C*Ausa* est principium per se positivè influens *esse* in aliud. Dicitur primò principium, quod tenet locum generis, in quo convenit *causa* cum privatione, quæ est principium & non causa. Dicitur 2. *influens*, per quod intelligitur nedum influxus causæ efficientis, sed cuiuslibet causæ physicæ, quæ influit, seu communicat *esse*. Additur *per se*, ut excludatur causa per accidens, quæ ut talis non influit *esse* in effectum, sed ratione alicuius connexionis cum causa *per se*; ut quando medicus dicitur causa domus, in quantum est etiam architectus. Per eandem particulam excluduntur conditiones, quæ dicuntur *sine quibus non producit effectus*; ut approximatio respectu causæ efficientis, quæ requiritur quidem, ut efficiens effectum producat, sed non influit *per se* in illum. Additur *positivè*, ut excludatur privatio, quæ dici nequit *causa*, cum nec in generatione, nec in rem genitam influat *esse* positivè. Adiungitur denique *in aliud*, quod denotat effectum debere distinguì realiter essentialiter à causa; unde Pater D. non est *causa* Verbi, quandoquidem non distinguitur Verbum à Patre realiter essentialiter, sed tantum realiter personaliter; & ob hoc Filius in divinis, non est *aliud* à Patre, quòd denotat distinctionem essentialem; sed est *alius*, quod distinctionem realem personalem importat.

Obijcies causam non posse definiri, quia ex Scoto Theor. 19. nomen causæ est æquivocum, & sola univoca explicari possunt per unicam definitionem: *Resp.* Nomen *causæ* esse verè univocum, quia *ratio causæ* perticipatur à quatuor causarum generibus, quæ sunt principia per se influentia *esse* in aliud. Quando autem Scotus ait, nomen causæ esse æquivocum; hoc loco loquitur de causa latissimè sumpta, ut coincidit cum principio: non verò loquitur de causa propriè accepta, quo sensu illam definivimus. Quòd autem

Scotus

Scotus ipse subscribat definitioni præallatæ, colligitur ex 1. *Metaph. in Comm. text. un. cap. 1.* Vbi dicit *causa est quæ necessario influit ad esse causati.* Quod etiam approbat Arist. 4. *Metaph. text. 3.* Si contra id quod diximus Patrem in diuinis non esse causam Filij, afferatur August. *quest. 28. 99. noui Testamenti*, dicens Filium Dei esse effectum Patris; ibi loquitur in sensu Græcorum, & latè sumit causam pro principio.

CONCLUSIO SECVNDA.

Quatuor sunt causarum genera, *materialis, formalis, efficiens, & finalis.* Sic Arist. 2. *Phys. cap. 7.* cui concordat Scotus 1. *Metaph. in Comm. cap. 2.* Ex definitione enim superiori, *causa est id quod influit esse in aliud*, seu in corpus naturale; sed quatuor influunt esse in corpus naturale, nempe materia, forma, efficiens, & finis: ergo. *Probatur minor: Quia compositum naturale non fit ex nihilo, sed ex aliquo, & tunc est materia: deinde non fit à se, sed ab alio, & est efficiens: illud autem efficiens producit aliquid in subiecto, quod aliud nequit esse à forma quæ facit compositum: & tunc est causa formalis: efficiens denique non agit temerè, quandoquidem Deus & natura nihil agunt frustra, sed proponunt sibi finem actionis suæ: & sic est causa finalis: ergo sunt quatuor causæ. Deinde, ut inquit Arist. præcitatus, tot sunt causarum genera, quot sunt genera questionum, cum causa adducatur ad satisfaciendum questioni: sed de composito physico quatuor queri possunt, nimirum à quo fit, & est causa efficiens; ex quæ fiat, & est materia; per quid fit tale, & est forma; & propter quid fit, & est finis. Tandem ex Scoto in 2. *Repor. dist. 34. quest. 1.* Omnis causa vel est intrinseca & remanens in composito, vel est extrinseca & non pertinet ad essentialem constitutionem compositi; si sit intrinseca, est materia & forma, quæ intrinsecè constituunt corpus naturale; si autem est extrinseca, duplex est adhuc, nempe efficiens & finis: ergo sunt quatuor genera causarum.*

Obijcies 1. Effectus pendet ab instrumento: ergo instrumentum est quinta causa. *Resp.* quòd pendeat ab instrumento, tanquam à causa minùs principali, quæ reducitur ad efficientem; quandoquidem efficiens di-

videtur in principalem & instrumentalem. *Si obiectum dicatur causa actionis naturalis*, hoc verum est; sed obiectum reducitur ad causam efficientem: quandoquidem obiectum concurret mediante sua specie cum potentia, ut actionem producat. *Dices* idea seu causa exemplaris influit etiam in effectum; ergo est quinta causa. *Resp.* Ideam reuerà influere, sed ea reducitur vel ad efficientem, quatenus dirigit operans ad efficiendum opus externum ideæ interiori consentaneum; vel ad causam formalem, in quantum idea est forma extrinseca ad cuius similitudinem efficitur artefactum; sed de causa exemplari agemus postea.

Obijcies 2. Unio materiæ ad formam est causa compositi, & approximatio ligni ad ignem est causa combustionis: ergo sunt plures causæ quàm quatuor. *Resp.* Nec unionem, nec approximationem esse propriè causas; quia non influunt esse in compositum nec in materiam & formam, nec in combustionem: sed sunt tantummodò conditiones extrinsecæ, sine quibus materia & forma non componerent, nec ignis combureret. *Dices*, causa debet esse perfectior effectû, vel saltem æquè perfecta; sed materia aut forma non sunt perfectiores composito: ergo non debent dici causa illius. *Resp.* maiorem esse veram de causa totali & adæquata, falsam verò de causa inadæquata & partiali: materia autem & forma seorsim sumptæ sunt causæ tantum partiales compositi: & sic nil mirum est, si quælibet harum partium non habeat tantam perfectionem, quantam habet compositum, in quo est perfectio vtriusque.

Licet antecedens diuisio sit in membra realiter distincta, quoniam materialis, formalis, efficiens, & finalis realiter distinguuntur, ut omnes admittunt; hoc non impedit tamen, quin eadem res possit realiter habere rationem finis, materiæ, formæ, & efficientis: idem enim calor potest esse efficiens respectu alterius caloris quem produceret, potest esse causa materialis respectu relationum, quæ in ipso subiectantur; potest esse causa formalis respectu subiecti quod informat; ac denique potest esse finalis causa respectu mediorum, quæ applicantur ad productionem ipsius. Licet quatuor causæ præcedentes non requirantur ad omnem effectum, quandoquidem effectus simplices, ut Angeli, & materia prima, non habent causam ma-

terialem, nempe formalem; sicut nec anima rationalis, quæ materia caret, à quâ dependeat in existendo; illæ tamen quatuor causæ necessariò concurrunt ad efficiendum compositum; ut probauimus in conclusione secunda, quatuor causarum genera assignantes. Porro quando distribuimus causam in quatuor species præassignatas, species illæ causarum non sunt in fine; sed subalternæ; quandoquidem subdiuiduntur in alias, efficiens scilicet in *naturalem*, & *liberam*; materialis in *materiam ex qua*, & *in qua*; formalis in *Substantialem*, & *accidentalem*; ac denique finalis in *finem cui*, & *finem cuius gratia*.

QVÆSTIO III.

Utrum due Causæ Totales possint producere eundem numero effectum.

NOtandum est causam per se vel esse *diuersi ordinis*; ut efficiens, & formalis: vel esse *eiusdem*, ut duæ causæ efficientes. Causæ etiam *eiusdem generis*, vel sunt sibi inuicem *subordinate*, & *ordinis eiusdem*, ut Deus, sol, & homo, qui sunt duæ causæ *eiusdem generis*, quia sunt causæ efficientes, non tamen *eiusdem ordinis* sunt, quia vna habet virtutem effectiuan ab alia, nempe homo à sole, & sol à Deo: vel sunt *eiusdem ordinis*, & consequenter non *subordinate*, ut duo ignes, vel duo homines. Tandem causæ vel sunt *totales*, vel *partiales*, si producant totum effectum, vel aliquam partem effectus tantum. Quæstio nostra non intelligitur de pluribus causis partialibus, naturaliter enim duo homines ferre possunt centum librarum pondus. Non intelligitur etiam de pluribus causis totalibus diuersi generis, quandoquidem euidens est, quòd quatuor causæ physice, quæ sunt diuersi generis, sint causæ totales eiusdem compositi, quælibet in suo genere. Non intelligitur denique quæstio de pluribus causis diuersi ordinis, quia constat, quòd plures causæ *subordinate*, licet sint eiusdem generis, producere valeant eundem numero effectum, ut causæ totales, quandoquidem Deus, sol, & homo, hominem producant, ut causæ efficientes.

Supereſt ergo, quòd titulus quæſtionis intelligatur de pluribus causis totalibus eiusdem generis, & eiusdem ordi-

ordinis; ita quòd idem ignis, aut idem homo numero producat^{ur} à duobus ignibus, vel hominibus. Quæstio nedum procedit de pluribus causis efficientibus, vt in allatis exemplis; sed etiam de tribus alijs: *utrum videlicet dua forma totales possint informare eandem numero materiam, vel duplex materia totalis possit sustentare eandem formam, vel duplex finis totalis intendi simul.* Quia tamen hoc clariùs patet in causa efficiente, quàm in alijs; quæ est ratio, cur hæc quæstio à pluribus reseruetur pro capite illo, in quo agitur de causa efficiente: ideo quæ mox diximus de causis efficientibus, applicari possunt ad alias causas, & quia hæc difficultas concernit omnes causas indifferenter, Idcirco non immeritò hic proponitur. In hac autem difficultate non conueniunt authores, quoniam Ochamus, & Gabriel, cum alijs Nominalibus, admittunt hoc posse fieri naturaliter; Mayronius, Suares, & quidam alij existimant hoc saltem diuinitus fieri posse: Scotus verò in 2. dist. 1. quæst. 1. & D. Thomam 5. Metaph. Lect. 2. affirmant id esse impossibile.

CONCLUSIO.

Impossibile est unum, & eundem effectum produci à pluribus causis totalibus eiusdem generis, & ordinis. Quod hoc non possit fieri naturaliter, euidenter demonstratur contra Nominale, Hurtadum, Auerfam, & alios. Naturæ enim actiuitas frustranea, & inutilis non debet attribui, quandoquidem Deus, & natura nil moluntur frustra: sed posito, quòd vnus effectus fuerit productus ab vna causa, superflue ad eundem effectum concurreret alia causa totalis eiusdem generis & non subordinata, cum à prima sufficienter, & adæquatè productus intelligatur effectus secundum omnes suas perfectiones: ergo non potest fieri naturaliter, quòd idem effectus producat^{ur} à diuersis causis adæquatè efficientibus compositum.

Quòd etiam supernaturaliter non possint dua causa totales producere eundem numero effectum, probatur per hoc, quòd supernaturaliter non possit fieri id quod repugnat; sed repugnat, vnum numero, effectum produci, & dependere à duabus causis totalibus: quia à nulla dependeret, & sic esset dependens, & independens, quod est impossibile. Eset, inquam, dependens,

dens, quia illum supponimus produci, & dependere à duabus causis; esset verò independens, quia à nulla earum dependeret, quod probatur. Effectus non dependet *per se* ab illa causa, quæ sublatà, manere potest quoad *esse*, & quoad *conseruari*; sed sublata quacumque ex pluribus causis totalibus, effectus fieret ab alia, & maneret: ergo à nulla earum *per se* dependeret, & sic dependeret, & non dependeret. Dependere, inquam, per se à prima quæ est causa ipsius totalis, & non dependeret ab illa per se, quoniam illa sublata produceretur ab alia, quæ esset etiam causa totalis.

Confirmatur conclusio. Hic numero effectus essentialiter, & per se dependet ab hac numero causa: ergo non potest produci ab alia. Si enim posset produci ab ista, non dependeret essentialiter ab illa, quoniam posita causa, à qua essentialiter dependet effectus, debet effectus poni, & illa ablata effectum auferri necesse est. *Quòd autem hic numero effectus essentialiter & per se dependeat ab hac numero causa:* Per hoc patet quòd sicut se habet effectus in communi, ad causam in communi, sic se habet hic numero effectus ad causam hanc numero, quoniam sicut effectus habet à causa *ut sit effectus*, ita habet ab hac causa *ut sit hic effectus*; sed effectus in communi dependet essentialiter à causa in communi: ergo hic numero effectus dependet ab hac numero causa, & sic non potest dependere ab alia. Deinde effectus non potest esse simplicior sua causa: ergo vnius effectus non possunt esse due totales causæ. Tandem effectus indiuiduatur à causa: ergo vnus numero effectus exigit necessariò vnā numero causam, & proinde plures causæ totales subordinate nequeunt producere eundem numero effectum. *Adde quòd effectus eodem instanti bis produceretur totaliter, & adæquatè; semel ab vna causa, & semel ab alia.* Nec dici debet quòd hæ rationes officiant conclusioni sequenti, vbi dicitur eundem numero effectum posse diuisim, & successiuè produci à pluribus causis totalibus: hoc enim negabitur in solutionem obiectionum.

Obiicies. Possunt duo homines ferre simul aliquod pondus, quod vnus potuisset ferre; possunt etiam duo ignes eodem instanti comburere eandem stuppam; possunt denique duo sacerdotes eandem numero ho-

stiam

stiam consecrare ; sed illi duo homines , duo ignes illi , & duo illi Sacerdotes erunt causæ totales , quia sublato vno non minus portaretur pondus , nec combureretur stappa , nec fieret consecratio : ergo idem effectus potest esse à pluribus causis totalibus eiusdem generis , & ordinis . *Resp.* In illis casibus duos ignes , duos homines , & duos Sacerdotes coagere , & duas causas partiales simul iunctas , quæ essent quidem causæ totales si agerent seorsim , sed sunt partiales quatenus uniuntur ad faciendum vnum totum . Si etiam Deus crearet duos soles , qui simul illuminarent nostrum hemisphærium , talis illuminatio foret vna numero ab eis , tanquam à causis partialibus ; ita quod illuminatio vnius iuncta illuminationi alterius feceret aerem magis illuminatum . Quantum ad duos Sacerdotes simul consecrantes admittit Scotus in 4. dist. 6. quæst. 2. vnum numero effectum posse produci à duabus causis moralibus , & instrumentalibus ; non verò à causis principalibus : quia causæ morales , & instrumentales non agunt propria virtute , sed uniuntur in Virtute totali agentis principalis .

QVÆSTIO IV.

Virum idem numero Effectus possit produci diuissim à duabus Causis Totalibus .

CONSTAT quidem apud nos per præcedentem conclusionem vnum numero effectum non posse simul produci à duabus causis totalibus , quia esset dependens , & independens pro eodem loco , & eodem tempore quod inuoluit repugnantiam : hic autem quærimus , an etiam hoc diuissim repugnet ; quod tripliciter potest intelligi . Primò scilicet , an idem numero effectus iam productus ab una causa , & permanens in suo esse possit adhuc produci ab alia . Secundò , an idem numero effectus qui productus fuit ab una causa , & postea destructus est , possit idem numero produci ab alia causa . Tertiò denique an effectus productus ab una causa possit idem numero produci ab alia . Quantum ad primum , euidentius est , eundem effectum iam productum & in suo esse perseverantem nequidem diuinitus posse ab alia causa produci ; quia nulla potentia potest de nouo conferre esse , quod iam collatum est per aliam causam : repugnans

gnat enim eundem effectum numero esse extra suas causas, & intra illas; quod tamen deberet admitti, si admitteretur suppositio præcedens. Quantum ad secundum, fides docet eundem numero hominem, videlicet Lazarum, post mortem suam resurrexisse virtute Christi. *Ioan. 11.* Quantum ad tertium, altercantur Thomistæ, & Scotistæ: illis dicentibus, quod repugnet eundem numero effectum produci etiam diuissim à duabus causis totalibus eiusdem ordinis; vbi Scotus *in 2. dist. 20. quest. 4.* & cum eo Gabriel, Suares, Ruuius, Faber, & alij plures docent fieri posse vt idem numero effectus, qui producitur ab vna causa totali potuisset produci ab alia, si agens applicatum fuisset, passo eodem modo, & cum iisdem circumstantijs.

CONCLUSIO.

Idem numero effectus diuissim produci potest à duabus causis totalibus eiusdem ordinis. Sic Doctor noster nedum loco præcit. sed, & *in 4. dist. 43. quest. 2.* & *in report. in 2. dist. 20. quest. 2.* Negari enim non potest, quod si Abel non fuisset genitus ab Adamo, potuisset generari idem numero à Noemo, quoniam idem Lazarus, qui à suis progenitoribus productus est, virtute Christi resurrexit. Idem etiam numero calor, qui productus est ab hoc igne, potuit produci ab alio; quoniam ille alius habet æqualiter vim calefactiuam. Et sic idem numero effectus, qui productus est ab vna causa totali, si diuissim sumatur, potuit produci ab alia; quandoquidem causæ præfatæ habent sufficientem vim productiuam circa eundem effectum. Quod si dicatur, illum hominem qui productus est ab illo patre, non fore amplius eundem numero, si ab alio patre produceretur: talis consequentia negari debet, quia ad vnitatem & identitatem effectus sufficit, quod partes essentielles & intrinsecæ sint eodem, nempe materia & forma; nec requiritur, quod partes extrinsecæ, quæ sunt efficiens & finis, eadem sint; sed si Abel, qui natus est ab Adamo, fuisset genitus à Noemo, partes intrinsecæ illius fuissent eadem, nempe eadem numero materia, & eadem numero forma: ergo Abel, qui ab Adamo natus est, potuit à Noemo generari: & sic idem effectus numero, qui est ab vna causa totali diuissim sumptus, potuit esse ab alia; quoniam idem numero
ho-

homines, qui vixerunt super terram, resurgent ante finale iudicium.

Obiicies : Effectus specificus determinatus habet causam determinatam specificam, cum *homo generet hominem, & leo leonem*: ergo idem numero effectus habet causam numericam determinatam, quâ variatâ, variatur effectus: & sic idem numero effectus ab hac causa totali productus non potuit produci ab alia. *Resp.* antecedens non semper esse verum, quoniam animalia quædam generantur ex putri materia vel ex semine, consequentia etiam est falsa, quia non repugnat, quin idem calor productus ab hoc igne in hanc aquam, productus fuerit ab alio igne; si scilicet ignis ille, qui calefacit aquam, non fuisset aquæ suppositus, & loco illius substitutus fuisset ille alter. *Dices* calor, qui produceretur ab alio igne, non esset idem numero cum calore istius; quia calefactiones essent diuersæ. *Resp.* quod licet calefactiones sint diuersæ, quia sunt diuersi ignes calefacientes; calor tamen potest esse idem numero: quandoquidem efficiens, & finis non pertinent ad rationem intrinsecam compositi, sed tantum materia, & forma; vnde quia idem numero calor potuit recipi in eandem numero aquam, per alium scilicet ignem, qui tali aquæ fuisset appositus; proinde idem numero effectus, & idem numero calor, qui productus est ab vna causa totali, potuit diuissim produci ab alia; nedum supernaturaliter, sed & naturaliter; quoniam supposito quod hic ignis non produxisset hunc calorem in istam aquam, alter ignis potuisset eundem numero producere; & si quæ reperiretur diuersitas in his productionibus illa esset tantum extrinseca, penes causas efficientes, non verò intrinseca, penes materiam & formam.

Obiicies 2. Hæc conclusio videtur esse contra præcedentem, vbi diximus repugnare quod vnus effectus sit à pluribus causis, quia esset simul dependens & indepēdens; quod etiam verum esset, si vnus effectus posset diuissim esse à duabus causis totalibus. *Resp.* negari debere hoc argumentum, quia licet repugnet eundem effectum esse simul, & coniunctim à pluribus causis, hoc tamen non repugnat, si effectus diuissim consideretur; quia repugnantia introuenit tantum, quando duo contradictoria verificantur de eodem, eodem modo sumpto, pro eodem tempore, & in eodem loco

locò: unde repugnat quidem, quòd idem effectus sit à pluribus causis pro eodem tempore & coniunctim, quia esset simul dependens, & independens, quod implicat: non repugnat verò, quòd idem effectus diuissim spectatus dependeat à pluribus causis; ita quòd, sicut post destructionem suam, potest de nouo produci ab alia causa: sic etiam quando producitur ab vna causa, possit idem *numero* produci ab alia, si prima causa eum non produxisset, & secunda applicata fuisset eidem passo cum iisdem circumstantiis temporis, loci, & similibus, solaque causa efficiens diuersa fuisset.

Dices in confirmatione præcedentis conclusionis dictum est, quòd sicut effectus in communi specificatur & determinatur per causam in communi, sic etiam hic effectus in particulari indiuiduatur per hanc causam in particulari: ergo si hic effectus productus ab hac causa posset produci ab alia, non esset amplius idem *numero* effectus, & sic falsum est dicere quòd plures causæ totales possint producere diuissim eundem numero effectum. *Resp.* ad consequentiam, non esset idem effectus, & secundum omnes suas rationes extrinsecas & intrinsecas, quia reuerà ille effectus in tali suppositione haberet causas efficientes diuersasque extrinsecæ sunt: esset tamen idem *numero* effectus intrinsecè quia haberet eandem *numero* materiam & formam: sicut dicitur quòd iidem *numero* homines resurrecturi sint in fine mundi, licet existentia illis restituenda futura sit à Deo, vbi pristina fuit à parentibus; quod euidenter demonstrat diuersitatem causarum efficientium non impedire identitatem intrinsecam effectus: & sic constat quòd idem *numero* effectus possit esse diuissim à pluribus causis totalibus.

Q V Æ S T I O V.

De Proprietatibus Causæ in communi.

Sub nomine proprietatum causæ comprehendimus prioritatem causarum per respectum sui, & per comparisonem ad effectus; intelligimus nobilitatem earum sub utroque respectu, ipsarumque distinctionem, connexionem, & causalitatem: quæ omnia per diuersas conclusiones elucidabuntur in præsentiquæstione.

CON-

CONCLUSIO PRIMA.

Si causa comparetur ad suum effectum, omnis causa est prior suo effectui, saltem prioritate temporis. Prioritas temporis est ea, qua vnum ita præcedit aliud, ut extiterit in aliquo intervallo temporis, ubi aliud non existebat. Prioritas naturæ ea est, per quam vnum præsupponitur ad aliud, & à quo procedit: licet utrumque existat pro eodem tempore: & sic sol est prior naturà luce, materia præcedit formam, & rationalitas antecedit risibilitatem, cuius est principium. Quod omnis causa sit prior naturæ suo effectui, ex dictis patet: quia scilicet illud est prius naturæ altero, quod dat illi esse; sed causa dat esse effectui, ergo est prior effectui, quandoquidem supponitur ad illum. Quod etiam causa non sit semper prior effectui prioritate temporis, ex dictis constat adhuc; quia sol, materia, & rationalitas non existunt in aliquo tempore, ubi non sint lux, forma, & risibilitas. Quod si correlatiua dicantur esse simul naturæ, quod videtur opponi priori parti conclusionis; ubi diximus causum esse priorem effectui, quæ tamen sunt correlatiua; Respondendum est correlatiua esse simul naturæ, si sumantur formaliter ut correlatiua sunt, si tamen sumantur entitative & materialiter, pro fundamento relationis, tunc non sunt simul naturæ, sed entitas causæ præcedit entitatem effectus.

Si causæ comparentur inter se, ita adinuicem disponuntur, ut causalitas finis sit prior, deinde accedit causalitas efficientis, postea causalitas materiæ & tandem causalitas formæ. Quod euidenter colligitur ex hoc; quod agens primò moueatur à fine ut agat, & sic finis est causarum prima. Deinde agens, seu efficiens, sic à fine motum in actionem prorumpit, & proinde causa efficiens secundum locum tenet inter causas. Postea agens operatur supra materiam primam vel secundam, quæ sunt subiectum actionis, unde tertio loco ordinatur inter causas materia. Tandem his omnibus accedit forma, quæ in materia recipitur, & est causarum vltima; unde dicitur terminus generationis. Si dicatur quod actio agentis supponat materiam ex qua agit, & quod proinde causa materialis præcedat efficientem: Respondendum est quod causa efficiens supponat materiam, quantum ad entitatem illius, quia
non

non potest efficiens agere nisi in subiectum: non supponit verò materiam, quantum ad eius causalitatem: imò nunquam materiam causalitatem suam exerceret circa materiam quam sustentat, nec circa compositum quod constituit, nisi prius agens per suam actionem educeret formam de sinu potentiali materie ad efficiendum compositum: & sic causalitas efficientis semper antecedit causalitatem materie.

CONCLUSIO SECUNDA.

SI causa comparetur ad effectum, debet dici absolutè nobilior effectui. Melius est enim dare, quam accipere; sed causa dat esse effectui: ergo causa formaliter sumpta, ut causa est, est effectui nobilior. Deinde principium actuum nobilitate superat passivum, ex communi axioma, nobilius est agens patiente; sed causa est principium actuum ex definitione eius, & effectus est principium passivum ex eiusdem definitione: ergo causa præfertur effectui. Tandem prius & independentens est excellentius posteriori & dependenti, cum melius sit esse à se, quam ab alio: ergo causa præstat effectui, ut causa est. Hoc non impedit tamen, si considerentur entitatis causæ & effectus in suo esse absoluto, quin effectus aliquando nobilitate superet suam causam; ut patet de sole producente hominem, qui est perfectior.

Si causæ comparentur inter se, causalitas finalis est omnium nobilissima; causalitas efficiens sequitur, succedit causalitas formalis; tandemque ultima est causa materialis. Quòd causa finalis dicatur nobilior alijs, hoc colligitur ex modo causandi illius, qui est omnium præstantior, cum spiritualior sit, & ipse finis immotus manens cætera moveat, quod est nobilissimum & divinum: unde causa finalis iure dicitur à pluribus causarum regina. Sic enim omnes causæ disponuntur, ut materia sit propter formam, forma propter agens, & agens propter finem à quo movetur, & sic finis est omnium causarum nobilissima. Causa efficiens nobilior est postea alijs; quia materia & forma sunt entia potentialia, quæ subiiciuntur causæ efficienti quæ actualis est, & formam educit de potentia materie. Causa denique formalis est perfectior causa materiali, cum materia sit pura potentia, prope nihil, &

ens infimum: ubi forma est *ens pulchrum*, *actuale*, & quodammodo *diuinum*, inquit Aristoteles. Sicut autem forma est præstantior materia, sic compositum præcedit materiæ & formæ; siue disiunctis, siue coniunctis, ut inquit Scotus *quodlib.* 9. *art.* 3. iuxta Aristotelem hoc expresse dicentem 7. *Metaph. cap.* 3. *art.* 7. Compositum enim præter materiam & formam, quas continet includit adhuc tertiam entitatem causatam ab eis, nempe *entitatem totius*: unde dici debet quid perfectius materia & forma: quandoquidem compositum est substantia completa & perfecta; partes verò illius sunt substantiæ imperfectæ & incompletæ, quæ ordinantur ad totum, ut compleantur.

Si causa intrinseca & extrinseca inter se comparentur, extrinseca eminent intrinsecis; quia causæ intrinsecæ potentialitatem & imperfectionem præ se ferunt, cum vna ordinetur ad alteram perficiendam, & utraque ad tertium constituendum, nempe compositum: causæ verò extrinsecæ actualitatem & perfectionem important, quandoquidem sunt entia in actu completo, proindeque nobilitate superant causas intrinsecas: *Deo adaptantur*, qui est omnium causa efficiens & finalis. *Si compareretur efficiens in fine, aliquando sunt æquales*: cum in Deo potentia, quæ est omnium creatorum efficiens, sit æquè nobilis, ac bonitas illius, quæ est omnium creaturarum causa finalis: aliquando verò sunt inæqualis perfectionis, quandoquidem bonitas D. quæ est finis nostrarum operationum, illas infinitè superat: aliquando denique finis est minus nobilis efficiente, quoniam multa operatur Dominus propter salutem hominum qui longè ignobiliores sunt Deo. *Si compareretur finis ultimus ad effectus qui propter eum producuntur, si sit verus, semper est nobilior*, cum nullus effectus possit vnquam adæquare perfectionem Dei, qui est verus finis ultimus omnium: Si verò finis ultimus sit tantum apparens & existimatus, aliquando est ignobilior; quando scilicet homo paganus operatur propter honorem Idoli, quod sibi constituit tanquam ultimum finem. Idololum enim illud est ignobilius operatione hominis. *Si compareretur finis non ultimus ad effectum, aliquando est præstantior effectu*; quando nimirum homo benè operatur ut gratiam D. obtineat, quæ gratia superat actiones hominis, aliquando etiam est ignobilior, cum v. g. aliquis studet Theologiæ

ut faciat lucrum, quod est inferius studio.

Si comparentur causa efficientes æquiuoca & uniuoca ad suos effectus, causa efficiens uniuoca est æqualis perfectionis cum suo effectu, ut docet Scotus in 1. dist. 2. quæst. 7. & alibi. Quæ enim sunt eiusdem speciei, sunt æqualis perfectionis essentialis, ut patet de Petro, & Paulo, qui æqualiter participant essentiam hominis; sed causa uniuoca & effectus sunt eiusdem speciei, ut liquet ex definitione causæ uniuocæ, quæ dicitur nata producere effectum sibi similem: ergo effectus causæ uniuocæ est æqualis nobilitatis cum illa. Quando autem videtur, quod homo stupidus generet filium ingeniosum, deformis pulchrum & infirmus robustum talis perfectionum inæqualitas non est essentialis & hausta à causa proxima efficiente; sed sequitur complexionem parentum, vel contemperationem eorum omnium quæ concurrunt ad formationem proles, cum astra v. g. benigniore aspectu aliquando suppleant defectum parentum, & aliquando ex maligno influxu deteriorerent prolem, quamuis parentes perfectam generandi dispositionem intrinsecam habeant.

Si dicatur, quod asinus cum equa producat mulum, qui est perfectior asino, & quod proinde non sit perfectionis æqualitas inter causam uniuocam & effectum. Resp. Nos loqui de causa totali, qualis non est asinus, qui producendo mulum est causa partialis cum equa: unde non est mirum, quod mulus asinum superet, trahendo quasdam perfectiones ab equa, quæ illi tribuit magnitudinem & generositatem; ubi habet ab asino duritiem carnis, laboris patientiam, & tarditatem complexionis.

Quoad causas æquiuocas, quæ plures & diuersos effectus possunt producere dissimiles à sua causa, in quo consistit ratio causæ æquocæ; Omnes fatentur causam æquiuocam primam, nempe Deum, esse nobiliorem quocumque effectu. Hoc tamen non est semper verum de causis æquiuocis secundis, quandoquidem sol, cælum, & astra, sunt causæ æquiuocæ plurium viuentium, quibus tamen cedunt in dignitate. Scotus verò in 1. dist. 3. quæst. 7. docet quamcumque causam efficientem æquiuocam esse nobiliorem suo effectu; quod idem admittit D. Thomas 1. p. quæst. 4. art. 2. Ratio huius est, quod causa, quæ potest producere plures effectus eiusdem vel diuersæ spe-

ciei, sit perfectior illà causà, quæ limitatur ad effectus vnius tantùm speciei, quia maior virtus designat causam esse perfectiorem; sed causa æquiuoca potest producere plures effectus eiusdem & diuersæ speciei, cum sol producat aurum, plantas, animalia; & intellectus eliciat cognitiones diuersorum obiectorum: ergo causa æquiuoca est nobilior suo effectù. *Quod si dicatur* solem producere viuientia, quæ ipso nobiliora sunt: *Responderi* potest cum D. Thoma 1. p. quest. 70. art. 3. ad 3. corpora cœlestia habere rationem instrumenti, quia sunt mouentia mota, quæ agunt in virtute causæ principalis, nempe in virtute Angeli cœlos mouentis, qui potest causare vitam: vnde quia cœlum cum Angelo motore est quid perfectiùs viuentibus; ideo causa æquiuoca semper dici debet præstantior effectù.

Quantùm denique ad causam instrumentalem, & exemplarem, illa aliquando est ignobilior effectù, vt patet de imagine, quæ penicillum superat, & de substantia, quæ est nobilior accidente, quod potest esse illius causa instrumentalis: cum calor radiorum solis producat aurum in visceribus terræ. *Aliquando etiam est nobilior*; vt pote quando Deus vtitur ministerio Angeli, tanquam instrumento, ad producendum aliquid in creatura inferioris ordinis. *Ista verò interdum etiam est effectù præstantior*, vt patet de diuina Essentia, quæ est exemplar creaturarum: & de homine, qui est exemplar suæ imaginis: interdum verò est æqualis perfectionis, quando scilicet imago iam antea facta, est exemplar alterius faciendæ.

CONCLUSIO TERTIA.

Quatuor causa distinguuntur realiter penes causalitatem suam, quia habent diueras realiter causalitates, & diuerfos influxus in eundem effectum: aliter enim materia influit in formam, quam sustentat, aliter forma influit in materiam, quam perficit & complet, aliter efficiens influit in compositum, cui dat esse coniungendo formam cum materia, aliter denique influit finis, mouendo causam efficientem vt agat: & sic causæ differunt realiter penes causalitatem & diuersum influendi modum. Non tamen differunt semper secundùm entitates suas, quoniam eadem res potest, sorti

tirirationem quadruplicis causæ, & sub diuerso respectu habere quatuor diuersas causalitates. Anima enim est causa formalis respectu corporis, quod informat; est causa efficiens respectu suarum operationum; est causa materialis respectu habituum intellectuum, quos recipit; est denique causa finalis respectu generationis & organisationis corporis, cum natura generet & organiset corpus humanum, ut recipiat animam.

Causa quæ distinguuntur realiter non secundum entitatem sed secundum causalitatem, ut diximus, necessariam habent connexionem in composito physico. Nunquam enim materia causare potest, nisi adsit forma quam sustentet; nunquam forma potest causare, nisi adsit materia quam informet: nunquam materia formam recipiet nisi disponatur ab efficiente, & nunquam agens seu efficiens inducet formam, nisi propter aliquem finem: & sic patet, quomodo in composito physico concurrunt simul quatuor causarum genera ad illud efficiendum. In substantiis autem spiritualibus, quales sunt Angeli & animæ rationales, non reperiuntur omnes illæ quatuor causæ; sed efficiens & finalis sufficiunt, nisi quis addere velit causam exemplarem, quæ ad efficientem reduci potest; quandoquidem agens intellectuale non est sufficienter dispositum ad operandum aliquid, nisi cognitionem & exemplar præbeat rei producendæ. Quando enim Deus producit animam rationalem, non indiget materiâ aut formâ, cum non sit compositum naturale utrumque exigens: sed sufficiunt potentia tanquam causa efficiens, bonitas tanquam causa finalis, & idea tanquam exemplaris causa.

CONCLUSIO QUARTA.

Quando Philosophi dicunt, quod causa sint sibi inuicem causa: hoc non debet intelligi, quod una causa possit causare alteram eiusdem ordinis, à qua fuit primò causata: naturaliter enim filius non potest producere patrem à quo genitus est; quia esset prior & posterior patre; attamen non repugnat, quod si causa destrueretur, nempe Pater, quin filius posset patrem reproducere, & hoc per potentiam D. Sed axioma præcedens Aristotelis intelligendum est de

causis *diuersi ordinis* sibi correspondentibus, quales sunt materia & forma, sicut efficiens & finalis; ita, quòd si comparetur materia ad formam, & finis ad efficiens, materia possit dici causa formæ, & forma causa materiæ; sicut efficiens potest dici causa finis, & finis causa efficientis: non quantum ad entitatem, sed quantum ad causalitatem. Sic autem materia est causa formæ, quatenus concurret ad eius eductionem, conseruationem, & sustentationem; forma verò dat *esse* materiæ, non primum, & entitatiuum, quandoquidem materia ex se est actus; sed secundum & determinatiuum, in quantum eam perficit & specificat. Similiter efficiens est causa finis efficiendæ, & finis est causa cur efficiens agat; sicuti patet de medico & medicina. Medicus enim mouetur à sanitate aegroti obtinenda per applicationem remediorum, & sanitas obtenta causatur efficienter à medico. Vnde nulla est in hoc repugnantia, quia sub eodem respectu eadem res non est simul causa & effectus, sed sub diuersis, sanitas enim vt *intenta* est causa actionis medici, & sanitas *obtentata* est effectus applicationis medicorum factæ à medico.

CONCLUSIO QUINTA.

Quamuis acerrimè disputetur inter Philosophos in assignanda ratione casualitatis; breuè tamen dicam *rationem formalem causæ seu causalitatem consistere præcisè in influxu, quo causæ tribuit esse effectui*. Causalitas enim consistit in hoc, quo posito res dicitur actu *causans*, & quo ablato res non amplius formaliter causat; sed posito solo influxu res intelligitur causans, quoniam *causare* est in effectum influere; & sublato influxu res non intelligitur amplius causare; ergo causalitas cuiuslibet causæ præcisè consistit in influxu. Quòd si Scotus 9. *Metaph. quest. 4.* & aliis in locis dicat causalitatem causæ esse relationem ipsius ad *causatum*; hoc intelligitur consecutiue, non verò formaliter. Priusquam enim ignis referatur ad calorem productum, debent existere ignis, & ille calor, quia relatio actualis supponit extrema actu existentia; sed calor non potest intelligi productus, quin antea causauerit & influxerit calorem: ergo relatio ignis est quid consequens ad influxum, & proinde causalitas non

non est relatio, sed fundamentum illius relationis, quam naturà præcedit.

Si quærat^{ur} autem *quid sit causalitas cuiuslibet causæ* Respondebitur *primò* causalitatem materiæ esse duplicem, respectu scilicet formæ quam recipit, & respectu compositi quod constituit. Prior causalitas seu influxus consistit in actuali sustentatione formæ, qua informatur; posterior verò sita est in constitutione partiali compositi. Respondebitur *secundò* causalitatem formæ esse adhuc duplicem; per respectum videlicet ad materiam quam informat, & ad compositum quod completè constituit: ex quo patet causas esse causas ad inuicem, quoniam materia ut sustentans est causa formæ ut sustentatæ; forma verò ut informans est causa materiæ ut informatæ: Respondebitur *tertiò* causalitatem efficientis consistere in actione; quoniam posita actione aliquid denominatur actu agens, & sublata actione non amplius agens denominatur & sic in actione sita est causalitas efficientis. Actio ergo non debet dici agentis effectus, quia actio propriè loquendo non fit; sed est medium, quo effectus procedit ab agente. Causa dicitur efficiens tripliciter, nempe per *respectum ad materiam*, ex qua educit formam: deinde per *respectum ad formam*, quam educit de potentia materiæ; ac denique *respectu compositi*, quod generat producendo unionem in partibus ex quibus coalescit. Respondebitur *quartò*, quòd causalitas finis consistat in motione reali morali, quam alij vocant *metaphoricam*. Illa motio, quæ finis mouet agens, dicitur *realis*, quia realiter excitat agens, ut agat. Et dicitur *moralis*, non verò *physica*, quia non est ita realis, ac si quis nauim traheret; sed est realis, quia apprehensio bonitatis eius excitat realiter agens ad operandum: unde agēs & finis dicuntur quidem *mouere*, sed cum hoc discrimine, quòd efficiens moueat actu reali Physico, & finis motu reali morali & Metaphorico.

Ex his quæ dicta sunt in quinque præcedentibus conclusionibus, possunt ut plurimum intelligi axiomata, quæ proponuntur à Philosophis in materia causarum. Primò enim quando dicitur *causa est prior suo effectui*; hoc debet explicari de causa & effectui entitatiuè sumptis, quo sensu entitas causæ præcedit tempore vel naturà effectum; non verò de causa & effectui sumptis formaliter, ut correlatiua sunt; tunc

enim sunt simul naturà, vt diximus. Secundò quando dicitur, *posita causà ponitur effectus, sublata causà tollitur effectus*; hoc intelligi debet de causa & effectu sumptis *formaliter*, vt sunt correlatiua; posito enim vno relatiuorum, ponitur aliud: non verò intelligitur de causa & effectu sumptis *entitatiuè*, & secundùm *summe* absolutum; quia potest esse homo sine effectu. Tertiò quando dicitur, *quod vnum & idem possit esse causa multorum, imò & contrariorum*; hoc intelligitur de causa *uniuersali & æquinocà*, v.g. de sole, qui eodem radio indurat lutum, & emollit ceram; de *materia*, quæ concurrit ad educationem & sustentationem formarum contrariarum; de *forma*, quæ efficit compositum simile & dissimile; & de *sine*, quæ allicit propter suam bonitatem ad amorem virtutis, & odium vitii. Aristoteles huius axiomatis exemplum tribuit. 2. *Physic. cap. 3.* de nauis gubernatore, qui præsens est causa salutis, & absens est causa submersionis.

Quartò cum dicitur, *quòd causæ sint sibi mutuo causæ*; hoc explicatum est in conclusione quartà præcedenti: quod scilicet hoc debeat intelligi de causis *diuersi ordinis* sibi inuicem correspondentibus, quales sunt materia & forma, sicut efficiens & finis: quæ ideo dicuntur causæ sibi correspondentes, quia forma *dare* esse materiæ, & materia recipit *esse* à forma, *dare* autem & *recipere* sibi *correspondent*: ob similem rationem efficiens & finis dicuntur causæ sibi correspondentes, quia *efficiens* est principium actionis, *finis* verò est actionis terminus; terminus autem & principium sibi adhuc correspondent. Diximus ergo quod causæ correspondentes mutuò se causent; sed sub diuerso respectu: quoniam, vt diximus, *sanitas intenta* est causa efficientis, & *sanitas obrenta* est effectus applicationis remediorum à medico, qui est causa efficiens sanitatis productæ. Similiter quando diximus quòd materia sit causa formæ, & forma causa materiæ; hoc adhuc intelligitur sub diuerso respectu, in quantum scilicet forma est causa materiæ vt informatæ, & materia sit causa formæ, vt sustentantis. Quintò cum dicitur quòd *causa sit nobilior effectu*; hoc axioma explicatum est in conclusione secunda huius questionis.

Porro quia questio præsens proponitur sub titulo

tulo de *Proprietatibus Causæ*, sciendum est quòd Philosophus 2. *Phys. cap. 3. & 5. Metaph. cap. 5.* tres tantum enumeret causarum proprietates, quòd idem admittit Doctor noster hunc locum commentans. Prima earum est, quòd *causæ possint esse sibi mutuo causæ*. Secunda, quòd *causæ sint causæ contrariorum secundum diversam dispositionem subiecti*. Tertia denique, quòd *causæ ut causæ, sint priores naturà & nobiliores suis effectibus*. Si autem nos ipsi ultra mentem Aristotelis & Scoti nostri agentes de *Proprietatibus causæ*, plurima adiunxerimus in præsentì quæstione; hoc idèò ita factum est, ut nihil non dictum remaneret eorum, quæ necessaria sunt ad perfectam causarum intelligentiam.

CAPUT II.

De Causis Materiali & Formali.

Cum materia & forma nedum sint principia rerum naturalium, ut diximus in Disputatione prima de *Principijs rerum naturalium, sectione prima*; sed etiam sint causæ compositi physici, ut habet in quæstione tertia capitis præcedentis: idèò postquam loquuti fuimus aliàs de materia & forma sub ratione principiorum, & multa attulerimus de qualibet; nunc agendum venit de iisdem materia & forma, quatenus sunt *causæ compositi physici*; quod fiet breuiter & succinctè, cum pauciora de illis dicere super sint.

QVÆSTIO PRIMA.

Quid sit Causa Materialis, & an influat in Compositum Naturale.

Sicut causæ in communi tria continent, nempe *entitatem absolutam causæ*, quæ est res ipsa quæ est & dicitur causæ; ut ignis, sol, & homo: deinde *virtutem causandi*, quæ est id quo causæ apta est causare & influere; ut virtus calefaciendi in igne, & potentia generandi in homine: ac denique *causalitatem ipsam*, quæ est id quo causæ in potentia fit causæ in actu; ut calefactio ignis, & generatio in homine: sic hæc tria reperiuntur in qualibet causæ, & proinde in causæ ma-

teriali, de qua hîc nobis est agendum. Entitas causę materialis est ipsa materia in suo *esse* absoluto considerata, virtus causandi materię est potentia quam habet materia sustentandi formam, & compositum cum ea efficiendi; causalitas verò actualis est actualis sustentatio formę. Loqui non intendimus de materia secundum suam entitatem absolutam considerata, hoc enim examinavimus agentes de principiis rerum naturalium. Nec de causalitate actuali materię, de qua dicetur in sequenti quęstione. Sed differere tantum meditamur de virtute & de potentia causandi materię, quęrentes scilicet an materia possit dici *causa materialis*, & quid *influat in compositum physicum*; sed prius dicere convenit, quid sit *causa materialis*.

CONCLUSIO PRIMA.

Causa materialis est id ex quo fit aliquid, cum *insit*. sic Arist. 2. *Phys. text.* 28. & 5. *Metaph. text.* 2. quam definitionem approbat Scotus in commentario talis loci. Quando autem dicitur, quod causa materialis sit id; subintelligitur principium: ita quod dicere sit *materiam esse principium ex quo aliquid fit*; ut vas ex auro, vel statua ex argento. Quando dicitur, *ex quo aliquid fit*; hoc distinguit materiam ab efficiente, quod est id à quo aliquid fit, à forma quę est id per quod aliquid fit talis naturę vel speciei, & à fine, quę est id propter quod fit aliquid: unde talis particula est differentia distinctiva causę materialis. Quando denique adiungitur, cum *insit*; hoc denotat materiam actu remanere in composito secundum propriam entitatem: & sic distinguitur materia à priuatione. Nosterque Fauentinus immeritò dicit quod materia & forma transeant in tertiam entitatem compositi.

CONCLUSIO SECUNDA.

Materia est causa materialis compositi, quia *influit partialiter in compositum*; ut docet Doctor in 2. *dist.* 12. *quęst.* 1. unde numeratur inter quatuor causarum genera, quę proprium influxum & causalitatem habent respectu compositi: *Influit*, inquam, *partialiter*, quandoquidem compositum non potest totaliter & in-

trinsecè causari à sola forma ; cum ideo dicatur *compositum*, quòd ex duabus partibus coalescat . Deinde causa materialis ex præcedenti conclusione definitur , *id ex quo aliquid fit cum insit* ; sed compositum fit *partialitè* ex materia, propter quam dicitur *compositum materiale*; ergo materia est causa materialis , primario respectu formæ, quam sustentat; & postea respectu compositi , quod constituit .

Obijcies . Materia non est actiua , quandoquidem dicitur pura potentia , ergo nec causa dici debet . *Resp.* distinguendo antecedens , materia non est actiua per influxum effectuum ; bene autem per influxum subiectivum , quatenus sustentat formam , quam recipit in se postquam educta est . *Dices* non posse credi , quòd materia tam imperfecta & infima possit causare tot composita eminentissimæ dignitatis, cuiusmodi sunt cæli : ergo circa ea se habet tantum passivè . *Resp.* hoc non debere videri absurdum illis , qui intuentur ex modico grano fegetes abundantissimas procreari , & ex minimo semine ingentes produci arbores .

Si quæratur autem *quanam sint munera materia* ; quatuor enumerari poterunt . *Concurrit enim passivè ad educationem formarum corruptibilium* , licèt non concurrat ad educationem animæ rationalis, quæ creatur immèdiatè à Deo . *Secundò formas corruptibiles eductas conservat* ; quandoquidem formæ corruptibiles dependent à materia in fieri & in conservari . *Tertiò eductam formam sibi unitam conservat , quantum ad informationem* ; quandoquidem nequit forma informare , nisi dependenter à materia , quæ est subiectum recipiens informationem . *Quartò denique simul cum forma constituit compositum* , ut liquet .

Q V Æ S T I O II.

Quid sit Causa Formalis , & an influat in Effectum .

CUM materia sit inchoatio compositi , quod perficitur à forma substantiali , per efficientis ministerium ; quod , cum agat ob aliquem finem intentum s in hoc apparet quatuor geuera intervenire in constitutione cuiuslibet compositi naturalis . Quia autem materia est prima causarum intrinsecarum quæ compo-

nunt : ideò agentes primò de causis intrinsecis , debuimus inchoare caput istud per explicationem causæ materialis, vt hic postea agamus de forma , quæ est alia pars intrinseca compositi .

CONCLUSIO PRIMA.

CAusa formalis est *principium per quod aliquid fit* , cum *insit* . Hæc definitio explicata manet ex quæstione præcedenti , & in ea *principium* tenet locum generis , per quod *aliquid fit* , facit differre causam formalem à materiali , ex qua fit aliquid . Cum *insit* verò denotat causam formalem , quæ remanet in subiecto , distinguì à causis extrinsecis , nempe ab efficiente & finali , quæ non remanent in composito , sed sunt extra illud . Nec dicatur formam nihil causare in materia , quia nullum *esse* illi communicat : cum materia de se habeat suam essentiam & existentiam : hoc enim falsum est , quia licet forma non det materiæ suum *esse primum* , nempe existentiam quam habet independentem à forma ; dat tamen illi *esse secundarium* , nempe esse perfectum & completum , cum materia sine forma sit incompleta & perfecta entitas . Adde quòd forma nedum influat in materiam suam *esse secundarium* , sed etiam influat in compositum quod constituit partialiter , materià tenente locum alterius partis : & iste influxus , seu causalitas , respectu compositi sufficit , vt in definitione præcedenti dixerimus formam causare , & esse principium per quod aliquid fit .

Non est ergo quòd dicant aliqui formam non esse causam respectu materiæ , circa quam nihil causat ; quia licet materia non causetur nec dependeat in suo *esse* à forma , in hoc tamen debet censi ab illa dependere , quòd materia non existat sine forma ; quoniam ita fuit à naturà constitutum , vt nunquam permaneret nec existeret materia , nisi esset iuncta formæ ; quod sufficit , vt forma dicatur causa materiæ , & circa illam suum influxum exercere censeatur .

CONCLUSIO SECUNDA

CAusa formalis influat propriè & realiter in effectum duplici modo , quatenus nimirum influat in
ma-

materiam quam informat, & in compositum quod constituit. Per respectum ad materiam, forma eius potentialitatem actuat, illius infirmitatem perficit, & eius indifferentiam determinat, ad certamque speciem redigit. Sic Arist. & Scotus 2. Phys. text. 28. & 5. Metaph. text. 2. Per respectum verò ad compositum, forma ipsum constituit essentialiter & intrinsecè, tanquam causa partialis illius; & ob hoc numeratur inter quatuor causarum genera: quia scilicet habet propriam causalitatem à cæteris distinctam. Quod autem causa formalis habeat propriam causalitatem circa compositum, ex illo patet sæpius decantato, forma dat esse rei; sed non potest dare esse rei, nisi habeat causalitatem circa rem, cum causa sit id quod dat esse alteri: ergo forma exercet causalitatem circa compositum. Compositum enim constituitur ex actu & potentia 2. de anima text. 7. sed per actum intelligitur forma, sicut per potentiam denotatur materia: ergo sicut materia habet causalitatem partialem circa compositum, sic & forma talem participat; ita quòd principalis ratio, cur forma dicatur causa, desumatur ex hoc, quòd concurrat ad effectum compositi; non verò ab eo quod influat in materiam.

Obijcies. Si causa formalis informet materiam & causet compositum, erit duplex causa; quia habebit duplicem effectum & causalitatem: ergo falsum est quòd antecedit formam informare materiam & efficere compositum. Resp. formam habere quidem duos effectus, non propterea tamen esse duplicem causam, licet sit duplex ratio causandi; cum videamus lucem simul illuminare & calefacere. Quantum ad hoc quòd iam dictum est, formam non causare materiam, quæ de se existit; non dat quidem materiam esse entitativum & intrinsecum, sed illi communicat esse perfectivum, specificativum, & extrinsecum.

Q V Æ S T I O III.

Quæ sit Causalitas Materia & Forma.

Sicut causa intelligi potest esse *potentialis*, quatenus effectum producere valet; vel *actualis*, prout actualiter influit in effectum: sic *causalitas*, per quam res formaliter denominatur causa, potest spectari, vel in
actu

actu primo, vel in actu secundo. *Causalitas in actu primo* est id per quod res, quæ actu non causat, potest reuerà causare, quatenus habet vim causatiuam, *causalitas in actu secundo* est ratio per quam res actu causare dicitur. Sicut hic consideramus causam, vt actualis est; sicut etiam præsens quæstio intelligitur de causalitate *actuali*; seu de ratione illa, per quam res dicitur causare *actu*: ad quam iam obiter respondimus post conclusionem quæstionis vltimæ capitis præcedentis.

CONCLUSIO.

Prin cipalis causalitas Materie & Formæ consistit in illo influxu, quo simul vnita concurrunt ad constituendum compositum, illa per modum subiecti actuati & informati, hæc per modum formæ actuantis & informantis. Dixi prin cipalis causalitas; quia materia habet causalitatem minùs principalem circa materiam quam sustentat; & formæ habet causalitatem circa materiam, quam actuat & informat, & sic minùs prin cipalis, causalitas materiæ respectu formæ consistit in hoc, quòd formam sustentet; sicut causalitas minùs prin cipalis formæ in eo sita est, quòd materiam actuat, informet, & faciat esse talis vel talis speciei. Causalitas verò prin cipalis materiæ & formæ attendi debet penes compositum, quod constituunt, quando simul vniuntur per actionem causæ efficientis, quæ formam educit de potentia materiæ, quam eductam illi coniungit; illa per modum potentiæ, ista per modum actus: vnde non immeritò diximus, quòd causalitas prin cipalis materiæ & formæ sit influxus ille, per quem simul vnitæ concurrunt ad constituendum compositum; prior per modum subiecti actuati, posterior verò per modum formæ actuantis.

Probatur conclusio præcedens rursus ex autoritate Philosophi 1. Phys. cap. 19. dicentis *Materiam esse id ex quo insit aliquid per se efficitur*; sed ex materia per se efficitur compositum, tanquam ex parte intrinseca actuata per formam, quæ ambo vnitæ compositum efficiunt: ergo causalitas materiæ consistit in influxu illo, quo concurrat cum forma ad constituendum compositum; quod idem dicendum est de forma concurrente vicissim ad efficiendum compositum cum materia.

Tum

Tum per rationem, quia materia & forma verè & propriè sunt causæ *physicæ*; sed causæ *physicæ* dicuntur tales propter influxum realem & physicum quem tribuunt effectui, quandoquidem *causa est id quod influit esse in aliud*; ergo causalitas materiæ & formæ est *influxus*, quo simul vnite concurrunt ad constitutionem compositi; materia videlicet per modum subiecti actuati, & forma per modum formæ actuantis & perficientis.

Obijcies 1. Per *causalitatem* intelligitur illud per quod res dicitur *actu* causare; sed vnio materiæ & formæ est id quo materia & forma efficiunt compositum; quandoquidem posita vnione inter vtramque, resultat compositum, & ea sublata compositum destruitur: ergo causalitas materiæ & formæ consistit in vnione vtriusque, non verò in influxu eorum. *Resp.* negando minorem, & ad rationem eius dico quod posita vnione efficiatur reuerà compositum, & ea sublata illud destruat: non quod vnio sit effectus materiæ & formæ, sed tantum conditio extrinseca, sine qua non fieret totum; vt innuit Scotus in 3. *dist.* 2. *quest.* 2. Conditio autem extrinseca non est causalitas materiæ & formæ, aliàs combustio ligni deberet attribui approximationi ignis ad lignum; sine qua non sequeretur combustio; quod tamen falsum est. Si ergo *dicatur* causalitas consistit in eo, quo posito, res dicitur *causare*, & quo sublato, *causare* non censetur; hoc absolutè negandum est, vt patet de exemplo approximationis allatæ. Imò vt aliquid censeatur causalitas propriè sumpta debet esse quid intrinsecè influens in effectum, quod dici nequit de vnione, quæ est extrinseca.

Obijcies 2. Ex Scoto causalitas est relatio causæ ad causatum 9. *Metaph. quest.* 4. quia est habitudo ad aliud, nempe ad effectum; quæ habitudo fundatur super actionem: ergo causalitas non consistit in influxu, qui est quid absolutum. *Resp.* causalitatem causæ non esse relationem, nisi *consecutiue*; vt diximus in 5. *concl.* *quest.* vltimæ cap. præcedentis: & sic intelligi debet Doctor noster præobiectus. Quod, inquam, *causalitas non sit relatio*, patet ex hoc; quod primò debeat considerari entitas causæ, deinde potentia causandi, & postea causalitas seu causatio actualis, quæ omnia sunt absoluta: ex quibus sequitur relatio cau-
sa-

sati ad causam : quod euidenter demonstrat causalitatem non esse relationem , nisi fundamentaliter , quatenus est fundamentum , ex quo resurgit relatio .

Q V Æ S T I O IV.

An Deus possit supplere Causalitatem Causarum Materialis , & Formalis .

EX hoc quod Deus supplere valeat causalitatem causæ efficientis , quia producere potest se solo quidquid causæ secundæ producere valent , & impedire effectum cuiuscumque effectus secundarij , quoniam in fornace Babylonica fecit , quod ignis non combureret pueros suæ actiuitati applicatos ; posset forsan quis dubitare , num etiam posset supplere causalitatem & influxum causarum materialis & formalis : sed ad hoc respondet negatiuè Scotus in 1. dist. 2. quæst. 2. contra Fonsicam 5. Metaph. cap. 2. quæst. 8.

C O N C L U S I O .

Deus non potest supplere causam materiale & formalem . Quia vel hoc sic intelligeretur , quod Deus posset producere compositum absque materia & forma v. g. hominem sine corpore & anima , vel quod in composito ipsemet Deus posset obire munera materie & forme ; sed neutrum fieri potest : ergo . Probat *prima* pars minoris . Quia si Deus faceret hominem sine corpore & anima , tale compositum esset homo , vt supponitur ; & non esset homo , quia careret partibus essentialibus hominis , quod repugnat . Probat *secunda* pars minoris , quia Deus est causa perfectè causans ; sed materia & forma sunt causæ imperfectæ cum materia perficiatur à forma , & forma sustineatur per materiam , quæ ambo imperfectionem redolent : ergo Deus non potest obire munia causæ materialis & formalis , quibus funguntur ad se inuicem . Non potest etiam Deus supplere causalitatem materie & forme in ordine ad compositum . Quia materia & forma compositum efficiendo ingrediuntur eius essentiam , suntque partes essentielles eius , vt constat de corpore & anima in homine , sed Deus non potest esse de essentia , nec pars essentialis compositi , aliàs foret imperfectus , cum

totum sit perfectius parte; ergo Deus non potest supplere causalitatem materiæ, & formæ in ordine ad compositum, ut innuit Scotus præcitatus, & in 4. dist. 12. q. 1.

Obiicies. Deus potest facere sine causa secunda quod potest facere cum illa: ergo potest supplere vices materiæ, & formæ, quæ sunt causæ secundæ. *Resp.* antecedens esse verum de causa *efficienti*, quam Deus supplere potest, cum ipse possit facere hominem sine concursu solis, & hominis generantis; non verò de causis *materiali*, & *formali*, quæ imperfectionem inuoluunt. Licet ergo Deus possit hoc sensu supplere materiam, & formam, quatenus ex se solo potest producere compositum in genere causæ efficientis, ipsum producendo sine subiecto præexistenti; non tamen potest se habere per modum causæ materialis, & formalis, ob imperfectiones in illis repectas, quas præallegauimus in probatione conclusionis. Potest etiam Deus per modum causæ efficientis supplere effectum expulsiuū formæ, quæ expellit formam præexistentem in composito, ut se introducat in illud, quoniam Deus talem formam se sola destruere potest: non verò hoc valet facere per modum causæ formalis.

Obiicies 2. Deus absque imperfectione vlla potest obire causalitatem materiæ, & formæ, si possit sustentare formam sine materia, & si possit conseruare materiam sine forma, quæ sunt causalitates vtriusque; sed vtrumque potest Deus sine imperfectione, ut probauimus suo loco dicentes, materiam posse diuinitus existere sine forma, & formam sine materia: ergo Deus potest supplere causalitatem materiæ, & formæ. *Resp.* ad minorem Deum posse vtrumque facere per modum causæ *efficientis*, efficienter concurrente ut materia spoliatur omni forma, & forma subsistat sine materia, cum accidentia Eucharistiæ existant sine subiecto; neutrum tamen illorum facere potest per modum causæ *materialis* aut *formalis*, ob imperfectiones in istis causis repectas: quia scilicet, id quod est materia perficitur à forma, & id quod est forma sustentatur à materia, quod inuoluit imperfectionem cuius Deus est incapax. Si Verbum D. dicatur assumpsisse humanitatem, quæ fuit illi forma: hoc non est factum per informationem intrinsecam, sed per solam terminationem, quæ nihil posuit reale in Verbo; ut diximus agendo de Incarnatione Verbi D.

CAPVT III.

De Causa Efficiente.

Explicatis causis intrinsecis naturalis compositi, quæ sunt materia, & forma, quarum exposuimus causalitates; nunc procedendum est ad examen causarum extrinsecarum, quæ sunt causæ *efficientis*, & *finalis*: cum hoc ordine, quod præagamus de efficiente, ante finalem; quia *in ordine executionis prius efficiens debet agere, quam obtineatur finis*. Plura autem examinauda veniunt de causa efficiente, quia sub nomine, & ratione causæ efficientis comprehenduntur *causa prima*, & *secunda*, *causa principalis*, & *instrumentalis*; imò ad efficientem reducitur pariter *exemplaris*: vnde de his omnibus dicendum est.

QVÆSTIO PRIMA.

Quid, & Quotuplex sit Causa Efficiens.

Causam efficientem dari, non est qui negare valeat; quoniam talis causæ effectivæ existentiam euidenter prædicant omnia corpora cœlestia, & sublunaria; quæ, cum se producere non potuerint, tenentur agnoscere causam sui effectiuam. *Deinde materia, & forma, cuius existentias vidimus, nobis sufficienter suadent existentiam causæ efficientis; cum ex illis non possit resultare compositum sine interuentu causæ efficientis. Tandem cum omnes creaturæ vna voce de Deo dicant ipse fecit nos, & non ipsi nos; nullus audebit negare existentiam causæ efficientis, nisi velit inficiari existentiam Dei, quod nullus dixerit, nisi insipiens, & adhuc in corde suo, non verò palam, nè acriter reprehenderetur ab insensibilibioribus, quæ primi agentis & efficientis existentiam proclamant. Posita ergo causæ efficientis existentia, ab ipsius definitione incipiendum est.*

CONCLUSIO PRIMA.

Causa efficiens est primum principium unde oritur motus, & quies, Sic Arist. 2. Phys. cap. 3. quam definitionem

nem explicat Scotus in *Comm. 5. Metaph.* dicens quoddam causa efficiens sit principium primum *per se*, & extrinsecum, vnde oritur motus, & quies. Dicitur primum principium; & illa particula tenet locum generis, in quo conuenit efficiens cum materia, & forma. Dicitur 2. primum; non quidem in ordine intentionis, quia in tali ordine finis præcedit efficiens, quod non agit nisi à fine motum, & in ordine executionis, quandoquidem agens prius efficit, quam finis obtineatur. Dicitur 3. *per se*, vt excludantur causæ *per accidens*, quæ propriè non debent dici efficiens; quia non influunt per se in effectus. Dicitur 4. *extrinsecum*, in quo causa efficiens secernitur à natura, quæ est quidem principium primum, & per se motus, & quietis, sed internum; vbi efficiens debet esse principium externum. Dicitur 5. *vnde oritur*, quod efficientem distinguit ab alijs causis; quoniam materia est *id ex quo*; forma est *id per quod*; finis est *id propter quod*, & efficiens est *id vnde*, seu *id à quo*. Additur denique *motus, & quies*, id est, vnde oriuntur motus physici, qui sunt generatio, corruptio, augmentatio, diminutio, alteratio, & motus localis.

Obijciens. Definitio nem Aristotelis non esse legitimam quia conuenit causæ finali; quandoquidem finis est primum principium vnde oritur motus, & quies, cum agens non agat, nisi quatenus à fine mouetur. *Resp.* à causa finali non incipere motum propriè, quia finis solum excitat agens ad incipiendum motum; vnde sicut pecunia oblata pictori non censetur inchoare picturam, quia nec penicillos mouet, nec colores applicat, nec picturam format, sed tantum excitat pictorem, vt hæc omnia faciat: sic etiam finis non est id à quo incipit motus, sed id quod excitat efficiens, vt incipiat motum seu actionem. Deinde in hoc distinguuntur efficiens, & finis, quod motus incipiat ab efficiente secundum suum esse reale existenti, & à fine existenti tantum secundum esse obiectiuium, & intentionale; quia finis non existit realiter, quando agens incipit actionem, sed tantum obiectiue, & intentionaliter, quatenus cognoscitur.

Obijciens 2. Præallata definitio conuenit etiam naturæ, materiæ, & Deo, quæ non sunt causæ efficiens: ergo non est legitima. *Resp.* negando antecedens. Licet enim natura sit principium internum motus, quia tamen efficiens, & principium externum, & natura prin-

principium internum, ideò definitio non competit vtrique. Licet etiam materia concurrat ad effectiorem compositi, quia tamen est quid intrinsecum in composito manens, & efficiens est quid extrinsecum manens extra compositum, proinde materia non est efficiens. Licet denique præcedens definitio conveniat Deo, non minùs est legitima; quia nil vetat dicere *Deum esse, & dici causam efficientem respectu creaturarum quas efficit*: non quidem per generationem, sed per creationem, quæ creatio potest dici mutatio, saltem improprie, quia est *transitus de non esse ad esse rei creatæ*. Non propterea tamen dici debet, quòd solus Deus sit causa efficiens, quia ab illo solo incipiunt omnes motus, vnde dicitur *primus motor*: quando enim dicitur *quod efficiens sit illud à quo motus primò incipit*: per hoc non excluditur causalitas Dei; sed influxus alterius causæ secundæ diuersi generis, nempe materia, forma, & finis.

CONCLUSIO SECUNDA

QUOT modis diuissimus causam in genere quest. 1. cap. 1. huiusce sectionis, tot, & iisdem distribui potest causa efficiens in particulari: vnde causa efficiens secari potest primò in *uniuersalem, & particularem*. Secundò in *primam, & secundam*. 3. In *uniocam, & equi-ocam*, 4. In *partialem, & totalem*, siue sit subordinans, aut subordinata, 5. In *principalem, & instrumentariam*. 6. In *propriam, & in impropriam*, 7. In *primam simpliciter, seu absolutè, & in secundam*. Quibus addi possunt *proxima, & remota, mediata, & immediata, naturalis, & supernaturalis, ordinaria, & extraordinaria, libera, & necessaria, moralis, & physica*. Quorum omnium causarum habentur explicationes loco præcitato. Imò præter illas omnes causas, quæ *efficientes* dici debent, potest vterius dici; quòd causa efficiens sit adhuc triplex. Nempe *conseruans, & producens*, vt aer; sine quo non possumus viuere, licet *esse* non præbeat: *non conseruans sed producens*, vt homo respectu alterius hominis, quem producit; non tamen conseruat, ac denique *conseruans, & producens simul*, vt Deus, & sol, qui concurrunt ad conseruationem rei sicuti antea concursum dederunt ad illius generationem.

Si quærat^{ur} autem *utrum ratio causa efficientis con-*

veniat uniuocè omnibus causis supra memoratis. Responderi debet affirmatiuè iuxta Philosophum, qui hoc probat 2. *Phys. cap. 3. & 5. Metaph. cap. 2.* Ratio huius est, quia omnes illæ causæ sibi vendicant nomen causæ efficientis, sicut, & naturam; quandoquidem causæ uniuersales, & particulares, primæ, & secundæ, uniuocæ, & æquiocæ, principales & instrumentales, omnesque illæ, quas recensuimus, influunt efficienter in effectum; & sunt primum principium extrinsecum, ex quo per se oritur effectus, seu procedit mutatio; in quo consistit formalis ratio causæ efficientis.

Q V Æ S T I O II.

In quo consistat Causalitas Causa Efficientis, & quodnam sit Principium agendi in Efficiente.

NE longius protrahatur materia, vtramque difficultatem sub eodem titulo proponimus; cum in conclusione quinta capitis primi iam explicauerimus causalitates omnium causarum in genere, quod de causa materiali, & formali resumpsimus in præcedenti: & pro secunda quæstione facile sit dictu, quodnam sit principium agendi causa efficientis.

C O N C L U S I O P R I M A.

Causalitas causa efficientis in actu secundo est actio illius. Illud enim censetur ratio formalis causæ efficientis, seu illius causalitas, à quo formaliter dicitur causare actu effectum, etiam sublati cuiuscunque alijs; sed posita sola actione, agens denominatur agens, ceteris quibuscunque ablatis, & sublata actione non amplius dicitur agens; ergo causalitas causæ efficientis consistit in actione. Quod, actione posita, agens denominetur, & verè sit agens, & quod ablata actione, non amplius possit agens denominari. Patet ex hoc, quod actio sit forma essentialiter constituens agens: & sic posita actione agens constituitur, & omisa actione agens esse desinit; proindeque euidenter colligitur, quod causalitas efficientis in actu secundo consistat in actione, seu in effectione, aut in efficientia, quæ est abstractum formaliter constituens concretum.

Obiicies. Si actio esset causalitas efficientis, deberet esse

esse in causa cuius est causalitas, quoniam à causalitate res dicitur causa; sed actio non est in causa, benè autem in effectu: ergo causalitas efficientis non est actio. *Resp.* maiorem esse veram, quia non posset causalitas denominare causam, nisi esset in causa, sicut albedo non potest denominare parietem album, nisi in illo pariete existat; sed minor negari debet, quia, ut diximus aliàs in Logica, actio est in agente, sicut passio in patiente: Cuius ratio sumitur ex hoc, quòd actio sit relatio agentis ad passum; & sic debet esse in agente: quòd quidem omnis relatio est in fundamento, quòd refert. Ad hoc quòd dicunt contra nostram assertionem Soncinas, Iauellus, & Fonseca, actionem esse effectum causæ efficientis: & sic non posse dici ipsius causalitatem, seu rationem formalem: quoniam actio realiter distinguitur ab agente, & ratio formalis identificatur cum re cuius est formalitas: *Respondendum* est actionem non esse propriè effectum agentis, sed potius viam & medium, quo agens producit suum effectum; quæ actio impropriè tantum debet dici *effectus quo*, non *vero effectus qui*, seu terminus totalis agentis.

CONCLUSIO SECUNDA.

Prinzipium agendi causæ efficientis duplex est, nempe principium *quod*, & principium *quo*. Principium *quod* seu materiale, est aliquando suppositum agens, & aliquando natura singularis, per se existens completè, quæ producit aliquid. Quando v.g. Petrus aliquid producit, tunc principium *quod* actionis Petri est ipsius Petri suppositum: vnde Aristoteles dicit *quòd actiões sint suppositorum*. Quando autem dicitur de humanitate Christi, quòd meruerit apud Deum, talis actio meritoria non procedit à supposito Christi, quòd est Verbum D. merendi incapax; quandoquidem mereri apud aliquem dicit inferioritatem in merente, quæ nulla esse potest in Verbo D. vnde principium *quod* meriti Christi non fuit suppositum ipsius Christi, sed natura humana singularis, quæ eliciebat actiones humanas: & in hoc falsum est quòd Aristoteles dicit *actiões esse suppositorum*; nisi dicatur quòd nomine *suppositi* intelligatur natura singularis per se existens, ut explicant plures.

Principium *quo*, seu formale, est illud mediante quo

quo principium *quod* agit, & operatur; & sic, quando dicitur, *Petrus intelligit*, principium *quod* materiale est Petrus, principium *verò quo*, est intellectus Petri, per quem producit intellectionem. Principium *quo* potest ulterius dici esse duplex, nempe proximum, & remotum. Principium *quo remotum* est forma substantialis rei, principium autem *proximum quo* est qualitas quædam actiua, vel potentia, per quam agens immediatè agit. Sic v.g. quando ignis calefacit aquam, principium *quo remotum* calefactionis est forma substantialis ignis, quia ab illa fluit calor, & à calore calefactio, principium *verò quo proximum* est calor ignis, à quo immediatè oritur calefactio. Quando etiam *Petrus intelligit*, forma substantialis Petri quæ est anima rationalis dicitur esse principium *quo remotum* intellectionis, quoniam ab anima rationali prodit intellectus; principium *verò quo proximum* est intellectus immediatè eliciens intellectionem.

QVÆSTIO III.

De Causa prima Efficiente, ut est Creans.

POST explicationem eorum, quæ concernunt causam efficientem in genere, dicendum est de causis efficientibus in particulari, & quia nobilior diuisio causæ efficientis est in causam *primam*, & *secundam*, prius sermo institui debet de illa, quàm de ista. Quia autem per *causam primam* intelligitur Deus, à quo omnia agentia creata dependent, & emendicant suam agendi virtutem; Deusque possit considerari, ut creans omnia, ut conseruans singulas creaturas, & ut concurrens cum omnibus, & singulis agentibus creatis; in hac quæstione differere meditamur de *Deo*, seu de *prima causa*, ut creans est; quærendo scilicet, *an Deus possit creare, an de facto creauerit, & adhuc creet, & an potentia creandi possit deuolui creatura.*

CONCLUSIO PRIMA.

DEUM creare posse docet Fides Catholica; innuens Gen. 1. Deum in principio creasse cælum, & terram, contra veteres Philosophos, qui creationis possibilitatem negantes volebant ex nihilo nihil fieri; ita quòd
licèt

licet non dixerint mundum esse ab æterno, assueverunt tamen materiam aliquam informem, quam appellabant *chaos*, Deo fuisse coeternam, & ex illa indigesta mole formas omnium fuisse eductas, compositaque naturalia fuisse constituta in tempore. Quantum ad Aristotelem, mens eius de rerum creatione, ita videtur dubia, ut aliquando videatur illam negare, docendo mundum extitisse ab æterno; interdum verò illam astruere, utpote docens 12. *Metaph. text. 38.* cælum & terram pendere à Deo, quem 8. *lib. Phys.* asserit esse rerum omnium principium; à quo tanquam à primo motore omnia entium genera acceperunt existentiam, quam antea non habebant, quod est admittere evidenter creationem.

Quòd autem creatio sit possibilis Deo, potest evidenter ex hoc colligi; quòd ex Scoto in 2. *dist. 1. quest. 2.* creatio sit productio rei ex nihilo subiecti & termini; ita quòd nihil eius quod producitur præexistiterit; sed talis productio est Deo possibilis: ergo sub eius potestate residet creatio. Probatur minor. Quanto agens est perfectius, eo paucioribus indiget in agendo, & minùs dependet à materia in quam agit; unde in hoc differunt agens artificiale, naturale, & supernaturale, quòd *agens artificiale* exigit compositum naturale, in quod artem suam applicet, ut artificiatum eruat; *agens naturale* exigit saltem unam partem compositi naturalis, nimirum materiam, è cuius potentia educat formam: *agens verò supernaturale*, quod est infinitæ virtutis, ita independenter ab alia agat, ut neque exigit compositum, in quod possit agere; neque materiam ex qua agat, sed ex se producere valeat omnia entium genera, iuxta determinationem suæ voluntatis, quæ est omnium prima causa, sed nemo dubitat, quin Deus sit agens supernaturale infinitæ virtutis: ergo omnes admittere debent, quòd *Deus creare possit*.

Deinde primum & supremum efficiens illud est, quod immediate & quocumque alio circumscripto potest efficere aliquid, sed Deus est prima causa & supremum efficiens, ut liquet: ergo independenter à quocumque alio potest producere quodcumque voluerit, etiamsi nihil rei producendæ præexistat, quod est *creare*. Illud enim quo Deus indigeret ad aliquid producendum; vel esset Deus, vel creatura; si autem esset *Deus*, non

non indigeret aliquo distincto à se ; si verò non esset *Deus*, *Deus* non esset agens supremum & independens, quandoquidem non posset egere sine ope alterius; ergo *Deus* se solo immediatè & sine subiecto agere potest. Tandem prima causa debet habere modum causandi sibi soli conuenientem, qui ad alteram non pertineat, aliàs essent plures primæ causæ, sed agens naturale producit ex præsupposito subiecto: ergo vt agens supernaturale habeat modum agendi sibi proprium, debet posse agere sine subiecto; quod est habere vim creatiuam.

Obijcies. Sicut sola potentia passiuæ non sufficit absque actiua ad producendum aliquid, sic potentia actiua, qualiscumque sit, non sufficit sola ad aliquid producendum: ergo *Deus* sine materia & subiecto non poterit aliquid producere, nec proinde creare aliquid. Resp. negando paritatem. Idè enim potentia passiuæ non sufficit ad productionem effectus, quia imperfecta est; & sic requirit efficiens, vt reducatur ad actum: efficiens verò, si sit infinitæ virtutis, vt *Deus*, nihil aliud requirit, proindeque sine materia producere potest effectum, quod est creare. Si dicat axioma philosophicum *ex nihilo nihil fieri*; hoc verum est respectu potentie finitæ & naturalis, non verò respectu Dei, qui cum habeat potentiam infinitam, non indiget subiecto in quod agat.

CONCLUSIO SECVNDA.

DE facto *Deus* creauit ex Gen. 1. In principio *Deus* creauit cælum & terram Eccles. 18. Qui vinit in æternum creauit omnia simul. Et 2. Machab. 7. Vbi Machabæorum mater suum filium adolescentiorem excitans ad mortem subeundam, dicebat illi, Peto nate, vt aspicias cælum & terram, & ad omnia, quæ in illo sunt, & intelligas, quia ex nihilo fecit illa *Deus*, & hominum genus. Hæc & similia Scripturæ verba euidenter demonstrant Deum nedum habere potentiam creandi, sed reuerà creasse nobiliores mundi partes, quas produxit ex nihilo materia seu ex nullo præsupposito subiecto, proindeque duplex asseruari potest creatio, actiua scilicet & passiuæ, quarum prima est actio quæ efficiens producit aliquid ex nihilo; posterior verò est ipsamet creatura ex nihilo producta.

Philos. R. P. Boywin To. II. Phys. Pars I. I Cre2-

Creatio, inquam, *actiua* est sola Dei volitio efficax, quæ vult creaturam ex nihilo nunc fieri, quæ antea non erat. Creatio verò *passiua* nihil aliud est quàm ipsamet creatura ex nihilo producta, dicens relationem realem dependentiæ ad Deum creatorem. Quòd si dicatur creationem non posse dici Dei volitionem; quia volitio Dei est ab æterno, & creaturæ non existunt nisi in tempore: *Responderi* debet cum Scoto in 2. dist. 1. *quæst.* 2. quòd volitio Dei sit reuerà ab æterno, quia est actio immanens; quoniam tamen non voluit creaturas pro æterno, sed pro tali vel pro tali differentia temporis; hoc non impedit quin creaturæ sint tantùm in tempore, quando scilicet aduenit illa temporis differentia, pro qua Deus voluit creaturas esse futuras.

Si quis instet *dicens* terminum actionis debere esse pro illo instanti, quo intelligitur esse actio; sicque volitionem Dei non potuisse esse ab æterno, & creaturas in tempore. *Resp.* hoc verum fore, si actio actualis & præsens connotaret terminum actualem & præsentem, non autem, si connotet tantùm terminum futurum: ut in proposito. Quando enim Deus ab æterno voluit creaturas produci, non voluit illas produci ab æterno; sed pro futuro tempore: vnde nil mirum, si volitio creaturarum fuerit ab æterno, & ipsæ creaturæ tantummodò in tempore existant. Si enim propter meum solum *velle* hodiernum, cras sol oriretur, volitio mea esset præsens, & effectus illius esset futurus; & sic per hoc exemplum patet, quòd nil vetet dicere volitionem Dei circa creaturas futuras esse ab æterno, & creaturas fore in tempore; quia scilicet actio illa D. voluntatis non connotat terminum actualiter præsentem, sed futurum.

CONCLUSIO TERTIA.

Nusquam causa secunda creauit, aut creare potuit, ut causa principalis, vel ut causa instrumentalis physica. Prima pars harum trium est Scoti & omnium Catholicorum contra Auicennam, qui 9. *Metaph.* cap. 4. existimat in rerum creatione esse catenam auream, primamque intelligenciam creasse secundam, secundam tertiam, & sic de cæteris, vsque ad vltimam; quæ condidit totam vniuersalitatis machinam.

Huic

Huic errori subscribit Plato in Timæo , vbi Aug. referente 12. Cinit. Dei cap. 26. ait Deos minores, seu Angelos condidisse corpora animalium . Istis adstipulantur Cerintiani existimantes pariter ab Angelis fabricatum fuisse vniuersum orbem . Contrarium autem firmiter asserit Fides Catholica, cum creatio omnium attribuitur soli Deo , Gen. 1. *In principio Deus &c.* & postea , *septima die requieuit ab omni opere quod patrarat.* Eccli. 18. *Qui vinit in aeternum creauit omnia simul.* Ad Hebr. 3. *Qui omnia creauit Deus est &c.* In confirmationem huiusce veritatis Concilium Oecumenicum Lateranense cap. *firmiter de Summ.* Triu-determinauit , *Deum de nihilo condidisse utramque creaturam , spiritualem & corporalem , angelicam & mundanam.* Quod idem expressè habetur in Symb. Nic. *Factorem cæli, & terra , visibilium omnium & inuisibilium.* Quod antea dixerat B. Ioan. cap. 1. *Omnia per ipsum facta sunt est , sine ipso factum est nihil.* Quantum ad rationem assertionis nostræ , afferetur in probationibus sequentibus , dicendo enim quod nulla causa secunda creare possit , nequidem ut causa instrumentalis physica : hoc satis probat , nullam causam secundam creasse aliquando .

Probatur secunda pars quod nulla causa secunda creare potuerit , ut causa principalis . Hanc tuerentur D. Thomas 1. p. *quest. 45. art. 5.* Scotus in 4. *dist. 2. quest. 1.* Ochamus, Aureolus, Suares , & plurimi, contra Maiorem, Durandum, Gabrielem, Raconium cum alijs numero tamen paucioribus. Primò quia Patres Ecclesiæ , D. Cyrillus Alexandrinus *lib. 2. in Iulianum* , D. Athan. *serm. 3. contra Arianos* , & præ cæteris ob breuitatem omittendis , August. inconcussum tenent Deum solum operari posse ut creatorem ; vnde in particulari Aug. *lib. 5. de Gen. ad Litt. cap. 15.* ait, *Creare naturam tam nullus potest ; quàm nec seipsum.* Nec sic Patres explicari debent , quod negauerint tantum creaturam posse creare virtute propria ; licet hoc facere potuerit per virtutem sibi à Deo concessam . Talem enim explicationem esse euidenter contra mentem Patrum colligitur ex hoc , quod sancti Patres agerent contra Arianos , & vellent probare contra illos , quod Verbum D. esset Deus , quoniam omnia creauerat ; sed eorum argumenta fuissent inualida , si virtus creatrix posset communicari à Deo puræ creatu-

rz: ergo intelligendi sunt Patres *absolutè*, quòd scilicet voluerint virtutem creandi non esse communicabilem creaturæ, siue factæ, siue factibili. Quantum ad illos, qui volunt Aug. intelligi de tota natura creabili, seu de potentia creandi totam naturam, quam negant posse communicari puræ creaturæ; hoc neque dici potest: quia si Deus posset dare creaturæ alicuius potentiam creandi aliquam naturam particularem, posset æquè dare facultatem creandi omnem naturam creabilem; cùm enim tota natura creabilis non sit inñita, posset tota produci, si aliqua produci posset per virtutem creandi diuinitùs delegatam creaturæ: & sic rationes Patrum non vrgerent Arianos, qui potuissent respondere *Verbum non esse Deum, estò creauerit omnia*; quia scilicet Deus posset conferre vim creatiuam puræ creaturæ. Nè ergo inualidentur rationes Patrum contra Arianos, dicendum est quòd ipsi Patres voluerint Deum non potuisse communicare potentiam creandi vlli creaturæ, quandoquidem talis virtus omnipotentiam redolet soli Deo propriam.

Quantum ad rationes huiusce veritatis confirmatiuas: Ratio D. Thomæ est, quòd effectus vniuersalissimus debeat tantum referri ad causam vniuersalissimam, qui est Deus, sed creatio, quæ respicit ens, vt ens est, est effectus vniuersalissimus: ergo debet ita spectare ad solum Deum, vt creaturæ communicari non valeat. Nec debet ad hoc *responderi*, quòd effectus creationis non sit vniuersalissimus, respectu aliquorum entium in particulari, sed tantum respectu totius entis creabilis. Hoc, inquam, responderi non debet, quia eadem ratio ita vrget pro vno ente ac pro omnibus, vt prædictum est; & sic, si potentia creatiua non possit delegari creaturæ pro omni ente creabili, vt fatentur aduersarij: non poterit etiam dari pro ente aliquo in particulari: quia repugnantia illa non procedit ex multiplicitate entium creabilium, sed ex modo producendi, qui est ex nihilo, & qui est absolutè impossibilis creaturæ. Ratio Scoti est hæc: quòd si creatio posset competere creaturæ, daretur vel materiali, vel spirituali; sed neutri competere potest: ergo non potest, inquit, creatura materialis recipere potentiam creandi, quia vel daretur materiæ, aut formæ, aut composito; non materiæ, quæ,

quæ purè passiva est; non formæ, quæ potest tantum producere formam sibi similem; nec etiam composito, quodd cum constet materia & forma, eandem planè rationem agendi participat. Quodd etiam potentia creativa non possit deolui creaturæ spiritali, ex hoc probat Doctor. Quodd Angelus non possit intelligi producere, nisi per naturam, aut per intellectionem; sed agens intellectuale non potest producere per naturam, aliàs non posset dici, quodd plures essent personæ in DD. quàm tres, vna scilicet, quæ produceretur per naturam D. Non potest etiam Angelus producere, nec creare per intellectionem & volitionem, quia cum sint accidentia, & accidens non possit productionem substantiæ attingere; proinde creatura spiritalis non potest virtutem creandi recipere à Deo.

His addi potest, quodd nulla creatura, siue facta, siue factibilis, sit capax recipiendi potentiam infinitam, *quidquid enim recipitur ad modum recipientis recipitur*, & creatura quælibet finita est; sed virtus creandi est infinita, quoniam est ab alio independens, tanquam à subiecto: ergo talis virtus delegari non potest creaturæ. Si dicatur talem protunc potentiam creandi non esse independentem absolute, quia supponitur illam dari à Deo; hoc non impedit quin diceretur infinita & independens, non quidem ratione principij, quandoquidem ab extrinseco procederet, nempe à Deo; sed entitatiuè remaneret infinita & in modo producendi: quia sicut non ens infinite distat ab ente, quandoquidem *negatio totum destruit, & nihil est entis in non ente*; idèd requiritur potentia infinita ad creandum. Quando autem respondent aduersarij non ens non differre infinite ab ente, quia differt magis negatio entis ab ente supremo, quàm ab ente iussimo; quodd est contra rationem infiniti, quo non potest dari maius: Dicendum est quodd hoc non impediat infinitam distantiam à non ente ad ens, cum *nihil entis sit in non ente*. Quando autem arguunt *infinito nil dari maius*; respondemus in ratione entis non magis differre Deum à non ente, quàm formica, ab ipso non ente, licèt plus differat in ratione talis entis. Nemo enim dubitat, quin Deus, qui infinitus est, distet infinite ab Angelo, attamen distat magis ab homine, & adhuc magis à formica; & sic licèt non ens magis distet

à supremo ente, quàm ab infimo in ratione talis entis; hoc non impedit tamen: quin in ratione entitatis simpliciter distent infinitè ens & non ens.

Tertia pars est adhuc Scoti in utroque opere Oxoniensi & Parisiensi in 4. dist. 1. *quæst.* 1. & D. Thomæ præcitati, & aliorum, qui negant ullam creaturam posse esse instrumentum alicuius creationis: contra præcitatos, qui arbitrantur posse creaturam eleuari à Deo, ut instrumentum ad creandum aliquid. Creatura enim vel disponderet subiectum ad posse creari, vel attingeret terminum creationis, his enim duobus tantum modis intelligitur instrumentum concurrere ad actionem; sed creatura non potest dispondere subiectum ut creetur, quia in creatione nullum extat subiectum disponendum, cum sit productio ex nihilo; nec etiam attingere potest terminum creationis, quia nullam in se possidet vim creativam: ergo creatura non potest esse instrumentalis causa creationis. Deinde creatura antequam assumere- tur à Deo ad creandum non habet virtutem creandi, nec eam recipere potest: quandoquidem talis virtus est infinita, & creatura non potest recipere aliquid infinitum, quoniam *quidquid recipitur ad modum recipientis recipitur*; ergo creatura non potest instrumentaliter creare. Tandem cui repugnat actus primus, repugnat etiam actus secundus, quia iste permanat ab illo: sed actus primus, nempe potentia creandi, repugnat creaturæ: ergo repugnat illi actus secundus: quod possit assumi à Deo ut instrumentum creationis. Quod si dicatur hanc rationem valere tantum pro causa principali, non verò pro instrumentali. *Respondendum* est argumentum urgere pro utraque; quia instrumentum non est propriè actiuum, sed tantummodo passivum: unde cum creatura non possit *creare principaliter*, nec etiam poterit *instrumentaliter*.

Obijcies 1. Sacramenta producant gratiam in anima recipientium, sed gratia creatur ex Scoto in 2. dist. 34. ergo creatura attingit creationem. *Resp.* Sacramenta non producere gratiam nec illam creare *Physicè*, sed tantum *moraliter*: quandoquidem sunt signa quædam externa & sensibilia, ad quorum applicationem Deus statuit gratiam conferre illis, qui dignè suscipiunt sacramenta; nostra autem quæstio intelligitur de causa instrumentali *Physica*; ut videre est in conclusione. *Dices*
crea-

creatura potest eleuari ad reproducendum corpus Christi in Eucharistia, quæ actio nobilior est creatione. *Resp.* Non creari corpus Christi per Sacerdotem, quia consecratio quæ est mutatio subiecti in subiectum, panis scilicet in corpus, subiectum & materiam supponit. Quando autem affertur, quod consecratio sit nobilior creatione; hoc verum est in genere moris, non verò in genere naturæ. Adde quod non reproducatur corpus Christi physicè, sed moraliter; quatenus scilicet Deus ad prolationem verborum sacerdotis panem transubstantiat in corpus Christi. Eadem responsio currit ad eos, qui dicunt panem annihilari à sacerdote; quæ annihilatio non est facilius creatione, quoniam redigit substantiam ad nihilum, sicut creatio substantiam producit ex nihilo: quia scilicet talis annihilatio, si admitteretur, fieret tantum moraliter, non physicè. Dixi, si admitteretur; quia negat Scotus panem annihilari in Eucharistia.

Obijcies 2. per potentiam D. potest Angelus producere Angelum sibi similem; sed protunc illum crearet, quandoquidem nihil subiecti præsupponeretur: ego creatio potest diuinitus competere creaturæ. *Respondent* aliqui Angelum in tali suppositione alium sibi similem producere ex sua propria entitate veluti ex quodam semine spiritali; sed quia hoc difficilè intelligi potest, ideò verissimilius responderi debet talem Angelum non posse recipere virtutem producendi sibi simile, qualis conceditur alijs viuentibus corporeis, quæ habent materiam ex qua possint educere effectus sibi similes. Ratio autem, cur non posset Angelus alium producere, est, quia limitatur potentia creaturæ ad producendum ex subiecto, vnde quia Angelus non haberet subiectum, ex quo alium Angelum produceret: proinde nequidem diuinitus talem producere posset. Ratio autem cur non possit Angelus talem potentiam productiuam ex nihilo recipere, iam antea à nobis allegata est; quia scilicet talis virtus est infinita, cuius nulla creatura est capax.

Obijcies 3. omnis creatura est in potentia obedientiali respectu Dei, à quo recipere potest quamcumque virtutem: ergo & potentiam creandi, cuius proinde erit causa instrumentalis. *Resp.* 1. Quod potentia obedientialis creaturæ non sit actiua, sed purè passiuæ; vnde licet Deus possit facere de creatura quidquid voluerit

non potest tamen illam eleuare ad creandum. *Resp. 2.* Quòd potentia obediēcialis non se extendat ad actiōnes, quæ repugnent alicui naturæ; sed repugnat creaturæ, quòd creare valeat, ob finitatem creaturæ, & infinitatem creationis: ergo non obstante potentia obediēciali, non potest Deus vti creatura, vt *Physicè* concurrat ad creationem. Quamuis enim Deus absolute valeat creare frigus, non tamen potest ipsum frigus producere per calorem, quia repugnat virtuti calefactiuz quòd frigefaciat licet Deus ad præsentiam caloris possit frigefacere se solo. Sic pariter licet Deus possit creare quamcumque creaturam se solo ad præsentiam creaturæ, non tamen potest creare aliquid per concursum *Physicum* creaturæ; quia repugnat naturæ eius, quòd creare valeat, ratione distantiz infinitæ inter ens & non ens. *Si quis* instet *dicens* creaturam producere dependenter à subiecto per virtutem propriam: proindeque, quando eleuata est à Deo, illam posse producere independenter à subiecto: quia plus potest à Deo eleuata, quàm non eleuata: Negari debet consequentia, ob impossibilitatem creationis; & ad rationem dicendum est, quòd plus possit eleuata in eodem ordine operandi in subiecto, non in diuerso ordine operandi ad quem repugnantiam habeat.

QVÆSTIO IV.

De Causa prima Efficiente, vt est Conseruans.

NEdum Deus considerari debet vt produciens siue per creationem, siue per generationem, producendo scilicet ex nihilo, vel ex subiecto præexistenti; sed etiam considerari potest vt conseruans, quandoquidem non longè est ab unoquoque nostrum, in ipso enim viuimus, mouemur & sumus. Act. 17. Ita quod si esse nostrum conseruare desineret, illicò reduceremur in nihilum, sicut extracti sumus de nihilo per potentiam illius, qui vocat ea qua non sunt tanquam ea qua sunt. Deus, inquam, est assiduus conseruator noster, non tantùm occasionaliter, sicut nauta dicitur causa conseruatiua nauis. Nec tantùm remorè, quatenus impedit, nè destruamur ab agentibus contrarijs; sed & propriè in quantum contínuò influit in effectus suos, & illos
ita

ita manu tenet & sustentat, vt cessante influentia illius, omnia quæ facta sunt perirent illico. Hic de causa prima agere contendimus, vt efficienter conseruat suas productiones; & de illa tribus conclusionibus dicere, quòd *Deus omnia conseruet, quod idem sit influxus creatiuus & conseruatiuus, & quid sint conseruatio actiua & passiva.*

CONCLUSIO PRIMA.

Deus ita conseruat omnes & singulas creaturas, vt absque illius entis supremi conseruatione, omnia reducerentur in nihilum. Sic Scotus in 1. dist. 2. quæst. 2. & in 4. dist. 1. quæst. 1. cum omnibus catholicis, contra quosdam ab Aug. relatos 5. de Gen. ad litt. cap. 20. quorum meminit Doctor noster in 2. dist. 37. quæst. vn. qui dicebant Deum condidisse reuerà mundum & omnes creature, ipsisque præbuisse agendi virtutem, sed postea illas taliter reliquisse, vt per potentiam sibi elargitam agerent, nihilque ampliùs circa ipsas operari, nec easdem conseruare. Hoc est contra plurimos textus sacræ scripturæ, Sap. 11. *quomodo posset aliquid permanere, nisi tu voluisses, aut quod à te vocatum non esset conseruaretur?* Isaïæ 40. *qui appendit uniuersum orbem tribus digitis.* Hebr. 11. *portans omnia verbo virtutis suæ.* Ob hoc Patres scribunt Deum esse omnium tenentem, quem græci vocant *πρωτοκτονητορ* ex Aug. tract. 106. in Ioan. Qui idem 6. de Gen. ad litt. cap. 3. ait: *si virtus Dei ab eis quæ creata sunt aliquando cessaret, simul & illorum cessaret species, omnisque natura concideret.*

Probatur Conclusio. Quia Deus inuoluit omnem perfectionem simpliciter id est, quæ nullam imperfectionem importat, quia est ens infinitum in omni genere; sed dependentia creaturarum à conseruante denotat perfectionem simplicem; nempe ius supremum in ipsis: ergo creaturæ dependent à Deo in conseruari, & Deus dici debet conseruare illas. Deinde quælibet creatura plus dependet à Deo, quàm vllæ creaturæ dependeant ab alijs; sed reperiuntur creaturæ, quæ ab alijs dependent in fieri & in conseruari, vt lumen à sole, visio ab oculo, & accidentia à subiectis: ergo multò magis creatura pèdere debet à Deo in conseruari. Tandem ratio cur Deus possit creaturam annihilare,

est quia ab illa suum influxum conseruatium substra-
here potest : ergo omnis creatura pendet ab illo D.
influxu conseruante ; vnde Aug. *lib. 4. de Gen. ad litt.*
cap. 12. ait mundum non esse similem structura domus ,
qua stare potest cessante fabricatore . His potest addi di-
ctum D. Bon. in 1. *dist. 37. art. 1. Vbi ad confirmatio-*
nem veritatis prædictæ comparat creaturam corpori
ponderoso in aere existenti , cui si non supponatur ma-
nus sustentantis , illud mox cadit deorsum ; sic omnes
creaturæ euanescerent , ac in suum nihil reuerterentur ,
si vel momento quidem influxus Dei conseruat iuus ab-
straheretur illis .

Obijcies . Quædam sunt creaturæ , quæ perire ne-
queunt , vt Angeli , animæ rationales , & corpora cœ-
lestia , quæ omnia corruptioni non subiacent : ergo
omnes creaturæ non conseruantur à Deo in suo esse .
Resp. Quod Angelus & anima non possint corrumpi ab
intrinseco , quia non constant materia , quæ est princi-
pium internum corruptionis ; possunt tamen annihili-
lari à Deo , si illis suum influxum conseruantem dene-
garet : vnde dicit D. Greg. ib. Mou. cap. 18. Cuncta
ex nihilo facta sunt , eorumque essentia rursus ad nihilum
tenderet , nisi eam author omnium manu regiminis reti-
neret .

CONCLUSIO SECUNDA.

Influxus , quo Deus conseruat creaturas , est illemet ,
quo ipsas antea produxit . Sicut enim se habet sol
respectu luminis ab illo exeuntis ad illuminandum ac-
rem , sic se habet Deus ad creaturas productas à se , sed
eadem actione , qua sol lumen producit , eadem istud
lumen conseruat , cum vtraque sit illuminatiua : ergo
influxus & actio qua Deus creaturas conseruat est ea-
dem cum illa , per quam antea illas creauit . Ob hoc
dicitur communiter , *Conseruationem nihil aliud esse præter*
continuatam creationem ; ista quòd differant tantum per
instantia temporis , quæ connotant : quatenus , si illa
actio Dei comparetur ad primum instans quo existit
creatura , dicatur *creatio* . Si comparetur autem ad alias
temporis partes in quibus creaturæ durant , dicatur
conseruatio .

Obijcies . Realiter possunt separari creatio & con-
seruatio , quia Deus potest hac die creare vnā ani-
mam ,

nam , quam annihilabit in eodem die , & sic effec creatio sine conseruatione : ergo influxus creatiuus & conseruatiuus non sunt vnum & idem . *Resp.* Non posse dari aliquod instans , in quo Deus creet & non conseruet animam , aliàs simul existeret , quia crearetur , & non existeret , quia non conseruaretur : potest tamen Deus creare animam pro aliquo tempore , quam non conseruabit pro alio , sed propterea non est creatio sine conseruatione , quia nullum est tempus in quo Deus creet & non conseruet , aut conseruet absque eo quod creet .

CONCLUSIO TERTIA.

Quandoquidem idem est influxus Dei creantis & conseruantis , ideo sicut creatio actiua nihil est aliud , quam volitio Dei efficax , quia vult creaturas produci ex nihilo pro tali differentia temporis : sic etiam conseruatio actiua nihil aliud est præter volitionem Dei efficacem , quo à vult conseruare creaturas in suo esse per tale vel tale tempus . Eodem pariter modo ratiocinandum est de conseruatione passiuæ creaturæ , ac de creatione passiuæ eiusdem ; quod scilicet , sicut creatio passiuæ est ipsamet creatura actu existens & realiter dependens à Deo creante , sic conseruatio passiuæ nihil aliud est præter creaturam ipsam actu perseverantem in sua entitate , & dependentem realiter ab ipso Deo , vt est conseruans & manu tenens ; iuxta dictum Sapientis cap. 11. *Quomodo posset aliquid permanere , nisi tu voluisses ?*

Si quærat ergo , in quo consistat dependentia creaturæ à Deo creante & conseruante , imò & operante . *Responderi* debet quod consistat formaliter in creatione realiter indistincta à creatura , vt innuit Scotus *In 2. dist. 1. quæst. 4.* Quod dependentia sit relatio creature ad Deum , hoc clarum est . Quia quod formaliter ordinat vnum ad aliud est relatio ; sed omnis dependentia ordinat id quod dependet ad id à quo dependet : ergo dependentia est formaliter relatio . Quod etiam illa relatio sit indistincta realiter à creatura , colligitur ex hoc quod non possit intelligi creaturam existere , quin illico intelligatur ipsam dependere à principio , à quo creata & conseruata est .

Si quis dicat dependentiam non posse censeri relationem , quia fundamentum est prius relatione ; nihil

verò est in creatura, quod præcedat illius dependentiam: quia illud esset à Deo independent. *Resp.* Quòd creaturæ entitas prior sit illius dependentiæ, quoniam ex illa oritur; quia tamen illà entitas distinguitur tantum formaliter à dependentiâ, ideo diximus in responsione, quòd dependentia consistat in relatione indistincta realiter à creatura. Quando autem dicitur *quòd relatione realiter distinguatur à fundamento*; hoc verum est de relationibus categoricis, non verò de transcendentalibus, maximè de illis quæ terminantur ad Deum; quales sunt relationes creationis & conseruationis passiuæ.

QVÆSTIO V.

De Causa Prima Efficienti ut est ad omnes actiones Creaturarum concurrens.

CAtholicorum nullus negauit aliquando Deum concurrere ad omnes & singulas actiones creaturarum; cum hoc expressè habeatur in S. Scriptura Isaïæ 26. *omnia opera nostra operatus es Domine*. Iob 10. *manus tuæ Domine fecerunt me*. Psal. 146. *Qui producit in montibus sanum*. Ioan. 5. *Pater meus usque modo operatur & ego operor*. Ad Rom. 1. *Ex ipso, per ipsum, & in ipso sunt omnia*. Hoc tamen non impedit quin Aureolus & Durandus famosissimi doctores, ille Cardinalis Eminentissimus, & ille sacri palatii Magister & Episcopus, sustinuerint Deum concurrere tantum mediâtè ad actiones agentium creatorum, quatenus in eorum productione omnem virtutem agendi illis indiderit, per quam possent operari pro libito absque nouo influxu Dei: quod euidenter contradicit Augustino lib. 5. de Gen. ad litt. cap. 20. dicenti. *Sunt qui arbitrantur tantummodò mundum ipsum factum à Deo, & cetera iam fieri ab ipso mundo, sic ut ille ordinauit & iussit, Deum autem nihil operari contra quos profertur illa sententiâ Domini, Pater meus usque nunc operatur. . . . non solum magna atque præcipua, verum etiam ista terrena & extrema*. Quibus verbis exploditur Aureoli & Durandi sententiâ. In hac autem quæstione tria examinabuntur, an scilicet Deus actum concurrat immediâtè cum causis secundis, an concursus Dei sit Physicè determinans, & in quo consistat ille concursus.

CONCLUSIO PRIMA.

Deus concurrit immediatè cum agentibus secundis ad omnes omnino operationes. Ita quòd si suum concursum positivum illi subtraheret, nullum agens naturale aut liberum quidquam posset operari, imò tota machina mundi & causarum collectio maneret tanquàm immobile horologium. Sic Scotus in 2. dist. 37. quæst. 2. D. Thomas 1. p. quæst. 106. art. 5. Cum Doctoribus Seraphico, Irrefragabili, Illuminato, & Nominalium Principe.

Ratio assertionis est quòd in agentibus essentialiter subordinatis inferius non agat independentè à superiore ex Arist. 8. Phys. tex. 41. Sed Deus est prima causa & primum agens, cui essentialiter subordinantur agentia secunda; ergo debet ad illorum actiones concurrere. Nec, sufficit Durando respondere creaturas dependere quidem à Deo quoad modum essendi & quoad modum operandi mediatè, quia ipse Deus dedit illis esse & virtutem generalem agendi conformiter suæ naturæ, licèt non dependeant ab illo quoad modum agendi immediatè, quasi indigeant novo influxu. Hoc, inquam, responderi non debet quia modus agendi sequitur modum essendi; & eo modo creaturæ agunt, quo sunt; sed sunt dependenter immediatè à Deo, à quo solo conservantur: ergo operantur dependenter immediatè ab ipso Deo. Si dicat Durandus formas materiales dependere à materia, attamen actiones illarum non dependere ab illa; proindeque actiones creaturarum non debere dici dependere à Deo, licèt existentia illarum à Deo dependeat. Respondebitur consequentiam Durandi esse falsam; quia materia in qua existunt formæ non est actiua, & sic actiones earum non possunt esse à materia; Deus autem est activus: sicque non mirum est, si nedum det esse, sed etiam operari immediatum agentibus secundis. Aliter enim non esset primum agens, cum in actiones agentium particularium non influeret; nec prima & uniuersalis causa, cui cæteræ causæ & effectus essentialiter subordinarentur, si concursus immediatus non haberet in illis: nam sublato ipso per impossibile, & remanentibus agentibus particularibus non minùs ista agerent sine illo; quod est absurdum.

Confirmatur Conclusio . Si Deus immediatè non concureret ad omnes effectus causarum secundarum , non posset impedire illarum actiones , quando sufficienter applicantur ad agendum , cùm hoc fiat tantùm per subtractionem sui concursus ; sed hoc fecit Deus , quando in fornace Babylonica innocentes ab igne illasi sunt: ergo non potest intelligi quomodo talis ignis non combureret , nisi quia Deus suum concursum illi denegabat ; quod euidenter denotat, Deum concurrere *immediatè* ad actiones causarum secundarum. *Deinde* maius est dominium Dei super causas secundas , si ab illo dependeant in essendo & in operando immediatè , quàm si dependeant à Deo tantùm in essendo , ista quòd post adeptam existentiam & virtutem generalem operandi possent ex se ipsis agere sine nouo & speciali influxu D. Sed dominium Dei super creaturas debet intelligi esse perfectissimum : ergo creaturæ dependent à Deo, tum in suo *esse*, tum in suo *conseruari*, tum in suis actionibus , ad quas omnes immediatè concurrunt . *Tandem* illi effectus, qui non dependerent à Deo *immediatè* , possent gloriari in se ipsis , & de Deo dicere , *ipse non fecit nos* , sicut nec auus nepotem , nec arbor destructa fructus ortos à recenti arbore , quæ esset progenita ex semine prioris ; sed omnis gloriatio auferenda est à creatura ; iuxta dictum D. Pauli 1. ad Cor. 4. *quid habes quod non accepisti* ; & omnibus modis creatura debet dici à Deo dependere: ergo ipsa debet ab illo habere potentiam agendi, & *immediatam* actionem .

Obijcies 1. Si Deus concurreret ad omnes actiones , concurreret ad peccatum ; cuius diceretur causa . *Resp.* Deum concurrere ad peccatum vt est causa vniuersalis *Physica* ; quæ debet ex ordinatione suæ voluntatis dare concursum suum , quotiescunque videt causam secundam ad agendum dispositam, concedo : concurrunt ad peccatum , vt causa particularis & *moralis* , cui deberet imputari culpabiliter talis actio , nego , Quando enim Deus concurrunt cum homine committente adulterium , talis actio est culpabilis & peccaminosa respectu hominis ; quia infringit legem quæ adulterium sibi prohibetur : non verò est culpabilis respectu Dei, imò est iusta ; quia iustum est quòd Deus sequatur determinationem suæ voluntatis , quæ statuit ab æterno concurrere in tempore ad omnes creaturarum actiones, siue necessarias , siue liberas . *Quando au-*

tem dicitur Deum esse causam peccati ; responderi debet hoc esse verum materialiter , quia est causa actionis quæ est peccatum respectu hominis ; non verò est causa peccati *formaliter* , quia non est causa actionis , quæ sit peccatum respectu Dei . Alij respondent Deum concurrere ad entitatem peccati , sed non ad malitiam & deformitatem eius ; sicut anima concurrens cum tibia curua , concurrit quidem ad motum tibie , non verò ad claudicationem eius ; quæ tota procedit à curuitate tibie : Vt ait Scotus in 2. dist. 37. quæst. 2. videatur instantia quæ habetur in obiectione sequenti .

Ostenditur hæc responsio per exemplificationem . Si Deus præcepisset Eux vt manducaret de ligno vite , & prohibuisset Adamo nè manducaret , pro tunc Adamus manducando peccasset , & non peccasset Eua manducando , esto posset dici commississe actionem materialiter peccaminosam ; quia fecisset id quod esset peccaminosum respectu Adami : non verò commississe actionem peccaminosam formaliter , quia talis actio respectu sui non fuisset peccaminosa . Sic in proposito dicunt Theologi *Deum concurrere ad materiale peccati , non ad formale* ; quia licet concurrat ad actionem ; quæ est peccaminosa respectu hominis , non tamen concurrit ad actionem , quæ sit peccaminosa Deo , qui benefacit concurrente ad actionem quamlibet ; quia sequitur regulam suæ voluntatis , quæ ab æterno decreuit concurrere ad omnes actiones creaturarum . Si dicatur quòd Deus debeat denegare suum concursum hominibus quos videt malè operaturos , aliàs diceretur peccare ; quandoquidem ille qui potest impedire peccatum alterius , & non impedit , censetur peccare . Resp. Deum ad talem denegationem concursus non teneri , imò suauitas prouidentie illius dicat illi , vt suum concursum præbeat creaturæ , quoties illam videt dispositam ad agendum . Cum autem dicunt , *illum peccare , qui peccatum alterius non impedit* ; hoc verum est de causa *particulari* , quæ ex charitate malum proximi impedire debet ; falsum verò de causa *uniuersali* , quæ tenetur non impedire peccatum ; quia se obligauit sponte ad concurrendum cuilibet actioni : & proinde etiam ad actionem materialiter peccaminosam .

Obijcies 2. Dum homo peccat , non alià ratione est causa malitie peccati , nisi quia causat entitatem

materialem actionis cui malitia annexa est ; sed Deus concursu suo eandem entitatem efficeret : ergo esset & causa peccati , si ad entitatem actionis peccaminosæ concurreret immediatè. *Resp.* Negando maiorem non enim homo est causa peccati , quia producit entitatem materialem ; sed quia per illum stat , nè producatut honestas & reſtitudo actionis , quæ deberet esse conformis voluntati D. non sic autem de Deo , qui ex parte sua paratissimus est concurrere ad reſtitutionem actionis : & qui proinde non debet dici peccati causa . Quotiescumque enim aliqua forma à duobus principijs producenda , non producit ; illud principium , per quod non stat , quo minus forma producatut , non debet dici causa priuationis eius , sed illud tantum per quod stat , quominus illa forma producatut ; sed Deus qui decreuit concurrere cum omnibus creaturis est semper paratus ad productionem reſtitutionis in actione facienda , & solus homo est ille , qui impedit reſtitutionem actionis illius ; sese determinando ad faciendum id quod legi D. aduersatur : ergo de solo homine dicendum est , quod sit causa peccati , non autem Deus . *Quod si obijciatur* vulgare istud effatum , *quid est causa causa est causa causati* : hoc verum est , quando causatum est quid positivum naturaliter & necessariò sequens ad causam ; peccatum autem est quid priuativum , quod in sua formalitate nihil aliud dicit , quàm *priuationem reſtitutionis*. Hoc idem respondendum est ad istud , *qui dat esse , dat etiam consequentia ad esse* . Ineptè ergo propter hanc duplicem rationem negauit Durandus Deum concurrere *immediatè* ad actiones creaturarum .

Obijcies 3. Si ex textibus Scripturæ allatis in annotatione deberet colligi , *Deum immediatè concurrere ad omnes & singulas actiones* , sequeretur opinionem Aureoli & Durandi esse hæreticam ; quia contradiceret Scripturæ : quod tamen nullus amodò dixerit . *Resp.* quod licet Suarez in Metaphysica asserat horum Doctorum sententiam esse hæreticam ; hoc tamen non sit conforme Scoto , nec alijs , qui dicunt prælegatos Scripturæ contextus posse explicari de concursu Dei mediato ; ita quod si Deus dicatur *operari omnia in omnibus* , *producere in montibus fœnum* , *sine ipso factum est nihil* , & similia : hoc idèò dicatur quia Deus dedit omnibus *virtutem producendi* , *montibus fœ-*
num,

num, arboribus fructum, & terræ herbas, & segetes. Licet autem illa Doctorum opinio non sit hæretica, quia non videmus eam damnari expressè à Scriptura, quæ explicari potest, nec à sacro sanctæ Ecclesiæ determinationibus: nihilominus ea quam sequimur maiorem habere videtur conformitatem cum Scriptura, Patribus, & ratione, vti videri potest in decursu conclusionis; vnde dicitur communiter ab authoribus, quòd mens talium Doctorum *erronea* videatur. Hoc autem asseruit Durandus non valens conciliare sanctitatem Dei cum concursu eius ad omnes actiones creaturarum, præuidens scilicet quòd si concurreret ad quoscumque actus, concurreret proinde cum voluntate humana ad peccatum, & sic esset causa peccati, quod repugnat sanctitati D. vnde asseruit creaturas pendere quidem à Deo, quoad motum essendi, & operandi *mediatè*; illis præbendo virtutem operandi generalem, non verò quoad modum operandi *immediatè*; qui totus erat à sola creatura, vt nullo modo à Deo, nec secundum entitatem materialem, nec formalem; ex quo colligebat Deum nullo modo esse causam peccati.

Obiic. 4. Deus concurrente ad actiones creaturarum vel produceret totum effectum, & protunc, illi frustra adderetur creatura; vel produceret vnā partem effectus, & creatura aliam, & tunc non concurreret Deus ad illam partem quam operaretur creatura: ergo dici non debet, quòd Deus concurrat in omnibus: *Resp.* Deum & creaturam producere totum effectum inadæquatè, quemlibet nimirum in genere suo. Deum videlicet in ratione causæ *vniversalis*, & creaturam in ordine causæ *particularis*. Si autem Deus non producat adæquatè totum effectum, hoc non fit ex imperfectione Dei agentis sed quia decreuit vti causa secunda. Si etiam creatura exigit Deum concurrentem, hoc non impedit quin virtus agendi creaturæ sit perfecta in suo genere; nempe in genere causæ secundæ, quæ habet virtutem completam agendi, supposito concursu causæ primæ. *Dices*, Si Deus concurreret ad productionem effectus, vel Deus produceret effectum per eandem *numero* actionem cum agente naturali, vel per diuersam; sed non eadem actione concurrat, quia non est eadem *numero* virtus in Deo, & in creatura; nec etiam diuersa, quia protunc Deus non concurreret ad actionem illam, crea

creaturæ. *Responsio* dabitur ad hanc obiectionem in
conclusionem tertiā.

CONCLUSIO SECUNDA.

Conkursus Dei non determinat physicè causas secundas. Sic Doctor noster in 4. dist. 1. quest. 1. & dist. 12. quest. 3. contra Thomistas existimantes causam primam ita præmovere, & prædeterminare secundam, ut absque illa præmotione agere nequeat; siue Deus præmoueat agens creatum per aliquam qualitatem realem, & physici in ipso receptam per quam redditur ad operandum potens, vel impotens, si illam non habeat, ut voluerunt Bannes, Aluares, & alij quidam: siue nihil reale præuium ponatur in creatura, sed tantum quid extrinsecum, quod est prædeterminatio D. voluntatis præmouens physicè causam secundam ad agendum.

Probatur conclusio nostra ex hoc, quod illa prædeterminatio physica, siue consistat in qualitate præuia, siue in sola actione D. voluntatis prædeterminantis, semper auferat libertatem voluntatis humanæ, quæ in hoc consistit quòd possit omnibus ad agendum necessarijs voluntas possit agere vel non agere; sed posita præuia prædeterminatione, voluntas non posset non operari id ad quod prædeterminaretur, nec operari id ad quod non determinaretur, quia in his consistit prædeterminatio: ergo concursus Dei non determinat physicè causas secundas, siue sint liberæ, siue sint naturæ. *Non determinat, inquam, causas secundas liberas, quia non manerent amplius libera, ut mox probauimus. Nec etiam prædeterminat causas naturales, quia causa secunda habet in suo genere, & in suo ordine virtutem sufficientem operandi effectus, ad quos ex natura sua determinata est, ver. gr. sol ad illuminandum, ignis ad comburendum, graua ad tendendum deorsum, & leuia ad sursum.*

Obijcies ex Doctore nostro: causa prima agit prius natura quam secunda, vnde Arist. 8. *Phys. text. 33.* asserit secundum mouens prius moueri à primo, quàm alia moueat sed non potest causa prima prius causare, nisi prædeterminet secundam motione sua: ergo concursus Dei est prædeterminans. *Resp.* Ad Arist. Primum mouens prius mouere secundum quàm agat, illi dando virtutem

tutem agendi, & ipsum applicando ad passum concursu *simultaneo*, non verò concursu *prædeterminante physice*. Quantum ad Scotum, ipse vult tantum, causam primam prius agere naturā, quā secunda agat, prioritatem dignitatis, & perfectionis, quia est independens in essendo, & in operando; non verò proprietate operationis, quia non præcurrit creaturam agentem, sed cum ea concurrit: nullum enim intelligitur instans, in quo causa prima agat non agente secunda. Concedimus quidem decretum Concursus D. esse antecedens ad actionem creaturæ: actualis tamen concursus nequidem naturā procedit creaturæ actionem. Quod Doctor noster non velit determinationem D. voluntatis esse naturā priorem determinatione agentium inferiorum, probatur sufficienter ex hoc quod dicit in 2. dist. 37. *quest. 2.* ubi expressè negat causarum efficientium subordinatarum unam prius naturā causare altera: unde ait, *non est ordo in causis, ut causant effectum communem; sed simul causant. Sicut enim loquendo de diversis generibus causarum, non prius materia materiatur, quā efficiens efficiat; sic in eodem genere causa, causa subordinata licet habeant ordinem secundum perfectiū, & imperfectiū causare, non tamen habent prioritatem naturā; quasi una causet in uno instanti naturā effectum communem, quā alia non causet in eodem instanti.* Ex his ergo patet quod si Scotus dicat in ordine causarum efficientium primam prius naturā causare quā secundam; hoc debeat intelligi de prioritatem perfectionis, non de prioritatem operationis, & causalitatis.

Obijcies 2. Causæ naturales prædeterminantur à Deo in actionibus suis, sicut, & voluntas creata, quæ cum sit ex sua natura differens, à Deo determinatur ut agat; sicuti videtur insinuare Doctor subtilis in 4. dist. 48. *quest. 2.* dicens voluntatem posse prædeterminari à obiecto beatifico. Resp. Negando Ant. causæ enim naturales non prædeterminantur à prima, cum Dei concursus non sit *præuius*, sed tantum *simultaneus*, identificatus realiter cum actione causæ secundæ. Idem dicendum est de voluntate nostra, quæ non determinatur à Deo per præmotionem *præuiam*, & *antecedentem*; quia talis præmotio tolleret libertatem illius, ut probatum est. Quantum ad Doctorem nostrum, evidentiſſimum est illum semper toto conatu hanc præmotio-

nem reprobasse; cū nullus vnquam tam acriter pugnauerit pro libertate voluntatis. Quod si dicat voluntatem beatorum aliququaliter prædeterminari ab obiecto beatifico: intelligendus est de præmotione morali, & obiectiua, cuius vis tanta est in obiecto beatifico, vt voluntatem fortiùs alliciat, quàm cætera obiecta creata. *An autem debeat admitti prædeterminatio illa moralis in actionibus moralibus, quas eliciunt viatores; ad hoc respondimus in theologia maiori, tractatu de Gratia pag. 371.*

Obijcies 3. Vel Deus prædeterminat voluntatem, vel illam expectat; sed illam non expectat ex Can. 4. Concilij Arausici 2. *Si quis contendit Deum expectare voluntatem, resistit Spiritui S.* ergo illam prædeterminat, iuxta id quod habetur Iob. 12. *qui immutat cor principum.* Prouerb. 21. *Corregis in manu Dei, & quocunque voluerit vertet illud.* Philipp. 2. *Qui operatur in nobis velle, & perficere.* Resp. Deum non expectare voluntatem nostram, sed potiùs ipsum esse qui eam anticipat & præuenit per inspirationem, quæ à nostra voluntate non dependet; supposita tamen illa inspiratione, & veniente gratia expectat aliquo modo consensum hominis vt cooperetur gratiæ; iuxta id quod habetur Apocalyp. 3. *ego sto ad ostium, & pulso, si quis aperuerit intrabo.* Si autem Concilium dicat *Deum non expectare voluntatem* Patres illius Concilij agebant contra Pelagianos dicentes Deum expectare consensum voluntatis creatæ per solas naturæ vires; quod hæresim sapit. Quantum ad allegatos contextus, qui dicunt *Deum immutare cor hominis, & vertere illud quocunque voluerit*; hoc fit non per motionem prædeterminantem, sed per inspirationem suauiter allicientem. Si dicat Paulus, *Deum operari in nobis velle*; non propterea prædeterminat voluntatem: sed dicitur *operari velle*, quia dat principium supernaturale, quo velimus. Plura de his habentur in nostra Theologia loco præcitato.

CONCLUSIO TERTIA.

Conkursus Dei cum causa secunda non consistit in prædeterminatione physica respectu actionum naturalium, vt probatum est in conclusione præcedenti; nec in prædeterminatione morali, qua antecederet ad actiones

nes

*mes liberas voluntatem pramoveat ad agendum, ut præcitauimus ex Theologia; sed consistit in causalitate simultanea causa prima cum secunda, ita quòd harum causarum qualibet totum effectum producat in suo genere, siue per concursum generalem pro actionibus naturalibus, siue per concursum specialem gratia pro supernaturalibus, & meritorijs. Hęc veritas ex antedictis patet. Si enim negetur prædeterminatio antecedens, ut conseruetur libertas humanæ voluntatis; remanet ut admittatur tantum concursus Dei *simultaneus*, seu concausalitas causę primę cum secunda. Cùm enim ratione subordinatio- nis essentialis, quam habet causa secunda ad primam, ista non possit agere independentem ab illa, Deus qui prouidet creaturam velle operari hoc vel illud, si fulciretur suo auxilio, præstò est creaturę, cui præbet suum concursum, seu suam concausalitatem; ita quòd actio procedat ab vtraque causa.*

Si quæzratur autem utrùm concursus D. sit ipsamet creatura actio, prout dependet à causa prima, tam in fieri quam in conseruari: Respondebitur affirmatiuè, iuxta mentem Scoti in 4. dist. 1. quæst. 2. Si enim actio creaturę esset alia numero ab actione Dei, vel Deus concurreret ad illam, vel non; quòd si concurreret ad illam, hoc esset per alium concursum, & postea per alium, & sic in infinitum: si verò ad illam actionem creaturę non concurreret, talis actio esset independens à Deo, contra id quod diximus multoties; omnia entia creata à Deo dependere, tum quoad esse, tum quoad operari: ergo Deus, & creatura agunt eadem numero actione. Actio enim suam desumit vnitatem à termino; sed vnus est numero terminus, seu vnus effectus dependens à Deo, & à creatura: ergo erit vna, & eadem numero actio. Nec hoc debet videri absurdum, quia licet vnus effectus non possit esse à pluribus causis totalibus non subordinatis; potest tamen esse à pluribus causis totalibus subordinatis: quoniam vna, & eadem numero sectio est ab homine, & à securi. Quando ergo dicitur, quod due cause habeant diuersas causalitatis, & actiones; hoc verum est, quando non sunt subordinate. Quod si Scotus alicubi videatur dicere actiones Dei, & creaturę esse diuersas respectu eiusdem effectus; debet intelligi Doctor de diuersitate desumpta ex parte principij, quod est extrinsecum actioni, cùm se teneat ex parte efficienti; est tamen vna,

ex parte termini, à quo denominari debet actio. Si etiam dicatur quòd actio sit in agente, & quòd proinde sint duæ actiones; cùm sint duo supposita agentia, Deus scilicet, & creatura: antecedens verum est de actione *Metaphysica*, & *pradicamentali*; non verò de actione *Physica*, quæ ab agente prodiens recipitur in passio, nec in Deo subiectari potest, cùm illa sit contingens.

Quæres *utrum causa prima determinet secundam, vel secunda primam*. Resp. in genere causam primam determinari à secunda; quando enim Deus videt causam secundam esse paratam ut agat, si Deus illi præbeat suum concursum, sine quo operari non potest ratione essentialis dependentiæ, quam habet creatura à Deo secundum esse, & secundum operari, tunc Deus præbet illi suum concursum ex suauitate suæ prouidentiae, per quam statuit adiuuare creaturas quotiescunque suo indigent auxilio, quod euidenter indicat causam secundam determinare primam. Quia autem triplex est indifferentia in causa secunda, nempe quoad actum, quatenus potest agere vel non agere; deinde quoad specificationem actus, in quantum potest elicere actionem huius vel illius speciei, iustitiæ scilicet vel prudentiæ respectu voluntatis: ac denique quoad indiuiduationem, & singularitatem actus, prout potest hunc vel illum actum producere hic, & nunc: Sic etiam triplex potest intelligi determinatio, quæ tollit triplicem illam indifferentiam, nimirum determinatio quoad actum, quoad specificationem actus, & quoad indiuiduationem, & singularitatem actus.

Resp. Ergo in particulari quòd causa secunda possit dici determinare primam quoad actum simpliciter; quatenus Deus videns dispositionem quam habet creatura agendi, determinat dare illi concursum suum. Quoad specificationem actus similiter causa secunda eodem modo determinat primam, quatenus Deus videns quòd causa secunda se determinaret ad actionem talis vel talis speciei v. gr. sol ad productionem ranæ, si haberet suum concursum; tunc decernit concurrere cum illo. Quoad indiuiduationem actus denique idem potest asseuerari, quòd Deus videns ignem paratum ad comburendam Stuppam sibi applicatam, si haberet concursum causæ primæ; tunc Deus se determinat ad concurrendum cum igne ad hanc numero combustionem. Quare autem ex pluribus combustionibus possi-

bilibus hanc potius quàm illam producat ignis; Rationius existimat hoc procedere ex circumstantijs loci, temporis, materiæ, & similibus: Scotus verò in 4. dist. 43. quæst. 3. docet hanc determinationem oriri à causa prima, nempe à Deo, qui videns ignem determinatum vt producat ignem ex subiecta sibi materia, determinat quod ex innumeris ignibus possibilibus producat hunc potius quam alium; sed illa controuersia parùm vtilis videtur.

QVÆSTIO VI.

De Causa Secunda vt Principalis est.

IN præcedentibus examinatum est, quid dicendum sit de causa prima, vt est creans, vt est conseruans, & vt est concurrens cum agentibus creatis, nunc ordo doctrinæ postulat, quòd loquamur etiam de causa secunda sub triplici diuersa ratione; vt est *principalis*, vt est *instrumentalis*, & vt est *exemplaris*: quod fiet in triplici quæstione sequenti. Causa autem *principalis* est ea, quæ agit virtute propria, sibi tamen communicata à Deo, à quo dependet omnis agendi virtus, & hoc modo arbor est causa principalis alterius arboris, quia virtus generatiua est propria arbori producenti, quamuis eam obtinuerit à causa prima, à qua omnia dependent in *esse*, & in *operari*. Causa *instrumentalis* verò est ea quæ agit virtute alterius; vnde non sibi operatur, sed alteri; sicut seruus non sibi laborat, sed domino: ob hoc penicillus pingens imaginem est causa *instrumentalis*, quia motio illius, quæ imago delineatur, non est propria ipsi penicillo; sed tantùm distorti. In quæstione sequenti sermo erit de *instrumentali causa*, in ista autem agimus de *principali*; de qua tria possunt quæri, *an causa secunda habeat veram rationem causæ actiue, quomodo causa secunda substantiam, & accidens producat, & an causa secunda immediatè attingat effectum.*

CONCLUSIO PRIMA.

Causa secunda est verè, & propriè actiua. Sic Scotus cum cæteris philosophis, qui defendunt causas secundas, siue spirituales, siue corporales, verè, & propriè

præ operari. Contra Gabrielem Biel in 4. *dist.* 1. *quest.* 1. *dubio* 3. & quosdam antiquorum philosophorum, quorum mentionem fecit Albertus Magnus 2. *Phys.* qui à causis secundis omnem efficientiam auferentes docebant res creatas nihil prorsus agere, sed Deum ad earum præsentiam operari; ita ut ignis in eorum sententia non combureret, sed Deus ipse ad præsentiam, & applicationem ignis materiæ combustibili: ita quod actio attribueretur vel igni, vel aquæ, & similibus, tantummodo propter apparentiam externam. Carthesius non tollit quidem vim operatiuam, & virtutem agendi omnibus causis secundis, sed eam aufert à substantijs corporeis, dicens Deum aut aliquas substantias spirituales omnia efficere ad præsentiam corporum, quod videtur absurdum, & sensuum experientiæ repugnans. Opinio autem communis est ea, quam attulimus, causas secundas verè, & realiter esse actiuas, & producere effectus suos iuxta id quod habetur Gen. 1. *Germinet terra herbam virentem, & facientem semen, & lignum pomiferum faciens fructum iuxta genus suum:* Deus autem non daret præceptum operandi rebus creatis, nisi haberent virtutem operatiuam, & sic res creatæ sunt verè, & propriè actiuæ, vnde mox sequitur præcepti exequutio, & *protulit terra herbam virentem, &c.* Idem habetur in nouo testamento pluribus in locis, sed præsertim Luc. 6. & Math. 7. *arbor bona bonos fructus facit, mala autem arbor malos fructus facit: igitur ex fructibus illorum cognoscetis eos.* Quod denotat euidenter creaturas esse verè actiuas, & actu operari; non verò Deum ad illarum præsentiam.

Probatur conclusio autoritate Arist. qui lib. huius cap. 2. docet expressè *solem, & hominem generare hominem*; quod dicere est *utrumque operari*. Huic authoritati accedit experientia, per quam sensibiliter videtur causas secundas agere; cum sol illuminet, ignis calefaciat, frigefaciat aqua, & sic de cæteris, quod si hoc negaretur ab aliquo, proijciendus esset in ignem, donec fateretur ignem comburere, inquit Scotus in 1. *dist.* 39. Quantum ad rationem conclusionis, hæc potest allegari; quod *esse sit propter operari*, seu quod *unum quodque sit propter suam operationem*, plantæ videlicet ad florendum, arbor ad fructificandum, homo ad laborem, & res naturales ad operationes sibi connaturales eliciendas; sed nullus dubitat quin plura

entia

entia sunt à Deo condita : ergo non possunt illis denegari operationes, cum *esse sit propter operari* 1. *Ethic. 7. & 2. de cælo* 17. Tandem si nulla esset actio in entibus creatis, nullas homo exerceret liberas operationes laude vel vituperio dignas : nullaque ab hominibus haberi posset rerum naturalium scientia. Cum enim res creatæ non innotescant nobis, nisi ex proprijs earum effectibus & operationibus, si res naturales non agerent, sed solus Deus ad earum præsentiam, nemo posset ex calefactione ignis cognoscere ignem esse calefactivum ; quoniam si ignis per se non calefaceret, bene autem Deus ad præsentiam ignis, nullus posset colligere ignem esse productivum caloris, quandoquidem calefactio non esset ab igne, cui non esset magis naturale calefacere, quàm frigefacere.

Obijcies ex 1. ad Cor. 12. *Deus operatur omnia in omnibus* : ergo creaturæ nihil agunt. *Resp.* Ex hoc contextu & similibus colligi tantum, quod Deus concurrat cum agentibus creatis ad omnes & singulas actiones illorum ; hoc tamen non excludit actionem illorum : quandoquidem ut causæ secundæ subordinatæ Deo producant in suo ordine eosdem effectus, ad quos Deus concurrat. *Dices* perfectissimus agendi modus convenit Deo ; sed perfectius est agere sine ope alterius, quàm exigere alienum auxilium : ergo melius est quod Deus dicatur agere se solo ad præsentiam creaturæ. *Resp.* Quod reuerà perfectissimus agendi modus possibilis debeat Deo attribui, non propterea tamen Deus solus agere debet, supposito quod decreuerit in suis actionibus ad extra agere concomitanter cum creaturis : hoc enim non facit Deus ex indigentia & debilitate virtutis suæ, sed tantum ex decreto D. voluntatis, quæ statuit non agere se sola, sed uti creaturis in actionibus ad extra. Licet enim Deus posset illuminare sine sole, calefacere sine igne, & frigefacere sine aqua, sicut se solo produxit ex nihilo cælum & terram ; attamen quia produxit creaturas ut operarentur, ideo per illas & cum illis agit, sicut & illæ operantur cum Deo.

Quando autem dicimus creaturas esse activas, per hoc intendimus dicere quod habeant rationem causæ principalis respectu effectuum quos producant. Causa enim principalis ea est quæ concurrat ad productionem effectus, per virtutem sibi innatam ; sed ignis

producit ignem & homo hominem per virtutem sibi inditam à natura : ergo causa secunda debet dici causa principalis & non instrumentalis tantum . Quod si creaturæ dicantur instrumenta Dei ; hoc debet intelligi respectu actionum naturæ vires superantium, ad quarum productionem eleuantur à Deo, vt instrumenta, sicuti patet de sacramentis , quæ dicuntur causæ *instrumentales* gratiæ , sicut & sancti homines qui dicuntur causæ *instrumentales* miraculorum , quæ per illos producit Deus, *qui facit mirabilia solus*.

CONCLUSIO SECUNDA.

Quantum ad secundam difficultatem , quæ est de principio productiuo substantiæ & accidentium multiplex est doctorum opinio . Quoniam Aresius apud Poncium nostrum contendit *Substantias de nouo productas à solo Deo ducere ortum* . Auicenna vult eas *produci ab intelligentijs separatis, quacumque sint* . Ragusa existimat eas *produci à solis substantijs cælestibus* . Pereyra existimat *substantiam produci, non ab alia substantia, sed ab accidenti, tanquam à causa principali* . D. Thomas 1. p. quæst. 34. art. 3. docet *substantiam sublunarem dici quidem causam principalem productiuam alterius substantia sublunaris, non tamen attingere immediatè productionem illius ; sed tantum mediantibus accidentibus, quæ agunt in virtute substantia* . Suarez tenet *substantiam sublunarem attingere immediatè productionem substantia, sed accidentia eam similiter attingere aq̃ue immediatè, sicut eam attingit substantia* . Scotus denique in 1. dist. 37. & in 4. dist. 12. quæst. 3. probat *solam substantiam immediatè attingere productiuam noua substantia, quam non attingunt accidentia, nisi dispositiue ; ita quod accidentia substantiæ producendis præparent quidem subiectum ad receptionem formæ nouæ : quando tamen sic præparatum est subiectum, vt recipiat nouam formam ; tunc substantia agentis introducit formam substantialem in passum : vnde dicit Doctor noster, & nos cum illo, quod sola substantia immediatè producat substantiam, & proinde dicitur causa principalis substantia ; vbi accidentia sunt tantum causæ dispositiua & instrumentales*.

Quod sola substantia immediatè producat substantiam probatur . Quia operari sequitur esse, vt principium essendi

sendi sit etiam principium operandi ; sed forma substantialis est principium *quo* essendi : ergo eadem forma substantialis est principium operandi, & sic sola substantia producit immediatè substantiam . Deinde quod producit aliud debet illud continere *formaliter vel eminenter* ; sed accidens non præcontinet substantiam formaliter , quia accidens esset substantia , nec etiam eminenter , quia accidens est imperfectius substantià , & nullum imperfectius potest continere perfectius : ergo accidens non potest attingere *immediatè* substantiæ productionem . Tandem virtus principalis agendi est id secundùm quod agens sibi assimilât effectum , cùm dicatur communiter *omnes agens formaliter ut agens continere & sibi assimilare effectum* ; sed agens substantiale sibi assimilât effectum substantialem secundùm formam substantialem , non verò secundùm formas accidentales , ut patet de sole producente ranas & metalla , & de patre producente filium sibi similem in natura , & non in accidentibus : ergo substantia est virtus principalis agendi , seu est principium *quo* producit effectus substantialis .

Obijcies ex Arist. 2. *de anima text. 5.* calor naturalis est id quo anima agit ; sed calor naturalis est accidens : ergo accidens producit substantiam ex alimento quod digeritur . Resp. Distinguendo Philosophum : calor est id quo anima agit : *dispositivè* , concedo : *formaliter & immediate* , nego : calor , inquam : est instrumentum dispositivum , quia alterat alimenta , ut cùm plenè alterata fuerunt , substantia hominis munducantis convertat alimenta in se ipsam : ita quòd , ut inquit Arist. præcitatus , in nutritione sint duæ actiones , quarum una est *alteratio præparatio* , quæ fit à calore naturali , alia verò est *productio substantiæ* , & istius principium est anima . Non negamus ergo quin accidentia concurrant ad productionem substantiæ ; sed hoc fit tantùm *dispositivè* , quatenus præparant subiectum per contrariorum accidentium expulsionem : non verò *effektivè & formaliter* , quasi ipsa accidentia substantiam attingant . Licet enim calor ignis disponat lignum ut formam ignis suscipiat , expellendo ab eo humidum & frigidum ; non tamen ille calor introducit formam substantialem ignis , sed est ipsamet forma substantialis ignis generantis , quæ immediatè introducit formam substantialem ignis in lignum dispositum ad illam .

Quodd si contra conclusionem afferatur : quodd radij solares, qui sunt accidentia, collecti in speculo producant ignem in materia combustibili, appropinquata; & quodd ex motu & collisione duorum lapidum producatur similiter ignis, qui motus est accidens : Ad hæc omnia afferri debet præmemorata distinctio, quodd radij solares & motus lapidum producant ignem *dispositivè*, qui effectivè & formaliter generatur à forma substantiali solis & lapidum. Si dicatur similiter quodd in sacramento Eucharistia accidentia vini convertantur guttam aqua in vinum de novo productum in calice : Responderi potest in hoc casu non accidentia vini convertere illam aquam in vinum, sed Deum esse, qui post alterationem & dispositionem aquæ per accidentia vini introducit formam substantialem vini. Nec hoc mirum videri debet aduersarijs, quodd recurratur ad potentiam Dei; quandoquidem ipsimet negantes esse plures formas substantiales in homine, dicunt quodd quando definit forma substantialis hominis & succedit cadaueris forma, ista forma cadaueris introducatur à Deo. Non mirentur ergo, inquit Scotus in 4. dist. 12. quæst. 3. si Deus author & rector naturæ suppleat defectus causarum naturalium, & producat ex se formas substantiales in subiecto disposito, quas accidentia non possunt producere, quandoquidem ipsemet Deus reperiens corpus hominis *perfectè organisatum* introducit in illud animam rationalem, quam non potest producere homo.

¶ Si etiam aduersarij *insistent* dicendo accidentia posse destruere substantiam, ergo & illam posse producere : Negari debet antecedens. Licet enim calor & siccitas ignis possint destruere frigiditatem & humiditatem aquæ, quia tamen non possunt producere formam substantialem ignis, sic nec poterunt destruere formam substantialem aquæ; quia *accidentia nullam habent actionem immediatam circa substantias*. In hoc ergo casu, destructis frigiditate & humiditate aquæ per calorem & siccitatem ignis, forma substantialis ignis destruit formam substantialem aquæ, & formam substantialem ignis de novo producti introducit in materiam primam, quæ antea erat sub forma aquæ. Ob hoc Doctor noster in 4. dist. 12. quæst. 3. num. 22. ait, quodd si totus calor possibilis separatus ab omni substantia esset in vno loco, vbi reperiretur gutta aquæ, ista

ista gutta non posset corrumpi à toto calore, propter rationem allatam; quòd *accidentia nihil possint in substantiam*, quandoquidem *substantia nihil est contrarium*, & *omnis destructio fit à contrarijs*: unde in suppositione Scoti recurrendum esset ad causam vniuersalem substantialem, quæ post destructionem qualitatum aquæ ab illo calore summo, substantiam aquæ destrueret: accidentia ergo ignis possunt quidem destruere accidentia conseruatiua aquæ, sed substantia aquæ non potest destrui, nisi per formam substantialem ignis, aut per potentiam Dei in casu quem antea supposuit Doctor noster.

Quantum ad productionem accidentium, substantia potest producere in seipsa aliqua accidentia immediate, & etiam in alieno subiecto. Potest, inquam, substantia in se producere aliqua accidentia, quoniam Angelus, & animæ rationales ex Doctore in 2.^a dist. 16. *quæst.* 1. per suam substantiam, seu per intellectum, & voluntatem, quæ non distinguuntur realiter, sed tantum formaliter, ab essentia Angeli, & animæ, producant intellectum, & volitionem, quæ sunt accidentia. Deinde per experientiam habetur quòd aqua intensè calida expellat à se calorem, & reproducat in se frigus, quod est accidens. Tandem si substantia possit producere immediate substantiam, ut antea probatum est: ergo à fortiori poterit producere accidens, cum accidens produci queat ab accidente. His addi potest ex doctore in 4.^a dist. 12. *quæst.* 3. quòd primum accidentium compositi, nempe *quantitas* necessariò productum fuerit immediate à substantia; aliàs esset æternum, & independens. Ob hoc dicitur communiter *quamlibet substantiam immediate post sui creationem producere in se accidentia sibi sympathica*, ut ignis calorem, aqua frigus, &c. quæ accidentia non debent dici tantum emanare à substantia, quia emanatio propria est solummodo respectu eorum, quæ non distinguuntur realiter à subiecto à quo fluunt, ut risibilitas à natura hominis; præcedentia autem accidentia realiter distinguuntur à subiectis eorum: ergo producuntur propriè. Quòd si nihil propriè dicatur agere in se-ipso; hoc verum est de actione *vninoca*; quia scilicet non potest agens producere in se ipso terminum eiusdem naturæ: hoc non impedit tamen, quin actione *aquinoca* agens possit producere in se ipso, quando sci-

connaturaliter, facilius elicit operationes sibi proportionatas: & sic verum erit dicere, quòd accidentia possint producere alia accidentia realiter & intèntionaliter, siue sint vnita substantiæ, siue sint separata à subiecto. Quòd si dicatur accidentia vnita substantiæ nihil posse producere, quia cùm accidentia producibilia possint produci à substantia producentis, melius est dicere ea produci à substantia producentis, quàm ab accidentibus illius. *Resp.* Accidentia vnita substantiæ producere immediatè formas accidentales effectus producti, quos nullo modo attingit substantia. Quando enim vniuntur duæ causæ equè capaces producendi vnum effectum, quarum vna est vniuoca, & altera est æquiuoca, tunc effectus debet attribui causæ vniuocæ, quæ est magis determinata ad producendum hunc effectum sibi similem in natura, quàm causa æquiuoca ad producendum effectum dissimilem, vt optimè docet Doctor fundatissimus noster *Frasien*.

CONCLUSIO TERTIA.

Quantùm ad tertiam difficultatem, quæ est de modo, quo causa secunda attingat suos effectus producendos, aliter responderi debet de causa secunda, quàm de prima: & aliter adhuc dicendum est de causa secunda vniuersali, & de causa secunda particulari. *Primò enim de causa prima dicendum est, quod attingat effectum immediatè, immediatione suppositi & immediatione virtutis*, sic Doctor in 2. dist. 37. *quest. vn.* Attingit, inquam, effectum immediatè immediatione suppositi, quandoquidem suppositum Dei agentis intimè coniungitur propter immensitatem suam cum omnibus effectibus suis, iuxta id quod habetur Act. 17. *Non longe est ab unoquoque nostrum, in ipsa enim viuimus, mouemur, & sumus.* Attingit etiam prima causa suos effectus immediatè immediatione Virtutis, quia omnia operatur per virtutem sibi propriam, & non aliunde emendicat potentiam, qua omnia operatur: in quibus constat *immédiatio suppositi & immédiatio virtutis*. Tunc enim agens agit immediatè *immédiatio suppositi*; cùm inter agens & passum nullum interponitur suppositum; quo pacto orbis lunæ agit immediatè immediatione suppositi in sphæram ignis sibi contiguam. Agens verò agi

immediatè *immediatione virtutis*, quando agit in passum virtute propria sibi inexistente; quo pacto ignis calefacit lignum sibi approximatum per calorem sibi intrinsecum. Quòd si agens agat in passum mediante aliquo supposito intermedio, tunc dicitur agere mediatè *mediatione suppositi*, vt quando homo per baculum feruum percutit. Cùm verò agens operatur mediante virtute aliundè emendicata, tunc dicitur agere mediatè, *mediatione virtutis*; vt quando virtute actiuorum naturalium applicatorum passiuus efficiuntur opera naturæ.

Secundò dicendum est de causa secunda vniuersali, quòd attingat effectus immediatè, non quidem immediatione suppositi, sed immediatione virtutis; quia suppositum solis non coniungitur plantis nec herbis, nec visceribus terræ, sed suas diffundit virtutes & influentias in effectus suos quantumcumque distantes. *Tertiò dicendum est de causa particulari, quòd debeat semper attingere effectum immediatè, vel immediatione suppositi, vel immediatione virtutis*. Debet, inquam, semper attingere effectum immediatè, quia necesse est vt mouens coniungatur mobili, vel per se, vel per suam virtutem in spatio medio diffusam. *Deinde quoniam operari sequitur ad esse, ideo operari in hoc loco exigit esse in illo loco*; & proinde agens debet immediatè attingere passum. *Tandem virtus actiua proportionatur essentix cuius est virtus; sed essentialis substantix cuiuslibet rei determinatur ad certum locum*: ergo virtus actiua cuiuscumque rei ad certum locum ita determinatur, vt non posset agere extra illum. Aliquando tamen causa particularis agit immediatè *immediatione suppositi*, quando scilicet ignis comburit lignum sibi approximatum; aliquando verò tantum *immediatione virtutis*, cùm homo per calorem ignis calefacit suas manus. Est ergo hæc differentia inter causam primam, secundam vniuersalem, & secundam particularem; quòd prima semper agat immediatè, tum *immediatione suppositi*, tum *immediatione virtutis*; causa vniuersalis secunda agit immediatè, *immediatione virtutis*; & causa secunda particularis aliquando agit immediatè *immediatione suppositi*, & aliquando *immediatione virtutis*.

Obijcies experientiam docere, quòd aliqua entia agant in distans non diffundendo virtutem suam per me-

medium ; sicut dicitur de torpedine , quæ stupefacit manum piscatoris , quam non tangit ; de sole , qui producit aurum in profundissimis locis terræ , ubi non perducitur illius calor aut influentia ; de magnete , qui ferrum attrahit etiam interposita tabula ; de tussientibus & oscitantibus , qui distantes prouocant ad tussendum & oscitandum ; ac denique de puluere sympathico , qui hominis absentis curat vulnera . *Resp.* hæc omnia non probare actionem *in distans* , quia tales effectus fiunt per diffusionem virtutis , quæ transeundo per medium attingit loca ubi fiunt prædictæ operationes ; quæ si non fiant in medio , hoc est , quia ad hoc non est dispositum : vt apparet de igne , qui comburit stuppam ; & non ferrum interpositum ; quia scilicet istud non est combustibile , sicut & illud .

Quando ergo torpedo stupefacit manum piscatoris : hoc fit per venenum quod transiens per hamum & arundinem perducitur ad piscatoris manum . Quantum ad solem generantem metalla in visceribus terræ , illius calor aut influentiæ occultæ pertinguntur ad fodinas etiam profundiores ; vnde Pythagoras dicebat calorem siderum in centro terræ esse vehementiorem ; quia ibi concentrantur omnes eorum radij . Quantum ad magnetem , attrahit ferrum per diffusionem virtutis cuiusdam particularis illi ad hoc inditæ ; si enim inter magnetem & ferrum interponeretur tabula lapidea , non ita promptè moueret ferrum ; sed expectanda esset quædam successio temporis ; vt subtilissima virtus attractiua magnetis penetraret poros lapidis interpositi . Quantum ad prouocationem tussendi & oscitandi respectu illorum qui longè distant , hoc fit non per actionem physicam , sed per intentionalem : quatenus intentionales species immittuntur à tussientibus & oscitantibus , quæ receptæ per aures & oculos excitant tussim & oscitationem in phantasia & imaginatione videntium & audientium ; vnde qui non audiunt tussientes , nec vident oscitantes , non prouocabuntur ad tussim & oscitationem .

Quantum ad puluerem sympathicum , quem alij *unguentum armarium* vocant ; non satis constat de experiētijs illius in magna distantia factis : & si constaret de aliqua earum dubium aliquod remaneret , an hoc fieret virtute naturali . De illo puluere narratur quod breuissimo tempore ministerij illius carentur vulnera

hominum, non quidem illum applicando vulneribus, sed armis tantum, quibus aliquis vulneratur, vel potius linteis sanguine vulneratorum madefactis. Non desunt plurimi, ut diximus in Theologia nostra 3. p. par. 153. qui existiment virtutem illius unguenti esse naturalem; cum Maximilianus Imperator vir sane Catholicus seculo præcedenti vteretur communiter illo pulvere ad sanandos absentes vulneratos: & iuperis annis religiosus quidam virtute & eruditione clarus in Idea scientiarum, quam dedit prælo, asserat se affuisse colloquio peritissimorum medicorum super hanc difficultatem differentium coram doctissimis Theologis; qui tandem dixerunt talis pulveris aut unguenti usum sine præiudicio fidei esse tolerandum. In communibus tamen philosophiæ principiis longè probabilius est, quòd tales experienciæ de illo unguento factæ, vel commentitiæ sint, vel huius pulveris effectus non esse naturales, iuxta tria argumenta quæ attulimus loco citato, ubi videri possunt, & responsio habetur ad præallegata. Paracelsus à pijs viris damnatus author hoc unguentum adinuenit, quòd ideo denominationem accepit *unguenti armorij*, quia applicatum armis dicitur curare vulnera.

QVÆSTIO VII.

De Causa Secunda ut instrumentalis est.

Quia sub diuersis rationibus, rebus diuersis conuenit nomen *instrumenti*: ideo iure Scotus ait instrumenti nomen esse æquiuocum. Primò enim attribuitur cuilibet causæ secundæ, ministerio cuius causæ prima operatur; & sic à D. Damasc. cap. 9. suæ physicæ, *Deus utitur causis secundis tanquam instrumentis eius*: Unde Deus hoc sensu solus dici potest causa principalis, & omnia alia erunt causæ instrumentales. Secundò *instrumentum* sumitur pro parte corporis viuientis, seu pro facultate per quam viuens operatur: & sic organa sensuum & potentia sensitiva dicuntur ab Arist. 1. de anima *instrumenta*, quibus anima sua vitalia opera exercet. Tertiò instrumentum sumitur pro qualitate præuia disponente subiectum ad recipiendam formam, licet ad illam effectiue non concurrat; & sic in quaestione præcedenti diximus quòd calor ignis sit *instrumentum*

*tum præparans lignum, ut recipiat formam substantialem ignis. Quartò sumitur instrumentum alio modo, pro ea præparatione cui forma debetur moraliter; & sic merita & sacramenta dici possunt *instrumenta*, quibus acquiritur gloria & gratia infunditur, ex pacto scilicet Dei cum creatura. Quintò denique & ad propositum, *instrumentum* sumitur pro illo omni, quod ab agente principali assumitur ad opus artificiale condendum; ut *ferra*, *ensis*, *malleus*. De instrumento autem sic sumptoria dicenda sunt, *quid sit*, *quotuplex sit*, & *an sit quid actuum*.*

CONCLUSIO PRIMA.

Instrumentum est causa agens in virtute causa principalis, non verò in virtute propria. Sicut enim causa efficiens principalis est ea quæ per vim naturalem & sibi propriam producit effectum, ut homo hominem, sol lucem; & ignis ignem; sic causa *instrumentalis* est ea quæ effectum attingit in virtute causæ principalis, quæ eam mouet ad operandum: sic ensis est instrumentum quo homo occidit inimicum, & ferra est instrumentum quo secatur lignum per motionem causæ principalis. Idèd autem inter causas efficientes reperiuntur *instrumenta*, quia sicut in vita civili & politica vnus homo vitur alio homine sibi necessario ad sua negotia; sic inter causas vna vitur alià ad suos effectus producendos, artifex nimirum malleo ut cathedram efficiat, arbor semine ut producat arborem, anima manu ut homo manducet, & Deus Sacramentis quibus animas nostras sanctificat.

Sic autem debet explicari definitio præcedens, quòd dicatur *causa attingens effectum*; & hæc particula est genus definitionis, in quo conueniunt causa principalis & instrumentalis; cùm vtraque attingat effectum. Quando autem dicitur, quòd causa instrumentalis producat effectum, *non in virtute propria, sed alterius*; ista particula tenet locum differentię, per quam causa instrumentalis, quæ non agit nisi mota ab alià, distinguitur à principali, quæ seipsam mouet ad effectum, saltem posito concursu Dei, qui necessarius est ad actionem omnium causarum.

Obijcies. Ex allata definitione indicatur, quòd causa *instrumentalis* non agat nisi ut mouetur à principali,

quod falsum est ; si enim moueretur lignum super ferram, secaretur lignum, & serra immota maneret : ergo causa instrumentalis non semper mouetur vt agat; quod etiam apparet de sigillo, cui manenti immoto, si applicetur cera, fiet impressio. *Resp.* hæc fieri per accidens, quia non solet applicari materia instrumento, sed in instrumentum materiæ ; quod quidem instrumentum ordinariò mouetur ab agente principali: & sic instrumentum nunquam agit sine motu, vel in se recepto, vt sit communiter ; vel in subiecto, vti habetur in allatis exemplis.

CONCLUSIO SECUNDA.

Instrumentum primò diuiditur in instrumentum quod, & in instrumentum quo. Instrumentum quod est superpositum quoddam seruiens superiori à quo mouetur ; vt baculus respectu hominis percutientis. Instrumentum quo est virtus agentis principalis, quæ à causa principali derivatur in instrumentum ; vt motio mallei ab artifice impressa in malleum, per quam ipse malleus agit. Instrumentum potest secundò diuidi in naturale, supernaturale, & artificiale. Instrumentum naturale est illud quod inseruit causæ naturali, principali ; vt intellectus, voluntas, manus, lingua, & pedes quibus vitur anima ad actus spirituales corporales obeundos.

Instrumentum *supernaturale* illud est quod per potentiam obedientialem Deo & hominibus inseruit ad effectus supernaturales producendos ; sic sacramenta inseruiunt ad producendam gratiam, ignis inferni ad torquendos dæmones, & lutum ad illuminandos cæcos. Instrumentum *artificiale* illud est quod inseruit artificibus ad efficienda opera suæ artis ; vt malleus ad faciendam cathedram, & serra ad secandum lignum.

Instrumentum vlteriùs diuidi potest in coniunctum & separatum. Instrumentum *coniunctum* est illud, quod vnitur causæ principali ; & sic manus dicitur instrumentum *coniunctum* animæ ; quia anima est vnita manui quam informat. Instrumentum *separatum* est illud quod emissum à causa principali producit suum effectum mediante virtute sibi communicata ; sic semen emissum ab arbore dicitur instrumentum *separatum*, quan-

quando gignit arborem , non propria virtute , sed virtute sibi impressa ab arbore , à qua decisum est . Pro instrumento coniuncto dicunt Theologi *humanitatem Christi fuisse instrumentum coniunctum respectu miraculorum , quæ Deus operatus est* ; quia personaliter coniungebatur Verbo D.

CONCLUSIO TERTIA.?

Quantum ad tertiam difficultatem *an instrumentum sit actiuum propriè* , videtur Scotus inclinare in partem negatiuam ; quia in hoc causa instrumentalis à principali distinguitur , quòd illa non agat ex se & virtute quæ sit illi propria , sed ex actiuitate à causa principali emendicata : quod denotat ipsam ex sua natura non esse actiuam propriè . Deinde si instrumentum esset actiuum ex seipso , in *esse quieto* existens haberet potentiam agendi ; sed instrumentum nullam habet actiuitatem , quandiu remanet in statu quieto , vt patet de ferra , quæ in angulo quiescens nihil agit , nisi prouocetur ab artifice ad scindendum lignum . Tandem instrumentum nihil habet præter quantitatem & figuram , quæ sunt de genere passiuorum . Si enim quantitas vt quantitas posset agere , omnis quantitas posset assumi ad eosdem effectus producendos ; & sic clavis posset scribere & baculus scindere lignum . Si etiam instrumentum ratione figuræ posset agere , gladius ex charta figuratus æque posset secare , ac si esset ferreus .

Hoc non obstat quin possit etiam dici , quòd instrumentum dicatur etiam aliququaliter actiuum ; quandoquidem penna est instrumentum scribendi , quæ concurrat actiue ad scriptionem : ratione suæ figuræ , ferra secans lignum expellit corpus ligni à loco quem permeat , quod est *agere* : Sigillum etiam imprimit suam figuram in subiectum dispositum . Adde quòd instrumentum reuocetur ad causam efficientem , quæ diuiditur in principalem & instrumentalem : ergo debet habere aliquam efficiendi virtutem , quod vltro non negat Scotus ; qui tantum contendit actiuitatem non esse necessariam ad rationem instrumenti vt sic : quandoquidem aliqua sunt instrumenta , quæ sunt *actiua* , vt vidimus ; licet dicantur maiori ex parte *passiua* , quia subsunt actiuitati causæ principalis , quæ illis vtitur ad effectus sibi proportionatos .

QVÆSTIO VIII.

De Causa Secunda ut est Exemplaris .

Exemplar apud Latinos , idem est ac Idea apud Græcos ; & per exemplar seu ideam intelligi debet similitudo quadam in mente existens , quæ ipsum artificem dirigit , ut quid simile producat ad extra ; unde causalitas exemplaris consistit in directiuitate artificis . Existentiam causæ exemplaris probat præceptum Dei ad Moysem . Exod. 25. *Inspice & fac secundum exemplar quod tibi in monte monstratum est .* Quod confirmat Boetius metro 9. de consol. dicens .

*Ductis ab exemplo pulchrum pulcherrimus ipse,
Mundum mente gerens .*

Cui veritati subscribit Aug. 1. de Retract. cap. 4. vbi constituit mundum intelligibilem in mente D. tanquam exemplar , ad quod respiciens Deus ipse sensibilem hunc mundum produxit intelligibili prorsus similem . Ab hac assertionem stat Philosophus 7. Metaph. cap. 7. vbi constituit sanitatem mentis pro exemplari sanitati corporis . Ratio huius veritatis petitur ex discrimine inter agentia naturalia & intellectualia , quod naturalia sint ad unum determinata , ut ignis ad calefaciendum , & homo ad generandum hominem ; Intellectualia verò non sunt determinata ad unum , sed determinantur ab exemplari ; ut patet de pictore , qui indifferens est ad pingendum hominem vel leonem . determinatur tamen ab idea quam habet de pingendo homine . Sicut agendo de alijs causis necessaria diximus de singulis per tres conclusiones , sic per totidem pronuntianda sunt quæ sciri debent de causa exemplari ; quid scilicet sit causa exemplaris , an sit conceptus formalis vel obiectiuus , & ad quod genus causa debeat reduci .

CONCLUSIO PRIMA.

Exemplar est forma quam efficiens imitatur ex intentione agentis determinantis sibi finem , ut loquitur August. 12. de Ciu. Dei cap. 24. quæ definitio coincidit cum alia , quæ dicitur quod idea sit id ad quod respicit causa efficiens , dum operatur , ut ad eius imi-

tationem producat effectum. Licet autem hæc definitiones videantur legitimæ, quia constant suo genere & sua differentia, & sufficienter explicant naturam ideæ seu causæ exemplaris; quia tamen non omnia expressè designant, quæ concernunt exemplaris rationem, quoniam quæri posset ulterius ad quodnam genus causæ spectet exemplar, & utrum influat penes esse obiectivum, vel penes esse formale: iure merito noster Columbus aliam definitionem attulit continentem omnes rationes causæ exemplaris, dicendo scilicet quod exemplaris causa sit principium effectivum per se influens in exemplatum penes esse obiectivum, quod artifex in mente gerit, iustar cuius producit ipsum exemplatum ad extra. Licet hæc definitio non sit expressis verbis apud Aristotelem, aut Scotum; evidenter tamen colligitur ex Arist. 7. *Metaphys. text. 30.* & ex Doct. Subtili in 1. *dist. 2. quest. 2.*

Causa exemplaris primò dicitur principium; & est genus definitionis, in quo causa exemplaris convenit cum efficiente principali. Dicitur 2. effectivum, quod denotat exemplar debere reduci ad causam efficientem, non verò ad causam formalem; ut dicitur in 3. Concil. Dicitur 3. per se influens, & hoc distinguit causam exemplarem à causis per accidens, quæ non influunt nisi accidentariò in effectus, ut casus, fortuna, & fatum, de quibus postea. Dicitur 4. in exemplatum, quia exemplatum seu ideatum producit suo modo ab exemplari seu ideato: unde Arist. dicit domum ad extra fieri à domo ad intra. Dicitur 5. penes esse obiectivum, ut denotetur ideam esse conceptum obiectivum rei, quæ producit ab efficiente. Dicitur 6. quod artifex in mente gerit, quia in intellectu artificis existit idea, quæ dirigit artificem in productione ideati. Hoc non impedit tamen quin idea sit aliquando extrinseca & extra intellectum agentis; quando scilicet pictura regis inservit ad faciendam alteram regis picturam. Additur denique iustar cuius producit ipsum exemplatum ad extra; quia agens intendit producere aliquid simile exemplari quod habet de effectu producendo: unde si eveniat ut præter intentionem agentis aliquid producatur simile; hoc non debet dici oriri à causa exemplari. Porro exemplaria dantur tantum respectu rerum artificialium, non verò respectu naturalium: quando enim homo producit hominem, non dirigitur à causa

exemplari: benè autem quando efficit domum vel cathedram. Hoc tamen intelligendum est tantùm de causis secundis, non de Deo, qui entia naturalia produciens habet ideas illarum: unde de Deo dicit Boetius lib. de Consol. metro 9.

*Ducis ab exemplo pulchrum pulcherrimus ipse
Mundum mentegerens.*

CONCLUSIO SECUNDA.

Idea seu exemplar non est conceptus formalis; quem habet agens, sed est conceptus obiectivus, ad quem terminatur conceptus formalis, quo efficiens cognoscit obiectum. Sic Scotus in 1. dist. 35. quæst. vn. contra Alensem & duos ex eius discipulis præcipuos D. Thomam, & S. Bonau. Probatur ex Arist. 7. Metaph. text. 23. sanitas & domus extra mentem artificis fit ex sanitate & domo extra intellectum; sed ista domus non efficitur similis cognitioni, sed domui obiectæ cognitioni artificis: ergo idea non est conceptus formalis, sed conceptus obiectivus rei quæ efficitur. Experientia hoc comprobatur. Posito enim quòd pictor viderit regem, species illius remanet intra mentem pictoris, cum autem pictor vult delineare imaginem regis, non respicit ad suam cognitionem, quæ est conceptus formalis, sed respicit ad speciem derelictam in sua phantasia, quæ est conceptus obiectivus: ergo idea rei efficiendæ est conceptus obiectivus, non verò formalis. Deinde idea est idolum & exemplar rei faciendæ, quod aspiciens artifex intendit producere rem illi similem, sed conceptus formalis non est id quod aspicit artifex sed id quo artifex respicit obiectum; ergo idea non est conceptus formalis, sed obiectivus. Tandem ita se habet exemplar externum sicuti internum, id est ita se habet species regis existens in imaginatione pictoris, sicut se habet alia picturæ regis, dirigendo pictorem, in pictione recenti ipsius regis; sed exemplar externum est quid obiectivum: ergo exemplar internum erit etiam obiectivum, proindeque idea est conceptus obiectivus, seu obiectum quod dirigit pictorem & artificem ad faciendum quid simile ad extra.

Maneat ergo quòd exemplar non sit ipsamet cognitio quam habet artifex exemplariter agens, ut volunt Thomistæ cum suo Doctore 1. p. quæst. 25. art. 5. sed quod

quod sit *obiectum* talis cognitionis; ita quòd idea designet rem ipsam, idea scilicet hominis hominem, & idea equi equum; non quidem in se realiter existentes, sed in mente artificis: unde vocantur obiecta intentionalia. Hoc videtur conforme D. Paulo ad Heb. 11. dicenti *Fide intelligimus aptata esse secula verbo Dei, ut ex inuisibilibus visibilia fierent*; quod denotat obiecta intentionaliter contenta in D. mente fieri existentia realiter per actualem eorum existentiam: quod præsупponit ideas in Deo sicut in creaturis non esse intellectiōnem D. *ut sic*, nec intellectiōnes creaturarum intellectualiū, sed illarum *obiecta*.

Obijcies. Idea ex Arist. 7. *Metaph. text. 23.* dicitur esse forma in anima; sed forma redollet conceptum formalem: ergo idea est conceptus formalis. *Resp.* Ideam non esse formam informantem, sed formam repræsentatiuam, & obiectiuam, ad cuius similitudinem efficiendam artifex laborat; ut patet de domo in mente artificis existenti, quæ est *obiectum* ad quod artifex respiciens efficit domum ad extra. Si quis dicat *exemplar esse expressiuum rei*, & exprimere spectare ad conceptum formalem: *Resp.* idèd exemplar dici *expressiuum*, quia est obiectum dirigens artificem, ut efficiat ad extra aliquid simile operi existenti ad intra. *Dices.* Si idea esset conceptus obiectiuus, vel esset conceptus rei quæ fieri debet, vel alterius; quod verumque dici nequit. *Resp.* Ideam esse conceptum rei eiusdem quæ fieri debet, sed diuerso modo se habentis; in mente enim artificis res est tantum intentionaliter, & repræsentatiuè; in se autem est entitas realis actualis.

CONCLUSIO TERTIA.

Exemplar reducitur ad causam efficientem, & non ad causam formalem, ut volunt aliqui. Sic Scotus in 1. dist. 35. *quæst. 1.* conformiter ad Arist. 2. *Phys. text. 33.* Idem admittunt D. Dionys. 4. *de Div. Nom.* Et Aug. 12. *Ciuit. cap. 25.* affirmantes ideas esse rerum existentium causas effectrices. Ratio nostra est quòd causa efficiens diuidatur in naturalem, quæ absque ideis operatur, qualis est ignis, leo, & homo, producentes ignem, leonem, & hominem, & in intellectualem, quæ ideis utitur, ut efformet certos quosdam effectus, quos intendit producere: ergo ex hac diuisione colligitur,

gitur, causam *exemplarem* debere reuocari ad efficien-
tem. *Deinde* forma naturalis est causa effectrix suorum
effectuum, ut patet de anima rationali, quæ producit
effectus spirituales, & corporeos: ergo idem dicendum
est de forma artificiali, quæ est idealis, & exemplaris
causa. Tandem causa exemplaris non pertinet ad ma-
terialem, cum illa non sit in Deo nec in Angelis, in
quibus est illa; non spectat etiam ad causam formalem,
quæ ob sui imperfectionem non est in Deo, nec ad fina-
lem reducitur, quoniam exemplatum non dependet ab
exemplari tanquam à fine, sed tanquam à principio
concurrente ad ipsius exemplati existentiam, ergo su-
perest, ut causa exemplaris reducat ad causam effi-
cientem.

Obiicies. Idea est forma extrinseca rei faciendæ in
mente agentis intellectualis præexistens: ergo debet
reduci ad causam formalem. *Resp.* Ideam posse dici
formam respectu efficientis quod informat, non verò
respectu operis producti; talis enim forma non existit
in effectu, nec illum informat: quod tamen requiri-
tur ad veram rationem formæ. Quod autem exemplar
debeat dici informare causam efficientem, patet ex hoc
quod exemplar nihil aliud sit quàm species intelli-
bilis impressa intellectui, quæ illum informat: licet
autem idea sit forma respectu agentis, non tamen est
forma operis, & sic non debet reduci ad causam for-
malem, sed ad causam efficientem: quia concurrat
cum efficiente ut producat effectum talis vel talis arti-
ficii. Dices forma dat esse rei, sed idea dat esse tale ef-
fectui: ergo idea ad formam pertinet. *Resp.* ad mino-
rem. Idea facit effectum esse talis vel talis artificii:
remote, & antecedenter, quatenus determinat causam
efficientem ad tale vel tale opus, unde diximus, quod
idea possit dici forma efficientis: non tamen hoc facit
proximè, & formaliter; cum enim idea non sit in effe-
ctu, non tribuit illi esse.

CAPUT IV.

De Causa Finali.

Quia intentionis ordinem sequeretur, præponere
deberet explicationem *causæ finalis*, quia finis
mouet efficiens ut educat formam de sinu materiæ, &
com-

compositum constituat : quod indicat causam finalem in intentione præsupponi ad alias causas . Quia tamen physicus principaliter se applicat ad existentiam, & executionem rerum , ideo cùm in ordine executionis finis sequatur ad omnia causarum genera , vt communi fertur axiome , *quod est primum in intentione est ultimum in executione* ; proinde non immeritò iuxta communem methodum prius instituere debuimus examen aliarum causarum , quàm istius : vnde de fine agentes in hoc capite vltimo sex obiter dicemus ; nimirum *quid sit finis , quotuplex sit finis , an finis sit vera , & realis causa , an causet secundum esse reale , & intentionale , quenam sit finis causalitas , quenam denique agant propter finem* : & hæc omnia expediuntur quæstione vnica per diuersas assertiones ,

QVÆSTIO VNICA.

Quenam dicenda sint de Causa Finali ,

Diuersimodè sumitur nomen *finis* . 1. scilicet pro termino continui , & sic punctum dicitur finis lineæ . 2. Pro limitibus alicuius loci , & sic vrbs vltima , quæ terminat Galliam , dicitur finis regni . 3. Pro completionem operis , sicque finita dicitur domus quæ suum habet complementum . 4. Pro consumptione cuiuscumque rei , & sic pecunia , & vinum dicuntur finita quando consumpta sunt . 5. Pro desitione durationis , & sic mors dicitur finis vitæ . 6. Denique , & ad propositum nostrum , finis sumitur pro illa causarum quæ excitat agens ad operandum , & de causa sic accepta sermocinandum est .

Dico 1. *finem* definiri ab Arist. 2. *Phys. text. 29. Id cuius gratia aliquid fit* . Quantum ad etymologiam huius nominis , finis dicitur à fune ; olim enim metæ & termini terrarum constituiebantur funibus , iuxta id quod habetur Psal. 16. *funes ceciderunt mihi in præclaris* : Et alio in loco , *dinisit terram in funiculis distributionis* . Cuius ratio potest assignari , quod sicut trahimus fune quod optamus ; ita ob finem consequendum multa operamur etiam difficiliora . Quantum verò ad ipsius naturæ explicationem , non immeritò diximus ; quod sit illa causarum , propter quam , & cuius gratia effectus producitur ; si enim quæretur cur homo

homo laboret, cur scholasticus studeat, cur calefaciat ignis, cur denique homo generet: in promptu respondetur hæc fieri, ut pecuniam acquirat, ut euadat doctus, ut comburat materiam sibi applicatam, & ut effectum producat sibi similem. Quod legitima sit præcedens definitio, patet ex hoc quod constet suo genere & suâ differentiâ, & quod assignet proprium caracterem causæ finalis. Quando enim dicitur, quod sit *id*, *id* est, quod sit causa; quæ particula induit rationem generis: in quo finis conuenit cum materia, forma, & efficiente. Quando etiam dicitur, *cuius gratiâ aliquid fit*; hoc importat differentiam causæ finalis: sicut enim efficiens est *id à quo*, materia est *id ex quo*, & forma est *id per quod*; sic finis est *id propter quod*, seu cuius gratiâ, aliquid fit.

Dico 2. Finem diuidi in finem *cuius gratiâ*, & in finem *cui*. Finis cuius gratia est bonum quod volumus; finis verò *cui* est persona cui volumus tale bonum: sic quando pater laborat ad dirandum filium, diuitiæ sunt *finis cuius gratiâ* pater laborat, & filius est finis *cui* laborat pater. Finis diuiditur secundo in *finem operis*, & in *finem operantis*. Finis operis est ille ad quem opus ex natura sua tendit: finis verò operantis ille est quem sibi præfigit operans pro libito; sic finis architecturæ est habitatio, & finis architecti est lucrum aut vana gloria. Licet autem hi duo fines sint diuersi in agentibus liberis, attamen in naturalibus idem est finis operis & operantis. Finis tertio diuiditur in *ultimum* & *intermedium*. Finis ultimus ille est propter quem cætera volumus, ipsum verò propter se tantum: finis autem intermedius est ille propter quem volumus aliquid, & istum vltius ordinamus ad aliud; sicut quando aliquis suum corpus macerat, ut acquirat virtutem continentie, quam continentiam vult sibi comparare propter Deum. Quarto finis diuiditur in finem *obiectiuum* & *formalem*. Finis obiectiuus est res quam volumus nobis vel alteri; finis autem formalis est actus quo possidemus rem volitam, sic Deus est finis obiectiuus beatorum, fructio verò est finis eius formalis; sic etiam pecuniæ sunt finis obiectiuus auari, possessio verò diuitiarum est finis formalis auari. Quinto finis diuiditur in *primarium* seu principalem, qui primario & directe intenditur; & in *secundarium*, seu minus principalem, qui intenditur quasi consequenter: sic
quân-

quando sacerdos celebrat, finis præcipuus sacrificij debet esse cultus Dei; finis verò secundarius est stipendij perceptio. Sextò finis distribuitur in *naturalem* & *supernaturalem*; finis naturalis ille est, qui potest obtineri viribus naturæ, vt patet de sanitate, quæ est finis naturalis medici; quoniam illam causare potest per remedia naturalia: finis supernaturalis est ille, qui naturæ vires superans non potest acquiri per media naturalia, sic iustificatio seu sanitas spiritualis animæ est finis supernaturalis hominis: quia non potest obtineri, nisi per gratiam, quæ est supernaturalis ordinis. Finis denique potest considerari, vel *in ordine ad agens*, quando ipsum mouet ad simpliciter operandum; vel *in ordine ad media*, quando ex pluribus medijs possibilibus mouet agens vt hoc vel illo medio vtatur.

Dico 3. quòd finis sit vera & realis causa. Sic docetur communiter contra Hurtadum. Illud enim est causa realis & physica, quod physice mouet efficiens ad agendum, sed finis mouet propriè & realiter efficiens ad efficiendum compositum, quod ab ea fine dependet, tanquam à causa cuius gratia fit: ergo finis est vera & realis causa physica. *Deinde* finis propositus per intellectum voluntati mouet propriè voluntatem vt agat, & non fictè aut imaginariò: ergo finis est causa realis, quoniam realiter causat, & mouet ad actionem realem & physicam. *Tandem* Philosophi admittunt quatuor vera & realia causarum physicarum genera; sed finis est vnum ex illis: ergo finis est vera, & realis causa. *Dices 1.* Causa realis debet existere realiter vt causet; sed sæpius nondum existit finis, quando mouet ad agendum, vt patet de sanitate, quæ non existit, quando ægrotus sumit pharmacum: ergo finis non est causa realis & physica. *Resp.* ad causam realem non requiri, quòd semper realiter existat: sed sufficit, quòd realiter causet: potest autem causare antequam existat, modò cognoscatur ipsius realis possibilitas, & illius conuenientia & bonitas innotescant. *Dices 2.* Finis non est principium, nam finis & principium opponuntur: sed quod non est principium, non potest esse causa, quandoquidem causa est principium: ergo finis non est propriè causa, *Resp.* dist. maj. Finis non est principium, sumendo principium pro inchoatione rei: concedo; quia finis & principium sic sumptum opponuntur; finis non est principium, sumendo principium pro

pro causa rei, & pro eo à quo res proficiscitur, nego.

Dices 3. Causa est id ad cuius *esse* sequitur aliud; sed ad *esse* finis non sequitur actio, imò cessat actio, quando finis incipit existere: ergo finis non est causa. *Resp.* dist. mai. causa est id ad cuius *esse* sequitur aliud; ad cuius *esse* possibile vel præsens, concedo: ad cuius *esse* præsens, nego. Quando enim ægrotus sumit pharmacum propter sanitatem recuperandam, sanitas nondum est præsens; quia tamen illa sanitas est possibilis, & speratur futura, idè est causa sumptionis pharmaci. *Dices 4.* finis mouet tantum metaphoricè excitando voluntatem efficientis, vt agat: ergo finis non est causa realis. *Resp.* motionem metaphoricam hic non excludere realitatem, sed Philosophi vocant motionem finis metaphoricam, quia excitat tantum ad agendum, & non mouet sensibilibiter, sicut efficiens mouet baculum: ista tamen motio verè realis dici potest, quia à parte rei, & imaginariò excitat voluntatem, vt producat veram, & realem actionem. Si Aristoteles 1. de Gener. text. 55. dicat causam efficientem esse veram causam, finalem verò esse causam translatitiā, & metaphoricā. *Resp.* Philosophum loqui, non absolutè, sed comparatè; quòd scilicet finis non habeat influxum ita sensibilem, qualem habet causa efficiens, quæ ob hoc dicitur antonomasticè causa; hoc tamen non impedit quin sit realis, quoniam ab ente rationis non sit ens reale; sed à fine est effectus realis, nempe sanitas causata.

Dico 4. quantum ad causalitatem finis, quòd illa nihil aliud sit, quàm ratio formalis per quam finis dicitur causare; ita quod posita illa ratione finis causet, & illa ablata non causet: quid autem sit illa ratio formalis seu causalitas finis, diuersa est authorum opinio. Soncinas enim, & Medina cum Thomistarum plurimis existimant cognitionem seu apprehensionem finis esse causalitatem illius. Faber, & Scotistarum aliqui tenentes cognitionem finis esse tantum conditionem necessariò requisitam vt finis causet, volunt bonitatem vel malitiam finis esse illis causalitatem; quia in illorum mente voluntas vtramque appetere potest: quod tamen maioris notæ Theologi, & philophi repudiant, afferentes voluntatem non posse velle malum *qua malum*; vnde ad quæstionem de causalitate finis in actu secundo

Respondeo primò quòd sola bonitas, quæ apprehen-

henditur in fine, sit causalitas finis in actu primo, seu ratio formalis motiua, propter quam obiectum possit mouere agens vt illud prosequatur. Dixi *sola bonitas*, quia malitia obiecti non potest voluntatem mouere ad sui prosecutionem: quoniam *in malo nulla est appetibilitas*, aut *conuenientia*, vt aliquando dicitur. Quod si aduersarij dicant aliquem posse velle malum vt malum est ad exercendam suam libertatem; hoc potest negari, quia voluntas non habet libertatem aut indifferentiam circa malum: cum malum sit extra sphaeram suæ actiuitatis, quæ limitatur ad id quod est sibi conueniens & bonum, nec vlllo modo se potest extendere ad malum. Adde quod si voluntas ad exercendum actum suæ libertatis prosequeretur malum tunc in illo actu aliquid boni quæreret, exercitium scilicet suæ libertatis, quod sibi videretur conueniens: nec amplius proinde esset malum. Dixi etiam, *qua apprehenditur*; quia non sufficit quod obiectum sit bonum, vt moueat voluntatem; sed bonitas illius debet cognosci: quia cum voluntas ex natura sua cæca sit, non potest prosequi obiectum quantumcumque sit bonum, nisi præcognoscat illius bonitatem, quoniam *ignori nulla cupido*. Vt obiectum ergo possit mouere voluntatem ad agendum, requiritur quidem apprehensio bonitatis obiecti; sed talis cognitio non est causalitas ipsius finis, sed est tantum conditio sine qua obiectum bonum non excitaret voluntatem ad agendum.

Respondeo secundò, quod causalitas finis in actu secundo consistat in actuali motione metaphorica, per quam obiectum cum bonitate sua cognitum & apprehensum mouet voluntatem ad agendum. Hoc intelligi potest ex antecedenti assertionem. Si enim causalitas in actu primo consistat in hoc quod bonitas apprehensa obiecti possit excitare voluntatem ad agendum, causalitas in actu secundo consistere debet in actuali motione: quod vt intelligatur facilius, quinque notari debent in causa finali. Primum est *entitas rei* quæ dicitur finis, secundum est *eius bonitas* quæ est principium finalisandi seu mouendi agens, tertium est *cognitio finis* quæ est cognitio sine qua finis non causaret, quartum est *effectus finis* seu id quod propter finem factum est, quintum denique est *causalitas ipsius finis*, per quam finis constituitur formaliter in *esse causæ finalis*, quam diximus consistere in motionem ac determinationem obiecti.

Finis quæ mouet voluntatem ad agendum. Illa autem motio est quidem realis, quia voluntas mouetur realiter ab obiecto reali, vt producat actionem realem, & ab his tribus illa motio potest iure dici realis, dicitur tamen etiam *metaphorica*, quia non mouetur eodem modo realitatis, quo manus mouet lapidem, sed simili modo mouet, quo bonum mouet agens, vt agat, quæ motio dicitur *moralis*, & *metaphorica*; cum tamen realitatem absolutam non excludat.

Dico 5. Affirmari posse, quod finis causet secundum esse intentionale, & secundum esse reale, diuersimodè explicando hos terminos; Si enim per esse intentionale intelligatur obiectum cognitum, & apprehensum mouere agens ad operandum, reuerà obiectum causat, & finalisat per suum esse intentionale; quia bonitas obiecti non moueret agens ad operandum, si non præcognosceretur talis bonitas finis, vt antea dictum est, quoniam scilicet voluntas non fertur in incognitum. Si verò per esse intentionale intelligatur quod illa cognitio obiecti sit id quod obiectiue excitet agens ad operandum, tunc finis non causat per suum esse intentionale; quia non est cognitio quæ mouet: sed est tantum conditio sine qua finis non moueret actum, vt antea dictum est. Quod autem cognitio obiecti non censeatur mouere, & finalisare agens, patet ex hoc quod finis moueat formaliter per id quod agens prætendit obtinere; sed agens non contendit obtinere cognitionem bonitatis obiecti, nec ægrotus cognitionem sanitatis, bene autem obiectum ipsum bonum, seu sanitatem: ergo cognitio obiecti seu esse illius intentionale non causat, sed illius esse reale.

Hoc vt euidentius pateat, tria designari possunt in causa qualibet, vt potè in igne, nempe principium quod, scilicet ignis, principium quo, seu calor, & conditio sine qua ignis non posset calefacere, quæ est approximatō. In causa finali similiter principium quod, est obiectum quod mouet agens, principium quo est bonitas obiecti per quam agens ad agendum mouetur, conditio verò necessaria est cognitio seu apprehensio obiecti, sine qua obiectum quantumuis bonum non moueret agens ad operandum. Difficultas præcedens intelligitur de principio quo causæ finalis, *utrum bonitas v. g. obiecti causet, moueat, & finaliset, per suum esse reale, vel per intentionale, & ad hoc respon-*
de-

demus quòd propriè loquendo moueat per suum *esse reale*, nempe per ipsam bonitatem obiecti: licet ad talem motionem concurrat cognitio talis bonitatis, quod est obiecti *esse intentionale*: non quod cognitio sit principium formaliter & intrinsecè influens in effectum sed quia est conditio sine qua obiectum non influeret *actu*, nec voluntas prosequeretur illud, nisi ipsius bonitatem cognosceret.

Dico 6. quæstioni vltimæ de agentibus, quæ agunt vel non agunt propter finem, diuersas deberi responsiones, pro diuersitate agentium, quæ sunt in rerum natura, vt pote Deus, Angeli, homines, bruta, & insensibiles naturæ. *Agere propter finem* nihil aliud est quàm habere aliquod bonum suæ operationi præfixum, quod mouet agens ad operandum. Duplicitè agens potest intelligi agere propter finem, materialiter nimirum & formaliter. *Materialiter* aliquid agit propter finem, quando tendit in id quod est sibi conueniens, non cognoscendo illam conuenientiam, nec proportionem mediorum, quæ adhiberi debent ad attingendum finem. *Formaliter* verò aliquid agit propter finem, quando tendit in bonum cognitum, & cognoscit proportionem seu aptitudinem mediorum, quæ ad attingentiam talis finis sunt propria. Cùm ergo entium quæ sunt in natura aliqua cognoscant finem, media, & proportionem mediorum cum fine; alia verò non cognoscant ista: ideo pro diuersitate agentium afferendæ sunt diuersæ responsiones: vnde.

Respondeo 1. *Deum agere propter finem propriè*. Sic Scotus in 1. dist. 1. quæst. 5. non quidem ratione sui sed ratione aliorum à se. Non agit, inquam, Deus propter finem ratione sui; quia sicut non habet causam efficientem ratione suæ ineffectibilitatis, quæ impedit quòd possit esse ab alio; sic non habet causam sui finalem, ratione suæ indefectibilitatis, cum finis dirigat agens, & Deus nō possit dirigi, quia est regula sui ipsius. Quod autem Deus agat propter finem ratione aliorum à se, habetur ex Prouerb. 16. *Vniuersa propter semetipsum operatus est Dominus*. Apocalyps. 1. *Ego sum α & ω, principium & finis*. Ratio ex hoc desumitur, quòd agens propter amorem alicuius agat propter finem: sed Deus agit propter amorem hominum, & homines amat propter se ex 1. ad Cor. 13. *Omnia vestra sunt, vos autem Christi, Christus autem Dei*: ergo Deus agit

Philos. R. P. Boywin. T. II, Phys. Pars I. L pro-

propter finem respectu aliorum, unde probat Doctor in 1. dist. 2. quest. 2. causam finalem nullam inuolucere imperfectionem, imò esset maxima imperfectio, si aliqua non ordinaret ad bonos fines.

Respondeo 2. *Angeli & homines agere propriè & formaliter propter finem.* Quia agere propter finem formaliter est cognoscere finem, cognoscere media, cognoscere proportionem seu vtilitatem aut necessitatem mediorum ad finem attingendum, & illa ordinare eligendo aptiora, & respuendo ea quæ minùs apta sunt; sed ea posse facere Angelum & Hominem, qui pollent intellectu, patet ex hoc, quòd medicus ægrotum sanare tentans ex pluribus remedijs illa applicet, & respuat alia: ergo Angelus & homo agunt propter finem formaliter: cùm Angeli possint hoc facere quòd facit medicus: imò dæmones applicando *astina passivis* certos quosdam morbos expellunt. Deinde consultatio de medijs adhibendis vel reiiciendis denotat quòd homines agant formaliter propter finem.

Respondeo 3. *Bruta animantia ab aliquibus ex nostris existimantur agere propter finem formaliter*, quia per operationem sensitivam apprehendunt quod sibi bonum est, & ad id prosequendum quod sibi bonum videtur applicant media. Quod patet ex pluribus exemplis animalium domesticorum, quæ apprehendunt ea quæ sibi sunt convenientia, illa quærunt, & applicant media ad eorum obtentionem. Hoc mirabile videtur in formicis, quæ opportuno tempore congerunt grana, *illis cor abrodunt ne germinent*, quandoque ea ventilanda exponunt aeri *ne putrescant* nimio calore aut humiditate: quæ sanè sicut & ea quæ videntur communiter de apibus, araneis, & multis animantibus denotare videntur talia agere propter finem. Attamen meo sensu melius est dicere bruta agere quidem propter finem perfectiori modo quàm agentia naturalia cùm per sensus apprehendant finem suum, exequantur opera in illum tendentia & suavitatè illius electa, & moveant in ipsam per aliqualem cognitionem, quidquid dicat Carthesius, qui vitam, & omnimodam cognitionem adimens bratis, ea censet nihil aliud esse, quàm secretas machinas elaterijs agitas, horologiorum ad instar: non tamen propriè & formaliter agere propter finem. Nam ad talem modum agendi non sufficit cognitio finis, aut cognitio mediorum, vel etiam

applicatio mediorum conuenientium ad finem, quæ proportionis cognitio est opus intelligentis.

Agens dicitur cognoscere proportionem mediorum cum fine, quando ponderat merita finis, quando examinat mediorum vtilitatem, quando illa respuit & ista eligit, quando proprio consilio agens se regit per consultationem, per experientiam, per instructionem, per exemplaria, & per similia quæque, nec eodem modo agit, sed vsu proficit, ac varijs circumstantijs variè operatur: hæc omnia contingunt in hominibus, qui non omnes eodem modo se regunt, sed excogitant diuersas inuentiones viuendi, ædificandi, se vestiendi, & alia exequendi opera. Bruta verò animantia eiusdem speciei semper eodem modo agunt, pariter quot annis nidificant, congregant grana, mella conficiunt, & similia operantur simili modo, quod denotat manifestè, illa *non agere ex consilio*, sed *ex solo impulsu naturæ*; quandoquidem à natiuitate omnem suam obtinent industriam: ergo probabilissimum est bruta animantia omnia facere per solum instinctum naturalem, quo feruntur in ea quæ phantasia illis exhibet esse conuenientia, non verò propter finem formaliter operari, vti faciunt homines quod satis declarat Aug. 11. de Ciuit. cap. & Scotus, Metaph. quæst. 3.

Respondeo 4. *Res naturales ratione carentes agunt quidem in finem, sed formaliter & propriè non agunt propter finem*, quod est proprium agentium rationalium, vt diximus: quod dicere est agentia destituta sensu agere tantum in finem materialiter. Non quòd intendant finem in seipsis, sed quia tendunt in finem sibi præscriptum à natura, vel potius à Deo, qui est author naturæ, quod est contra Democritum, Leucippum, ac Epicurum postea: qui volentes omnia agi & agere temerarijs & fortuitis concursibus, negabant naturæ motum tendere determinatè in aliquem finem. Euidenter probari potest hæc veritas ex hoc quod omnia fiunt in naturalibus, vel à casu & fortuna, vel ad aliquem finem determinatum à Deo; sed agentia naturalia non agunt à casu, quia semper eodem modo operantur, quoniam ignis semper calefacit, leuia semper ascendunt sursum & graua deorsum semper mouentur: ergo entia naturalia agunt in finem, non quidem formaliter & propriè, quia non cognoscunt fines suos, sed materialiter & passiuè, quia operantur ea ad quæ sunt determi-

nata à Deo, quicum sit agens præstantissimum nihil per se aut per causas secundas operatur temerè, sed propter aliquem finem, quem sibi præfixit prouidentia.

Obiicies. Si naturæ præisset ratio quædam omnia ordinans in finem, nihil superfluum, ineptum, & defectuum fieret in operibus naturæ; sed multa in naturalibus sunt superflua, inepta, & defectiua: ergo. Probatur minor, ex bestiis pluribus, quæ superflue sunt & importunæ, ut serpentes, vermes, muscæ, & pulices; itemque ex hoc, quod lingua detur piscibus mutis, genitalia mulis sterilibus, & mamma viris; quæ omnia denotant superfluitatem in naturalibus. Ipsius naturæ ineptas productiones ostendunt monstra. Et eiusdem naturæ defectus patent ex hoc quod effundat è suo sinu teneros infantes qui nudi sunt, inermes, egentes, teneri, & omnibus viribus destituti. *Respondeo* propter pauca quæ præter rationem videntur, non esse calumniandam Dei prouidentiam, quam vniuersa creaturarum familia magnificè demonstrat; maximè cum allegata, nec superflua sint, nec inepta, nec defectuosa. Bestiæ enim illæ non carent suis finibus, quandoquidem mundum populosiorem reddunt, ut plebecula ciuitatem; specierum suarum varietate complent vniuersum, inferunt medicinæ pro variis vñibus, perfectiora alunt animantia, authorisque sui solertiam commendant in minoribus; vnde hec dici non debent superflua: sicut nec quod dentur linguæ piscibus mutis ad gustatum, genitalia mulis ad emittendum urinam, & mammæ viris ad ornatum, & præsidium pectoris. Productio etiam monstrorum, quæ aduenit tantum præter intentionem naturæ, non est inepta; quia sicut umbræ in picturis, non mediocriter illustrant alia opera, quæ sunt conformia intentioni naturæ. Nec denique infantes teneri & inermes arguunt naturam esse defectuosam, quod enim non habent ex se obcinere possunt à duobus parentibus, quibus eò chariores efficiuntur quod infirmiores sunt in seipsis.

Quæres *quinam sint effectus finis*. Ut compleantur omnia, quæ scitu sunt necessaria respectu finis, non prætermittendum est id quod duobus verbis egregiè colligit doctissimus noster Frassennus, hunc ordinem reperiri in agente intellectu propter finem. Primò intellectus proponit voluntati agentis rem conuenientem, deinde voluntas illam desiderat, ex desiderio pro-

procedit intentio acquirendi finem per media, dehinc fit consultatio de medijs, ad hanc sequitur electio alicuius præ ceteris, facta electione voluntas imperat potentijs executivis ut applicent media ad opus, ex hac applicatione resultat finis consequutio, & ad consequutionem sequuntur amor, gaudium, fruitio, & delectatio, quibus voluntas quiescit in fine obtento.

S E C T I O III.

De Causis per accidens Rerum Naturalium.

CAusa per accidens tribus modis contingit. Primò *privative*, per sui absentiam; sic sol dicitur causa per accidens tenebrarum. Secundò *ratione alicuius accidentariò coniuncti eum causa per se*; sic musicus est causa per accidens sanitatis: quando coniungitur cum medico, qui est causa per se illius. Tertio causa per accidens dicitur illa, *qua est quidem causa per se alicuius effectus, sed quia aliquid coniungitur effectui, quod non intendebatur ab agente, ideo illa causa dicitur causa per accidens respectu illius effectus, qui raro contingit*: sic tegula cadens è tecto est causa per se descensus, sed quòd sit causa læsionis hominis alicuius transeuntis per illum locum ubi cadit, hæc est causa per accidens. Cùm autem loquuti fuerimus in prima sectione huius disputationis de *natura & arte*, quæ præsupponuntur ad compositionem rerum naturalium & artificialium; & in secunda de *causis per se*, quæ naturaliter concurrunt ad constitutionem corporis naturalis: superest ut in ista loquamur de *causis per accidens*, quæ communiter dicuntur esse *Casus, Fortuna, & Fatum* de quibus dicetur immediatè per quæstiones, quibus subiungemus aliqua de monstris.

Q V Æ S T I O P R I M A.

Quid sint Casus & Fortuna.

ANtiquorum plurimi impietate & errore pleni, præsertim Cicero ab Aristotele designatus, fortunam faciebant tanquam numen aliquod diuinum, cui multa templa consecrabant, tanquam Deo alicui in hæc inferiora suum dominium exercenti, iuxta id quod

habetur apud Iuvenalem *Satyr.* 10. Sed quia diuinitatem inconstantem, planè cæcam, & ita mobilem, ut eam depingerent antiqui super volubilem globum altero pede stantem, agnoscere ridiculum est; ideo christiana philosophia aliter ratiocinatur de *fortuna* & *casu*, quæ interdum sumuntur promiscuè, distinguuntur tamen aliquali ter, ut patebit.

CONCLUSIO.

Casus est causa per accidens in ijs quæ agunt ex determinatione naturæ, ad quam rarò sequitur effectus, unde si regula è tecto decidens hominem occidat, tunc est casus: quia regula fertur deorsum ex determinatione naturæ, fortuna est causa per accidens in ijs quæ agunt ex electione, ad quam rarò etiam effectus sequitur; & ob hoc si quis intenderet fodere terram ad plantandam arborem, & fodiendo terram inueniret thesaurum, quem nec intendisset antea, nec de eo cogitasset, tunc esset fortuna; quia homo fodiens terram agit ex electione.

Licet confundantur interdum casus & fortuna, & in eo sensu fortuna dicatur promiscuè de animatis & inanimatis, de naturalibus & liberis; unde lapides templi & altaris denominabantur aliquando *fortunati*; attamen, si sumantur propriè, in hoc distinguuntur, quòd casus latius pateat fortunà: cum casus conueniat agentibus liberis & necessarijs indiscriminatim, ubi fortuna competit tantum agentibus per electionem. Quando enim causa naturalis deficit à fine, & defleat ad effectum minimè intentum, tunc est casus. Dum verò causæ liberæ, ut homines, in suis negotijs deficiunt à fine proposito, & impingunt in aliquid aliud inopinatum, siue bonum, siue malum, tunc dicitur fortuna.

Ex hoc patet quòd iuxta mentem Doctoris nostri & Aristotelis lib. de bona fortuna cap. 1. fortuna præscindat à bona & mala, veluti genus abstrahit à suis speciebus. Cum enim fortuna idem sit ac causa, quæ effectum producit non intentum; si effectus sit bonus, fortuna perhibetur esse bona: si malus, mala. Sciri tamen debet quòd nullus debeat dici benè aut malè *fortunatus* in his quæ non sunt in manu sua, ut sanitas, pulchritudo, & similia; quoniam fortuna propriè est de ijs

ijs quæ agimus præter nostram intentionem. Si etiam aliquis vnum euentum bonum aut malum habeat, non propterea debet dici *fortunatus* aut *infortunatus*; quia sicut vna hirundo non facit ver, sic nec vna beata dies hominem efficit beatum.

Vt euentus censeantur fortuiti & casuales, debent quidem aduenire præter intentionem agentis, si tamen aliquis intendat in communi aliquem effectum, qui postea aduenit ex actione per quam non sperabatur talis euentus non minus debet dici *fortuitus*: vt patet de illo, qui in communi decreuisset occidere inimicum, quem postea per ictum impræuisum occideret: & ratio huius est, quod non intenderet inimicum occidere per talem ictum particularem. Sic pariter, quando ex aliqua actione particulari & impræuisa oritur bonus effectus, qui in communi desiderabatur & quærebatur, non minus censeretur fortuitus & casualis; vt patet de illo, qui vulneratus per ensen inimici, curatus fuit ab apostemate quod habebat in intestinis: quia scilicet talis non intendebat sanari per illum ictum, estò in communi speraret salutem.

Fortuna & casus locum habere possunt respectu Angelorum & cœlorum, quoniam in illis plura possunt euenire præter eorum intentionem. Angelus enim potest inspirare suo Clienti inclinationem bonam adeundum templum, non præuidendo, quod cliens ille obuium haberet inimicum, à quo occideretur; vbi talis euentus esset fortuitus respectu Angeli, qui non præuidisset aut intendisset talem occasionem clientis. Cœlum similiter naturaliter potest attrahere sulphureas exhalationes, quæ accensæ possunt comburere syluam, & condensatæ cadere possunt super caput transeuntis qui occidetur; & tunc illæ combustio & occisio erunt *casuales*. Eclipses verò solis & lunæ, etiamsi rarò accidant, non tamen attribui debent casui aut fortunæ; quia tales effectus sunt à causa determinata, qua posita, ponuntur necessariò: effectus autem fortuiti per se non intenduntur, nec determinantur à causa, sed ex quibusdam accidentibus impræuisis oriuntur.

Respectu Dei nihil est casuale aut fortuitum. Quia illud solummodò est casuale aut fortuitum, quod euenit præter intentionem agentis; sed nihil euenit præter intentionem & cognitionem Dei, qui cum sit causa vniuersalis agens per intellectum omnia præui-

det, cuncta intendit, & singula operatur cum omnibus: ergo nihil est fortuitum & casuale respectu Dei, licet aliquid sit fortuitum respectu agentis secundi cum quo Deus concurrit; ut patet per hoc exemplum. Quod si aliquis dominus posuerit nummum aureum in aliquo loco horti sui, ad quem suum servum in eodem loco fossurum mittit, tunc illa inuentio nummi aurei; quem reperiet servus, erit quidem *casualis* respectu servi, quia evenit præter intentionem illius non tamen erit fortuita respectu domini, qui talem prævidit inventionem.

Quod si in ea quæ dicta sunt obijciatur Augustinus, qui *lib. retract. cap. 2.* corrigit se quod usus fuerit nominibus *casus* & *fortuna*; ergo neutrum deberet admitti à nobis, *Resp.* Aug. illa vocabula retractare in sensu gentilium, qui usurpabant fortunam pro *numine* quodam fortuitis eventibus præidentem. Si quis dicat in superius allegata, lucrum à ludente intentum dici fortuitum; & sic non omnes eventus fortuitos esse præter intentionem agentis, ut diximus. *Resp.* Talem lucri consequutionem non esse propriè fortuitam sed accipitem; quia fortuita non debent tantum contingenter accidere, sed præter intentionem agentis. Deinde talis consequutio lucri aduenit ut plurimum; & proinde non est propriè *fortuita*.

Si quis probare velit casum & fortunam competere Deo, quia competit creaturis, dicendo scilicet Deus se accommodat causis secundis, & agit uniformiter cum illis; sed causæ secundæ non intendunt omnes casus fortuitos: ergo nec Deus. *Resp.* Deum suo concursu se accommodare causis secundis, illas iuvando modo consentaneo ipsarum naturis, concedo: consensiendo imperfectioni illarum, nego. Licet ergo causæ secundæ non intendant aut cognoscant effectus fortuitos, propter imperfectionem & finitatem sui intellectus; Deus tamen, quem nihil latet, evidenter cognoscit omnia: & sic quod est casuale respectu creaturæ, non est tale respectu Dei. Quod declarari potest per exemplum Domini, qui mittit duos servos per diversas vias ad eundem locum, vno ignorante de altero; si talis occurus referatur ad servos, qui ipsum nesciunt, ille est casualis; si verò referatur ad dominum, non est fortuitus; quia intentus est & prævisus ab illo.

Q V Æ S T I O II.

Quid dicendum sit de Fato.

Qui existentiam Fati negarent, ut astruerent omnia temerario concursu euenire, fidei christianæ opponerentur, cum similiter reuocarent in dubium gubernationem D. prouidentix, quæ fortiter attingit à fine vsque ad finem, disponit omnia suauiter, & cuncta dirigit in fines debitos. Qui etiam fatum reducerent ad corpora cœlestia, dicentes sub nomine *fati* intelligi inuitabilem astrorum impressionem, cui omnia, etiam humana negotia, subijcerentur indispensabiliter; in alium errorem impingerent: cum per illud lederetur humana libertas, tolleretur consultatio, hominesque laudandi aut vituperandi non essent, sicut nec afficiendi premio, aut plectendi pœna, si cuncta acciderent necessariò & inuitabiliter. Hæ ergo opiniones extremæ repudiari debent, & media tanquam catholica secunda est, de qua erit

C O N C L V S I O.

Si per fatum intelligatur ordo causarum secundarum præuisus à Deo, per quem Deus finit res agere & euenire contingenter & liberè, infallibiliter tamen, nil magis catholicum. Talis enim definitio *fati* nil continet quod non sit conforme principijs fidei catholicæ, quæ solemniter commendat Prouidentiam D. Sapientiam eius in regendo, libertatemque hominis in operando. Quando enim de *fato* dicitur, quod sit ordo & connexio causarum secundarum; hoc denotat Prouidentiam D. quæ causas particulares subordinauit vniuersalibus, & vniuersales secundas ipsi Deo, à quo omnia dependent, tanquam à supremo & sapientissimo moderatore omnium. Quando additur quod illa connexio causarum secundarum sit præuisa à Deo; hoc indicat omnia & singula quæ eueniunt in tempore, esse ab æterno manifesta Deo ipsi. Quando denique subiungitur quod illa connexio causarum præuisa à Deo sit talis, ut Deus finat res agere propriis moris; istud manifestè demonstrat, quod præuisio Dei respectu futurorum nullum asserat præiudiciu agentibus liberis,

quandoquidem Deus sinens omnia agentia obire fines suos conformiter illorum naturæ, permittit ut naturalia agant naturaliter, necessaria necessariò, contingentia verò & libera contingenter & liberè.

Valeant ergo qui finxerunt *fatum* esse necessitatem quandam ipsismet Dijs ii adomnantem, ut illius fatalem necessitatem mutare non possent: unde Homerus inducit Therim & Iouem deflentes futuram Achillis mortem; quam nequibant auertere, propterea quòd in fatis esset exarata, & cum alijs euentibus descripta in tabulis æneis, quas dii poterant quidem nosse, sed emendare nullo modo. Abeant, inquam, tales & tam fabulosæ Poetarum fitiones, fidesque sola adhibeatur Patribus Catholicis, qui per *fatum* nihil aliud intelligunt quàm ordinationem causarum secundarum ad effectus diuinitus intentos, salua semper libertate hominum, & immutabilitate D. præscientiæ, quarum conciliationem vidimus in logica, ostendentes durarum propositionum de futuro contingenti vnā esse determinate veram, & alteram determinate falsam.

Q V Æ S T I O III.

Quid dicendum sit de Monstris.

Licet non immeritò posset referuari hæc materia ad libros de generatione, cum inter generandum adveniant sæpius defectuositates naturæ; quia tamen hoc in libro explicantur ab Aristotele, & aliquo modo sunt à fortuna & à casu, cum rarò eueniant & præter intentionem naturæ, quæ non agit nisi ut suam formam effundat in materiam, & sibi simile producat: ideo non à ratione alienum videtur hic breuiter in tribus conclusionibus dicere, *quid sit monstrum, in quibus rebus accidat, & quanam sint monstrorum causa.*

CONCLUSIO PRIMA.

Monstrum etymologiam sui nominis desumit à monstrando inquit Aug. 21. ciuit. Dei cap. 8. ue quia futurum aliquem euentum monstrat & prædicit, iuxta Ciceronem 2. de natura Deorum; siue quia cis insolitis ab omnibus spectantur & monstrantur multis,

tis, quia monstrum est effectus deficiens ab aliqua lege, quod Aristoteles vocat *peccatum naturæ* 2. *phys. tex. 82.* Cum lex sit triplex, nempe moris, naturæ, & artis, triplex constituitur monstrum. Vnum est *morale*, quod in moribus occurrit, quando aliquid fit contra legem moralem; cuiusmodi est peccatum. Aliud est monstrum *artificiosum*, quod nihil est aliud, quàm error & defectus in operibus artificiosis. Tertium denique est monstrum *naturale*, quod à lege naturali deflectit; & illud est de quo intendimus loqui impræsentiarum.

Monstrum secundùm rem definitur *effectus naturalis à recta & solita secundùm speciem dispositione degenerans*; vt colligitur ex 2. *phys. tex. 82.* & 4. *de generat. animalium cap. 4.* Dicitur primò *effectus*, & est genus definitionis, in quo conuenit monstrum cum alijs effectibus benè ordinatis. Dicitur secundò *naturalis*, quia in artefactis si aliquis defectus contingat, non monstrum, sed error, appellatur. Dicitur 3. *à recta dispositione degenerans*, quia vbi nullus error intercessit, non est monstrum; sed necesse est, quòd effectus monstruosus deflectat ab ordine & lege quam præscripsit natura operibus suis. Dicitur 4. *à solita dispositione deuians*, quia id quod iam est in vsu non dicitur monstrum; vt quando pigmæi generantur à pigmæis, & gigantes à gigantibus. Dicitur 5. *Secundùm speciem*, quia fieri potest vt aliquod corpus habeat omnia membra benè figurata, si tamen illa figura non sit secundùm naturam specificam ad quam pertinet indiuiduum, tunc erit monstrum; vt si homo nascatur cum pede vituli quantumcumq; benè formato; quia hæc figura pedis non debetur naturæ humanæ, vnde pes ille erit monstruosus in homine, sicut pes hominis monstruositatem efficeret in corpore vituli.

CONCLUSIO SECVNDA.

Monstra enaniunt maximè in rebus quæ plura ad sui productionem & perfectionem requirunt. Vbi enim plura requiruntur, ibi facilius contingunt defectus; vnde in elementis nulla sunt monstra, quia illorum natura est simplex & vniformis. In mixtis inanimatis, puta in lapidibus & metallis, possunt interuenire monstra, quando scilicet deuiant à natura aut

proprietatibus vel figuris quas debent habere ; quia tamen in talibus non apparent defectus , ideò facile non possunt percipi illorum monstruositates . In plantis clarum est reperiri posse monstra , quoniam à via communi præter intentionem naturæ possunt habere aliquando defectus . Clarius verò in animantibus , quæ cum sint perfectiora , plura existunt ad sui complementum ; in quorum aliquo deflectere & aberrare potest natura . Imò partus hominum , cæteris paribus , frequentius monstruosi nascuntur , quàm ferarum ; cum homines libertate sua sæpiùs naturæ leges turbent , aut vi imaginationis multum valentis in corpus virtutem formatricem pervertant , aut peccatis suis hæc species suæ prouocent contumelias : vbi bruta , quæ magis viuunt secundum naturam , & quæ imaginationis impetu non plurimum turbantur , tales defectuositates non admittunt ; nisi aliquando per quædam accidentia à naturæ legibus cogantur declinare : vt leæna , quæ inopia proprii masculi pardum admittit , ex quo leopardus monstrum quoddam in Africa satis frequens procreatur .

Si quærat autem *cur Deus in mundo permittat nasci monstra* ; cum per prouidentiam suam omnia gubernet , & debeat dirigere agentia & causas ad effectus suos conformiter regulis quibuslibet speciebus præfixis : Resp. hoc permittere Prouidentiam D. propter ornatum mundi , vt fieret magis spectabilis ex deformium & elegantium varietate . Deinde vt prædictum est , ad peccata puniendâ terroremque incutiendum improbis & nefarijs hominibus . Tandem vt agnoscat creatura se indigere ope & præsidio Dei , sine quo semper deficit . Quibus addi potest Deum defectus pati inter homines , vt illi qui sunt integro corpore , & elegantiam formæ habent , gratias Deo rependant , quòd nullam in se ipsis habeant monstruositatem , quam habent alij ; & ex hoc occasionem sumant gratias agendi Dei , ipsiusque laudandi bonitatem .

CONCLUSIO TERTIA.

Varia monstrorum causa assignantur . Primò vel ob *materia redundantiam* , quæ membra multiplicat ; vel ob *materia penuriam* , quæ aliqua membra distrahit aut minuit ; vel ob eius commixtionem , quando se-

mina diuerſa ſpeciei confunduntur : vnde in Africa ſæpiſſimè reperiuntur *monſtra*, ſc. commiſcentibus bel-
luis ad aquas quæ ibi raræ ſunt ; & ideò communiter
dicitur, quòd *ſemper Africa aliquid noui habeat*. Se-
cundò ex *parte virtutis ſeminalis*, quæ ita aliquando
debilis eſt, vt perfectum fœtum efformare non valeat.
Tertiò ex *parte ſecundine*, quæ eſt pellicula fœtum in-
uoluens ; & quæ ob anguſtiam ita aliquando materiam
coarctat, vt Pigmæi procreentur ; vel ob amplitudinem
ita materiam extendit, vt ſiant gigantes. Quartò ex *parte*
influentiarum, quarum impreſſiones ita malignæ ſunt,
vt tenero fœtui maximè noceant. Quintò ex *parte qua-*
tuor qualitatum, quarum vna alteram nimium excedit ;
& ob hoc ex nimio calore aliqui infantes barbati pati
ſunt, & alij caneſcunt in puetitia ex nimia humidita-
te. Sextò ex parte imaginationis matris acta concipi-
entis, quæ interdum tanta eſt, vt mulieres fœtui
ſuo impreſſerint figuram eorum, quæ firmiter in tem-
pore conceptionis apprehenderunt. Septimò denique
propter parentum occulta crimina, quæ Deus vindicare pe-
rotrat in fœtibus.

Quia aliquando viſi ſunt infantes habentes biceps
caput cum vno tantum corpore, vel duplex corpus
ſub vno capite tantum, vel duplex caput & duplex cor-
pus ſimul vnita, dubitarique poſſit, ſit ne vnus homo, vel
multiplex : Ad hoc reſpondet Ariſt. 4. *de gener. anima-*
lium, quòd ſi talis fœtus vnicum habeat cor, tunc
erit vnicum animal ; & duplex, ſi corde geminato con-
ſtet : quia cor, vt inquit Philoſophus, eſt origo & ſe-
des vitæ : vnde ex vnitæte vel duplicitate eius debet ſta-
tui vnicum vel duplex animal. Dignoſci autem pote-
rit, an cor ſit vnum vel duplex, ſi infans habeat vni-
cum & vniſormem pulſum, aut variū & difformem,
inquit Scotus in 4. *diſt. 6. quæſt. 2.* Quòd ſi partus ille
adoleſcat, apparebit euidenter an ſit vnus homo vel du-
plex, ex identitate vel diuerſitate intellectuum &
volitionum ; quia vnitæte vel multiplicitas animalis de-
ſumitur à rationali anima.

DISPUTATIO TERTIA.

De Proprietatibus Rerum Naturalium.

QUoniam proprietates subiecti sequantur ad essentialē illius constitutionem per principia & causas, ideo postquam egimus in prima disputatione de rerum naturalium principiis, & in secunda de causis illarum, tum per se, tum per accidens, quod facit Aristoteles in duobus primis libris physicorum; superest, ut in hac disputatione agamus de *rerum naturalium proprietatibus*, quas in sex ultimis physicorū libris tradidit idem philosophus. Hanc autem disputationem per tot capita absoluemus, quot proposuit libros Aristoteles, nimirum sex; in quorum primo agetur de *quantitate*, in 2. de *infinito*, in 3. de *loco*, in 4. de *vacuo*, in 5. de *tempore*, & in 6. de *motu*, quem ad calcem huius disputationis reservamus: cum plura de illo dicere necessaria sint: quandoquidem ipsemet Aristoteles in omnibus libris physicorum, de-
ptis primo, secundo & quarto, aliquid dicit de *motu*.

CAPVT PRIMVM.

De Quantitate.

SI disputatio ista instituta sit de proprietatibus rerum naturalium, in ea tamen proprietates non sumuntur rigorosē, pro eo quod fluit essentialiter & intrinsecē à subiecto, & quod solum formaliter ab illo distinguitur; quantitas enim, locus, tempus, & motus, de quibus sumus principaliter acturi, realiter à corpore naturali distinguuntur; & sic non sunt illius proprietates strictē sumptæ, sed potius videntur esse accidentia quædam inseparabilia à rebus naturalibus, quæ non possunt esse sine quantitate, sine loco, tempore, & motu, ut probat experientia. Loquuturi autem de istis exordium sumere debemus à quantitate, quæ primum est inter accidentia absoluta, quæ compositum naturale sequuntur. Porro quia in logicis plura iam præfata sunt de quantitate, quæ hic resumī non debent; ideo quatuor tantum examinanda supersunt. *Ans* scilicet *quan-*
titas

titas distingatur realiter à substantia . An in continuo, seu in quantitate continua sint indivisibilia positiva . An continuum componatur ex indivisibilibus . An denique continuum dividatur in semper divisibilia . Quibus principalioribus quæstionibus quædam minus principales adungi poterunt , nè inexplicatum aliquid remaneat eorum quæ concernunt quantitatem .

QVÆSTIO PRIMA.

An Quantitas realiter distingatur à Substantia .

Vis in logica quid sit quantitas, quæ sint illius species, quænam sit ratio formalis quantitatis, quæ habeat species quantitas continua permanens, quod tempus & motus sint legitimæ species quantitatis continue successivæ, quasdam species habeat discreta, quantitas, ac tandem quæ sint proprietates quantitatis; nunc opere pretium est, ut videamus *an quantitas distingatur realiter à substantia*. Nominales cum Ochamo in 4. dist. 4. & quodlib. 4. quæst. 29. sentiunt quantitatem non distingui à substantia, sed esse ipsammet substantiæ entitatem, quæ quatenus est *ens per se subsistens*, dicitur substantia, & quatenus *habet partes extra partes* vocatur quantitas. Contrarium tuerentur utriusque scholæ discipuli.

CONCLUSIO.

Quantitas realiter distinguitur à substantia. Sic Scotus in 4. dist. 10. §. ad quæstionem ergo. Cum D. Bonau. Ibidem art. 1. quæst. 1. ad 2. sic etiam antea Arist. in logica cap. de quantitate. In met. lib. 1. cap. de quanto, & explicitis verbis 7. met. tex. 8. ubi ait; *longitudo, latitudo, & profunditas, quantitates quædam sunt, sed non substantia, quantitas enim non est substantia*. Ratio nostra est quia ens distribuitur in substantiam & accidens, tanquam in membra opposita sed vnum membrum non potest realiter identificari cum alio; ergo quantitas, cum sit accidens, realiter distinguitur à substantia. Imò sunt diuersi generis, & proinde diuersæ speciei; cum iuxta regulam Antepredicamentalem, *diuersorum generum diuersa sint spe-*

Species, differentia, & individua. Deinde ea distinguuntur realiter, quorum unum persistit alio perente; sed fides catholica docet quantitatem panis in Eucharistia remanere separatam à pane, qui post consecrationem non amplius remanet: ergo quantitas diffidet à substantia. Tandem non sunt multiplicanda entia sine necessitate; sed si quantitas non distingueretur realiter à substantia, multiplicarentur entia sine necessitate: ergo admittenda est distinctio realis inter quantitatem & substantiam.

Probatur minor per explicationem mentis Nominalium, qui dicentes quantitatem non distingui à substantia: tot ponunt in vna & eadem re quantitates, quot sunt entitates in illa; ita quòd in pomo sit vna quantitas substantiæ pomi, alia quantitas coloris pomi, alia saporis, alia odoris, & sic de alijs accidentibus quæ sunt in pomo; sed multiplicare quantitates pro multiplicatione entitatum, est *multiplicare entia sine necessitate*, quoniam vna quantitas sufficit ad extensionem substantiæ pomi, & omnium accidentium eius: ergo si quantitas non distingueretur realiter à substantia, entia multiplicarentur sine necessitate. Adde quòd si substantiæ & accidentium darentur plures quantitates, deberet etiam admitti naturalis dimensionum penetratio, quandoquidem quantitas saporis pomi penetraret quantitatem coloris, odoris, & substantiæ pomi, quod non admittent aduersarij, qui negant possibilem esse talem penetrationem dimensionum. *Quod autem in eo casu deberet admitti penetratio quantitatum*, patet ex eo quòd sicut color, sapor, & odor pomi penetrant pomi substantiam, sic etiam quantitas saporis penetraret quantitatem odoris & substantiæ eiusdem pomi.

Obijciunt Nominales argumentum ex fide desumptum contra illos esse nullum, quia facta consecratione non remanet quantitas panis, sed sola quantitas accidentium, nimirum quantitas saporis, quantitas albedinis; &c. *Resp.* hoc esse falsum, quia Patres asserunt expressè veram quantitatem panis remanere. Deinde iam antea ostendimus non remanere quantitatem accidentium, quia accidentia non habent quantitatem particularem; aliàs fieret *penetratio dimensionum*, quæ resultat ex positione plurium quantitatum in eodem loco & in eodem situ: vnde opinio communis est quòd in quolibet composito sit tantum vna

quant-

quantitas, per quam, tum materia, tum forma, tum alia accidentia extenduntur.

Obijcies 2. quæ habent easdem proprietates, eandem habent essentiam; sed substantia, & quantitas easdem habent proprietates, cum utraque suscipiat contraria, albedinem scilicet, & nigredinem: ergo realiter, & essentialiter non distinguuntur. *Resp.* mai. esse veram de proprietate quarto modo sumpta, quæ conuenit omni, soli, & semper; falsam verò de aliis. *Suscipere autem contraria* non est proprietas quarto modo, quoniam conuenit omni, sed non soli; substantia enim, & quantitas contraria suscipiunt, cum hoc discrimine, quòd substantia sit subiectum quòd contrariorum, mediatum scilicet, & remotum; quantitas verò est subiectum quo, immediatum, & proximum.

Obijcies 3. non potest separari quantitas à substantia: ergo non distinguitur realiter ab illa. *Probatur aut.* Si quantitas posset abstrahi à substantia, abstracta quantitate, corpus esset adhuc diuisibile, & prout de extensum, & quantum, & sic esset simul quantum, & non quantum, quod repugnat; *Resp.* antecedens negandum esse, cum antea dixerimus quantitatem panis esse separatam in Eucharistia à substantia panis. Quando autem dicitur quòd abstracta quantitate corpus remaneret adhuc diuisibile hoc distinguendum est, & dicendum quòd substantia corporis esset diuisibilis in partes entitatiuas, quia earum quælibet esset ens; non esset autem diuisibilis in partes quantitatiuas, quæ essent extensæ in ordine ad locum: quandoquidem hoc habetur à quantitate, quam obiectio supponit esse separatam à substantia corporea.

Quæres à quo compositum materiale habeat partes: Ad hoc prænotari debet quòd totum physicum materiale, puta homo, quatuor genera partium habeat; quarum primæ sunt metaphysicæ, nempe genus, & differentia, quæ sunt animal, & rationale. Secundæ sunt partes physicae, materia videlicet, & forma, seu corpus & anima. Tertiæ sunt partes integrantes vel entitatiuæ, ut caput, collum, pectus, pedes, venter, & brachia; quæ corpus humanum integrant. Vltimæ sunt partes quantitatiuæ, quæ nihil aliud sunt quam supradictæ partes, prout habent extensionem. Hoc posito, *Respondeo* compositum materiale habere partes quantitatiuas & extensas à quantitate; ita quòd si Deus denudaret

corpus aliquod propriâ quantitate, non amplius haberet partes quantitativas seu extensas, quia effectus formalis nusquam esse potest sine causa formali; sed extensio partium est effectus formalis quantitatis: ergo separata quantitate, corpus non haberet amplius partes extensas. Quando autem dicitur *supposito quod Deus separaret quantitatem à Petro*, caput illius esset adhuc extra collum, & collum extra humeros; quod denotat substantiam sine quantitate habere adhuc partes extensas, quia partes essent extra partes: *Respondet* debet in tali suppositione Petrum conservaturum esse partes entitativas, quia vna pars non esset alia, quoniam distinguerentur intrinsecè, non esset confusio essentialis partium; attamen Petrus non amplius haberet partes quantitativas, & extensas: quandoquidem illæ habentur à quantitate.

Resp. 2. Compositum materiale habere partes *entitativas* seu *integrantes* independentes à quantitate, ut innuit Doctor in 1. dist. 3. *quæst. 4.* ita quod si quantitas separaretur à Petro, corpus Petri haberet adhuc partes substantiales ita distinctas, ut vna non esset altera; licet vna esset in eodem loco, ubi esset altera: & hoc immediatè per substantiam illius Petri, quæ cum sit corporea, & habeat partes integrantes ex quibus componitur, nempe collum, caput, & brachia, ideo censi debet habere partes independentes à quantitate. Hoc tamen notari debet; quod si Deus conservaret substantiam Petri sine quantitate, nullæ amplius remanerent partes heterogeneæ in Petro, ossa nimirum, aut nervi, aut sanguis; quia partes non sunt heterogeneæ, nisi per receptionem diversarum dispositionum in diversis partibus materiæ, quæ diversæ dispositiones recipiuntur, & conservantur per *quantitatem*. In eo autem casu remanerent tantum partes entitativæ, & substantiales materiæ, quæ omnes homogeneæ essent, & eiusdem rationis, si ab illis tolleretur quantitas. Si Deus autem sine quantitate conservaret substantiam Petri in eodem loco ubi antea erat cum quantitate, tunc talem substantiam Petri poneret Deus in illo puncto quod eligere vellet illius loci ubi prius erat; vel ipsius substantia Petri conservaretur tota in toto loco ubi præfuerat, & tota in qualibet loci parte, ut corpus Christi est in tota hostia, & in qualibet particula hostiæ.

Quæres an possit extensio externa quantitatis esse sine extensione externa ad locum. Ad cuius solutionem, notandum est extensionem nihil aliud esse ex nomine, quàm extra tensionem, & secundùm rem nihil aliud dicere quàm positionem partium, quæ duplex est, interna scilicet, & externa. Extensio interna est positio partium in toto, quæ est de genere quantitatis, & illius essentia, ut in logicis diximus: externa verò est positio partium in loco, seu in ordine ad partes loci, quæ est de genere situs. Constat quidem, extensionem internam non posse naturaliter existere absque externa, seu absque locali commensuratione, quia hæc naturaliter sequitur ex illa, veluti effectus à causa, & lumen à corpore luminoso. *An autem hoc fieri possit diuinitus.* Respondeo affirmatiuè contra hæreticos Lutherum, & Calvinum, qui dicant repugnare extensionem externam quantitatis in ordine ad locum posse separari ab interna extensione partium in toto. Quod autem externa quantitas possit separari ab interna, patet ex hoc quòd Christus ingressus fuerit ad discipulos ianuis clausis, & autea ex utero virginis, iniuncto claustro illius; quòd utrumque fieri non potuit, nisi per separationem extensionis externæ ab interna, ut sit quotidie in Eucharistia Sacramento, ubi corpus Christi nullam habet extensionem externam actualem ad locum, sed aptitudinalem duntaxat. Ratio huius est quia in essentialiter subordinatis potest prius virtute D. esse sine posteriori, sol nimirum sine productione luminis; sed extensio interna quantitatis partium in toto sibi subordinat extensionem externam, & localem, eaque est prior ista: ergo potest interna quantitas separari ab externa. Cum enim præfatæ extensiones spectent ad diuersa prædicamenta extensio interna ad prædicamentum quantitatis, & externa ad prædicamentum situs, proinde separari possunt ab inuicem.

Si in contrarium afferatur D. Augustinus epist. 49. ad Dardanum dicens quòd si locorum spatia tollantur à corporibus, tunc ista non erunt. Resp. per hæc verba velle tantum sanctum doctorem, naturali virtute corpora non posse existere, nisi extendantur in ordine ad loca: non negat tamen hoc posse fieri diuinitus. Dices quantitas interna dicit continuitatem, & continuum habet partes extensas, quarum vna est extra aliam, quod non potest esse sine ordine ad locum. Resp. negando vltimum.

num. Licet enim quantitas dicat continuitatem, & extensionem in ordine ad se, neutram tamen dicit essentialiter in ordine ad locum, si interueniat potentia Dei absoluta. Quod si dicatur extensionem externam esse proprietatem externæ à qua non potest separari supernaturaliter, sicut nec visibilitas à rationalitate. *Resp.* extensionem in ordine ad locum non esse proprietatem internæ, nisi quatenus est aptitudinalis; unde sicut rationalitas non potest diuinitus separari ab aptitudine ridendi, sic nec extensio interna separari potest ab extensione aptitudinali externa: hoc tamen non impedit quin quantitas interna possit priuari externa extensione actuali, quæ non est proprietas, sed effectus internæ.

Q V Æ S T I O II.

An in Continuo sint Indiuisibilia Realia Positiua.

Sufficienter dictum est in logica quantitatem continuam illam esse, cuius partes vinculo communi copulantur; sic linea copulatur punctis, superficies lineis, corpus superficiibus, motus *mutatis esse*, & tempus momentis. Illud autem vinculum idèd dicitur indiuisibile, quia caret, & partibus entitatis, & quantitatis. Duplex enim est indiuisibile, vnum videlicet *substantiale*, quod non habet partes entitativas, vt Angelus, & anima rationalis: & aliud *quantitativum*, quod partes quantitativas, & extensas non obtinet; vt punctum in linea, & instans in tempore. Punctum in quantitate continua duplex etiam est, *Terminans* videlicet extremitates quantitatis ex parte principij, & finis, & *Continuans* partes quantitatis continuæ; quæ talis dicitur, quia partes eius copulantur termino communi, qui est punctum in linea, quod vnā partem lineæ coniungit cum alia. Super quætionem propositam tres habentur opiniones, quarum *prima* est Ochami, & Nominalium, qui dicunt talia indiuisibilia non esse realia, sed entia purè negatiua, seu negationes vltioris extensionis. *Secunda* est eorum qui volunt dari quidem indiuisibilia terminantia, non verò copulantia. *Tertia* denique admittit in continuo dari indiuisibilia positiua, tam copulantia, quàm terminantia.

cia. Sic Scotus in 2. dist. 2. quest. 9. cum maiori philosophorum numero.

CONCLUSIO.

Indivisibilia quantitatis continuæ tum terminantia tum continuantia sunt entia realia & positiua. Sic Arist. 5. met. cap. 6. Hoc probat Aug. lib. de quantitate animæ cap. 11. & 12. ubi loquens de puncto, quod est indivisibile terminans & copulans lineam, ait ab ipso incipit linea, ipso terminatur; & paulo post subiungit, nulla linea copulatur lineæ, nisi per ipsum. Quod autem dicitur de puncto respectu lineæ, debet etiam dici de lineæ respectu superficiei; & de superficie respectu corporis, cum sit par utrobique ratio: & proinde quælibet quantitas continua habet realiter & positiuè indivisibilia, quæ extremitates terminant, & copulant partes. Deinde Geometria supponit in medio circuli esse punctum vnum, quod centrum dicitur à quo omnes lineæ ductæ ad circumferentiam sunt æquales? sed talis scientia est realis: ergo indivisibilia in quantitate sunt realia. Tandem quantitas continua definitur, ea cuius partes termino communi copulantur, qui est punctum, & punctum est indivisibile; sed partes quantitatis continuæ sunt reales & positiuæ; ergo indivisibilia quantitatis continuæ sunt positiua, quandoquidem continentur in definitione entis realis positiui.

Puncta inquam, tam copulantia quàm terminantia, sunt realia & positiua. Quia sicut partes extremæ quantitatis continuæ terminantur indivisibilibus, nimirum punctis: sic etiam partes mediæ eiusdem lineæ copulantur punctis; alias quantitas continua, quæ est accidens reale & positiuum, non definiretur ea cuius partes termino communi copulantur. Ob hoc Arist. 6. phys. cap. 1. discutit num continuum componatur ex punctis, quod intelligi debet de punctis copulantibus, cum euidenter sit puncta terminantia non componere continuum; sed quæ componunt aliquod totum reale & positiuum debent esse realia & positiua; ergo supponit Aristoteles quod puncta copulantia sint entia realia & positiua. Quod à fortiori dicendum est de punctis & indivisibilibus, quæ terminant quantitatem continuam; cum manifestum sit talem quantitatem actu ter-

terminari per puncta. Videantur quæ addita sunt in 3. obiect. & post eam.

Obijces 1. Ex Arist. 8. *Phys. tex. 68.* punctum non est actu in continuo, sed tantum in potentia: ergo indiuisibilia non sunt in continuo quid positium & reale. *Respondes* puncta non sunt actu penes diuisionem, concedo: penes existentiam, nego. Licet enim puncta quæ sunt in continuo non diuidant actu continuum, sed tantum in potentia, si scilicet diuidatur in plures partes, hoc tamen non impedit quin puncta actualiter existant in continuo, cum semper definiatur à parte rei, *id cuius partes termino communi copulantur.* Quodd si idem philosophus 3. *phys. tex. 25.* dicat punctum cognosci per priuationem: hoc non impedit quin in se sit quod positium, quod melius dignoscitur per negationem diuisionis. Si dicatur ulterius, punctum non habere subiectum in quo sit, quia est indiuisibile, & quilibet locus est diuisibilis, cum sit quantitas: *Resp.* punctum non esse in loco ratione sui, quia *reuerà omne locatum est diuisibile*; attamen est in loco ratione continui cuius est terminus.

Obijces 2. Sicut materia & forma in composito se ipsis vniuntur, ita partes continui & lineæ seipsis copulantur in continuo. *Resp.* non esse parem rationem, quia materia & forma vniuntur per penetrationem mediam, quoniam forma est in omnibus partibus materiæ, & in omni loco ubi est materia; duæ verò partes quantitatis non possunt se penetrare, immò sese expellunt, & proinde indigent vinculo communi, quo iungantur simul. Dices quod copulat duas partes, debet partim esse in vna, & partim in alia: sed hoc non potest dici de puncto, cum sit indiuisibile: ergo lineæ non copulatur punctis. *Resp.* maj. fore veram, si punctum esset in lineæ tanquam in loco & tanquam in subiecto, tunc enim vtramque partem lineæ tangeret; punctum autem non est in lineæ tanquam in subiecto, quia est in vtraque parte lineæ per se totum, tanquam terminus indiuisibilis.

Obijces 3. Partes lineæ & cuiuslibet continui non sunt actu partes distinctæ, quia in continuo esset actualis multitudo: ergo non copulantur actu per puncta: quæ proinde non debent censeri actualia. *Resp.* in quolibet continuo esse partes actualiter distinctas, alias continuum non esset totum actualile

le *quantitativum*; non sunt tamen actualiter diuisa, aliâs multiplicaretur continuum. Puncta ergo seu indiuisibilia, quæ copulant partes continui, sunt actualia; quia *actu* copulant, & impediunt *actu*, nè diuidatur continuum. Quando autem tale continuum *actu* diuiditur, tunc illa indiuisibilia quæ antea erant copulantia, fiunt terminantia, non quidem per veram productionem, sed per resultantiam naturalem; quia sequuntur ad diuisionem continui.

Ex his ergo omnibus antedictis patet, contra Durandum indiuisibilia in continuo esse actualia & positiua, non verò esse tantùm negationes vltioris longitudinis. Patet etiam ineptè alios contra Thomistas & Scotistas reijcere indiuisibilia continuantia, & sola terminantia retinere, cum sufficienter probatum fuerit per plures rationes dari indiuisibilia copulantia; quæ actu & positiuè coniungunt partes quantitatis continui. Quòd vltius inuincibiliter confirmatur per hoc quod dicunt Mathematici. *Si corpus perfectè sphericum vel pyramidale caderet super corpus perfectè planum, illud tangeret istud in puncto*: quia si corpus illud sphericum haberet aliquam planitiem continuam & diuisibilem in qua tangeret planum non esset perfectè sphericum, sed illa duo corpora *planum* & *sphericum* se tangerent in aliquo reali & positiuo: ergo tum in corpore plano, tum in corpore spherico reperiuntur puncta, quæ actu & positiuè copulant partes continui spherici & plani.

Q V Æ S T I O III.

An Continuum componatur ex Indiuisibilibus.

EX antecedenti quæstione probatum est in continuo dari indiuisibilia, quæ actu & positiuè terminant continuum, & copulant eius partes simul. Ita quòd in linea sint puncta, quæ vtrumque faciant, sicut in superficie dantur lineæ diuisibiles in latitudine, quæ terminant & copulant partes superficiiei: & in corpore reperiuntur superficies indiuisibiles in profunditate, quæ terminant & copulant eius corporis partes: *An autem indiuisibilia quæ reperiuntur in continuo ipsum componant*, antiquorum plurimi, vt Zeno, Pythagoras, Democritus, & Plato existimarunt continuum com-
po-

poni ex indiuisibilibus ; communiter tamen hoc ab alijs negatur.

CONCLUSIO.

Continuum non componitur ex indiuisibilibus . Sic Scotus in 2. dist. 2. quest. 9. & 2. Metaph. quest. 6. post Arist. 6. Phys. cap. 1. Ratio omnium ferè Philosophorum est, quòd continuum sit diuisibile ; sed indiuisibilia , quantumcumque reduplicentur, non possunt efficere diuisibile : ergo continuum non componitur ex indiuisibilibus . Licet igitur linea constet punctis , superficies lineis, & corpus superficiebus, tanquam terminis copulantibus & finientibus partes talium continuorum, non tamen constant illis indiuisibilibus tanquam partibus, quæ componant talia continua ; sed linea componitur ex alijs lineis minoribus, istæ ex alijs, & sic deinceps in partes semper diuisibiles . Deinde continuum est diuisibile in partes æquales iuxta Euclidem lib. 1. Elementorum ; sed non esset diuisibile in partes æquales, si componeretur ex indiuisibilibus : ergo . Probatur min. per exemplum lineæ compositæ ex quinque punctis, quæ si diuidatur in duas partes, vel vna constabit duobus punctis & altera tribus, & protunc partes non erunt æquales, vel vna constabit duobus punctis & dimidio sicut altera, & tunc punctum erit diuisibile ; quod est contra naturam puncti, quod definitur, *id cuius pars nulla est* . Tandem quæ componunt continuum se tangunt tactu continuitatis, alioquin non esset continuum, sed discretum ; indiuisibilia autem non se tangunt secundum totum, aliàs non facerent quid maius, cum *indiuisibile additum indiuisibili quid maius non efficiat* ; nec etiam secundum partem, cum sint indiuisibilia & impartibilia : ergo continuum non componitur ex indiuisibilibus .

Obijcies ex Arist. 1. Topic. cap. 14. sicut se habet vnitas ad numerum, sic punctum ad lineam, sed unitates componunt numerum, quoniam quinaris componitur ex quinque unitatibus ; ergo puncta componunt lineam . Resp. ad mai. punctum se habet vt vnitas, in ratione principiationis, concedo : in ratione compositionis, nego . Sicut enim numerus ab unitate sumit exordium, sic linea ducit initium a puncto : vnitas tamen est pars componens numerum, & puncta non
com-

componunt lineam. *Dices corpus perfectè sphericum tangit planum in puncto ex Arist. 1. de Anima text. 13. Ergo si corpus perfectè sphericum trahatur per planum percurreret ipsius longitudinem tangendo tantum puncta; & sic planum constabit ex punctis. Resp. sphaeram dum quiescit super planum tangere illud in puncto, quando verò continuè trahitur & mouetur, non tangit ampliùs in puncto, sed in linea; quia cùm ille motus sit continuus, debet illi respondere subiectum proportionatum, quod continuum sit, & per consequens diuisibile. Dices. Puncta lineæ sunt sibi inuicem proxima & immediata: ergo linea fit ex punctis. Negatur antecedens, quia inter duo puncta eiusdem continui sequitur pars lineæ, vr ait Scotus 2. *Metaph. quest. 7.* sicut post *instans* sequitur pars temporis.*

QVÆSTIO IV.

Verum Continuum sit in Infinitum diuisibile.

IN hoc differunt Continua, Contigua, & Consequenter se habentia, quòd *continua* sint ea quorum vltima sunt vnum, & copulantur termino comuni, qui est finis vnius partis & principium alterius. *Contigua* ea sunt quorum extrema non sunt vnum, sed sunt simul; ita quòd nihil mediet inter vtrumque. *Consequenter se habentia* sunt illa quorum extrema non sunt vnum, nec simul, sed inter ea nihil mediat quod sit eiusdem generis; vtpotè cùm in certa quadam distantia ordinantur arbores. Hic loquuturi sumus non de contiguo, sed de *continuo*; de quo querimus *an sit diuisibile in infinitum saltem syncategorematicè*: ita quòd in diuisione ipsius nunquam deueniri possit ad aliquam partem, quæ sit indiuisibilis.

CONCLUSIO.

Continuum est diuisibile in infinitum. Sic Arist. 6. *phys. cap. 1.* & Scotus in 2. *dist. 2. quest. 9.* & com muniter Philosophi, paucis demptis, qui tenentes continuum componi ex solis indiuisibilibus, inferunt ipsum diuidi in diuisibilia certa, determinata, & finita. Ratio nostra est quia *id quod est diuisibile in semper di-*
Philos. R. P. Boyvin, T. II, Phys. Pars I. M *nisi-*

visibilia, est diuisibile in infinitum; sed continuum est diuisibile in partes semper diuisibiles, quia quælibet pars continui est quantitas, & omnis quantitas est diuisibilis: ergo continuum est diuisibile in infinitum, ita vt quælibet pars illius, quantumcumque minima sit, possit vltcrius diuidi. Deinde vnumquodque resoluitur in ea ex quibus componitur, vt patet de corpore mixto, quod resoluitur in elementa, quæ illud componunt; & de homine qui resoluitur in corpus & animam, quæ componunt ipsum; sed continuum componitur ex diuisibilibus, vt vidimus in præcedenti quæstione, vbi probauimus indiuisibilia non componere continuum: ergo continuum est resoluibile in semper diuisibilia, & proinde in infinitum syncategorematicè. Tandem si continuum non esset diuisibile in partes infinitas, esset diuisibile in partes finitas, quia inter finitum & infinitum nil mediat. Hæc autem diuisione facta quæri posset, an vna illarum partium finitarum esset diuisibilis, vel indiuisibilis; si est indiuisibilis, continuum componitur ex indiuisibilibus, contra præcedentem conclusionem: Si autem est diuisibilis, pari ratiocinatione arguendum erit de illa; quod sit vltcrius diuisibilis, & sic semper quælibet pars erit diuisibilis in partes semper diuisibiles: ex quo patet continuum esse diuisibile in infinitum syncategorematicum tantum in se, quàm in suis partibus etiam minimulis; cum nunquam in illius diuisione possit deueniri in aliquam partem ita exiguam, vt non possit amplius diuidi: vnde dicit Philosophus quantum esse diuisibile in ea qua insunt, id est, in ea quæ sunt diuisibilia, vt ait interpres.

Obijcies 1. Si continuum esset diuisibile in infinitum granum sinapis esset æquale toti mundo; quia vtrunque esset diuisibile in infinitas partes. Resp. negando consequentiam: licet enim granum sinapis esset diuisibile in tot partes, ac mundus est diuisibilis, non tamen est diuisibile in tantas partes, ac mundus, & hoc est, quod dicunt alij granum sinapis esse æqualiter diuisibile ac mundus, quantum ad partes proportionales, non tamen quantum ad partes æquales. Dices non datur infinitum ex Philosopho 3. Phys. text. 35. sed quod habet partes infinitas & in infinitum diuisibiles est infinitum: ergo continuum non potest diuidi in partes in infinitum diuisibiles. Resp. non dari infinitum

actu seu categorematicum, ut dicetur suo loco; datur tamen infinitum in potentia, seu syncategorematicum, continuum videlicet, quod quantumcunque diuidatur, est semper ulterius diuisibile.

Obijcies 2. Si continuum quodlibet esset infinitum diuisibile, Angelus in tota æternitate non posset diuidere solum arboris, quod absurdum, fictum & imaginum videtur. *Resp.* admittendo consequentiam, quæ nullam absurditatem continet; licet enim hoc sensus percipere non valeat, hoc tamen intellectus de facili capiet, agnoscendo scilicet, quamlibet partem entis quanti esse quantum, quia pars est eiusdem rationis actorum; sed omne quantum est diuisibile, cum dixerimus in Logicis diuisibilitatem esse proprietatem quantitatis: ergo quælibet pars continui est continua, quantumvis exigua appareat, & proinde diuisibilis in alias partes, quæ ulterius erunt diuisibiles pariter, sicut & subsequentes in infinitum, quidquid reclament sensus.

Obijcies 3. Deus cognoscit distinctè continuum, & omnes illius partes; & sic videt continuum finiri per ultimam; sed videt res uti sunt: ergo continuum habet partem ultimam, quæ non est amplius diuisibilis. *Resp.* Deum cognoscere res sicuti sunt, in hoc enim consistit infallibilitas scientiæ D. ut diximus in secunda parte Logices, & sic cognoscens continuum, cognoscit illud esse finitum in existentia sua. Quantum autem ad illius continui diuisibilitatem, illam etiam nouit uti est: unde quia continuum est diuisibile in semper diuisibilia, nunquam cognoscit, nec cognoscere potest ultimam partem continui; quia nulla datur ultima pars in continuo.

Quæres quomodo distinguantur diuisibilia à continuo. *Resp.* non distinguui realiter, sed tantum formaliter. Non distinguuntur, inquam, realiter à continuo, quia nec continuum potest esse sine terminis, nec termini sine continuo. Non sunt etiam in diuersis suppositis, quia ubi est continuum, ibi sunt termini continui. Tandem vnum non est producens & aliud productum, quandoquidem indiuisibilia non sunt partes componentes continuum: ergo cum vna harum trium conditionum requiratur ad distinctionem realem, proinde continuum & termini in ipso existentes non distinguuntur realiter. Distinguuntur tamen formaliter, quia alia est ratio continui, & alia est ratio terminorum. Quod si termini comparentur inter se, tunc realiter distin-

guuntur, quia situ & loco seiunguntur, quoniam ubi est terminus inchoans lineam, ibi non est terminus copulans, nec finiens; & proinde termini inter se comparati distinguuntur realiter. Indivisibilia alia sunt *simpliciter indivisibilia*, ut puncta lineæ, quæ diuidi nequeunt in longitudinem, latitudinem, aut profunditatem; alia sunt *indivisibilia secundum quid*, quæ sunt quidem diuisibilia in una dimensione, non verò in alia; ut linea, quæ est indivisibilis secundum latitudinem & profunditatem; non verò secundum longitudinem.

Quæres utrum res naturales habeant terminos suæ magnitudinis & paruitatis, infra quos minui, & ultra quos augeri non possint; quorum ille vocatur communiter inter Philosophos *minimum quod sit*, & iste *maximum quod sit*: ubi distinguendum est de rebus simpliciter naturalibus, quales sunt lapides, & quæcumque res inanimatæ; & de rebus naturalibus viventibus, uti sunt plantæ animalia, & homines. Si quæstio intelligatur de facto, de facili responderi debet quòd omnia naturalia sint sic ordinata & disposita, ut suis terminis & limitibus coerceantur, iuxta id quod habetur Sap. 11. *Omnia in numero, pondere, & mensura facit Dominus*. Hinc ignis elementaris limitatur ad certam sphaeram intra concavum lunæ & conuexum aeris, ultra quam si procedat, diu non conseruatur, sed extinguitur breui. Si verò quæstio procedat de possibili, controuertuntur authores, cum de rebus purè naturalibus, tum de naturalibus animatis; vnde

Respondeo 1. res naturales inanimatas non habere terminum suæ magnitudinis, nec etiam suæ paruitatis. Vtrumque est Scoti in 2. dist. 2. quæst. 9. Primò subscribit Arist. 2. de anima text. 41. ubi explicite affirmat quòd ignis cresceret in infinitum, si ei semper combustibilia apponerentur; vnde Prouerb. 30. habetur, *ignis nunquam dicit sufficit*. Ratio huius est quòd si ignis attingeret *maximum quod sit*, eique apponeretur stупpa, non posset eam comburere, vel ipsam comburendo cresceret. Nec est quod respondeant Complutenses, qui sunt in opinione contraria, in tali suppositione ignem tunc reuerà combusturum esse stuppam sibi applicatam, non verò sibi vniturum ignem de nouo productum, qui foret tantum præcedenti contiguus, & vnus cum illo per aggregationem. Talis enina responsio est merè elusoria, cum ea quæ sunt eiusdem

rationis, si accedant adinuicem, simul vniri debeant; vt patet de aqua fluminis, quę iuncta aquę maris facit vnum integrale cum illa, sicut & quęcumque homogenea iuncta homogeneis.

Secundum etiam est eiusdem Scoti loco præcitato, quod illud colligit ex Arist. lib. de Sensu & sensibili. contra Thomistas, Complutenses, & plures alios, qui existimant res omnes naturales habere terminum paruitatis suę, & in illis talem posse dari paruitatem, quā minorem nulla forma naturalis admittat. Ratio nostrę assertionis est, quod composita naturalia inanimata sint continua; sed omne continuum est diuisibile in semper diuisibilia, vt probatum est in præcedenti conclusione: ergo res naturales non possunt habere terminum suę paruitatis, quandoquidem sunt semper subdiuisibiles in minores partes. Si in contrarium dicitur quod vnumquodque naturale sit propter operationem, quę operatio exigit quasdam dispositiones ita extensas, vt si illę desint operatio sequi nequeat: Resp. Quod si talis res naturalis in minori quantitate non possit amplius operari, hoc non proueniet ab intrinseco, quasi res illa amittat suam naturam, sed ab extrinseco tantum.

Resp. 2. pro rebus naturalibus viuentibus, quod habeant terminos suę magnitudinis & paruitatis; sic Scotus quæst. 24. prædicam. 5. Metaph. ad cap. 15. text. 21. & in 2. dist. 2. quæst. 9. contra Paulum Veneretum, & aliquos, qui putarunt viuentia naturalia nullo limite suę magnitudinis aut paruitatis cohiberi, quod apertè est contra Arist. 1. Phys. cap. 4. text. 36. vbi docet omnium viuentium natura constantium certum esse terminum augmenti & decrementi. Quodlibet enim animatum exposcit determinata organa ad exercendum suas operationes vitales, quę organa, si contrariam extensionem non habeant, non amplius possunt concurrere ad tales operationes: ergo viuentia naturalia habent terminos intrinsecos suę magnitudinis aut paruitatis, quibus coercentur. Hoc experientia comprobatur, per quam videmus, viuentia, vt homines, boues, & plantas, crescere vsque ad certam quantitatem, quam vbi attingere, cessat incrementum. Viuentia enim crescunt per vim nutritiuam, quę paulatim languescit, donec statuto tempore totaliter deficiat ex defectu caloris naturalis & radicalis humi-

di, quæ agendo & patiendò consumuntur.

Quòd si Scriptura Gen. 6. extitisse gigantes tradat insolite magnitudinis, quod designat hominum naturam ad certam quantitatem non limitari. Si etiam dicatur, ex Arist. quòd crocodilus semper crescat. Si denique obijciatur, quòd si homo, qui attigisset *extrimum quod sic*, manducasset, tunc augeretur, & per nutritionem acquireret novas partes in sui substantiam conuersas: sicque non haberet *maximum quod sic*. Resp. ad primum, tales homines, quorum meminit Scriptura, non superasse terminum absolutum hominis; sed tantum superasse terminum communem hominum ordinariorum. Quoad crocodilum, vitem, hæderam, & similia; sit semper viuerent, non crescerent semper, sed haberent eundem terminum magnitudinis & vitæ: quæ vita, si in illis permaneret, quando attigerunt terminum magnitudinis, non amplius crescerent; quia virtus conuertendi alimentum in substantiam alicui debilitatur, & proinde nihil facit amplius. Quoad rationem allatam, homo ille qui supponitur attigisse terminum magnitudinis suæ, si ulterius manducaret, quando in ætate consistenti versatur, tunc non augeretur, sed tantum partes substantiæ deperditæ repararentur, & postea deficiente naturali calore & humido radicali, deperiret ille homo.

C A P V T II.

De Infinito.

Quia finitas & infinitas pertinent ad quantitatem; tanquam proprietates eius, vel tanquam modi; ideo præcedenti capiti quod naturam quantitatis examinat, non immerito subiungitur caput istud de *infinito*; in quo quinque quæstiones proponemus. *Quid & quotuplex sit infinitum. An aliquid detur infinitum in rerum natura. An ens creatum possit dari, quod sit infinitum in essentia. An possit in creatis dari infinitum in quantitate continua, seu in magnitudine. An tale infinitum dari possit in quantitate discreta, seu in numero & multitudine. An denique possit inter creaturas reperiri aliqua, quæ infinita sit in qualitate.*

QVÆSTIO PRIMA.

Quid & quotuplex sit Infinitum.

Res aliqua dicitur aliquando infinita quatuor modis, negativè nimirum, hyperbolicè, abusivè, & propriè. Infinitum negativè sumptum illud intelligitur esse quod caret termino reali & positivo. Infinitum hyperbolicè acceptum illud intelligitur, quod finem reuerà habet, sed cum maxima difficultate potest exhaustiri: quo sensu arena maris dicitur infinita. Infinitum abusivè denominatum est illud quod aliquam habet similitudinem cum infinito; ut circulus qui in suas partes recurrendo similitudinem infiniti imitatur. Infinitum tandem propriè consideratum est illud quod nunquam exhaustiri & absorberi potest; & in quo semper aliud & aliud remanet accipiendum. Et de isto loqui intendimus.

CONCLUSIO PRIMA.

Ex etymologia nominis *infinitum* est id quod non est terminatum aut limitatum, quo sensu à mathematicis punctum vocatur *infinitum*; quia cum omni extensione careat, proinde non habet finem & terminum; quoniam finis & terminus dicuntur respectu rei, cuius finitur & terminatur extensio. Secundùm rem infinitum tres communiter patitur descriptiones apud Philosophos. Interdum enim dicitur esse id cui nulla potest fieri additio vel detractio. Aliquando definitur id à quo si aliquid accipiat, restat semper aliquid accipiendum. Tandem ab Arist. 3. phys. dicitur id esse, cuius aliquid semper est extra; ita quòd quamvis finitur quodcumque desumatur ab infinito, semper aliquid desumi possit, nec deveniri queat ad ultimam infiniti partem. Descriptiones illæ, si benè examinentur, coincidunt; cum hoc tamen discrimine, quòd prima descriptio conveniat propriè infinito actuali & categorematico, quod tale est *actum*, ut nec possit augeri vel minui: secunda verò competit infinito syncategorematico & potentiali, quale diximus esse omne continuum, quod semper in ulteriores partes est divisibile. Præfatis descriptionibus adiungi potest ea quæ

dicitur *infinittum* esse id quod superat omne finittum ultra omnem proportionem determinatam vel determinabilem. Porro omnes illæ explicationes ita patent ex terminis, ut ampliori explicatione non indigeant.

CONCLUSIO SECUNDA.

Infinittum diuiditur in Infinitum in Essentia, in Virtute, in Duratione & in Quantitate. *Infinitum in essentia*, seu in omni genere, est illud quod habet essentiam illimitatam & ornatam omnibus perfectionibus in gradu intenso, & sic solus Deus est infinitus. *Infinitum in virtute* illud est quod habet vim agendi illimitatam, & hanc adhuc infinitatem Deus solus obtinet, qui solus est omnipotens. *Infinitum in duratione* est illud quod non habet initium aut finem, qualis iterum est solus Deus, qui solus habet æternitatem. Si aliquod ens productum fuisset ab æterno, & cessasset in tempore, diceretur infinitum à parte ante, id est, ex parte principij, Angeli verò, & animæ rationales dicuntur esse entia infinita à parte post, seu ex parte finis; quia nunquam desinent, licet creata fuerint in tempore. *Infinitum in quantitate* duplex est, nimirum in quantitate continua, & in quantitate discreta. Si daretur corpus infinitæ magnitudinis, vel linea infinitè longa talia dicerentur *infinita in quantitate continua*. Si daretur autem infinitus numerus Angelorum, vel hominum, diceretur *infinitus in quantitate discreta*.

Infinitum insuper diuiditur in *Categorematicum* seu actu, & in *syncategorematicum* seu potentia. *Primum* est illud quod secundum id quod actu habet, nullis finitur terminis, sic Deus est ens actu & *Categorematicè* infinitum, quia eius essentiam totam continet essendi plenitudinem sine vllis limitibus. *Secundum* illud est quod in his quæ actu habet, clauditur quidam terminis, attamen secundum id quod haberet potest, nullos limites agnoscit: sic creaturarum numerus est infinitus *syncategorematicè* & in potentia, quia sine fine crescere potest per potentiam. D. licet actu sit finitus. Idèd autem illud dicitur *categorematicum*, quia sicut termini *categorematici* res ex seipsis significant absque consortio alterius vocis; sic infinitum *categorematicum* ex se importat omnem entitatis perfectionem absque ad-

iunctione alterius; illud verò propter contrariam rationē dicitur syncategorematicum, quia sicut termini syncategorematici, ut omnis, aliquis, nullus, requirunt adiunctionem alterius, ut perfectè significant; sic hoc infinitum non fiet tale, nisi per additionem alterius.

Q V Æ S T I O II.

An datur in rerum natura Infinitum actū.

Hic non loquimur de infinitate molis seu corporis, quæ in sequentibus examinabitur; sed de infinitate perfectionis: *An scilicet in tota latitudine entium reperiatur aliquod, quod sit infinitum in perfectione*; Infinitum autem in perfectione definitur à Scoto dupliciter, comparatè, scilicet & Absolutè. Priori modo illud est quod excedit in perfectione quodcumque ens finitum, ultra omnem determinatam & determinabilem proportionem; & hæc descriptio est relatiua & comparatiua, quia datur per comparisonem entis infiniti ad finitum. Posteriori modo illud est cui nihil entitatis & perfectionis deest, eo modo quo potest habere; seu ens infinitum est illud quod habet omnes omnium entium perfectiones, siue formaliter, siue eminenter. Continerere formaliter aliud est essentiam & rationem formalem illiusita habere, ut ab ea denominari queat: sic homo dicitur formaliter continere rationalitatem, nix albedinem, & ignis calorem; quia essentia rationalitatis, albedinis & caloris sic formaliter sunt in homine, nix, & igne, ut ab illis homo, nix, & ignis denominentur rationalis, alba, & calidus. Continere eminenter aliquid est posse producere illud, & actiones eius, & esse nobiliori modo in continente, quam in seipso: sic Deus continere dicitur omnes creaturas eminenter, quia eas producere potest, & actiones illarum, & ipsæ creaturæ sunt nobiliori modo in Deo, quàm in seipsis; quoniam in Deo sunt ipsemet Deus, & in seipsis sunt entia creata, finita, & limitata.

C O N C L V S I O.

IN rerum natura datur infinitum actū, nempe Deus, qui infinitus est in substantia & in omni genere perfectionis. Sic Scotus in 1. dist. 2. quæst. 2. post Arist.

8. *Phys. text. 78. & 12. Metaph. text. 41.* Hanc conclusionem docet fides, Baruch. 3. *Magnus & non habet finem, excelsus, & immensus.* Psal. 144. *Magnitudinis eius non est finis.* Reuelationi subscribunt Patres, & præsertim D. Dionys. lib. de DD. Nom. cap. 9. *Magnus est super omnem magnitudinem, omnem transiliens infinitatem.* Ratio nostra est quia nullum datur ens limitatum, nisi habeat aliquam causam suæ limitationis; unde si entia creata sint limitata, hoc est, quia eorum causa efficiens, vel non potuit, vel non voluit dare suo effectui ulteriorem perfectionem, sed à nullo Deus potest limitari, quoniam est ens supremum, ab omni alio prorsus independens: ergo datur actuale infinitum, nempe Deus. Deinde omni ente finito potest dari maius; sed si daretur ens aliquod maius Deo, Deus non esset Deus, cum per Deum intelligatur omnium entium perfectius & præstantius: ergo. Tandem nulla est entitas, aut perfectio actualis vel possibilis, quæ in Deo non reperitur in gradu infinito, quoniam est infinitus in duratione per *Æternitatem*, in existentia per *Immensitatem*, & in Bonitate, Potentia, Scientia, & cæteris perfectionibus, ratione suæ *essentia*, quæ dicitur *infinitum essendi pelagus*: ergo in rerum natura datur ens actu infinitum in essentia & in omnibus perfectionibus, nempe Deus.

Obijcies 1. Si Deus esset infinitus esset infinitè perfectus; si esset infinitè perfectus, esset infinitè bonus; si esset infinitè bonus, non sineret in mundo vllum esse malum; quia si unum contrarium esset in mundo, non pateretur aliud; sed Deus permittit malum, quia tolerat peccatum: ergo non est infinitus. *Resp.* Deum esse infinitum, & infinitè bonum, non tenetur tamen malum & peccatum destruere; quia non est agens naturale, sed liberum, quod peccata permittit, ut manifestentur eius iustitia, peccatorum puniendo, & eius misericordia reuocando homines à peccatis eorum.

Obijcies 2. Sicur illud est finitum secundum locum, quod ita est in hoc loco, ut non sit in alio; sic illud est finitum in substantia, quod est ita sua substantia, ut non sit substantia alterius; sed ita Deus est sua substantia, ut non sit substantia bruti, hominis, aut Angeli, aliàs denominaretur brutum, homo, vel Angelus: ergo Deus non est infinitus in substantia. *Resp.* ad
min. Deus est ita sua substantia, ut non sit substantia
alte-

alterius formaliter; tunc enim Deus reuera denominaretur brutum, homo, vel Angelus: hoc non impedit tamen, quin contineat eminenter has substantias, quas producere potest, & quæ sunt nobiliss in Deo, quàm in seipsis.

Obijcies 3. Si Deus est substantia hominis, vel bruti, potest denominari homo, & brutum; quod tamen absurdum est dicere: ergo nec etiam eminenter continet naturam bruti, aut hominis. *Resp.* negando sequelam antecedentis, quia à continentia eminentiali non denominatur subiectum, sed tantùm à continentia formali; licet enim sol contineat eminenter ranam aut vermes, non tamen denominatur vermibus aut rana; bene autem ignis denominatur calidus, & nix alba, quia formaliter continet essentiam & rationem formalem caloris & albedinis.

Q V Æ S T I O III.

*An dari possit in Creatis Infinitum actu in
Essentia.*

HOc existimant antiquorum aliqui, quorum meminuit Arist. 3. *Phys. text.* 40. imò Democritus ex Fonseca 2. *Metaph. cap. 2. quest. 7.* censuit infinitos actu existere mundos; quod audiens Alexander magnus lacrymatus est, propter quòd unicum mundum tunc sibi comparauisset. Contrarium tenent Catholici, nullum ens creatum esse actu infinitum; & præsertim Scotus in 1. *dist. 2. quest. 2.* post Arist. 3. *Phys. text.* 41. Hanc veritatem docet fides Sap. 11. *Omnia in pondere, numero, & mensura posuisti.* Hoc idem tradit philosophia, quæ omnia entia creata in decem categorijs collocat; sed ea quæ in prædicamentis continentur, sunt finita & limitata, quandoquidem, vel sunt genera, vel species, vel individua, quæ omnia suas habent differentias quibus ita restringuntur ad certam classentis, ut non progrediantur extra illam. Constat ergo in creatis non dari infinitum actu; an autem per potentiam D. si possibilis creatura secundum essentiam infinita, negabit etiam.

CONCLUSIO.

Non potest in creatis dari aliquod ens, quod sit *actus* & categoromaticè infinitum in essentia. Dixi *infinitum actus*; quia in rerum natura dari potest infinitum in potentia, tum secundum magnitudinem, tum secundum multitudinem, tum aliquammodo secundum essentiam. Cum enim non possit reperiri tam magna quantitas, cui Deus novam extensionem addere non valeat, proinde datur infinitum in potentia secundum magnitudinem. Cum etiam nullus numerus Angelorum vel hominum ita magnus sit, cui Deus non possit adijcere novas partes, proinde datur infinitum in potentia secundum multitudinem. Cum denique nulla creatura tam perfecta sit secundum essentiam. Quod si dicatur frustraneam esse potentiam, quæ non potest reduci ad actum, & proinde non debere admitti infinitum potentiale; quoniam nunquam effici potest actuale. Responderi debet quod infinitum potentiale non dicat respectum ad infinitum actuale quod possibile sit; ad hoc enim nulla datur possibilitas, cum nullum infinitum actuale dari queat in creatis: sed infinitum potentiale tale dicitur per respectum ad gradum ulteriorem, quem recipere potest.

Quod autem non possit dari infinitum actuale inter entia creata, ex eo probari potest quod si daretur infinitum actuale in essentia, deberet esse infinitum in omni genere perfectionis, quia proprietates subiecti sequuntur naturam subiecti: sed nulla creatura potest participare essentiam infinitam & infinitas perfectiones, aliàs esset Deus, qui pro caractere suo induit infinitatem essentiae & perfectionis: ergo inter creaturas nulla potest dari, quæ sit infinita secundum essentiam. Deinde creatura illa, quam à Deo supponimus creari infinitum, vel esset dependens, vel independens; sed si esset dependens, non esset infinite perfecta, quia careret independentia, quæ est perfectio: si verò diceretur independens, hoc repugnat; quia supponimus illam à Deo produci, & quod ab alio producitur, ab alio dependet: ergo non potest dari infinitum actu. Tandem omnis essentia creata vel creabilis est determinata vel determinabilis ad certum genus, & ad certam differentiam entis, utraque non progreditur; ita quod

quodd si sit de genere spiritualium, non possit tendere, ad entitatem corporalium; sed quod est sic determinatum ad vnum genus & ad vnam differentiam, non est infinitum; quia caret perfectionibus illorum generum & illarum differentiarum, quibus priuatur: ergo nullum ens creatum aut creabile est infinitum actu.

Obijcies, Deus habet potentiam actu infinitam: ergo potest producere effectum infinitum actu. *Resp.* negando consequentiam. Licet enim Deus sit infinite productiuus, creatura tamen infinita actu non est producibilis; aliàs esset creatura & non creatura, quod repugnat. Esset, inquam, creatura, quia à Deo crearetur, vt supponimus; non esset verò creatura, quandoquidem esset Deus participando naturam infinitam & perfectiones infinitas, quæ sunt notio Dei. Quando ergo dictum est, *quod non possit dari infinitum actu*, hoc non procedit ex defectu virtutis ex parte Dei, qui cum sit omnipotens, producere potest omne possibile; sed ex defectu possibilitatis ex parte obiecti, in quantum inuoluitur aliqua contradictio in obiecto, nempe in illo infinito, quod esset Deus & non esset Deus, & quod esset creatura & non creatura. *Dices* effectus debet proportionari causæ; sed potentia Dei est infinita, ergo debet illi respondere effectus infinitus. *Resp.* effectus debet correspondere causæ, si sit *possibilis*, concedo: si sit *impossibilis*, nego. Quando autem Deus agit *ad extra* respectu creaturarum, non potest producere effectum infinitum, nisi in potentia; quatenus nihil potest dari in creatis taliter perfectum, quin Deus possit reddere illud perfectius: non potest verò producere effectum actu infinitum, quia hoc repugnat, vt ostensum est. Quando autem Deus producit *ad intra*, tunc terminus productionis est infinitus, sicut & potentia productiua est infinita; quia non repugnat, quod in diuinis dentur productiones infinite, sicut hoc implicat in creatis.

Q V Æ S T I O IV.

Virum possit dari Infinitum in Magnitudine.

Licet præcedens conclusio probauit non posse dari in creatis aliquod ens infinitum in substantia & in omni genere; quia scilicet talis entitas repugnat in se: dubi-

dubitari tamen potest *an possit dari ens aliquod infinitum in quantitate continua*, seu in magnitudine, quod admittunt recentiorum aliqui, nullam reperientes implicantiā, quod detur linea infinite longa, superficies protensa in infinitum, & corpus infinite longitudinis, latitudinis, & profunditatis. Sic inter Scotistas noster Poncius, qui existimans Doctorem nostrum nihil positiui determinasse super hanc difficultatem, docet per potentiam D. posse in creatis dari infinitum in magnitudine. Hoc habet *Disp. 3. de Infinito*, ubi soluit quinque implicantias eorum qui negant posse dari actu infinitum in quantitate.

CONCLUSIO.

Dari nequit infinitum actu in magnitudine. Sic Scotus 2. *Metaph. quest. 6.* & in 2. *dist. 2. quest. 9.* post Arist. 3. *Phys. tex. 37.* & 40. Ratio huius veritatis est quod si daretur linea infinita totum non esset maius sua parte; posito enim quod talis linea diuideretur in partes, vel illæ partes essent finitæ, vel infinitæ: si finitæ, linea esset finita, quia ex finitis infinitum resultare non potest: si autem illæ partes essent infinitæ, tota linea non esset maior qualibet parte, quandoquidem infinito nil maius dari potest. Deinde omne continuum & quantum est figuratum, quia figura resultat ex terminatione partium quantitatis continuæ; sed quod est figuratum est finitum, quoniam terminatur ab extrinseco nempe à sua figura; ergo non potest dari quantitas aliqua, quæ sit infinita. Tandem omne corpus naturale est mobile; sed omne mobile est finitum, quia requireretur spatium infinitum, in quo moueretur illa infinita quantitas, quod non est dabile: ergo cum repugnet dari corpus naturale quod non sit mobile, pari iure implicat quod detur corpus infinitum. His addi potest, quod si à linea infinita detraheretur longitudo bipedalis; vel illæ partes essent æquales, vel inæquales; si non sint æquales, una earum est longior, altera, & proinde ea quæ est minus longa, non erit infinita: si autem remaneant æquales, evertitur axioma mathematicum, si ab æqualibus inæqualia demas, quæ remanent erunt inæqualia.

Obijcies. Deus cognoscit lineam infinite longam; sed quidquid intellectus eius cognoscit, voluntas potest effici-

efficere: ergo Deus potest efficere lineam infinitam.
Resp. Deus cognoscit lineam infinitam, *syneategorematicè* possibilem, concedo: cognoscit lineam infinitè longam, *categorematicè* possibilem, nego: non potest enim Deus cognoscere lineam ita longam, quin possit illi addere aliam & aliam longitudinem, aliàs potentia Dei exhauriretur, quod pugnat contra illius infinitatem. *Dices* potentia infinitæ debetur effectus infinitus: ergo non debet Deo denegari, quòd possit producere quantitatem infinitam, cum ex parte sui sit infinitè productivus, & ex parte obiecti, quantitas semper augeri valeat. *Resp.* Potentiam D. posse spectari, vel ad intra, vel ad extra; si consideretur ad intra, habet quidem terminum infinitum, quandoquidem Pater in Diuinis producit Filium, qui infinitus est, si spectetur verò ad extra, non potest habere effectum infinitum, quia talis effectus non est possibilis, quandoquidem esset Deus & non esset Deus, creatura & non creatura, ut antea dictum est. Si consideretur ergo potentia Dei ad intra, non ideo dicitur infinita, quia potest producere infinitum in actu; sed quia valet producere infinitum in potentia: ita ut quamlibet magnitudinem, quemlibet numerum, & quamlibet qualitatem possit augere & intendere; quod sufficit, ut in creatis possimus colligere Deum esse infinitè potentem: cum ius potentia limitari non possit per ullum effectum productum aut producibilem.

Q V Æ S T I O V.

An possit dari Infinitum actu in multitudine.

EX antecedentibus, aliud est infinitum secundum substantiam, seu in omni genere entis: & infinitum secundum quid, seu in certo entis genere, nimirum in quantitate, vel in qualitate. Infinitum in quantitate intelligitur esse duplex, nimirum in quantitate continua, si v.g. daretur linea infinitæ longitudinis; & in quantitate discreta, si daretur numerus in infinitum multiplicatus. Infinitum simpliciter seu in omni genere non posse dari inter creaturas; probatum est in quaestione tertia huius capituli. Infinitum etiam actuale in quantitate continua seu in magnitudine non posse dari in creatis, ostendimus per rationes præcedentis conclusionis, contra Epicurum, & quosdam alios, qui putauerunt

dari de facto magnitudinem infinitam, dicentes extra hunc mundum esse spatia infinita plena infinitis alijs mundis, modò pereuntibus, modò renascentibus ex varia dispositione atomorum in infinito illo spatio volitantium. Nunc superest vt agamus de infinito actuali in multitudine, seu in quantitate discreta, supra quam difficultatem tantum est dissidium, vt Conimbricenses vtramque partem probabilem censuerint; Ochamus, Gregorius, Ariminensis, cum Vasquesio & pluribus existimauerint posse dininitus dari numerum infinitæ multitudinis; D. Thomas verò, D. Bonau. Scotus, Durandus, & alij sustinuerint *repugnare infinito actu in multitudine*.

CONCLUSIO.

Non potest dari infinitum actu in multitudine. Sic Scotus præ alijs in 2. dist. 1. quæst. 3. & dist. 3. quæst. 6. & quodlib. 2. & 6. Contra Mauricium, Cancellum, & Poncium, qui existimant in hac difficultate dubium & problematicum videri Scotum; qui tamen, si seriò legatur, in locis præallegatis, & 2. Metaph. quæst. 6. sicut & in 3. dist. 13. quæst. 4. aperte patebit Doctorem nostrum negare possibilitatem infiniti actualis in multitudine; vnde in 3. dist. 14. quæst. 2. addit contrariam opinionem opponi multis authoritatibus Philosophorum, & Sanctorum. Quando ergo Aristoteles 1. Phys. text. 15. pro quantitatis proprietatibus assignat finitatem & infinitatem, hoc non debet intelligi de infinitate actuali, sed tantum de potentiâ; quanaoquidem non potest tanta dari quantitas, quin maior adhuc in infinitum dari possit per respectum ad potentiam D. quæ in effectibus suis exhaustiri non potest. Licet etiam in mente Philosophi 6. & 8. phys. motus & tempus sint infinita, quia sunt æterna: hoc tamen non probat dari infinitum actuale: vltra enim quòd effectum Aristotelis sit contra fidem, quæ Gen. 1. docet Deum in principio creasse cælum & terram; non propterea daretur infinitum actuale: quia præexistenti motui & tempori partes de nouo actuales adiungerentur, quod repugnat infinito actuali, de cuius ratione est quòd non possit fieri maius: quia antequam reciperet talem nouam partem, eacareret, & proinde non esset infinitum. Si denique nam, 10. mentio fiat

fiat de infinita multitudine, & *Ecclesiastes* 1. numerus stultorum dicatur *infinitus*; hi contextus intelligantur de ingenti multitudine, & de numero qui valde excedit multitudinem aliarum rerum. Porro, si Aristoteles 6. *topic. cap. 3.* dicat lineam infinitam non habere medium aut fines; ibi loquitur de infinitate *potentiali*, ut interpretatur Scotus; quatenus non potest deueniri in ultimam diuisionem partium lineæ, sicut diximus de omni continuo.

Conclusio nostra probatur ex hoc, quod infinito in actu nihil possit addi; nec detrahi ab eo, ut docent Arist. 3. *Phys. text. 41.* & Scotus in 4. *dist. 49. quæst. 1.* sed datâ quacumque multitudine, Deus potest illi addere nouas vnitates, & de præcedentibus aliquas detrahere: aliàs potentia Dei esset exhausta, & proinde non infinita: ergo non potest dari per potentiam D. actuale infinitum in multitudine. Quæ ratio etiam ostendit non posse diuinitus dari infinitum actuale in magnitudine. Deinde si posset dari infinita multitudo hominum, talis numerus esset finitus & infinitus, quod repugnat; esset, inquam, infinitus, ut supponitur: non esset verò infinitus, quia infinito non potest dari maius, & tali infinito maior numerus daretur, quia plures essent oculi, quàm homines; plures digiti, quàm oculi; & plures capilli, quàm digiti; quæ omnia sensatis videbuntur absurda, nisi admittere velint infinito dari maius: vel totum non esse maius sua parte. Tunc si supposito quod detur multitudo infinita, ipsa diuiditur in duas, vel in quatuor, aut decem partes; quælibet earum erit finita, vel infinita; sed si est finita, non faciet multitudinem infinitam; quia finitum additum finito non facit infinitum, si autem quælibet pars est infinita, illa totalis multitudo non erit maior qualibet parte, quandoquidem infinito non datur maius; quod adhuc repugnat: ergo dari non potest infinitum in quantitate discretæ, seu in multitudine.

Obijcies 1. Deus potest facere nunc, quod in tota æternitate facere valet: sed in tota æternitate, quæ est infinita, potest producere infinitos Angelos: ergo nunc potest producere infinitum numerum Angelorum actualem. Resp. distinguendo maiorem: Deus potest facere nunc, quod in tota æternitate efficere valet, diuise, concedo: collectiue, nego. Id est, Deus potest quidem in hoc instanti facere in particu-

lari quodlibet entium, quæ facere potest per totam æternitatem, sed non potest simul actu omnia entia producere, quæ per totam æternitatem creare potest. Nam si crearet simul omnia entia quæ posset creare in tota æternitate, vel Deus posset addere aliquid postea tali numero, vel non; si possit, numerus ille non est infinitus, quia *infinitum est id cui nihil addi potest*. Si Deus non possit addere illi numero, exhausta est potentia D. ergo non esset infinita, quia *infinita potentia exhaustiri, & terminari non potest*, quandoquidem infinitum est id, quod caret terminis actualibus & possibilibus. Dicendum ergo est, quod Deus possit quidem diuisione producere in vno instanti id quod potest producere in tota æternitate, non verò collectiue, propter rationem allatam.

Obijcies 2. In vna hora sunt infinita instantia; sed in quolibet instanti potest Deus producere vnum Angelum: ergo elapsa vna hora productus erit numerus Angelorum infinitus. *Resp.* in vna hora reuera esse instantia infinita *syncategorematicè*, non verò actu, & diuise, & in vnoquoque eorum Deus posset producere Angelum, si illa instantia essent actu diuise; sed quia illa instantia non possunt actu diuidi, alias continuū quod est diuisibile resolveretur in diuisibilia, & ex illis proinde componeretur; ideo non potest Deus actu in quolibet instanti diuiso producere Angelum, quoniam illa instantia actu diuidi non possunt, vt probauimus alias, dicentes omne continuū esse diuisibile in semper diuisibilia, & nunquam deueniri posse ad aliquam partem indiuisibilem.

Obijcies 3. Voluntas, & intellectus in Deo sunt eiusdem virtutis; sed intellectus D. potest intelligere infinitum: ergo, & voluntas illud velle poterit: & sic dari potest infinitum actu, quoniam voluntas D. est causa rerum. *Resp. ad min.* Intellectus D. potest intelligere infinitum actu, vt est impossibile; non verò, vt est possibile: & sic voluntas diuina vult etiam ipsum vt impossibile, sed non vult quod possibile sit. Si dicatur effectum debere proportionari causæ, & propterea causam infinitam respicere infinitum effectum. *Resp. anteced.* esse verum in causis vniuocis, quæ agentes ad extremum potentia producant effectum sibi similem; vnde prædiximus in diuinis Patrem Infinitum generare Filium Infinitum: In causis verò æquiuocis non est necesse vt
esse.

effectus infinitus procedat à causa infinita, nec consequenter Deus, qui *adextra* est causa equiuoca, potest producere creaturam infinitam, propter rationes allegatas.

QVÆSTIO VI.

An possit dari Infinitum actu in Qualitate.

HVcusque dictum est de infinitate quantitatis, quam negauimus posse dari, tum in quantitate continua, tum in quantitate discreta; quoniam dari nequit extensio infinita, aut infinita multitudo: nunc examinandum est *an etiam repugnet dari inter creaturas aliquod ens, quod sit infinitum in qualitate, seu cuius qualitas sit infinite intensa*; sicut enim quantitas, dum crescit, augeri dicitur; ita qualitas, dum perficitur, dicitur *intendi*. In hac quæstione controuertuntur authores, propterea quòd gratia Christo concessa dicitur *summa*; ex quo forsàn possent inferre aliqui *gratiam Christi; qua est creata, esse summam*. Quòd ut facilius soluatur, sciendum est gratiam Christi posse intelligi *summam* per respectum ad omnes gratias actuales, quatenus non tanta fuerit gratia in omnibus Angelis, & hominibus, quanta fuit in Christo, qui est Angelorum, & hominum caput: licet per respectum ad gratias possibles gratia Christi non fuerit *summa*, quoniam Deus de potentia sua absoluta potuit infundere alteri creaturæ gratiam maiorem illà quam contulit Christo.

CONCLUSIO.

Non potest dari infinitum actu in qualitate in 3. dist. 13. quæst. 1. cum D. Thom. 2. 2. quæst. 14. articulo 7. Rationes sunt eadem cum illis quas attulimus antea, probantes non posse dari infinitum actu in magnitudine, aut in multitudine. Posito enim, quòd daretur qualitas infinita in aliquo subiecto, posset vterius quæri, *an Deus valeret conferre nouum gradum eiusdem qualitatis, vel non posset*. Si autem Deus posset taleni gradum addere, illa qualitas non esset infinita; quia infinito nihil addi potest; si verò non posset illi addi nouus gradus, exhauriretur potentia D. quæ proinde non

non esset infinitè productiua. Et sic eadem ratio fundamē-
 mentalis, quę probat non posse dari infinitum actum
 in quantitate, suadet etiam non posse dari infinitum
 actum in qualitate. Adde quòd repugnat dari infinitam
 essentiam; ergo & infinitam qualitatem; quoniam qua-
 litas infinita exigeret subiectum infinitum sibi propor-
 tionatum.

An autem detur aliqua qualitas, quę in sua finitate
 sit ita intensa, vt non possit fieri intensior; hoc aliqui
 attribuunt Scoto sustinenti gratiam Christi fuisse in-
 extensibilem, & inaugmentabilem, cùm sit maxima, si-
 cut, & eius hypostatica vnio: sed hoc facilè solui po-
 test, dicendo scilicet, vt prænotauius; quòd gratia
 Christi sit summa positiuè per respectum ad omnes
 gratias actuales, quas Deus decreuit dare Angelis, &
 hominibus, licèt non fuerit maxima per respectum ad
 gratias possibles, quas potuit dare. Postquam enim
 Verbum D. incarnatum fuit, potuit Spiritus Sanctus
 incarnari, & Deus potuit dare Spiritui S. incarnato
 gratiam maiorem gratia Christi; quia maior absolutè
 est dabilis. Si enim, vt diximus in Theologia, repu-
 gnaret dari gratiam maiorem gratia Christi, vel re-
 pugnaret ex parte gratiæ, vel ex parte recipientis; sed
 non repugnat ex parte gratiæ, quia gratia Christi se-
 cundùm omnes, est finita, & omni finito potest dari
 maius: non etiam repugnat ex parte recipientis, quia
 anima est in potētia obedientiali ad Deum, & ad quam-
 cumque gratiam ab eo recipiendam: ergo quacumque
 recepta, potest semper maiorem, & maiorem recipere,
 modo non sit infinita, & sic non datur qualitas ita in-
 tensa in se, vt intensior non possit reddi absolutè per
 potentiam D.

Obijcies. Vel inter omnes gratias, possibilis erit ali-
 qua simpliciter summa, quā maior dari non potest
 absolutè, & talis erit in Christo, cui attribui debent
 omnes perfectiones possibles, propter vnionem hypo-
 staticam, qua maior non potest dari; vel potest sem-
 per alia, & alia fieri perfectior, & tunc admittetur pro-
 cessus in infinitum, in quo vltima gratia infinitè dista-
 bit à prima, & proinde erit infinita, quod non potest
 concedi, quandoquidem in creatis daretur infinitum
 categorematicum: ergo remanet dicere, quòd gratia
 Christi ita fuerit intensa, vt ea maior non possit dari,
Resp. quòd dabitur reuerà processus in infinitū syncate-
 gore-

gorematicè, cùm non possit dari talis gratia, quin maior adhuc sit dabilis: negamus tamen, quòd aliqua earum sit infinita, & quòd vltima infinitè distet ab alijs, cùm semper maior, & maior dari possit.

Quæres, an Deus possit producere speciem in infinitum perfectiorem. Hoc admittunt omnes, quantum ad intentionem accidentalem, quòd scilicet non possit dari species aliqua creaturæ tam perfecta, quin illi possit superaddi gradus vltior perfectionis accidentariæ; ità quòd lux solis, fertilitas terræ, & humiditas aeris possint augeri in infinitum. An autem idem possit contingere respectu perfectionum essentialium, non æqualiter admittunt authores; quoniam Alensis 2. *Metaph. text. 12.* D. Bonau. in 1. *dist. 44. quæst. 1.* cum D. Thoma 1. p. *quæst. 25. articul. 6.* & pluribus alijs tenet darà quacumque specie perfecta, Deum posse aliam, & aliam perfectiorem in infinitum producere. Durandus verò, & ex Scotistis Poncius affirmant hoc repugnare, ad suamque mentem adducere tentant Scotum 2. *Metaph. quæst. 6.* sed cum Mauricius noster in annotatione ad prædictum locum velit Scotum non firmiter adherere huic parti; libenter dicam cum nostris duobus nuperis Scotistis posse sustineri, quòd sicut Deus potest producere creaturam in infinitum perfectiorem accidentaliter; sic etiam valeat producere species semper, & in infinitum perfectiores in essentialibus.

Tale enim infinitum syncategorematicum non repugnat ex parte Dei, qui est omnipotens: nec ex parte creaturæ, quæ cum sit finita in sua specie, potest admittere perfectionem essentialem maiorem in infinitum. Data enim quacumque specie perfecta, vel Deus potest perfectiorem condere in infinitum, vel non potest: si potest, vera est nostra responsio: si non potest, potentia Dei manebit exhausta per productionem effectus finiti, quod imperfectionem redolet in potentia Dei, quæ cùm sit infinita, nullos agnoscit limites in essentialibus, sicut nec in accidentalibus, quod tamen admittunt aduersarij. Quòd si in contrarium afferatur Aristotel. 2. *Metaph. cap. 2.* dicens, in essentialiter ordinatis non abiri in infinitum; & proinde in naturis specificis debere apponi limites, & terminos: Respondet noster Moestrius Philosophum intelligi debere de causis essentialiter suber-

subordinatis, ad quarum primam deueniendum est, quæ sic alias producat, vt à nulla producat, non negat tamen Aristoteles quin inter species possit dari processus in infinitum syncategorematicum, in hoc scilicet consistens, quod non possit dari species ita perfecta, quin perfectior & perfectior in infinitum syncategorematicè possit dari, sicut diximus euenire respectu magnitudinis, multitudinis, & qualitatum, quæ ad tale augmentum non deueniunt, quin possint adhuc augeri, multiplicari, & intendi.

Quantum ad Scotum pro parte contraria allegatum, sciendum est ex illo in 1. dist. 17. quæst. 2. potentiam Dei esse duplicem; ordinariam scilicet, & absolutam. *Ordinaria* est ea quæ Deus agit in tempore secundum leges, quas sibi ordinauit, & proposuit ab æterno: sit Deus de potentia ordinaria remunerat virtutem, & punitiones infligit vitio. *Potentia verò absoluta* ea est, quæ à decretis æternis absoluendo respicit simpliciter, & præcisè possibilitatem obiecti: sicque Deus per potentiam absolutam, & extraordinariam potest liberare damnatum ab inferno, annihilare hunc mundum, vel alios creare, quandoquidem in his nulla est repugnantia. Quando ergo Scotus videtur dicere, quod Deus producere non possit speciem in infinitum perfectiorem, intelligi potest de potentia *ordinaria*; non verò de potentia *absoluta*, Debet, inquam, intelligi de potentia *ordinaria*, quia scilicet Deus attendens ad species, quas potest producere cum tali, & tali perfectione decreuit perfectiorem istà vel illà non producere: & sic de potentia ordinaria stare debet in aliqua specie talis vel talis perfectionis essentialis determinatæ. Hoc non impedit tamen quin de potentia sua absoluta, quæ solam obiecti possibilitatem respicit, aliam, longè perfectiorem producere valeat.

Quando autem dicit Scotus omne creatum aut creatibile residere in prædicamento, in cuius ascensu summum genus tenet supremum locum, ultra quem non potest dari progressus prædicamentalis, hoc non impedit quin sub illo supremo genere, quod est finitum, vt supponitur ex Logicis; possint dari infinita genera subalterna, & species infinitæ, saltem syncategorematicè, quas Deus producere potest, sicut sub aliqua specie talis prædicamenti potest producere individua infinita syncategorematicè. Quod si Aug. 12. Confess.

cap.

cap. 7. dicat, *Deum fecisse Angelum prope se ita perfectum, ut perfectiorem producere non valeat*; intelligitur sanctus Doctor de facto, non verò de possibili potentiam absolutam. Si denique dicant Theologi *unionem hypostaticam Verbi D. visionem beatificam, & maternitatem B. Virginis esse ita perfectas, ut perfectiores effici non valeant*; hoc verum est respectu terminum quem connotant, qui cum sit infinitus, non potest effici perfectior; quandoquidem unio hypostatica Christi, & maternitas Virginis Mariæ terminantur ad personam verbi D. & visio beatifica ad *Essentiam D.* quæ cum sint infinitæ perfectionis, proinde hæc tria entia non possunt reddi perfectiora, nec intelligi. Hoc tamen non impedit, quin inter creaturas finitas alia, & alia perfectior in infinitum possit produci.

CAPUT III.

De Loco.

Non sumus hic loquuturi de Loco sumpto formaliter, ut est respectus extrinsecus adueniens locantis ad locatum; qui respectus apud Logicos constituit prædicamentum *vbi*: sed de loco materialiter spectato, ut est *superficies corporis ambientis locatum*.

QVÆSTIO PRIMA.

Quid sit Locus.

Locum existere præsupponit Scorus *quodlib.* 11. cum enim experientia demonstret dari locatum, seu corpus in loco existens; negari non potest, quin detur *locus*; quoniam à concreto ad abstractum tenet communius consequentia, quæ probatur ex albo albedo ipsa, & vestis ex vestito. Deinde grauiâ descendunt deorsum, leuiâ sursum, & omnia elementa ad loca quæ illis naturaliter competunt. Tandem sicut ex transmutatione substantiæ perducimur in notitiâ materiæ, quæ successiuè recipit formas; sic ex mutatione locali corporum colligere possumus euidenter dari locum, quoniam videmus ad oculos unum corpus deferere locum in quem aliud subintrat, cum simul esse in eodẽ loco non valeant. Supposita autẽ loci existentia, explicandũ venit *quid sit locus*.

CON-

CONCLUSIO.

Locus non est spatium illud quod intercedit inter latera corporis ambientis, ut voluerunt veteres illi Philosophi, quos refutat Philosophus 4. *Phys. text. 36.* Spatium enim illud non est aliquid reale, sed purè imaginarium, & sic non est locus Physicus, qui realis esse debet: cum realiter contineat corpora naturalia. Melius ergo dici debet, quòd *locus sit superficies ultima, & immobilis corporis ambientis.* Dicitur primò quòd sit *superficies*, quia cum linea non sit diuisibilis, non potest continere corpus, quod est diuisibile. Dicitur secundò *ultima*, seu *concaua*; quia non omnis superficies est locus, sed solùm illa, quæ in suæ concauitatis capacitatem continet corpus: ut superficies concaua aeris, quæ quia circumscribit, & immediatè continet corpus meum, ob hoc dicitur *locus meus*. Dicitur tertio *immobilis*, quia locus ut sic non mouetur, nisi per accidens; cum per se non moueatur *locus*, sed corpus moueatur ad locum. Dicitur quartò quòd sit *superficies corporis*, quia agimur de loco corporeo, in quo corpora actualiter extensa locantur. Additur denique *superficies corporis ambientis*: quia talis superficies continet, & ambit locatum; ut superficies conuoca cœli lunaris, quæ immediatè ignem elementarem tangit.

Obijcies ù. Definitio debet constare genere, quod participetur à definito, ut patet de definitione hominis, in qua includitur *animal*, cuius rationem participat homo; sed in definitione præcedenti superficies non potest tenere locum generis, quandoquidem locus nequit dici propriè superficies, cum locus sit quid relatiuum, & superficies quid absolutum, de genere quantitatis: ergo præcedens definitio non est legitima, *Resp.* In hoc distingui definitionem entis absoluti à definitione entis relativi, quòd definitio entis absoluti detur per proprium genus, quod à definito participetur; ut patet in definitione hominis, in qua includitur *animal*, tanquam genus ab homine participatum; in definitione autem entis relativi, non reperitur proprium genus, quòd à definito participetur; sed loco illius ponitur fundamentum relationis; unde quia locus est quid relatiuum, ut paulo post dicetur, idèò

ideo in definitione illius pro genere apponitur fundamentum ex quo resultat illa relatio, nempe superficies concava corporis continentis, quæ fundat relationem loci ad locatum.

Obijcies 2. Locus ex Arist. 4. Phys. text. 41. est ultimum corporis continentis immobile primum; sed superficies corporis ambientis non est semper immobilis, ut patet de turri existente in superficie aeris; quæ flante vento perpetuò mutatur: ergo non benè definitur locus, quòd sit immobilis. Ad hanc instantiam respondent Thomistæ immobilitatem loci reperendam esse ex distantia à terminis & centro mundi: aut quotiescumque locatum mutat eiusmodi distantiam à illis terminis & à centro mundi, dicatur moueri localiter. Scotus verò respondet locum esse immobilem non quidem simpliciter & absolutè, ut patet ex ratione obiecta; sed æquivalenter, quatenus nimirum flante vento superficies aeris mutatur quidem, sed illa quæ de nouo aduenit transit in vices præcedentis: vnde cum semper eadem conseruetur distantia turris ab illo aere priori, vel ab alijs succedentibus, proinde turris illa non dicitur moueri localiter; imò aer illam ambiens censetur esse idem æquivalenter, non obstante continua mutatione illius. Idem dicendum est de illa parte turris, quæ existit in fluuiq, cuius partes formaliter fluunt continuò, licet æquivalenter censeantur manere, quatenus vna succedit alteri.

Ad hanc solutionem Scoti, addi potest conformiter illius doctrinæ, quòd non ideo locus dicatur immobilis, quasi omnem mobilitatem reiiciat; tunc enim turris non esse in aere, cuius partes continuò fluunt; sed ideo locus dicitur immobilis, quia non est necessarium, quòd locus moueatur cum locato, sed quòd corpus moueatur ad locum. In hoc enim distinguitur locus à vase continente liquorem, quòd moto liquore vas moueatur, moto tamen locato non mouetur locus, id est, non est necessarium, quòd moueatur. Non debet ergo negari, quòd locus sit omnino immobilis, sed tantum negari debet, quòd locus moueatur necessario ad motum locati: sicuti partes intrinsecæ mouentur ad motum totius, vestis ad motum rei vestitæ, & liquor ad motum vasis in quo continetur. Si ergo queratur quanam sit differentia inter vas continens liquorem, & locum ambientem corpus, cum utrum-

que contineatur in alio : Respondetur in ea hoc distingui, quod vas sit necessariò mobile, ad motum liquoris; & locus non sit necessariò mobilis ad motum rei locatæ, imò res locata deserit suum locum, tanquam terminum à quo, vt acquirat nouum locum, tanquam terminum ad quem, in quo consistit ratio motus localis.

QVÆSTIO II.

Quotuplex sit Locus.

Explicata definitione loci, quem diximus esse superficiem corporis ambientis, non quidem omnem, sed solam concuam; quandoquidem loquimur de loco proprio, qui immediatè cingit locatum, vbi superficies conuexa mediatè tantùm & remotè locatum continet. Explicata etiam ratione generis prædictam definitionem ingredientis, quod non est proprium genus, sed tale quale debet esse genus entis relatiui. Explicata denique ratione immobilitatis loci, per hoc scilicet, quòd non debeat necessariò moueri ad motum rei locatæ: quandoquidem locus ille esset adhuc in loco, & ille in alio, sicque in infinitum. Nunc progrediendum est ad diuisionem loci.

CONCLUSIO.

Locus diuiditur in Communem & Proprium. *Communis* est ille qui res multas continet; sic templum in quo sunt plures orantes. *Proprius* ille est qui vnicam rem ambiat, vt aer, qui meum corpus circumdat.

Locus diuiditur in Naturalem & Violentum. *Naturalis* est ille in quo locatum naturaliter quiescit, & ad quem naturali impetu fertur, quando abstractum est ab illo, sic quando lapis est deorsum, & ignis est sursum, dicuntur esse in loco naturali. *Violentus* est ille in quo locatum vi detinetur; vt si lapis esset suspensus in medio aere.

Locus diuiditur in Internum & Externum. *Internus* est spatium illud, quod à corpore occupatur: vnde corpus aliquod dicitur esse in tali loco, quatenus tale spatium loci occupat. *Externus* verò est superficies externa, à qua corpus locatum continetur, quæ ideo di-

citur locus externus, quia inter locum & locatum non est unio formalis & intrinseca, licet sit immediata: Locus intrinsecus est idem cum superficie concava, & *internus* cum connexa.

Locus diuiditur in Realem & Imaginarium. *Realis* est vera & *realis* superficies corporis continentis corpus reale & verum. *Imaginarium* verò est imaginaria superficies, quæ corpus fingitur cingi, à qua tamen non cingitur, cum nullum sit aliud corpus in quo contineatur: sic cælum empyreum dicitur esse in loco imaginario, qui tamen non est quid reale, quandoquidem extra cælum empyreum non est aliud corpus, quo istud vltimum cælum cingatur.

Locus denique diuiditur in Circumscriptiuium & Definitiuium. *Circumscriptiuius* est ille in quo partes locati correspondent partibus loci: ita quòd pars superior locati sit in parte superiori loci, & inferior in inferiori. *Definitiuius* est ille, in quo totum locatum correspondet toti loco, & cuilibet parti loci, vt amplius explicatum habetur in logica, agendo de Prædicamento *ubi*.

Quæres quam sint proprietates loci. Resp. multas afferri communiter à philosophis, quarum prima est *unitas*; sicut enim quælibet res creata est vnius essentia, sic vnum exigit determinatum locum, adæquatum videlicet, quòd non impedit quin eadem *numeros* res possit aliquando per partes esse in pluribus locis inadæquatis & partialibus, caput nimirum in aere, humeri in igne, & pedes in aqua: hoc non impedit etiam, quin supernaturaliter vnum & idem corpus possit esse in pluribus locis, vt dicitur. Secunda proprietas est, quòd *locus contineat locatum à quo repletur*; est enim relatio inter locum continentem & locatum in eo contentum, actualis nimirum vel aptitudinalis, si scilicet locatum actu vel aptitudine in loco existat. Tertia proprietas est, quòd *locus sit aqualis locato*; loquimur enim hic de loco adæquato, & locus adæquatus non debet esse maior aut minor re locata. Quòd si continens dicatur maius contento, & quòd proinde locus videatur locato maior: antecedens est verum, de loco sumpto materialiter, prout est corpus quoddam physicum diuisibile, & proinde maius contento; falsum verò de loco sumpto formaliter pro superficie indiuisibili, quæ non excedit locatum. Eandem di-

stinctionem afferunt alij, dicentes, locans quod esse maius locato; locans verò quo esse locato æquale. *Quarta* proprietas est, quod locus sit terminus motus localis, in quo reperiuntur duo termini, à quo, & ad quem. Aliqui addunt quod locus generet, conseruet, attrahat, & perficiat locatum, si sit locus naturalis; & quod habeat contrarios effectus, si sit violentus: sed talis proprietas non censetur conuenire loco ratione sui, sed ratione qualitatum amicarum vel inimicarum locatis; locus enim absolutè consideratus dicit tantum continentiam rei locatæ, quidquid sit de qualitatibus loci & locati, quæ sunt illis extrinsecæ.

Quæres an locus sit quid absolutum, vel relatiuum? Resp. locum materialiter sumptum esse quid absolutum, quandoquidem per locum intelligitur superficies corporis continentis locatum; sed superficies est de genere quantitatis, quæ est accidens: ergo locus materialiter sumptus est quid absolutum. Si formaliter verò sumatur locus, tunc est entitas relatiua, vt docet Scotus 5. met. quæst. 9. post Arist. 4. phys. text. 41. vbi, in definitione loci, præter superficiem, ponit continentiam rei locatæ; sed continentia est relatio continentis ad contentum, quoniam locus est locati locus, & locatum est loco locatum: ergo locus formaliter sumptus est quid relatiuum: vnde Doctor noster quæst. 23. & 24. prædicam. Docet locum non reponi in prædicamento quantitatis, sed in prædicamento vbi; quod est relatio intrinsecus adueniens. Nec in hoc dissentit Scotus ab Arist. quidquid reclamet Toletus, quia Philosophus non dicit simpliciter, quod locus sit superficies; sed addit, quod sit superficies continentis; continere autem est quid relatiuum pro formali, licet materiale eius sit absoluta quædam entitas, nempe superficies, quæ fundat relationem.

Quæres vtrum qualibet res existat in loco. Resp. hanc esse rerum naturalium sortem, vt sicut quælibet producta est in aliquo tempore, sicut etiam existat in aliquo loco determinato, quem Deus destinauit unicuique pro sua dignitate; ita quod inter elementa inferiores locum teneat terra, paulò superiorem aqua; deinde aer, postea ignis; ac denique cæli; vnusquisque in ordine suo, vsque ad vltimum, quod omnes globos cælestes continet, quorum verè propriè dicitur

citur *locus*. An autem vltimum cælum dicatur esse in loco, hoc negat Scotus *quodlib.* 11. & in 4. *dist.* 49. *quest.* 16. Si enim vltima sphaera, quæ à Theologis vocatur cælum empyreum, esset in loco, contineretur ab alio corpore: sed supra vltimum cælum non est aliud corpus, quoniam illud vltimum esse supponitur: ergo vltimum cælum non existit in loco, ut docet Arist. 4. *phys. tex.* 43. Quod si ibi videatur Arist. dicere cælum esse in loco per partes; per *cælum* intelligit Philosophus vniuersum, cuius partes sunt quidem in loco; quia ambiuntur per vltimam sphaeram; ita autem nullibi esse censetur, quia vltima est.

Quæres *utrum possit aliqua res produci absque præsentia ad locum*. Resp. affirmatiue, potuit enim Deus creare Angelum, imò & corpus aliquod vnicum sine alio corpore quod illud contineat; sed protunc tale corpus non erit in loco: ergo potest aliqua res produci absque præsentia ad locum. *Deinde* ex præcedenti responsione habetur quod vltimum cælum non sit in loco & proinde Deus potest idem facere respectu Angeli, vel cuiuscumque corporis, destruendo scilicet omne aliud à quo inuolueretur. *Si quærat*ur autem per quid *res formaliter sit in loco*: respondebitur breuiter hoc fieri per aliquem modum à re locata distinctum, per quem ipsa verè dicitur realiter existere in loco, ubi antea non erat: qui modus dici potest ubi internum rei locatæ, à re ipsa procedens, non per localem motum, sed per emanationem simplicem. Si quærat^rur autem ulterius *an aliqua substantia totalis existens in loco cum suis partibus & accidentibus habeat plures præsentias ad locum*; hoc admittit noster Poncius, quantum ad partes essentielles substantiæ corporeæ, & quantum ad quodlibet accidens absolutum, ita separabile ab alijs accidentibus & partibus illis essentialibus, ut posset sine illis esse in toto. Sicut etiam horum quodlibet essentialiam habet diuersam ab alio, sic etiam quodlibet eorum potest sibi vindicare præsentiam particularem ad locum; cum dixerimus antea, vni vel diuersæ essentialiæ vnum vel diuersum locum deberi.

QVÆSTIO III.

Verum idem corpus possit esse simul in pluribus locis.

CONSTAT quidem quòd vnum corpus possit esse simul in pluribus locis inadaquatīs, vt si homo esset in aqua vsque ad caput, & haberet caput in aere; sed quæstio nostra est, *utrum possit esse totum in pluribus locis adequatis & totalibus*. Constat etiam idem corpus esse in diuersis locis simul & semel indiuisibiliter, & veluti definitiua præsentia eum fides doceat corpus Christi esse in pluribus altaribus. Constat denique quòd idem corpus possit esse in vno loco diuisibiliter seu extensiuè & in alio indiuisibiliter & inextensiuè, vt corpus Christi in cælo, vbi extensiuè residet, & in sacramento, vbi existit indiuisibiliter. Sed quæstio nostra est, *utrum idem corpus saltem de potentia D. possit esse in pluribus locis diuisibiliter & circumscriptiuè*, Petrus v. g. Romæ & Parisiis. Circa hanc materiam admittunt omnes vnum corpus vnicam exigere Præsentiam ad vnum locum, cum enim omnes corpus finitam habeat perfectionem, limitari debet ad vnum locum, vltra quem se extendere non valeat naturaliter: vnde experientia comprobatur locum vnum ab vno corpore occupatum aliud non posse capere. Imò si aliquod corpus præoccupauerit illum locum, necesse est vt illud expellatur ab eo, antequam aliud possit in eius loco substitui; quod aliundè procedere non potest nisi quia vnicorpori vnus locus debeat. In eadem hac materia dissentiant Calvinistæ à Catholicis, & catholici inter se, quòd illi reiicientes præsentiam realem corporis Christi à sacramento Eucharistiæ, velint vnum & idem corpus non posse esse simul in pluribus locis. Thomistæ cum Durando admittunt quidem idem corpus posse existere in pluribus locis definitiuè, vel in vno loco circumscriptiuè, & definitiuè in alio, vt docet fides catholica de corpore Christi, quod extensum & diuisibile residet in cælo, & definitiuè seu sacramentaliter in Eucharistia. Scotus autem cum nostris, quibus subscribunt plurimi, docet communiter vnum & idem corpus posse diuinitus existere in pluribus locis circumscriptiuè & diuisibiliter.

CON-

CONCLUSIO.

DE potentia Dei absoluta unum Corpus potest esse in pluribus locis simul circumscriptivè. Sic Scotus in 4. dist. 10. quest. 2. Hanc sententiam unanimiter amplectuntur Alensis, Ochamus, Parisienses, & eam Richardus vocat tutiorem in fide. Suares dicit eam maximè magnificare potentiam Dei; & Valentia contrariam refellit, tanquam fidei, patribus, & rationi minùs conformem.

Probatur primò. Quod aduenit respectu corporis Christi, idem aduenire potest respectu cuiuscumque corporis, cum in omnibus sit par & utrobique ratio; sed corpus Christi fuit circumscriptivè in pluribus locis simul & semel: ergo & idem dici potest de quocumque alio corpore. Probatur minor, quia de fide est corpus Christi ascendisse in cælum, & exinde non esse egressurum usque ad diem iudicii, ut habetur Act. 3. *quem oportet cælum suscipere usque ad tempus restitutionis omnium*. Fides eadem docet eundem Christum cum corpore suo apparuisse Paulo eunti in Damascum, ut habetur 1. ad Cor. 15. sed in utroque loco, id est, tum in cælo, tum in aere, vel in terra Damasci, corpus Christi erat diuisibili & circumscriptiuo modo, aliàs non visus fuisset ab Apostolo, quandoquidem oculi, qui sunt organa diuisibilia, non possunt videre nisi obiecta, quæ etiam diuisibilia sunt: ergo corpus Christi simul & semel fuit in pluribus locis diuisibiliter & circumscriptivè. Nec dicere debent Thomistæ apparitionem Christi ad Paulum factam fuisse, non quidem proprio corpore, sed in quadam similitudine & apparentia corporis Christi. Hoc enim contradicit fidei, quæ docet Paulum fuisse verum & proprium testem Resurrectionis Christi; de qua tamen certò non posset testari, nisi ipsum vidisset in carne propria suscitatum. Quòd si dicant Christum ad breve tempus deseruisse cælum, ut occurreret Paulo eunti in Damascum; hoc contradiceret eidem scripturæ Act. 3. dicenti quod oporteat ipsum permanere in cælo usque ad tempus restitutionis omnium: quòd deuotat ipsum nunquam exiisse è cælo, nequidem pro vno momento. Cum ergo eodem tempore Christus extiterit in cælo cum sua quantitate diuisibili quam se

cum assumpsit, & in via Damasci, ubi ipsum vidit Paulus; proinde merito dicimus ipsum fuisse in pluribus locis simul circumscriptivè & divisiibiliter.

Probatur 2. Quidquid potest Deus mediante causa secundâ, hoc idem potest propria virtute, quia potentia D. non alligatur agentibus creatis; sed mediante sacramento Eucharistiæ facit Deus, quod corpus Christi sit in pluribus locis, ut docet fides: ergo Deus se solo idem facere potest. Si respondeant Thomistæ fieri reuerà posse, quod corpus Christi sit in pluribus locis definitivè; non verò posse fieri quod sit in pluribus locis circumscriptivè & divisiibiliter: urgeri debent per hoc, quod si corpus Christi sit in vno loco divisiibiliter nempe in cælo, & in alio indivisiibiliter, nempe in sacramento, à fortiori possit esse in pluribus locis divisiibiliter: quia facilius est esse divisiibiliter in pluribus locis, quàm indivisiibiliter. Nam ad hoc quod corpus Christi sit in cælo extensum, & inextensum in sacramento, requiritur duplex miraculum, per quorum prius idem corpus est in pluribus locis, & per posterius est in vno horum locorum indivisiibiliter, quod est contra virtutem ordinariam corporum, quæ petunt extendi ad locum. Ad hoc autem, ut idem corpus sit in pluribus locis divisiibiliter, sufficit vnum miraculum, nempe multiplicatio præsentia corporis. Et sic si Thomistæ admittant, iuxta principia fidei catholicæ corpus Christi esse in pluribus locis, in vno quorum est divisiibiliter, & indivisiibiliter in alio, & in cælo scilicet & in Sacramento; proinde negare non debent quin de potentia Dei absoluta idem numero corpus possit esse circumscriptivè & divisiibiliter in pluribus locis.

Probatur 3. ratione Scoti. Cum unitate prioris potest stare pluralitas posterioris, sed esse in loco est quid posterius corpore, quoniam est respectu corporis ad locum: ergo loca possunt multiplicari non multiplicato corpore, & sic idem numero corpus poterit esse in pluribus locis simul & semel. Respondent Thomistæ hoc posse quidem fieri definitivè, non verò circumscriptivè: quia circumscribi à loco est ita cingi & determinari à loco, ut non possit existere extra illum. Sed gratis allegatur ista responsio, quia circumscribi & determinari à loco dicit quidem determinari à limitibus loci per respectum ad potentiam naturalem locati, quod est ita in loco suo, ut non possit naturaliter extendi ex-

tra illud : hoc tamen non impedit , quin de potentia Dei absoluta id quod definitur & circumscribitur à loco , possit extendi extra illud . Non enim in hoc differunt *circumscribi & definiri à loco* , quòd *circumscribere* absolutè determinet corpus ad suum locum , sed quòd partes locati corresponsdeant partibus loci ; vbi aliquid censetur à loco definiri , quod non habet talem correspondentiam ad partes locati . Sicut ergo in mente Thomistarum vnum corpus potest esse *definitivè* in pluribus locis , sic concedi debet , quòd idem corpus possit esse etiam *circumscriptivè* in pluribus locis ; quandoquidem , vt antea probatum est , minor difficultas interuenit in isto , quàm in illo .

Obijcies 1. quod est in vno loco *circumscriptivè* est in suo termino ; sed quod est terminatum non potest vterius extendi : ergo quod est in vno loco non potest esse in alio . *Resp.* maiorem esse veram , vt diximus , per respectum ad potentiam naturalem locati , non verò per respectum ad potentiam Dei absolutam . *Dices* . Vnum & non vnum sunt contradictoria ; sed idem corpus esset vnum , quia loquimur de vno corpore , & non esset vnum , quia esset diuisum à se ipso : ergo non potest fieri , quòd vnum corpus sit in pluribus locis . *Resp.* negando min. Tale enim corpus semper remaneret *vnum* , licet multiplicaretur illius locatio . Quando autem dicitur , quod esset *diuisum à se* : hoc verum est quantum ad præsentiam localem , quæ esset diuisa : non verò quoad entitatem locati , quæ semper indiuisa maneret . *Dices* si posset vnum corpus esse in pluribus locis , posset esse in infinitis ; proindeque esset immensum , quod repugnat . *Resp.* non propterea foret in infinitis locis , quia infinita loca non sunt dabilia ; nec etiam propterea tale corpus esset *immensum* : quia esset in infinitis illis locis contingenter & deperdenter à Deo , quod est contra rationem immensitatis , quæ est perfectio qua ens est vbique necessariò & independenter .

Obijcies 2. Si corpus possit esse in diuersis locis simul , poterit esse in diuersis temporibus . *Resp.* negando conseq. quia duo tempora , quæ sunt successiua , non possunt esse *simul* ; bene autem duo loca , quæ sunt de genere permanentium . *Dices* . Si corpus sit in duobus locis contiguis vel continuis , erit sibi contiguum vel continuum . *Resp.* erit contiguum vel con-

tinuum ratione loci, quia habebit præsentias diuersas contiguas vel continuas: non verò ratione sui: quia cum remaneat semper vnum & indiuisum, non poterit esse sibi continuum aut contiguum. *Dices*, Si corpus præsens in vno loco fieret adhuc præsens in alio, non videtur per quam actionem id fieret. *Resp.* Scutum vocare hanc actionem adductiuam, non productiuam; quia non producit corpus, quod iam existit, sed producit noua corporis præsentia, sicut quando corpus Christi fit præsens alicui loco, non acquirit de nouo esse, sed tantum nouam præsentiam. *Dices*. Illud corpus posset dealbari Parisiis & denigrari Romæ, quæ cum sint contradictoria repugnant posse fieri. *Resp.* hoc non fore contradictorium, nisi respectu eiusdem corporis in eodem loco constituti; non verò respectu diuersorum locorum.

Obijcies 3. Si corpus posset esse in pluribus locis, Romæ scilicet & Parisiis, Petrus Parisiis existens posset se mouere versus Petrum existentem Romæ, & vice versa, sicque sibi possent occurrere in via angusta, & protunc vel vnus cederet locum alteri, quod non est verisimile, quia non est maior ratio, vt vnus cedat quam alter; vel sese inuicem penetrarent, quod adhuc non potest fieri. *Resp.* posse fieri reuera, quod Petrus existens Romæ se moueat versus Parisios, & vice versa, duplexque illa præsentia poterit reperiri in eodem loco, sed protunc fieret penetratio vnus extensionis seu vnus præsentia cum alia, non quidem viribus naturæ, quia penetratio dimensionum non est possibilis naturaliter, sed fieret talis penetratio per nouum miraculum, Deo scilicet auferente vnum *ubi*, & remanente tantum altero: & sic protunc Petrus non esset amplius in pluribus locis, sed in vno loco duntaxat.

Obijcies 4. Si vnum corpus posset esse in pluribus locis, posset idem corpus simul calefieri & frige fieri, quiescere & moueri; stare in vno loco & sedere in alio, saturari & esurire, vinere & mori, damnari denique & saluari. Ad harum & similium obiectionum solutionem tres assignat regulas doctor subtilis, quarum prima est. *Quæ sunt essentialiter priora ipso ubi, uniformiter insunt corpori habenti tantum vnum ubi, & habenti plura; ita quod si multiplicentur illa ubi, talia etiam predicata multiplicentur*; v. g. si ante multiplicationem præsentia corpus sit viuens, aut talis quaq-

titatis, vel qualitatis, erit etiam viuens in omnibus locis, & talis quantitatis, aut qualitatis. *Quæ verò sunt simul naturà, vel posteriora ipso ubi, variari possunt ad variationem ipsius ubi, & reperiri in uno loco, non verò in alio.* Ratio autem huius regulæ est, quia prius essentialiter non variatur propter variationem posterioris, bene autem illud quod est posterius, vel simul naturà variari potest ad variationem prioris. Secunda regula est; *sicut passum existens in uno loco formam reciperet à duobus agentibus approximatis, sic eandem reciperet in pluribus locis existens;* quod tamen intelligi debet de formis absolutis, quæ si recipiantur in uno loco, recipiuntur etiam in alio; unde si Petrus calefieret Romæ, calefieret etiam Parisiis, licet ignis non esset illi approximatus Parisiis. Tertia regula; *sicut corpus in uno loco existens se habet in ratione actiui ad diuersa approximata in illo loco, sic ipsum existens in pluribus locis se habet ob illa, & ob hoc, sicut homo existens in uno loco non potest vincere duos homines, sic nec eos vincere poterit in pluribus locis existens: quia nimirum eodem modo se habet, in ratione actiui, in diuersis locis, sicut se haberet tantum in uno.* His positis, ex harum regularum præscripto.

Resp. ad primum quòd si corpus sit frigidum in uno loco aut calidum, tale erit in alio; quod fiet hoc modo. Si corpus Petri apponatur frigeri Parisiis, & calori Romæ, illa agentia, velerunt æqualis virtutis, vel diuersæ; si sint æqualis, neutrum aget; quia calor in secundo gradu impiedietur à frigore in eodem gradu: si autem vnum sit maioris virtutis quàm aliud, & calor v.g. superet frigus, tunc corpus Petri fiet calidum in eo gradu, quo calor superabit frigus. Et hæc solutio nititur in secunda regula, quæ docet quòd *sicut passum existens in uno loco formam absolutam reciperet à duobus agentibus sibi approximatis, sic eam pareretur in diuersis locis existens: sicut ergo illud corpus Petri existens in vno tantum loco calorem vel frigus reciperet iuxta proportionem agentis, sic Romæ & Parisiis existens recipiet frigus vel calorem ab illo tantum agente, quod aliud superabit, licet non sit approximatum tali loco; quia nimirum approximatum est eidem corpori, quod est vnum & idem in pluribus locis.*

Resp. ad secundum quòd vnum & idem corpus sta-

bit in uno loco & sedebit in alio, poteritque esse sursum & deorsum; quia sunt relationes loci ad locatum, quæ eam sint posteriores corpore, possunt variari secundum diuersa loca, licet non varietur corpus. Hæc autem solutio fundatur in prima regula doctoris, quæ docet posteriora ad ubi posse quidem variari, licet non varietur prius; & ideo licet non varietur corpus, ita tamen variabuntur situationes corporis, ut Petrus v.g. possit stare in vno loco & sedere in alio, quiescere Parisiis & moueri Romæ. Si autem quis vellet colligere hoc esse contradictorium; quia protunc idem corpus staret & non staret. Resp. hoc non debere admitti simpliciter, ne detur contradictioni locus; sed semper addi debere, quod idem corpus sedeat in vno loco & non sedeat in alio: quia affirmatio & negatio non se tenent ex parte locati, sed ex parte loci, qui variatur, ubi corpus inuariatum manet iuxta priorem regulam.

Resp. ad tertium, quantum ad famem & saturitatem, quod si sumantur pro sumptione alimenti, quæ est quid relatiuum, possit reuerà idem corpus sumere cibum in uno loco, & non in alio; si verò saturitas sumatur pro nutritione, quæ est forma absoluta, sequens ad sumptionem alimenti; tum si corpus aliquod repletum sit in uno loco, erit etiam repletum in alioratione scilicet identitatis subiecti; quatenus nimirum est idem corpus in utroque loco. Licet ergo Petrus Romæ possit capere alimentum, mediante quo saturabitur in illo loco, & Parisiis se abstinere à cibi sumptione, ubi proinde fameſcet; attamen quantum ad saturitatem, quæ sequitur ad sumptionem alimenti Romæ accepti, quia ipsa saturitas est forma absoluta, ea ad erit tum Romæ tum Parisiis: & hoc iuxta secundam regulam, quæ dicit passum existens in pluribus locis recipere easdem formas absolutas.

Resp. ad quartum, quod vita & mors sint qualitates absolute, quæ faciunt vel destruunt hominem; & proinde si Petrus moriatur Romæ, morietur Parisiis: aliàs secundum substantiam esset & non esset. Potest tamen hic vulnerari, & non alibi; quia vulneratio est actio, & relatio sequens ad corpus; ex vulnere tamen inflato Romæ Petrus morietur Parisiis, quia est idem subiectum, quod non potest simul viuere & mori. Ad id quod aliquando obicitur posse unum hominem simul
dam.

damnari & saluari : responderi debet quòd si per *damnari & saluari* intelligatur esse in inferno & in paradiso, hoc fieri possit sicut in alijs locis; si verò per *damnari* intelligatur habere dolorem quem damnati habent, & per *saluari* intelligatur habere gaudium quòd saluati percipiunt : tunc non potest idem damnari & saluari, quia damnatio & saluatio sic acceptæ sunt *formæ absolutæ, quæ non variantur ad variationem ipsius ubi*.

Resp. ad id quòd potest colligi ex conclusione, *unum corpus posse esse in mille locis* ; & sic *unum solum hominem posse facere exercitum, choræas ducere, & harmoniam edere vocum*. Respondeo, inquam, *unum & eundem hominem posse multoties multiplicari* ; sed proinde ex tali multiplicatione non consurgeret exercitus ; quia non erunt plures homines, sed tantum unus homo. Poterit etiam ille in vno loco vocem altiore emittere, & in alio demissiorem, quia aer aliter mouebitur in vno loco, & aliter in alio ; non tamen vlla erit harmonia ; cum hæc multiplicationem vocum requirat. Quantum denique ad *choræam*, talis multiplicatio præsentiarum *choræam* non faciet ; quia non erit multiplicatio hominum, sed vnitas. Si autem quæ- ratur num ad multiplicationem eiusdem hominis in centum locis possint plures effectus sequi, quàm in vno tantum : respondendum est negatiue per tertiam regulam, quam attulimus ex Scoto, quæ docet, quòd *sicut corpus in vno loco existens se habet in ratione ætini ad diuersa obiecta, sic se habeat in pluribus locis*.

Ad vltimam instantiam, quâ dici potest Petrum Romæ existentem posse videre Papam, & Parisiis videre Regem Christianissimum ; & sic videre & non videre Papam, quæ repugnant : Responderi debet, quantum ad actionem visiuam, quæ est relatiua ; quòd Petrus reuerà vt Romæ existens videbit Papam, & non vt existens Parisiis : quantum verò ad visionem, vt est terminus actionis & qualitas absoluta per visionem producta, talis erit in Petro existente Parisijs & Romæ ; sicque Petrus poterit dici Parisiis habere visionem Papæ seu speciem illius, quam tamen non acquisiuit vt Parisiis existens, sed vt existens Romæ. Idem dici debet de visione Regis Christianissimi. Porro ad id quòd dicitur forsan, *unum & idem corpus posse distare à se ipso, & ad seipsum reueri*. Resp. quòd nulla sit in eo repu-

gnantia, si per *distare* intelligatur corpus esse in distantibus locis. Nec etiam repugnat, quod corpus moueatur, non quidem ad se, quia esset diuisum à se, sed ad locum in quo habet aliam præsentiam.

Q V Æ S T I O IV.

Verum duo corpora possint esse in eodem loco.

Veterum philosophorum aliqui mordicè asseruerunt duo corpora posse naturaliter reperiri in eodem loco, cum sua propria quantitate; ita quod sese mutuo penetrarent, quandoquidem penetratio nihil est aliud quàm positio duorum corporum in eodem loco. E diametro Durandus in 4. *dist.* 44. contendit impenetrabilitatem non posse tolli à quantitate, quæ cum sit conditio essentialis corporum, proinde vult duo corpora non posse existere simul in eodem loco, etiam diuinitus: quid statuumdum sit pro vtraque parte, in duplici conclusione dicitur.

C O N C L V S I O P R I M A.

Duo corpora non possunt esse naturaliter in eodem loco. Experientia enim videmus locum ab vno corpore occupatum non posse aliud capere; imò sese inuicem expellunt, aliàs fieret dimensionum penetratio, & quantitas, quæ dicit ordinem ad locum quem replet, priuaretur sua proprietate, si non expelleret aliud corpus à loco ubi se ponere vult. Deinde si naturaliter possent existere duo corpora in eodem loco, nulla fieret diuisio continui per impetuosum contactum vnius corporis ad aliud, nec gladius lignum scinderet, nec ensis lateri hominis infixus vulneraret ipsum, cuius tamen contrarium videtur quotidie: quod satis demonstrat duo corpora non posse existere simul, sed vnum cedere alteri. Tandem licet non sit formalis oppositio inter duas quantitates, quarum vna debeat expellere aliam, sicuti est oppositio formalis inter calorem & frigus, vel inter humiditatem & siccitatem: attamen inter duas quantitates versatur virtualis repugnantia, nimirum penes effectus suos secundarios, quatenus vnaquæque replet locum cui apponitur; & sic postquam vnum corpus per suam quantitatem repleuit

vnum

vnus locum, alia quantitas non potest eundem locum replere, aliàs idem locus esset simul repletus & non repletus: ergo ex virtuali repugnantia, quæ reperitur inter duas quantitates, oritur impossibilitas naturalis duorum corporum in eodem loco.

Obijcies pro veteribus philosophis, in ferro candente ignem non solum meare per poros ferri, sed etiam ipsius ferri penetrare corpus, quod volunt non posse fieri, nisi quia corpora ignis & ferri sunt in eodem loco. *Resp.* in candente ferro substantiam ignis non esse in eodem loco, vbi est substantia ferri; sed intra ferri poros subintrat ignis, qui est subtilissimus. Deinde in ferro candente reperiuntur quædam partes pinguiusculæ ipsius ferri, quæ conuertuntur in ignem; vnde ferrum candens dum percutitur scintillas vibrat, quæ extinctæ vertuntur in cineres. Tandem licet partes ferri videantur ignis, non tamen sunt tales à parte rei; sed ferrum ita incalcescit, vt ignis videatur.

Ad id quod alij afferunt de vase cineribus pleno, quod vltèriùs potest maximam aquæ copiam continere. *Responderi* debet hoc non fieri, quasi corpora cinerum & aquæ sint simul, sed quia granula cineris non ita exactè se contingunt, quin spatiola quædam aere plena inter se admittant; vnde adueniente aqua fortiter compimento tales cineres reducuntur ad minus spatium, quod antea occupabat aer expulsus per aquam; & sic nil mirum est, si vas illud, quod antea plenum cineribus videbatur, recipiat insuper non mediocrem aquæ quantitatem. Idem habetur de vase pleno aqua, quod plures adhuc nummos recipit absque effusione. Quod scilicet hoc ideo fiat, quia aqua ad injectos nummos condensatur, figuramque sphæricam suscipit, quæ sibi est maximè propria, ad quod inuat siccitas extremitatum vasis, quæ cum sit contraria humiditati, eam fluere non patitur, donec vincatur ab aqua. Idem denique ad id quod afferunt alij panem calidum liquorem plurimum ebibere: hoc enim procedit ex hoc, quod liquor expellat aerem à pane, cuius meatus occupat.

CONCLUSIO SECUNDA.

PRæallegata rationes non impediunt, quin plura corpora cum sua externa quantitate & extensione di-

visibili possint esse in eodem loco per absolutam Dei potentiam. Sic cum philosophorum & theologorum tur-
mā Scotus *quest. 11. quodlib.* contra Durandum loco
præcitato. Hoc primò docet Scriptura, in qua habemus Christum Dominum exisse ex utero beatissimæ Virginis absque *violatione* pudici claustrī : ipsum post resurrectionem sepulchrum *clausum* peruasisse, corpora obstantia penetrando : eum similiter ianuis *clausis* ingressum fuisse ad discipulos tanta cum libertate, ut spiritus putaretur : tandemque ipsum *penetrasse* cœlos, ut habetur ad Heb. 4. *habentes pontificem, qui penetravit cœlos, Iesum* ; sed omnia non potuerunt fieri, nisi corpus Christi fuisset in eodem loco, ubi fuerunt claustrum Virgineum, lapides & lintheamina sepulchri, ianux & parietes cubiculi Apostolos continentis, ac denique cœlorum corpora : ergo non repugnat quin plura corpora possint esse in eodem loco cum sua quantitate extrinseca, quandoquidem corpus Christi extensum remanens prædicta corpora penetrauit.

Deinde si in hoc esset aliqua contradictio, maximè quia quantitas nata est occupare locum : sed talis occupatio loci & expulsio vnius quantitatis ab alia est tantum effectus secundarius ipsius quantitatis, quem Deus impedire potest, sicut impediuit nè ignis combureret pueros in fornace Babylonica : ergo potest Deus facere, ut duæ quantitates reperiantur in eodem loco, absque eo quòd vna expellat aliam. Tandem ideo Deus dedit *impenetrabilitatem* quantitativis ; nè vna quantitas confunderetur cum alia, & ordo *fitualis* inter illas servaretur, sicut qualitatibus indidit contrarietatem, ut servaretur qualitatum distinctio inter eas ; sed Deus, ut supremus naturæ Dominus, potest auferre à qualitatibus contrarietatem, & eas in eodem subiecto conciliare : ergo & ipse poterit auferre impenetrabilitatem quantitativis, & facere ut vna sit compossibilis cum alia, absque eo quòd sese inuicem expellant ab eodem subiecto : & sic de potentia Dei *extraordinaria* duo corpora cum suis quantitativis erunt in eodem loco.

Obijcies 1. Expulsio corporis à loco est effectus formalis quantitativis ; sed Deus non potest impedire effectum formalem alicuius causæ, si illa causa remaneat : ergo Deus non potest ponere duas quantitates in eodem loco,

loco, quin vna expellat aliam. *Resp.* ad maiorem, quòd expulsio corporis è loco sit tantum effectus secundarius, & extrinsecus quantitatis, qui ab ea auferri potest per potentiam D. Effectus enim proprius, & formalis quantitatis est extendere partes in ordine ad se, effectus verò secundarius est extendere partes corporis in ordine ad locum, & vltior adhuc effectus eiusdem quantitatis est expellere vnam quantitatem à loco in quem se vult introducere alia. Primarius ille effectus, qui est extensio partium in ordine ad se, non potest tolli à quantitate quia vt diximus aliàs, est de essentia ipsius quantitatis. Effectus verò secundarius, qui est extensio partium in ordine ad locum, est auferibilis ab illa, vt patet ex corpore Christi, quod in Eucharistia non extenditur in ordine ad locum, quoniam totum existit in qualibet parte hostiæ: ergo expulsio vnius quantitatis ab alia, qui est effectus minus præcipuus eiusdem quantitatis, potest ab illa auferri diuinitus, & duæ quantitates extensæ in ordine ad locum sese compari poterunt, & manere simul, vt liquet de corporibus gloriosis; quæ cum sua quantitate extrinseca possunt existere in eodem loco.

Obijcies 2. Si vnus locus vna quantitate repletus posset aliam recipere, esset repletus, & non repletus, quod repugnat. *Resp.* talem locum esse quidem repletum per primam quantitatem quæ ipsum ita occupat, vt non relinquat vacuum in illo; hoc tamen non impedit, quin alia quantitas possit introduci ad eundem locum absque eo quòd præcedentem eiiciat, Deo scilicet impediente talem effectum secundarium quantitatis. Non propterea tamen locus ille esset simul repletus, & non repletus, quia duo illa locata non extra se inuicem existent, sed se mutuò penetrabunt, vt patet de existentia plurimum corporum beatorum in eodem loco. Nec ad ista corpora gloriosa debet respondere Durandus, eorum subtilitatem in hoc consistere, quòd brevissimo tempore se ita colligant, & quasi attenuent, vt plura illa corpora contineri possint in cuspide acus. Talis, inquam, responsio Durandi sustineri non potest, quoniam illa constrictio corporis beati non posset fieri sine graui alteratione, & destructione propria figuræ, & organorum, quæ omnia repugnant impassibilitatis, quæ est altera dos gloriosi corporis: vnde longè melius est, si dicatur quantitatem talium corporum remanere in-

tegram, vt conseruetur impassibilitas, & vnā quantitatem non expellere aliam, vt conseruetur subtilitas corporis gloriosi.

Si dicat Durandus ex contextibus allegatis Scripturæ non rectè colligi veritatem istius conclusionis; quoniam D. Gregorius homil. paschali scribit *cælum aperiri ad vocem sacerdotis consecrantis*: & Act. 7. *cælos fuisse apertos vt Stephanus videre Christum*; quod satis indicat cælos non penetrari, nec proinde plura corpora esse in eodem loco. Resp. hæc præcedentia potuisse sic fieri; hæc tamen non impedit, cū Christus penetraverit cælos, & ad discipulos ingressus fuerit ianuā clausis quoniam hæc omnia habentur expresse in Scriptura. Si autem corpus Christi potuerit esse cum alio corpore, hoc idem fieri potest respectu omnium corporum; cū sit vbiq; par, & eadem ratio. Si queritur vterius, dato quod ignis penetraret lignum, an ignis lignum consumeret. Respondendum est affirmatiuè quia penetratio non tollit actiuitatem corporum, cū quodlibet eorum suam extensionem localem retineat, quæ sufficit vt vnum possit agere contra aliud.

CAPVT QVARTVM.

De Vacuo.

Cum vacuum nihil aliud sit, quàm locus non repletus corpore; idè philosophorum non pauci in eodem capite, vbi agunt de loco, per accidens de vacuo fermocinantur: nos verò maioris distinctionis gratia, hæc duo seorsim examinanda proponimus.

QVÆSTIO PRIMA.

An datur, vel dari possit Vacuum, & quā virtute.

Vacuum potest tribus modis intelligi. Primo scilicet pro inani seu pro negatione loci realis, quo sensu extra cælum vacuum aliquod, seu potius inane quoddam imaginamur; vbi tamen nihil prorsus reperitur. Secundo vacuum sumitur pro carentia corporis opaci, solidi, & sensibilis; quo sensu crumena dicitur vacua, dolium vacuum, & domus vacua pariter, quan-

quando in his non reperiuntur pecunia, vinum, aut bona mobilia, vel incolę. Tertiò denique vacuum accipitur pro carentia, & priuatione cuiuscumque corporis in loco contenti; & tale esset cælum luaz, si quatuor elementa destruerentur per potentiam D. De vacuo in hac vltima acceptione considerato nobis loquendum est, & de illo dicendum *an detur naturaliter vacuum, aut possit dari viribus natura, an saltem Angeli possent efficere vacuum, an denique per potentiam D. vacuum sit possibile.*

CONCLUSIO PRIMA.

Nullum dari vacuum in rerum natura probant Arist. 4. phys. cap. 6. text. 56. & Scotus in 4. dist. 49. quęst. 16. contra Pythagoricos existimantes vacuum dari; quod, & idem sibi finxerunt Epicurei, qui contende-
bant vacuum, & plenum esse vniuersalia rerum omnium principia, quatenus scilicet in infinita vacuitate infinitos constituebant atomos, ex quorum concursu temerario, & casuali omnia, & singula corpora dicebant efformari. Nullum autem dari vacuum in rerum natura sufficienter probat experientia, per quam videmus res creatas ita disponi, & connecti inter se: vt vna contineatur ab alia. Vltimum enim cælum immediatè per superficiem sui concanam coniungitur superfici ei conuexę ignis, ignis vnitus immediatè aeri, aer mari certis quibusdam in locis, & mare coniungitur terrę; & sic, cum omnia vniuersi orbis corpora sint continua, vel saltem contigua, proinde non datur vllum vacuum in rerum natura.

Ratio autem cur Deus nullum permiserit esse vacuum in orbe vniuerso, sed voluerit omnes eius partes esse sibi inuicem continuas vel contiguas, desumi potest ex hoc quòd voluerit Deus omnia entium genera sic esse disposita, vt inferiora dependerent à superioribus in sui conseruatione, & sublunaria cõseruariantur per influentias quas illis præbent cœlestia; sed corpora cœlestia in hæc inferiora non possent agere, nisi per corpora intermedia, quę tales influentias transferrent in hæc sublunaria, imò, & in penetralia terrę, vbi sol, & astra, metalla & lapides præciosos generant: & sic à naturalibus debet arceri vacuum, & omnes vniuersi orbis partes debent habere continuitatem vel contiguitatem; unde optimè Aug. 8. de Cinit. cap. 21. docet elementorum

rum catenatam & colligatam extare seriem : & alij Patres asserunt coniungi elementa inter se , velut annulos in catena . Quod antea voluit insinuare Aristoteles 1. *meteor.* 1. dicens oportet mundum hunc subiectum esse superioribus lationibus . Hoc vltcrius communi Voce celebrant philosophi , dicentes *naturam abhorre vacuum* .

Obijcies : super cœlos dantur spatia imaginaria , quæ nihil aliud sunt , quàm *vacuum* ; inter poros etiam cuiuscumque corporis vacuum intercipitur : tandemque non posset fieri motus localis , si non daretur vacuum ; aliàs duo corpora essent in eodem loco , si motus localis fieret in spatio pleno . *Resp. ad primum* spatia illa esse prorsus imaginaria , nec aliud dicere a parte rei , nisi fictionem mentis : & sic non datur vacuum actuale & reale , sed solummodò imaginarium . *Resp. ad secundum* non dari vacuum inter poros corporis : quia minimæ etiam particulæ mutuam vnionem & societatem diligunt , sicut maiores vniuersi partes : vnde quemadmodum maiora corpora toto impetu confluunt , vt vacuum impediunt ; sic minores cuiuscumque corporis partes sese comprimunt , vt nulla supersit vacuitas in corpore : tales autem pori replentur vel aere , vel substantia quadam subtiliori , quæ si exhaletur , quando pars aliqua separatur à toto , tunc corpus illud separatam ad minus spatium contrahitur ; vt patet in floribus , qui exhalata subtili humiditate marcescentes ad minimum locum se colligunt . *Respondet ad tertium* Aristoteles motum localem fieri per spatium plenum ; non tamen duo corpora in eodem loco existunt , sed vpo accedente recedit aliud , vel comprimitur vt in eo fiat motus localis : ita quòd aperiatur v. g. aer , & separentur eius partes , vt emissæ sagitta peruadere possit ad scopum .

CONCLUSIO SECUNDA.

Vlribus natura non potest dari vacuum , vt post Aristotelem tradit Doctor noster loco præcitato , & in 3. *dist.* 27. & adhuc expressius *quodlib.* 11. *art.* 3. Id enim non possunt efficere agentia naturalia proprijs viribus quod apertè videntur abhorre ; sed agentia omnia naturalia abhorrent à vacuo , tanquam à pernicioso schismate mutuam vnionem & communicationem partium

elum impediēte, in qua situm est *bonum vniuersi*: ergo agentia naturalia ipsum non possunt propriis viribus efficere vacuum. Maior ex se patet, quod agentia naturalia non possint efficere quod abhorrent. Quandoquidem nihil appetit aut efficit, quod est sibi malum & disconueniens; sed vnio mutua partium & communicatio rerum facit bonum totius vniuersi, sicut earum diuulsio efficit illius *malum*, vt patet ex diuisione animalis in particulari; ergo sicut animal non potest efficere naturaliter diuisionem suarum partium, ad quam habet naturalem repugnantiam; sic etiam agentia naturalia, quæ sunt vniuersi partes, non poterunt efficere vacuum, quod abhorrent absolutè, tanquam sibi malum & veluti sui deformitatem.

Quantum ad minorem, quod omnia agentia naturalia abhorreant à vacuo, illam innumerę experientię demonstrant, ex quibus videtur naturam vt quatuor præsertim modis ad impediendum vacuum in vniuerso, contra inclinationem naturalem partium illius vniuersi. *Primò*, inquam, natura vtitur motu contranaturali, quando grauiascendunt sursum, & leuiascendunt deorsum; vt patet primum de aqua, quæ ascendit per fistulam, cuius inferius orificium immergitur aquæ, si videlicet attrahatur aer ab aliquo; tunc enim ascendit aqua, ne vacuum detur. Secundum verò demonstratur ex hoc quod aer, non obstante leuitate propria, descendat in interiores cauitates terræ, ne ibi detur vacuum; & aliquando aer ille inclusus violentos terrę motu excitat. *Secundò* ad impediendum vacuum natura vtitur rarefactione, vel condensatione corporum contra eorum inclinationem; videmus enim aliquando aerem rarefieri, vt maiorem locum occupet; & interdum condensari, vt minorem possit occupare, & dare libertatem motui locali prosectorum. *Tertiò* vt natura impediat vacuum, dat resistantiam certis corporibus, quam non haberent ex propria facultate; quandoquidem duę tabulę politę sibi inuicem applicatę fortiter adhererent simul, non alia de causa, nisi quia propter exactam coniunctionem vtriusque non posset facilè dari via externo aeri: & sic vt deuitetur vacuum, tales tabulę non disiunguntur, nisi paulatim & motu successiuo, per quem possit ingredi aer, separentur ad inuicem. *Quartò* denique natura vacuum impeditura folissimorum vti-

tur confractione corporum, vt videri potest in bombardis, quæ licet sint solidissimæ, franguntur tamen, cum tanto impetu erumpit ignis, vt æquali celeritate non possit aer in eius locum succedere.

Obijcies 1. ineptum videri, quod dicatur agentia naturalia abhorrere à vacuo, ipsum metuere, & contra-
 naturales subire motus, vt illud impediunt; quando-
 quidem metus, & horror sunt proprii animi effectus, qui non possunt rebus naturalibus sensu priuatis competere. *Resp.* talem loquendi modum vsitatissimum esse apud philosophos, qui omnes vna voce pronuntiant *naturam abhorrere à vacuo, ipsum metuere, & toto conatu illud impedire*; ille tamen loquendi modus debet intelligi *metaphoricè*, hoc modo scilicet quod tanta sit in qualibet vniuersi parte repugnantia ad vacuum, vt potius ascendant graua, leuia descendant; laxa cōdensentur, condensata rarefiant, separata vniantur, & frangantur solidiora, quàm vllq̃ modo patiantur dari vacuum, quod respiciunt omnes, & singulæ partes vniuersi tanquam suam deformitatem: & ad talem vacui deuitationem natura vtitur quatuor illis modis superius explicatis. *Eadem de causa cucurbitula medica* carnem, & sanguinem attrahunt sursum, dum aer, qui ignis virtute fuerat rarefactus, extincta flamma condensatur, & in minorem locum se recipit, efficeretque vacuum, nisi caro intumesceret, & ascenderet sanguis ad ventosarum summitatem facta scarificatione. *Eiusdem metus* vacui dolium vino plenum nihil aut parum illius poterit effundere, quamuis ex parte inferiori sit perforatum, nisi aperiatur orificium superius. *Pari-ter uelagenas* aqua calida plena, si diligenter obturata exponatur aeri frigido, tunc ex debiliore parte frangetur, nè aqua illa refrigerescens daret locum vacuo, ad minorem se reducens locum.

Obijcies 2. si natura ad impediendum vacuum faceret succedere vnum corpus alteri, non posset fieri motus in aere, quin vniuersæ aeris partes mouerentur, quoniam mota prima parte aeris secunda deberet succedere, tertia secundæ, quarta tertiæ, & sic de omnibus aeris partibus, quæ deberent moueri ad motum auiculæ cuiuslibet; sed hoc dicere ridiculum est: ergo nec dici debet, quod vna pars vniuersi alteri succedat ad fugiendum vacuum. *Resp.* negando sequelam maioris. Cum enim aer sit fluidus, talis genii est, vt possit ra-

re fieri, & condensari; ita quod dum homo v. g. mouetur in aere, pars illa aeris in qua fit motus, condensetur & minorem locum occupet, vt præbeat homini locum; postquam verò transiit homo ille per aerem, tunc rarefit & dilatatur aer ad pristinum locum, sicque cæteræ aeris partes non propterea moueri debent. *Dices* incredibile videri, quòd grauiæ afficiantur desiderio tendendi sursum ob fugam vacui, & leuiæ deorsum eadem de causa. *Resp.* grauiæ non tendere sursum vt grauiæ sunt, bene autem vt sunt partes vniuersæ; tunc enim inclinationi particulari cedunt ob bonum publicum & commune reipublicæ vniuersalis.

Obijcies 3. detur vas aliquod æneum plenum aqua calida, bene obductum; si vas illud exponatur aeri frigido, gelabit aqua, & ipsa densata minorem locum occupabit; ergo in tali vase dabitur vacuum: cùm intra illud non possit subire aer. *Resp.* quòd in tali occasione non congelatura sit aqua, id prohibente natura, ob metum vacui; vel frangetur vas, quantumcunque sit fortissimum, vt periculum vacui remoueatur. *Ad id quod dicunt alij* posse extrahi aerem ab aliquo vase, vbi alius aer non introducetur, quia firmissimè oclusum erit. *Respondendum* est tunc necessariò introduci aerem per poros vasis quantumcunque solidissimi, vel per os ipsius, quantumcunque fuerit firmiter obductum potiusquam detur locus vacuo; vel denique non extraheatur aer à vase prædicto: nihil enim est quod non faciat natura vt vacuum impediat, quod respicit tanquam sibi inimicum; quandoquidem ipsa est amans vniouis; & connectionis suarum partium, vt patet in aquæ guttulis, quæ vt se conferunt, dum sparguntur, in figuram rotundam coeunt, quæ omnium figurarum est vnitissima.

Quæres per quam virtutem natura vacuum impediat? Ad hoc respondent aliqui agentia naturalia impedire vacuum per virtutem quamdam sibi intrinsicam à Deo concessam corporibus naturalibus, per quam rapiuntur ad illa loca, in quibus fieret vacuum, nisi talia corpora substituerentur in loco aliorum, quæ per absentiam sui vacuum efficerent. Quia tamen nulla reperitur virtus fluens intrinsecè à principijs naturalibus subiecti, quæ illud moueat ad aliquid contra naturalem inclinationem; aliàs virtutes contrariæ profluere ab eodem principio naturali; idèò melius

responderi potest, quòd talis virtus sit extrinseca, & indita à Deo, non quidem pro semper, sed pro occasione illa, in qua daretur vacuum, si vnum corpus non acciperet locum alterius, etiam contra propriam inclinationem naturalem. *Cum enim* res quælibet ordinetur ad mundi pulchritudinem, & vacuum sit maxima vniuersi deformitas, quæ mutuam societatem corporum soluit absolute necessariam vt superiora inferioribus communicent influxus suos; idèd potius quam datur vacuum, & dissoluatur illa entium communicatio, Deus indidit singulis corporibus virtutem illam extrinsecam, & transeuntem, per quam locum suum naturalem deserunt, vt vacuum impediunt, & vniuntur corporibus à quibus forent separata. *Hanc unionem corporum*, quæ aliàs separarentur, aliqui dicunt, non immeritò fieri per virtutem magneticam; qua corpora quædam attrahunt alia, vt impediatur vacuum: vnde talis motus dici potest *motus attractionis*, cum Philosophus 4. de celo text. 39. dicat aquam non ascendere nisi tractam. Quod autem *contiguum trahat corpus sibi proximum*, hoc debet referri ad vniōem quā Deus coniungit partes vniuersi; quæ tanta est, vt si corpus medium tolleretur per aliquam virtutem, tunc attrahatur remotius, vt conseruetur eadem coniunctio. Si autem quæzatur *an ille motus, per quem ascendit aqua vt impediat vacuum sit naturalis, vel violentus*. Respondet Scotus in 4. dist. 49. quod dicatur *naturalis*, si spectetur aqua vt est pars vniuersi, & *violentus*, si spectetur vt est corpus graue, qui naturaliter repugnat ferri sursum.

CONCLUSIO TERTIA.

Licet non possit dari vacuum per virtutem Angelicam. de potentia tamen Dei ipsum effici potest. Primum colligitur ex scoto in 2. dist. 2. quæst. 22. & in dist. 49. quæst. 13. Ratio primi est, quod nec Angelus, nec homo, nec vlla creatura possit inuertere ordinem vniuersi; cum Deus ad Heb. 2. dicat se non subiecisse Angelis orbem terra; sed inductio vacui est contra totius vniuersi ordinem: ergo per potestatem Angelicam non potest procurari vacuum. Deinde fortior est inclinatio naturæ ad impediendum vacuum, quam ad obediendum Angelo, quoniam inclinatio ad impediendum respicit bonum commune totius vniuersi, & obediencia

tia ad Angelum spectat tantum ad aliquam vniuersi partem : ergo natura non poterit efficere vacuum, vt obediat Angelo ; & proinde nullus Angelus poterit causare vacuum. Tandem virtus Angeli non est tanta, quanta est potentia totius vniuersi ; sed ex conclusione precedenti, tota potentia vniuersi non potest vacuum inducere ; cum probauerimus vacuum naturæ viribus effici non posse : ergo *per virtutem angelicam vacuum dari non potest.*

Secundum asseritur pariter à Scoto *quodlib. 11. art. 2. & in 2. dist. 43. quest. 3.* Deus enim potest annihilare omnia corpora quæ sunt sub cælo empyreo, & nullum corpus in tali spatio reproducere ; & sic per virtutem D. potest dari vacuum, quidquid dicat vnus Vulpes, qui *1. p. disp. 18. art. 3.* Probare nititur vacuum ita repugnare, vt nec per D. potentiam possit effici. Deinde, constat Deum posse amouere aliquod corpus à suo loco, & impedire nè aliud locum precedentis occupet ; sed hoc efficiendo efficitur vacuum : ergo affectio vacui non est impossibilis potentiæ D. Tandem ex antecedentibus, duo corpora possunt esse in eodem loco : sed difficilius est naturam pati vacuum, quam duo corpora eundem locum occupare : ergo hoc erit possibile per respectum ad potentiam D.

Obiicies 1. In primam partem *quod tanta sit Angeli potestas quod nulla sit super terram qua comparetur ei, Job. 41.* quod denotat intelligentias cælestes posse inducere vacuum, sicuti possunt euertere ciuitates, & excitare terræ motus : expellendo v. g. aerem ex hac aula & impediendo nè ingrediatur alius. Resp. potestatem Angeli excedere potestatem cuiuscunque creaturæ particularis ; non verò superare potentiam totius vniuersi & vniuersalis naturæ, cuius est tantum pars : vnde si viribus naturæ non possit effici vacuum, idem à fortiori erit impossibile Angelo. Negari quidem non potest quin Angelus multa facere possit extraordinaria, euertendo ciuitates, & excitando pluias : non potest tamen mutare ordinem rerum stabilitum à Deo : vnde esto posset de permissione Dei extraordinaria expellere aerem ex hac aula, & impedire nè alius subintret ; hoc tamen non poterit facere de permissione Dei ordinaria : quia constituit Deus vniõnem & colligationem omnium partium vniuersi, quam auferre non potest qualiscunque creatura.

Obijcies 1. in secundam partem, quòd si Deus destrueret omne corpus sub superficie concava cœli empyrei existens, talis superficies esset locus & non esset locus; quæ repugnant. Ellet, inquam, locus, quia esset superficies, quæ est locus; non esset verò locus, quia locus dicit ordinem ad corpus locatum, nullum autem pro tunc foret corpus locatum sub cœlo empyreo: & sic non esset locus. Resp. in hac hypotesi superficiem illam cœli esse locum materialiter & potentialiter sumptum, quia esset superficies, quæ posset locare, si esset aliquod corpus intra illam, quod ambiret: non esset verò locus formaliter & actualiter spectatus, quia cum nullum esset corpus locatum sub illa superficie, nullus etiam esset respectus loci ad locatum, in quo ratio formalis loci consistit, Dices. Nihil potest Deus contra ordinem vniuersi; sed inductio vacui est contra ordinem vniuersi: ergo Deus non potest inducere vacuum. Resp. distinguendo maiorem, nil potest Deus contra ordinem vniuersi, de potentia sua ordinaria, concedo: de potentia extraordinaria, nego.

Q V Æ S T I O II.

Dato, quòd Deus efficeret Vacuum, posset-ne motus localis fieri in illo, & qualis.

Quatuor probauimus in præcedenti quaestione, non dari scilicet actu Vacuum, nec posse dari viribus naturæ, neque etiam per virtutem Angelorum, quorum potentia non subiecit Deus orbem terra, vt inquit D. Paulus ad Heb. 2. qui proinde non possunt viribus suis & abque permissione Dei extraordinaria introducere vacuū in rerum natura; quandoquidem immutarent ordinem prouidentia D. quæ inter omnes creaturas continuitatem apposuit, vt superiores possint inferiores adiuuare per influxus suos à cœlestibus descendentes ad sublunaria quælibet, mediantibus corporibus intermedijs, quæ sunt veluti quædam talium influentiarum vehicula. Quia tamen asseruimus Deum de sua potentia extraordinaria posse vacuum inducere in naturalibus, annihilando nimirum omnia corpora elementaria & mixta; ideo factà hac suppositione, quaerimus in præsentia an in illo vacuo posset fieri motus localis, & an talis motus foret successiuus, vel instantaneus.

CON:

CONCLUSIO.

Si daretur vacuum per potentiam D. posset in illo fieri motus localis, qui esset successivus, non vero instantaneus. Prima pars huius conclusionis est Scoti in 2. d. sr. 2. quest. 9. D. Thomæ 4. Phys. lect. 2. & aliorum communiter. Positis enim principiis agendi & patiendi, & remotis impedimentis, potest effici motus; sed si in spatio vacuo, vel supra vacuum, nempe in cælo, esset homo habens pilam præ manibus, esset agens & patiens, nullumque poneretur impedimentum: ergo illam pilam posset proijcere, & proinde efficere motum in vacuo: Deinde si inter cælum & terram annihilaretur aer, & mola asinaria à cælo lunæ proijceretur in terram, non potest concipi cur illa non caderet; cum foret immensi ponderis: ergo pro tunc fieret motus localis in vacuo. Tandem si aliquid obstaret, quin posset dari motus localis in vacuo, maximè quia deest medium plenum; sed plenitudo medijs spatii plus officit motui locali, quam profit ad illum, quandoquidem densitas & crassities medijs retardant motum: ergo non debet negari quin motus localis posset fieri in vacuo. Porro si nullus esset aer in hac aula, assignari nulla ratio potest cur homo in illa existens non posset movere pedem aut manum.

Secunda pars est eiusdem Scoti loco præcitato, & quest. 12. eiusdem 2. dist. 2. Ratio huius est quia successio motus nedum fit per resistantiam medijs, sed etiam fit per distantiam inter terminum à quo & terminum ad quem; at licet in motu qui fieret in vacuo nulla adesset resistantia medijs, quandoquidem medium illud esset vacuum nullummodo resistere potens, attamen in tali motu reperiretur distantia terminorum, si videlicet pila proijceretur à cælo lunæ in terram: ergo motus qui fieret in vacuo non esset instantaneus, sed successivus. Deinde movens finitum & limitatum relinquens terminum à quo & acquirens terminum ad quem agit in tempore & cum successione aliqua; sed si homo se moveret à cælo ad terram esset agens finitum & limitatum relinquens terminum à quo, scilicet cælum & acquirens terminum ad quem terram videlicet: ergo motus illius hominis factus in vacuo esset successivus & non instantaneus. Tandem posito quòd

Deus destrueret omnia corpora, quæ sunt intra cælum & terram, remanentibus duobus tantùm lapidibus, quorum vnus caderet è cælo, & alter ex illo spatio vbi nunc est media aeris regio, si hic vterque lapis simul caderet, ille qui est in medio citiùs attingeret centrum, quàm ille qui de summo caderet, quod euidenter demonstrat motum in vacuo factum inuoluere *continuitatem & successionem*.

Obijcies 1. Motus localis debet esse sursum vel deorsum, & à dextris vel à sinistris; sed si fieret motus in vacuo, nullam haberet differentiam ex prædictis: ergo non posset fieri motus in vacuo. *Resp.* quodd reuera *sursum & deorsum*, sicut *dextrorsum*, vel *sinistrorsum*, sint proprietates motus localis: vnde si fieret motus in vacuo, motus ille haberet aliquam ex illis differentiis, non quidem respectu corporum inferiorum, quia supponimus nulla esse ratione *vacui*, benè autem respectu cæli & partium eius: tunc enim talis motus esset à dextris vel à sinistris cæli & alicuius partis illius. *Dices* Si fieret motus in *vacuo*, mobile illud non quiesceret, quia nullum esset medium resistens; sed omnis motus localis fit ad acquirendam requiem in centro, quo adepti, cessat motus, ergo non posset fieri motus in vacuo. *Resp.* negando sequelam maioris, quia si mobile esset proiectum aliquod, quiesceret in illo loco, vbi deficeret virtus proijcientis; si verò mobile esset animal, quiesceret pro libito, vel pro fatigatione sua.

Obijcies 2. *in secundam partem*. Resistencia medijs est causa, cur retardetur motus; sed in vacuo nulla esset resistencia medijs: ergo nil posset retardare motum localem in *vacuo* factum, proindeque non foret successiuis, sed instantaneus & indiuisibilis. *Resp.* quod resistencia medijs sit quidem causa partialis, cur retardetur motus non tamen est causa totalis & adæquata talis retardationis: quandoquidem successio & continuitas motus desumitur nedum ex resistencia medijs, sed etiam ex distantia terminorum à quo & ad quem: vnde licet in *vacuo* nullum sit medium resistens mobili, quia tamen est distantia inter terminum à quo & terminum ad quem, ideo mobile prius transit vnâ partem spatij vacui, quàm aliam; & sic talis motus in vacuo factus esset *successiuis*. Supposito enim, vt prædictum est, quodd omnia corpora sublunaria annihilarentur, &

mo-

mola asinaria caderet è cælo, tunc prius perueniret ad locum vbi nunc est suprema aeris regio, deinde ad locum vbi existit media, ac denique ad illum vbi infima reperitur; quod satis demonstrat continuitatem & successionem motus localis facti in vacuo.

Quæres, an supra cælum existant spatia imaginaria, in quibus Deus possit dici existere. Hoc negat Scotus in 1. dist. 37. quæst. vn. contra Recentiorum plures, qui affirmant supra vltimum cælum dari vacuum quoddam, seu spatia imaginaria, in quibus existit Deus, & vbi alios mundos in infinitum syncategorematicè creare potest. Quod autem nulla dentur de facto & positivè spatia imaginaria, colligi potest ex Arist. 1. de cælo text. 99. & 100. vbi expressè habet extra cælum, nec esse locum, nec vacuum, nec tempus. Ratio huius veritatis est quòd omne ens actuale & positivum sit vel productum, vel improductum; sed illa spatia imaginaria non sunt quid productum, vel improductum: ergo non dantur de facto & positivè spatia imaginaria. Probatur minor, quòd talia spatia non sint quid productum, quia essent quid à parte rei, vocantur tamen imaginaria, quia sola imaginatione finguntur. Non sunt etiam quid improductum, quia essent Deus vel creatura, non sunt autem Deus, quia non est quid imaginarium: nec creatura, quia omnis creatura producta est: & sic non dantur spatia imaginaria de facto & positivè. Deinde si darentur positivè illa spatia imaginaria, terminarentur à superficie alicuius corporis, quod esset extra cælos; sed extra vltimum cælum non datur aliud corpus, quoniam supponimus illud esse vltimum: ergo non dantur de facto & positivè spatia imaginaria, sed tantùm negativè & potentialiter; in quantum Deus potest in illo inani producere alios mundos.

Tandem si Suares, Conimbricenses, Ariaga, & Recentiorum plurimi, dicant Deum existere in spatiis imaginariis, quæ proinde supponunt dari de facto hoc ideo afferunt, quia Scriptura & Patres docent Deum esse excelsiorem cælo, & ipsius ambitu non contineri; sed talis loquendi modus insinuat tantùm Dei immensitatem quæ talis est, vt non limitetur per limites cæli; quoniam si extra vltimum cælum vellet producere mille mundos, in illis omnibus esset præsens; ergo non obstante eo quod habetur in Scriptura & Patribus, Deus non est extra cælum tanquam in aliquo, sed tantùm in

318 PRIMA PARS PHYSICÆ
se, sicuti erat ante mundi constitutionem, iuxta dictum
Poetæ.

*Dic ubi tunc esset, cum præter eum nihil esset.
Tunc ubi nunc, in se; quoniam sibi sufficit ipse.*

C A P V T V.

De Tempore.

Cum videlicet corpori naturali competat esse hic & nunc, seu existere in loco & in tempore determinatis: ideo exigit à nobis ordo doctrinæ, ut postquam examinauimus ea quæ locum concernunt, & vacuum loco oppositum; agamus de tempore: non quidem ut est relatio extrinsecus adueniens inter tempus & rem temporaneam, sed *ut est mensura motus rerum naturalium*. Quia autem tempus est species durationis, quæ non potest sufficienter cognosci, nisi quædam dicantur ante ea de duratione considerata in genere; ideo in capite præsentis quatuor præsertim examinanda sunt. *Quid nimirum & quotuplex sit duratio, quid sit æternitas, quid ævum, & quamam dici debeant de tempore.*

Q V Æ S T I O P R I M A.

Quid & quotuplex sit Duratio in communi.

PER *durationem* nihil aliud intelligi debet, quàm permanentia rei in suo *esse*, seu in sua existentia. Dicitur autem *permanencia*, quia illa tantum dicuntur durare propriè, quæ in *esse* suo persenerant; ubi illa quæ vno tantum momento existunt propriè non debent dici *durare*, qualia censentur esse generatio & corruptio formaliter sumptæ pro acquisitione vel deperditione formæ substantialis. Dicitur verò *permanencia rei in esse suo*, seu in sua existentia; quia *duratio* non competit rei secundum essentiam solam consideratæ, sed tantummodo attribui debet rei actu existenti: unde licet essentia rerum dicantur æternæ, eo modo quo explicuimus aliàs; non tamen dici debent *durare* ab æterno: quia *duratio* non competit rei spectatæ secundum essentiam sed secundum existentiam.

CONCLUSIO.

Duratio est triplex, nimirum *Aternitas*, *Aeum*, & *Tempus*. Cum enim duratio sit permanentia rei in suo esse, tot sunt durationes, quot sunt modi, quibus aliquid potest permanere in sua existentia; sed sunt tres modi permanendi in esse, seu in existentia: ergo & tres species durationis. Probatur minor, ex eo quod rerum existentium quædam ita permaneant in esse suo, ut sunt omnino immutabiles in illo, cuiusmodi est Deus, qui de se loquens ait, *ego Deus & non mutor*; & talis permanentia in esse innvariabili est *Aternitas*; quædam verò habent esse prorsus variabile, ut motus, & substantiæ corruptibiles, quæ perpetuæ mutationi subiacent, & plus durauerunt hodie, quàm heri; & harum duratio est *tempus*: aliæ tandem medium quasi tenentes sunt inuariabiles quantum ad substantiam, & variabiles quantum ad accidentia & operationes suas; ut Angeli & animæ rationales, quæ recipiunt totam suam substantiam simul & actus suos successiuè: & istarum duratio vocatur *Aeum*. Sicque patet quod sint tres durationis species, *Aternitas*, *Aeum*, & *Tempus*.

Omnis duratio saltem creata, habet aliquam rationem quantitatis, quia duratio est mensurabilis; sed esse mensurabile propriè participat quantitatis rationem & sic omni duratione reperitur aliqua ratio quantitatis. Licèt tamen mensura magis propriè conueniat quantitati, quàm qualitati; isti tamen transfertur per accommodationem: nedum enim res mensuratur penes magnitudinem, penes multitudinem, penes pondus, penes perfectionem, & penes durationem: quæ ad quantitatem pertinent: sed etiam penes intensiorem, quæ conuenit qualitativis, cum quærat quantum sit calor, quantum sit candor, & quanta sit nigredo; quibus respondetur calorem esse intensum ut duo, vel ut tria, vel ut quatuor, & sic de alijs qualitativis.

Præter has principales durationis species, *Aternitas* diuiditur in *Aternitatem Imparticipatam*, *Participatam*, & *Modum æternitatis participatæ*. *Aternitas imparticipata* soli Deo conuenit, cum solus Deus habeat existentiam interminabilem à parte ante & à parte post; ut mox dicetur. *Aternitas participata* con-

venit rebus supernaturalibus incorruptibilibus ex sua natura & suum esse possidentibus totum simul, vt sunt angeli, animæ rationales, lumen gloriæ, visio beatifica, & amor beatificus: talia dicuntur habere *Æternitatem participatam*, quia duratio illarum rerum imitatur durationem Dei, cum suum totum esse habeat simul, sicuti Deus, à quo ista suum esse emendicant? *Modus æternitatis participata* est duratio rei supernaturalis totum suum esse simul habentis, quæ tamen est defectibilis & corruptioni subiecta; sic fides, spes, charitas, & alia dona supernaturalia, quæ viatores amittere possunt, dicuntur habere *modum æternitatis participata*; quia in hoc imitantur æternitatem *participatam*, quod sint supernaturalia & habeant suum esse totum simul, non tamen habent simpliciter æternitatem *participatam*, quia ista dona viatoribus concessa definere possunt, illa verò sunt perpetua.

QVÆSTIO II.

Quid sit Æternitas.

AB æternitate aliquid dicitur æternum. *Æternum* autem multis modis sumitur. *Primo* nimirum pro eo quod antiquum est; sic Gen. 49. Messias dicitur *desiderium collium æternorum*. 2. Pro eo quod longius durat, Gen. 14. *Dabo tibi terram Chanaam in possessionem æternam*. 3. Pro eo quod habet principium & non habet finem, sic gloria dicitur *æterna*, ignis *æternus*, & animæ *æternæ*. 4. Pro eo quod habet quidem principium & finem, sed illa non exprimuntur in Scriptura; sic ad Heb. 7. *Melchisedech. sine patre & sine matre dicitur, nec initium aut finem dierum habuit*. 5. Pro eo quod intelligitur quidem sine principio & fine, verumque tamen habere potest; sic si Angelus fuisset creatus ab æterno; diceretur hoc modo *æternus*. 6. Denique *æternum* sumitur propriè, pro eo quod non habet nec habere potest principium aut finem; & sic *solus Deus est æternus*; Et de æternitate sic sumpta loquendum venit.

CONCLUSIO.

Descriptionum *æternitatis*, quas afferunt Theologi, accuratissima videtur ea, quam tradit Boetius lib.

lib. 1. de Consol. prola 6. *Aeternitas est interminabilis vita tota simul & perfecta possessio*. Dicitur primò *interminabilis*, & hoc excludit terminum à parte ante & à parte post, seu principium & finem: imò hæc particula nedum excludit terminum actuale, sed & possibile: vnde si Deus Angelum ab æterno creasset, ille non fuisset propriè *æternus*; quia licèt haberet *esse indeterminatum*, habuisset tamen durationem terminabilem; quia potuisset non creari ab æterno. Secundò dicitur *vita*, vbi per *vitam* intelligitur existentia actualis; ita quòd ens *æternum* intelligatur habere existentiam interminabilem. Dicitur 3. *tota simul*, & hoc denotat *æternitatem* non esse diuisibilem, nec habere vnā partem suæ durationis post aliam: imò *æternitati* omnia sunt præsentia: vnde Augustinus Conc. 2. in Psal. 101. ait, *diuina æternitas est substantia Dei, qua nihil habet mutabile; & in qua nihil præteritum, quasi iam non sit; nec futurum quasi nondum sit: in qua denique non est nisi est*; iuxta illud Exodi 3. *qui est misit me ad vos*. Subiungitur denique *perfecta possessio*: quæ particula denotat ab ente æterno debere tolli dependentiam ab alio: vnde si aliquod ens esset ab æterno productum, non propterea *æternum* dici deberet; quia haberet suam existentiam dependentem à Deo, quod repugnat æternitati propriè sumptæ.

Obijcies. Aeternitas non est tota simul, quoniam Apocal. 1. Scriptura attribuit præsens, præteritum, & futurum Deo, qui est *æternus*, de illo enim dicit, *qui est, qui erat, & qui venturus est*. Resp. has temporis differentias non attribui Deo formaliter & propriè, sed tantum metaphoricè & accommodatè ad nostrum intelligendi modum: vt concipiamus scilicet Deum semper fuisse, semper fore, & esse actu. Nec in hoc non decipit Scriptura, imò sic loquitur ad instructionem nostram, dicendo scilicet inuisibilia per visibilia: sicut quando attribuit Deo brachia, pedes, & oculos, quæ non sunt actu in illo, sed indicant in eo reperiri Potentiam, Immensitatem, & Cognitionem. Dices Aeternitas non est indiuisibilis & tota simul, si possit suscipere magis & minus, sed Aeternitas suscipit magis & minus, quia plus hodie durauit, quàm heri, quandoquidem maiori tempore coexistit: ergo non bene dicitur, quòd *Aeternitas sit interminabilis vita tota simul & perfecta possessio*. Resp. Aeternitatem non

fulcipere magis aut minus, quia est tota simul, & licet maius tempori coextiterit hodie, non tamen plus duravit: sed ex eo inferri tantum potest, quod coexistentia Æternitatis D. sit indivisibilis, pro diuisibilitate differentiarum temporis, quibus coexistit tota simul, absque vlla diuisibilitate suæ entitatis; ut diximus, *Disp. 4. de Æternitate D. vbi plura videri possunt,*

Q V Æ S T I O III.

Quid sit Æuum.

EX præcedenti quæstione colligi debet Deum esse æternum, quia durationis existentia illius est perfecta, tota simul, & interminabilis à parte ante & à parte post, in quibus consistit tota æternitatis ratio. Ratio huius sumi potest ex hoc quod Deus sit *immutabilis*; sed quod est immutabile non potest transire à non esse ad esse, nec ab esse ad non esse: ergo Deus est æternus. Deinde Deus censetur esse summè perfectus, qui proinde incipere aut desinere nequit; cum hoc maximam imperfectionem redolet. Tandem Deus etiam est ens absolutè necessarium: ergo & æternum, iuxta id quod habetur Psal. 9. *Deus regnabit in æternum*. Et ad Heb. 10. *Tu autem permanes, & anni tui non deficient*. Deus nedum est æternus, sed æternitas illi taliter est propria, ut non competat creaturæ; quandoquidem Gen. 1. dicitur quod Deus in principio creavit cælum & terram, & omnia quæ in illis continentur: ita quod si Deus ab æterno creasset Angelum, non fuisset propriè æternus: quia potuisset à Deo non creari, & nunc annihilari posset: quod autem æternum est, non tantum debet esse interminatum, sed insuper debet esse interminabile, ut prædiximus. Postquam ergo loquuti fuimus de æternitate, quæ est duratio solius Dei: nunc videndum est quid sit æuum, quod est duratio Angeli, & animæ rationalis, quæ habent suum esse totum simul, dependenter tamen à Deo.

C O N C L U S I O.

Æuum aliquando sumitur pro æternitate, ut Ecclesiastici 4. *Nomen Domini permanens in æuum*, seu in æternum; frequentius sumitur pro tempore nostro,

stro, quo sensu dicimus homines, qui eodem tempore vixerunt, esse coæuos: propriè autem sumitur *æuum* pro duratione Angeli & animæ rationalis, quæ sic definitur, *Æuum est duratio rei permanentis & incorruptibilis ab intrinseco, quæ tamen ab extrinseco desinere potest.* Dicitur primò *duratio*, & est genus definitionis; in quo *æuum* conuenit cum æternitate & tempore, quæ sunt durationes. Dicitur 2. *rei permanentis*, ad distinctionem rerum corporalium successiuarum, quæ cum non habeant suum esse permanentem & simul, sed per partes, idè non mensurantur æuo, sed tempore; vnde diximus antea, quòd *æuum* competat Angelis & animabus rationalibus, quæ habuerunt suum esse simul, licèt habeant suas operationes *sucessiue*, hodie scilicet vnâ intellectionem aut volitionem, & postea aliam & aliam. Materia prima insuper mensuratur etiam æuo, quia simul, & non per partes, creata fuit à Deo. Dicitur 3. *Incorruptibilis ab intrinseco*, in quo ea quæ mensurantur æuo distinguuntur à compositis ph ysicis, quæ sunt ab intrinseco corruptibilia; quia constant materia & forma, quæ sunt principia corruptionis, vbi Angeli, animæ rationales, & materia prima, non sunt corruptibiles ab intrinseco, benè autem ab extrinseco, à Deo videlicet qui pari facilitate ea destruere & annihilare potest, sicut eadem extraxit de nihilo.

Modus *æui*, seu æternitas, est duratio rerum permanentium, quæ totum suum esse simul habent, in eoque perseverant aliquandiu, possunt tamen interire ab intrinseco, quia constant materia & forma, quæ sunt principium corruptionis; sic dici potest de cælo, quod mensureretur modo *æui*, seu æuiternitate: quia scilicet suum totum esse obtinuit simul, in quo conuenit cum Angelo & anima rationali, quibus tamen distinguitur, quandoquidem propter suam materiam corrumpi potest ab intrinseco, quod non potest dici de Angelis & animabus: vnde de cælo dicitur, quòd mensureretur modo *æui*, quatenus habet suum totum esse simul, corruptibile tamen ab intrinseco. *An autem substantiæ generabiles & corruptibiles mensurentur æuo, vel tempore*, dicetur in sequenti quæstione; si priùs notauerimus, quòd comparando durationes principales inter se, quæ sunt Æternitas, Æuum, & Tempus, hæc inter sit differentia, quòd *æuum* sit medium inter tempus & æternitatem, Æternitas enim omnem mutationem

excludit, tam substantialem, quàm accidentalem; cùm Deus secundùm substantiam aut secundùm accidentia non possit mutari. *Tempus* vtramque mutationem includit, secundùm substantiam & accidentia; quandoquidem homo, plantæ, & similia, acquirunt suum corpus per partes: & accidentia illis successivè adveniunt. *Ænum* autem excludit omnem mutationem substantialem, quandoquidem tota substantia Angeli & animæ simul acquiritur, & nulla illi advenit substantialis variatio: attamen recipit *successivè* mutationes accidentales, vnam scilicet intellectionem vel volitionem post aliam.

QVÆSTIO IV.

Quid sit dicendum de Tempore.

IN antepenultima quæstione explicapdo æternitatem, vidimus eam'posse distingui in æternitatem imparticipatam, participatam, & modum æternitatis participatæ: quarum durationum prima soli Deo competit, secunda competit qualitatibus permanentibus ab intrinseco incorruptibilibus; quales sunt fides, spes, charitas, & lumen gloriæ beatorum: tertia denique convenit rebus permanentibus ab extrinseco corruptibilibus; quales sunt virtutes infusæ in'homine viatore existentes, ut fides, spes, & charitas, quæ acquiruntur simul, attamen destruuntur per peccata. In quæstione præcedenti explicuimus quid sit ænum Angelo, animæ, & materiæ primæ conveniens; & distinximus illud ab æuiterno, quod competit cælis, qui habuerunt suum esse totum simul, & possunt corrumpi ab intrinseco; cùm consent materiâ, quæ est corruptionis principium. Nunc agendum superest de *Tempore*, quod ex professo examinare tenentur physici, quandoquidem illis incumbit agere de motu, qui est proprietas corporis naturalis; qui motus mensuratur *tempore*. De tempore autem hæc præsertim septem discutienda sunt, *an detur tempus, an tempus sit reale, quid sit tempus, an tempus distinguatur à re temporanea, quanam dicantur mensurari tempore, quæ sint proprietates temporis, ac denique quomodo diuidatur tempus; quæ omnia per diuersas conclusiones aperientur.*

CONCLUSIO PRIMA.

Frustra tempus terreret qui existentiam ipsius temporis probare meditaretur. Sic Scotus in 2. dist. 2. quæst. 2. siue enim consulatur fides, siue requiratur ratio, per vtramque patebit dari reuera tempus. Scriptura siquidem Sacra Gen. 1. testatur *Deum fecisse lumina in firmamento cæli, ut diuiderent diem ac noctem, & essent in signa & tempora, & dies & annos*. Act. etiam 1. Christus Apostolis dixit, *non est vestrum nosse tempora vel momenta*. Itemque Ecclesiastici 3. fertur. *Omnia tempus habent & suis spatijs transeunt vniuersa sub cælo*. Qui sacre Scripturæ contextus sufficienter probant temporis existentiam. Quantum ad rationem confirmatiuam huiusce assertionis, non aliunde repeti debet quàm ex motu naturali corporum naturalium, quorum alia mouentur velocius, & alia tardius; sed velocitas & tarditas motus desumitur ex maiori vel minori tempore in motu consumpto: ergo euidenter probatur ratione dari tempus, quod est mensura rerum successiuarum, quarum partes sunt in continuo fluxu. Sicut Æuum est duratio rerum permanentium, defectibilem ab intrinseco vel ab extrinseco. Æternitas est duratio Dei permanentis tum secundum substantiam, tum secundum accidens.

Obiicies illud non datur cuius partes non existunt; sed partes temporis, quæ sunt præteritum, præsens, & futurum, non existunt, quandoquidem Aug. l. 83. qq. quæst. 17. *præteritum iam non est, futurum nondum est, nec præsens, quia labitur*: ergo non datur tempus. Resp. distinguendo minorem, partes temporis non existunt actu permanenti, concedo; non existunt successinè, nego: licet enim tempus non habeat partes simul coexistentes, habet tamen partes fluentes actu continuo; cum hæc sit entium successiuorum proprietas.

CONCLUSIO SECUNDA.

Tempus est ens reale à parte rei & nemine cogitante existens. Sic Doctor noster in 2. dist. 2. quæst. 1. contra Auerroem, Galenum, & aliquos ex antiquioribus, quibus subscribere videtur D. Thomas 4. Phys. lect.

lect. 13. existimans tempus complementum accipere ab intellectu. Nostra conclusio videtur esse Aristotelis, qui *lib. Pradicam. cap. de Quantit.* numerat tempus inter quantitatis species: sed species quantitatis sunt reales, cum quantitas earum genus, sit accidens reale absolutum: ergo tempus, est quid reale. Deinde quod habet proprietates reales, debet censerì ens reale; sed tempus habet proprietates reales, nimirum longitudinem aut breuitatem: ergo tempus debet censerì reale. Tandem nemine cogitante, res sublunares successiue durant; sed duratio successiua est tempus: ergo nemine cogitante tempus est quid reale. Est enim mensura motus, vt dicetur in conclusione sequenti: motus verò est quid reale, & proinde tempus non habebit suum complementum ab anima.

Obijcies: Tempus ita pendet ab anima, inquit *Arist. 4. Phys. cap. ult.* vt nisi operaretur intellectus, tempus desineret esse: ergo tempus non est quid reale. *Resp.* tempus posse sumi dupliciter, nimirum secundum suam diuisionem, quatenus scilicet tempus, quod est à parte rei continuum, consideramus tanquam si esset diuisum, ipsumque distribuimus in secula, annos, menses, hebdomadas, & horas. Quando autem dicit Philosophus, quod tempus pendeat ab anima, loquitur ipse de tempore quantum ad diuisionem considerato, innuitque talem distributionem temporis in partes præmemoratas pendere tantum ab anima: hoc non impedit tamen quin tempus ipsum secundum suam entitatem consideratum, non existat à parte rei; non quòd partes illius simul existant, quia hoc ad eutia tantum permanentia pertinet; sed quòd tales partes sint in continuo fluxu.

CONCLUSIO TERTIA.

Quamuis Augustinus natura temporis ita difficilis videatur, vt eam explicare non possit; cum *lib. 6. Confess. cap. 14.* dicat, *Si nemo ex me quærat quid sit tempus, scio; si quærenti explicare velim, nescio*: conformiter tamen Aristoteli *4. Physic. cap. 11.* dicitur de tempore, quòd sit *numerus motus secundum prius & posterius*. Dicitur primò *numerus*, non ille qui est quantitas discreta, quia tempus est quid continuum non verò discretum aliquid, sed *numerus* ibi sumitur pro
men-

mensura motus, in quantum motus particulares numerantur & mensurantur per tempus, cum motus brevis sit ille, qui brevi tempore decurrit; longior vero, qui longo tempore perseverat. Ideò autem Philosophus in descriptione temporis utitur nomine *numeri*, quia mensuramus motum numerando tempus, & assumendo determinatam aliquam temporis extensionem, v. g. horam, vel diem, quas multoties aliquando replicamus; ut indicetur quænam sit motus quantitas. Dicitur 2. *secundum prius & posterius*, quia res mobiles non mensurantur tempore, nisi in quantum habent successionem suarum partium; in successione autem reperitur prius & posterius, seu præteritum & futurum; ergo *tempus est mensura motus secundum prius & posterius*.

Obijcies 1. Tempus mensurare æqualiter quietem ac motum, cum dicatur vulgo, quanto tempore aliquis quieuerit, sicut quanto tempore fuerit operatus; ergo tempus uedum est mensura motus, sed debet dici mensura motus & quietis. Respondet Scotus in 2. dist. 2. *quest. 4.* tempus reuerà posse dici *mensuram motus & quietis*, communius tamen dicitur tantum a Philosophis *mensura motus præcisè*, quia physicus per se considerat motum corporis naturalis, & per accedens tantum quietem, quæ est priuatio, seu cessatio motus. Porro hic sciendum est tempus quatuor modis accipi. *Primò* scilicet pro dispositione & temperie aeris quo sensu dicimus tempus esse serenum aut nebulosum, sic cum vel humidum. *Secundò* sumitur pro iucunditate & felicitate vitæ, quam aliqui ducunt fruenter bonis; quo modo dicit Iob de impijs cap. 21. *Iob bonis ducunt dies suos, & in puncto ad infernum descendunt*. *Tertiò* sumitur tempus pro opportunitate rerum faciendarum, Ecclesiast. 3. *Tempus plantandi, Tempus euellendi*. *Quartò* denique accipitur tempus, pro duratione successiua rerum; & hoc modo spectatum designauimus illud esse numerum seu mensuram motus.

CONCLUSIO QVARTA.

Tempus non distinguitur realiter à motu factò in tempore, seu à re temporanea; sed tantum formaliter. Sic Scotus in dist. 48. *quest. 2. & 5. Metaph. quest. 10.* Proprietates enim seu propria passio non distinguitur realiter à subiecto cuius est proprietas, ut
pro.

probat Scotus in 2. dist. 16. *quæst. vii.* sed tempus est passio motus, ut docet Arist. 4. *Phys. cap. text. 103.* ergo tempus non distinguitur realiter à re temporanea, sed tantum formaliter. Illa enim distinguuntur formaliter & ex natura rei, quæ habent distinctas definitiones independentes ab intellectu; sed motus & tempus diuersimodè definiuntur à Philosophis, qui dicunt *tempus esse numerum motus secundum prius & posterius, motum verò esse actum entis in potentia*; ergo motus & tempus distinguuntur formaliter & ex natura rei. Hoc alij aliter explicant, dicendo durationem in communi distingui formaliter à re durante; quod tamen restringendum est ad durationem creatam, quandoquidem Æternitas, quæ est duratio Dei, non distinguitur formaliter positivè ab essentia illius; ut diximus in Theologia assignantes inter Deum & modos intrinsecos distinctionem tantum formalem negativam.

2. Obijcies *quando aliqua talia sunt, ut unum multiplicetur non multiplicato alio, talia distinguuntur realiter*: sed sunt plures motus & res temporaneæ, ubi est tantummodo vnum tempus, nempe duratio primi mobilis, quo mensurantur omnes motus particulares: ergo tempus distinguitur realiter à motu, seu res temporanea à tempore, & quæcumque res durans à sua duratione. *Resp.* distinguendo minorem sunt plures motus, & tantummodò vnum tempus, *commune & extrinsecum*, concedo: *particulare & intrinsecum*, nego. Quando autem dicimus rem temporaneam non distingui nisi formaliter à tempore, hoc intelligimus de tempore *intrinseco* & de duratione propria cuiuslibet rei, à qua non distinguitur res, nisi formaliter; licet quilibet motus, quælibet actio, & quælibet res durans, distinguatur realiter à duratione communi & extrinseca quæ est duratio motus primi mobilis, per quam mensuramus communiter res illi inferiores, tum cœlestes, tum sublunares: quilibet enim motus particularis distinguitur à motu primi mobilis, qui est tempus commune & extrinsecum. *Quando etiam dicitur, ad probandam distinctionem realem inter motum & tempus, quod mensura distinguatur realiter à mensurato*; & proinde tempus à motu, quandoquidem tempus est mensura motus: eadem currit responsio. Quòd mensura *extrinseca* distinguatur quidem realiter à mensurato, non verò mensura *intrinseca*, quæ est duratio propria rei, & tempus intrinseca

C O N-

CONCLUSIO QUINTA.

Quantum ad ea, quæ debent dici mensurari à tempore controuertuntur Philosophi. Thomistæ enim contendunt quamcumque substantiam generabilem & corruptibilem mensurari tempore; sicut Angeli mensurantur Æuo, & Deus improprie dicitur mensurari æternitate: quæ tamen non est proprie mensura Dei. Scotus verò in 2. distr. 2. quæst. 4. cum nostris docet substantias generabiles & corruptibiles non tempore, sed æuo, mensurari. Ratio nostra est quia entia permanentia, quæ habent suum totum esse simul, non mensurantur tempore, quod est mensura rerum successiuarum: sed generatio & corruptio non fiunt successiuè & per partes, sed in instanti & permanenter: ergo res generabiles & corruptibiles præcisè & formaliter sumptæ pro introductione & deperditione formæ substantialis non mensurantur tempore, quoniam sunt entia permanentia; vnde Arist. 4. Phys. cap. 12. text. 118. dicens corpus mobile non est in tempore ut quantum; sed ut quantus est motus; per hoc indicat substantiam corpoream sublunarem non mensurari tempore, nisi quatenus habet sibi annexum motum, qui mensuratur tempore secundum prius & posterius. Cum ergo generatio & corruptio non admittant successionem; sed fiant in instanti, & habeant existentiam permanentem, licet parum durabilem; proinde non mensurantur tempore, sed æuo, sicut & Angelus eodem æuo diceretur mensurari, etiam si Deus illud destrueret paulo post suam creationem.

Obijcies. Viuentia naturalia habent esse per generationem, & ipsum deperdunt per corruptionem; sed viuentia naturalia dicuntur viuere tanto tempore, & mori in talitempore, ut patet: ergo quæ generantur & corrumpuntur mensurantur per tempus. Resp. talia mensurari tempore, secundum motum successiuum qui illis adiungitur per diuersam temporis successionem, concedo: secundum suum esse substantiale & quantitatum permanentem, nego. Spectari enim potest generatio dupliciter: Formaliter nimirum seu intrinsecè, pro præcisa introductione formæ substantialis; & extrinsecè seu concomitanter, pro omnibus dispositionibus & alterationibus, quæ præcedunt talem introductionem
formæ

formæ substantialis . Si sumatur generatio posteriori modo , pro alterationibus & dispositionibus illis , quæ adueniunt materiæ priusquam introducatür forma substantialis ; tunc substantiæ generabiles & corruptibiles subsunt tempori ; quia tales alterationes præuiæ sunt *successivæ* . Si verò generatio præcisè & formaliter sumatur pro introductione formæ substantialis , aut pro deperditione eiusdem , tunc substantia generabilis & corruptibilis dicitur mensurari non tempore , sed *ævo* ; quod est mensura rerum permanentium ; & sic intelligendus est Scotus , docens substantias generabiles & corruptibiles non mensurari tempore ; nec generationem aut corruptionem ; sed solas alterationes , seu motus successiuos , qui habentur per partes .

CONCLUSIO SEXTA.

Quantum ad proprietates temporis , hæ principaliores videntur : Prima quod tempus formaliter sumptum sit *unum specie* . Quia omnes omnino motus qualescumque sint , habent eandem specie durationem , seu permanentiam existentiae , illa tamen duratio in plures *numero* durationes distinguitur , cum alia sit duratio hominis , & alia duratio leonis : Ex diuersitate tamen specifica motus non potest colligi specifica multiplicatio temporis , nisi materialiter . Secunda temporis proprietas est quod sit *continuum* . Tale enim est tempus , qualis est motus , cuius est mensura ; sed motus est continuus : ergo & tempus . Tertia proprietas est , quod *motus dicatur continere tempus* , in quantum motus durat per tale vel tale tempus . Quarta proprietas est , quod *tempus dicatur causa ortus & interitus rerum* , quas perficit & corrumpit , non quidem per se , sed per adiunctas qualitates ipsarum rerum , quæ mutuò prægnant inter se in decursu temporum ; unde sequuntur generationes & corruptiones compositorum . Aliæ sunt quod tempus sit *irreuocabile* , quia *idem numero reproduci non potest naturaliter* . Quod sit *insensibile* , quia non cadit sub sensu , sed sola mente potest concipi ; unde forsitan ab Aristotele dicitur *dependere ab anima* . Quodque sit *sapientissimum* , & *ignarissimum* , quoniam est causa manifestationis & obliuionis omnium &c.

Quæres , an tempus sit *præsens & existens ratione partium* . Hæc quæstio supponit in tempore reperiri partes , quæ

quæ sunt præteritum, præsens, & futurum, & instantia quædam indiuisibilia, quæ partes illas inter se copulant. Queritur autem an tempus sit præsens, & existat *ratione partis*, vel *ratione instantis*; ad quod responderi debet, quòd tempus non existat, nec sit præsens *ratione partis* quæ est extensa, & diuisibilis; sed *ratione instantis*, quòd prorsus indiuisibile est: vnde Arist. 5. Phys. text. 105. ait, *nihil est temporis nisi nunc, quòd est indiuisibile*. Et postea subiungit partes temporis esse præsentis, in quantum terminantur per illud *nunc indiuisibile*, quòd est præsens. Ratio autem huius petitur ex natura entium successiuorum, quæ cum successiua sint, & in continuo fluxu consistent, non possunt existere per partem diuisibilem; sed tantum per aliquid indiuisibile sui: *Implicat enim ens successiuum habere plures simul*. Quando ergo dicitur quòd tempus habeat partes præsentis, sicut habet partes præteritas, & futuras; responderi debet quòd habeat partes præsentis, non *ratione sui*; sed *ratione alicuius indiuisibilis*.

Quæres *utrum sit unum, & idem nunc in toto tempore*. Hoc videtur haberi apud Arist. 4. Phys. text. 104. dicentem, *In toto tempore esse idem nunc secundum substantiam, differens verò secundum esse*. Quia autem ex hoc sequeretur, quòd omnia quæ extiterunt ab initio mundi, & futura sunt usque ad finem illius, simul censerentur existere, si haberent idem *nunc*, quia viderentur habere eandem durationem, & eandem permanentiam: ideo, distinguendum est dictum Philosophi, quòd scilicet sit idem *nunc* specie, seu eadem omnium duratio specifica, sicut antea diximus; licet sint diuersa *nunc* numero diuersis rebus conuenientia: ita quòd omne ens in particulari habeat suum *nunc* in particulari, seu suam durationem numero distinctam à duratione alterius. Quia autè illa *tunc* particularia seu illæ particulares durationes conueniunt in *nunc* communi, & in duratione specifica, ob hoc dixit Aristoteles *in toto tempore esse idem nunc secundum substantiam, seu idem nunc in communi; differens verò secundum esse*, videlicet secundum esse, & durationem numericam.

Quæres *utrum*, sicut æternitas potest accipi pro Impericipata, pro Participata, & pro modo æternitatis participatæ; æuumque similiter sumitur aliquando pro æuo simpliciter, & pro modo cui; quarum omnium dura-

durationum explicationes attulimus initio huius capituli : Sic etiam tempus possit dividi in continuum, & discretum. Hanc distinctionem temporis discreti à continuo invehere nituntur Thomistæ in scholam dicendo operationes, Angelorum, quæ discretæ sunt, v.gr. illorum intellectiones, aut volitiones, mensurari tempore discreto, quod nihil aliud est, quàm duratio talium operationum, quarum una distinguitur ab alia; sicut operationes illorum continuæ, quales sunt motus locales corporum, mensurantur tempore continuo, cum, & ipsæ continuæ sint. Talem distinctionem reicere contendit Scotus in 2. dist. 2. quæst. 2. docens operationes Angelorum, quantumcumque discretas, inter se mensurari æquo, sicut, & ipsos Angelos; cum enim tota ratio cur Angelus æquo mensuretur, desumatur ex hoc quod Angelus ipse sit quid permanens; sic etiam cum Angelorum operationes sint permanentes, licet in toto æquo una succedat alteri, attamen quælibet earum quantumcumque parum duret, non minùs debet dici mensurari per æquum, cum quælibet operatio Angelica sit permanens: sicut si Angelus ipse immediate post sui creationem annihilaretur, non minùs mensuraretur æquo; cum æquum non desumatur ex maiori aut minori duratione rei, sed ex natura ipsa rei durantis, quæ si sit permanens, mensurabitur æquo; & tempore si fuerit successiva.

CONCLUSIO ULTIMA.

Tempus ab aliquibus dicitur dividi in *imaginarium*, quod nihil aliud est, quàm non repugnantia temporis *passivi*, & in *reale*, quod est *realis duratio motus continui*, & *successivi*; sed cum agant physici de corpore naturali, reali, & verò, ideò agunt etiam tantum de vero, & reali tempore; Vnde melius est si dicatur simpliciter tempus dividi in *intrinsecum*, & *extrinsecum*, seu in tempus communem, & in tempus proprium. Tempus *extrinsecum* seu *commune* est duratio circulationis, & reuolutionis primi mobilis, quæ cum regulariter, & uniformiter perficiatur viginti quatuor horarum spatio, accipitur communiter pro mensura omnium motuum, & omnium actionum, quæ peraguntur sub illo; ita quòd homo v.gr. dicatur durasse per tot annos, seu per tot reuolutiones primi mobilis vel per aliquam partem reuolutionis illius, si scilicet per

per integram, & totalem non permanferit in exiftentia. Tempus *intrinsecum* feu *particulare* eft curatio cuiuslibet motus particularis, quæ conuenit rebus per partes fibi mutuo fuccedentibus, vt duratio diei, noctis, calefactionis, frigefactionis, & fimilium actionum, quæ habent durationes particulares fibi intrinsecas, à quibus non diftinguuntur, nifi formaliter.

Tempus *extrinsecum* iuxta diuerfa hominum placita diuerfimodè diftinguitur, alijs illud fupputantibus per Annos, Menses, Dies; & Horas; hæc omnia multoties replicando: alijs fupputantibus per Secula, Olympiades, Iuftra, & indictiones, iuxta nationum diuerfitatem. *Hora* eft duratio conftans fexaginta minutis. *Dies* duplex diftinguitur, naturalis nimirum, & artificialis. *Naturalis* dies eft integra reuolutio folis ab vno ortu ad alterum; ficque complectitur litem & tenebras. *Artificialis* eft reuolutio folis ab ortu ad occafum. Ille eft femper æqualis, ifte verò inequalis pro tempeftatum diuerfitate. *Mensis* eft certa collectio dierum in quam annus diftribuitur, diciturque *mensis* ex eo quod fit mefura anni. *Annus* eft duratio conftans duodecim menfibus, hebdomadis duabus, & quinquaginta, diedus verò fexaginta quinque & fere fex horis; tanto enim temporis interuallo fol perluftrat zodiacum.

Annus ab aliquibus diuiditur in annos *Planetariis* ita, quod in talium fupputatione tot fint anni, quos videantur efle curfus Planetarum; inter quos annos *Saturnius* erat maximus, & *lunaris* minimus, quia in ampliori duratione Saturnus in fuo cælo voluitur, & minori Luna. Communiter tantum numerantur duo anni, *solaris* nimirum, qui componitur ex duodecim menfibus: & *lunaris*, qui ex duodecim lurationibus componitur. Quia autem annus Ianuarius habet tantum trecentos quinquaginta quatuor dies. ideo annus solaris, de quo antea, excedit lunarem vndecim diebus, qui faciunt *epactam*, & fex horis, quæ reduplicatæ quater faciunt annum *bisextilem*, femel in quatuor annis.

Annus diuerfum habebat initium apud Hebræos, & Romanos. Illi exordiebantur annum *civilem* à nouilunio *Septembris*, & annum *sacrum* à Martio. Romani verò ordiebantur annum fimpliciter à mense *Martio*, quem mensem Romulus vocauit *Martium* à fuo

parente Marte. Secundus vocatus fuit *Aprilis* à verbo latino aperio, eo quod terra tunc suum finem aperiat ut germinet. Tertius fuit vocatus *Maius*, quia consecratus fuit in gratiam maiorum. *Iunius* sic dictus est quia in gratiam Iuniorum fuit institutus. Quintus dictus fuit *Quintilis*, ratione loci quem tenebat inter menses; qui etiam vocatus fuit *Iulius* in gratiam Iulij Cæsaris. *Augustus*, qui propter numerum *Sextilis* vocatus est, fuit etiam hoc nomine insignitus in honorem Cæsaris Augusti. Septimus ob suum ordinem vocatus fuit *September*, Octauus *October*, Nonus *November*, Decimusque *December*. His decem mensibus Numa Pompilius, duos adiecit Ianuarium videlicet, & Februarium *Ianuarius* sic dictus est à Iano, eo quod sicut alter Ianus videretur biceps, respiciendo finem prioris anni, & exordium sequentis: vel sic cognominatus est, quia erat aliorum mensium ianua. *Februarius* dictus est à Februo, seu à Plutone, cui tanquam deorum infernalium principi sacrificabatur eo tempore, ut animæ ex hoc mundo transeuntes faciliorem ad campos Elysios transmissionem haberent.

Seculum est spatium centum annorum. *Decas* est spatium annorum decem. *Lustrum* est spatium quinque annorum apud Latinos, sic dictum à Romanis à verbo *lustrare*, eo quod Censores quolibet quinquennio lustrabant uniuersum populum. Olympiades est spatium quinque annorum apud Græcos, quod vocabatur apud Latinos *Lustrum*; sic autem vocabatur ab Olympicis certaminibus, quæ celebrabant Græci de quinquennio in quinquennium. *Indictiones* denique sunt spatium quindecim annorum, eo quod quolibet *Indictio* contineret tria Lustra, seu tres Olympiades.

CAPUT VI.

De Motu.

INTER corporis naturalis proprietates principalior videtur esse *motus*, quandoquidem est primarius partus nature: quæ describitur *principium motus, & quietis*; unde in quinque libris Physicorum de eo agit Aristoteles, loquens in tertio de motu in genere, in quinto de unitate, diuisione, & oppositione motus; in sexto de motu locali, in septimo denique, & octauo, de

de motu grauium, & leuium, vbi motum cum primo Motore comparat: Hæc omnia propter breuitatem indifferiminatim habentur in hoc præfenti capite, cui dantur duæ fectiones, vt diftinctius explicentur omnia, quæ naturam motus concernunt.

SECTIO PRIMA.

De natura motus in genere.

QVÆSTIO PRIMA.

An detur Motus, & quid fit.

Non intendimus hic agere de motu intentionali, qui eft actio per quam intellectus voluntatem mouet, eam illustrando; aut voluntas intellectum, vel aliam potentiam impellit, vtrique imperando; vel denique obiectum potentias excitat, eas alliciendo vt agant: fed de *motu reali* qui eft actio realis, & physica, per quam aliud reale, & physicum acquiritur, siue fit *substantialis*, comparatum per generationem; siue fit *accidentale* acquisitum per quantitatem, qualitatem vel motum localem. Existentiam motus non timuit negare Zeno, iuxta id quod habetur apud Arist. 6. *Phys. cap. 9. text. 75.* sed ridiculo huic errori sese fortiter opposuit Philosophus loco præcitato.

CONCLUSIO PRIMA.

Existentiam motus sufficienter probare visus est Socrates, dum deambulando, & efficiendo motum, voluit refutare Zenonem, qui motum negabat contra Philosophos, & præsertim contra Stagiritam, qui octauum librum Physicorum instituit de *motu, & mobili*. Deinde communis experientia satis convincit Zenonistas; cum enim prospiciamus ad oculum corpora calefieri, & frigesieri, augeri, & minui, ac de vno loco transire ad alium, quæ omnia non sunt nisi per *motum*, hoc euidenter comprobatur existentiam motus; qui à talibus impugnari non potest, nisi verbo aut scriptis. Quod si loquantur, mouent linguam, & labia; si verò scribant, mouent manus: proindeque non possunt dicto aut scripto negare *motum* quin ipsum efficiant, de-

destruere, conādo. Tandē corpus naturale, habet potē-
tiam mouendi se de loco ad locum, vt quærat quæ sibi
sunt commoda vel necessaria, sicut patet de hominibus
& de brutis: ergo sese mouere possunt, & se mouent de
facto, ne frustraneam habeant potentiam, quæ non posset
reduci ad actum. Ob hoc Doctor noster 9. *met. quest. 14.*
non probat, sed supponit dari motum, & in Report.
quest. 2. primi dist. 2. collocat existentiam motus inter
propositiones contingentes per se notas.

1. Obijcies. Si daretur *motus*, mobile finito tempore per-
transfret infinitum spatium, quia omne spatium est
semper diuisibile in partes vltro diuisibiles in infinitum,
vt probauimus agentes de continuo; sed infinitum non
est pertransibile 3. *phys. tex. 40.* quia quæcumque pars
rei infinitæ exhauriatur, semper alia, & alia remanet
exhaurienda: ergo non potest dari motus, inquit Ze-
no. *Resp.* negando sequelam maioris, quod scilicet
daretur spatium infinitum, si admitteretur motus. Quan-
do autem dicitur quodcumque spatium esse diuisibile in par-
tes infinitas: hoc verum est, quantum ad partes pro-
portionales potentiales quæ non possunt ita diuidi, quin
vltius sint in infinitum diuisibiles: falsum tamen
quantum ad partes aliquotas actuales quæ sunt determi-
natæ, & finitæ quantitatis, sicut & totum illud cuius
sunt partes.

CONCLUSIO SECVNDA.

Motus definitur communiter *actus entis in potentia*
ut in potentia. Sic Scotus cum Arist. 3. *phys. cap.*
1. Dicitur primò *actus*, seu actio inchoata, & imper-
fecta; quia idē mouetur mobile vt acquirat aliquid:
vnde motus, qui est via, & tendentia ad illud, non im-
meritò vocatur actus, seu operatio incepta, & imper-
fecta. Dicitur 2. *actus entis*, nempe physici seu cor-
poris naturalis; quoniam ex philosopho 8. *phys. tex. 10.*
subiectum motus est corpus naturale, à quo profluit
mobilitas, tanquam propria passio. Dicitur tertio *in*
potentia, quia illud mobile quod mouetur est in po-
tentia ad actum perfectiorem ad quem tendit, &
quem acquirit per illum motum: vnde quia Deus om-
nia habet, & est actualissimus seu perfectissimus, idē
nulli motui subiacere potest. Additur denique *prout*
in potentia; vt innotescat motum semper esse actum
entis

entis completi, non verò completi; ut patet per exemplum aque, quæ de non calida efficitur calida per motum. Illa enim aqua est ens quod mouetur, ens, inquam, in potentia, quia est ens incompletum respectu caloris acquirendi, quod ob hoc dicitur ens in potentia.

An autem prædicta definitio motus competat omni motui, controuertuntur authores. Iandunus enim, Fonseca, & Conimbricenses applicant hanc definitionem soli motui successiuo; Scotus verò quæst. 44. prædicam. cum Parisiensibus, & Complutensibus docet eam conuenire cuilibet motui tum instantaneo, tum successiuo; & hoc conformiter Aristoteli, qui 3. phys. text. 6. prædictam definitionem illustrat per exempla generationis & alterationis, quorum motuum ille est instantaneus, & iste successiuus: quod ulterius confirmari potest ex eodem in postprædicamentis, ubi sex species affert motus inter quas collocat generationem, quæ fit in instanti.

Obijcies 1. motus ex Arist. 3. phys. text. 1. est de genere continuorum; sed non est de genere continuorum permanentium: ergo est de genere continuorum successiuorum, & sic præallata definitio soli motui successiuo applicari debet. Resp. Philosophum reuera dicere, quod motus sit de genere successiuorum, ut nos ipsi admisimus dicentes in logica, motum, & tempus esse species quantitatis continuæ successiuæ; hoc tamen impedit quin dentur motus instantanei, nempe generatio, corruptio, illuminatio aeris, & actiones illæ, quas Deus per Omnipotentiam efficere potest in instanti. Si ergo dixerimus cum Philosopho motum esse de genere successiuorum; hoc ideo dictum est à nobis, & ab illo, quod motus successiuus sit apertior, & euidentior motibus subitaneis, & conformior principiis naturæ; licet ulterò fateamur dari motus instantaneos, ut probabitur, dicendo inferiùs successionem non esse de essentia motus naturalis.

Obijcies 2. præcedentem definitionem non esse legitimam, quia non conuenit omni definito, nempe corruptioni, quæ non est in potentia ad formam acquirendam, sed deperdendam: quia etiam ipsamet definitio potest conuenire actionibus inmanentibus, nempe intellectioni, & volitioni, quæ non sunt motus. sunt tamen actus entis in potentia. Resp. prædictam

definitionem conuenire corruptioni, quæ tendit in formam deperdendam; quando enim diximus de motu, *quod sit actus entis in potentia*, hoc debet intelligi, non tantum de potentia ad acquirendum, sed etiam de potentia ad deperdendum; alias Philosophus ipse non responderet corruptionem inter species motus. Adde quod nunquam fiat de perditio formæ per corruptionem, quin alia acquiratur per generationem succedentem corruptioni; quandoqui dem *corruptio unius est generatio alterius*. Quantum ad *actus immanentes*, illi non sunt propriè *motus*, nec illis præcedens definitio competit, quia quando Aristoteles de motu dicit, *quod sit actus entis in potentia*, hoc intelligit de actu corporis naturalis; tales autem actus immanentes non sunt propriè producti à corpore, sed ab anima. Quàm verò ad *actiones immanentes corporeas*, ut sunt visio, auditio, & similes: sicut possunt dici impropriè motus, nempe intentionales: sic etiam prædicta definitio potest illis impropriè applicari; licet propriè tantum conueniat motui reali & physico, ut in annotatione prædiximus.

Quæres, an motus sit quid absolutum aut relatiuum. Primùm affirmant aliqui, existimantes motum esse de genere quantitatis; quæ est prædicamentum absolutum: Scotus verò in 2. dist. 14. quæst. 2. cum Parisiensibus & multis alijs docet motum esse ens relatiuum. Motus enim non est ad se, sed ad aliud, quoniam est via & tendentia ad formam aliquam de nouo acquirendam. Deinde motus ex definitione sua dicitur esse *actus entis in potentia*, ut in potentia est; sed actus seu actio est entitas relatiua extrinsecus adueniens: ergo motus & relatio. Tandem motus non est mouens, quia mouens est causa motus à quo distinguitur; Nec etiam est mobile, quia mobile est subiectum motus; nec etiam fluxus formæ, cum fluxus includat successionem quam dicemus postea non esse de intrinseca ratione motus: ergo superest quod motus dicatur esse relatio extrinsecus adueniens mobilis ad mouens. Quod si in logica dixerimus, motum esse speciem quantitatis continuæ successivæ, quæ quantitas est genus absolutum, hoc verum est de motu sumpto materialiter, pro forma acquisita vel acquirenda, per motum quæ reuera pertinet ad quantitatem, falsum verò de motu formaliter accepto, qui nihil aliud est quam relatio extrinsecus adueniens mobilis ad mouens.

QVÆSTIO II.

Quotuplex sit Motus.

DVobus modis Aristoteles accipit motum, nimirum genericè, & specificè. Sumit motum genericè prout abstrahit à mutatione instantanea & successiva, & hoc modo in *Logica cap. de postpradic.* admittit sex species *motus*, quarum duæ sunt ad substantiam, nempe generatio & corruptio; duæ ad quantitatem, nempe accretio & diminutio; una ad qualitatem, scilicet alteratio; & altera ad ubi; quæ vocatur latio, seu loci mutatio. Sumit verò specificè motum, quando illum accipit pro motu successiuo duntaxat: & de illo sic usurpato loquens Aristoteles 5. *phys. cap. 1.* negat generationem esse *motum*: quod idem videtur sentire Scotus ad hunc locum, & in 2. *dist. 12. quæst. 1.* Propter hanc diuersam acceptionem motus, aliqui philosophorum volunt successionem esse de essentia motus; quia scilicet accipiunt motum specificè, eo modo, quo illum explicuit Arist. 5. *phys. cap. 5.* Scotus verò & alij motum sumentes genericà & communem acceptionem, prout illum tradit Philosophus in postpradic. docens motum abstrahere à successiuo & instantaneo; sicut genus abstrahit à speciebus. Quantum ad *diminutionem motus*, potest desumi vel à terminis ad quos tendunt motus, vel ab alijs circumstantijs intrinsecis vel extrinsecis, quæ motus comitantur; de quibus postea.

CONCLUSIO PRIMA.

SI sumatur *motus* in sua significatione genericà, in qua accepit eum Arist. in *postpradic.* dici debet quòd *motus secundum terminos*, debeat dividi in *motum ad substantiam*, in *motum ad Quantitatem*, ad *Qualitatem*, & ad *Ubi*. Si verò sumatur motus secundum strictam & specificam explicationem, pro motu successiuo duntaxat; tunc *motus penes terminos dividitur solum in motum apud Quantitatem*, ad *Qualitatem*, & ad *Ubi*. Et hic est communior modus Recentiorum, qui dicunt ad substantiam non dari motum, sed mutationem duntaxat, cum generatio & corruptio potius

debeant dici mutationes, quàm motus: sed hæc contestatio est plus de nomine, quàm de rebus.

Motus ad quantitatem est ille per quem acquiritur vel deperditur aliqua quantitas, vnde duplex est motus ad quantitatem, nempe accretio, seu augmentatio & decretio siue diminutio. *Accretio* est motus à minori quantitate ad maiorem, vt cùm virgula sit arbor. *Decretio* est motus à maiori quantitate ad minorem, quæ manifestè apparet in senibus, qui continuò decreſcunt. *Motus ad qualitatem* est ille quo acquiritur vel deperditur aliqua qualitas, vt cùm aqua de calida fit calidior, aut de non calida euadit calida: & iste motus vocatur *alteratio*. *Motus ad ubi* ille est, quo acquiritur nouus locus, & vocatur *motus localis* seu *ubicatio*, vt cùm aliquis transit de aula in ortum: & hæ sunt quatuor communes species *motus successiui*, quibus si addantur duo priores, qui sunt motus instantanei, nempe *generatio* & *corruptio*, tunc erunt sex illi motus, quos commemorat Aristoteles *cap. de postpradic.* Si autem duo vltimi terminantur ad substantiam, quia generatio est transitus, seu motus à priuatione formæ substantialis ad ipsam formam substantialem, vbi corruptio est motus à forma ad priuationem formæ substantialis.

CONCLUSIO SECVNDA.

PRæter diuisionem illam trimembrem, quam philosophi faciunt communiter de motu, quem distinguunt essentialiter in *motum ad quantitatem*, in *motum ad qualitatem*, & in *motum ad ubi*, hæ sequentes possunt adijci, in Naturalem, Violentum, & Medium. In motum Simplicem & Compositum. In Rectum & Reflexum. In Velocem & Tardum. In Regularem & Irregularem. In Instantaneum & Successiuum. Et in similes, qui in transcurso habentur apud philosophos. *Motus Naturalis* est ille qui proficiscitur ab interno principio mobilis, & qui est secundum naturalem illius inclinationem: sic motu naturali lapis cadit deorsum. *Motus violentus* ille est qui emanat à principio extrinseco, & est contra inclinationem mobilis, sic motu violento de puteo extrahitur aqua, & lapis mouetur sursum. *Motus Medius* ille censetur, qui partim est naturalis, & partim violentus, vt si quis la-
pi-

pidem deorsum proijceret : talis enim motus partim esset naturalis lapidi , quatenus tenderet deorsum , & partim esset violentus , in quantum exiret ab impetu impresso . Hanc diuisionem motus iudicat Doctor noster in 2. dist. 2. quæst. 3.

Motus simplex est ille qui fit à simplici virtute mobilis , vt quando lapis mouetur deorsum à seipso . *Motus compositus* ille est qui fit à pluribus virtutibus mouendi ; vt cum auis descendit per aera : tunc enim motus ille fit partim à ponderositate auis , & partim ab impetu alatum ipsius auis descendentis . Si etiam lapis de Alto proijceretur in inum , talis motus diceretur pariter compositus .

Motus rectus & reflexus in hoc distinguuntur quòd si pila v. g. in parietem proiliceretur , tunc esset motus rectus quando autem pila reflectens , contra parietem reuertitur ad locum vnde fuit egressa , tunc est motus reflexus . *Motus velox* est ille qui spatium suum percurrit tempore breuiori : *tardus* vero ille est qui prolixiori tempore spatium conficit . *Regularis* est ille qui semper eandem velocitatem retinet . *Irregularis* autem seu inæqualis est ille qui velocior est in vna sui parte quàm in altera .

Motus violentus , de quo antea dictum est , quatuor species habet , quæ sunt Pulsio , Tractio , Vectio , & Volutatio ; quas species motus localis violenti assignat Philosophus 7. Phys. tex. 16. *Pulsio* est quando mouens aliquid à se , vel ab alio , propellit : vt si quis a se lapidem proiliceret . *Tractio* è contra est quando mouens aliquid ad se trahit , vt quando stomachus de ore ad se trahit alimentum , vel magnes ferrum . *Vectio* est quando aliquid vehitur cum alio cui coniungitur : vt quando aliquis in curru vehit aliud . *Volutatio* est cum mouens agit mobile in gyrum , vt quando quis mouet rotam .

Præcedentes diuisiones conueniunt præcisè motui successiuo , sequens verò quæ distinguitur motus in *instantaneum & successiuum* , intelligi debet de motu sumpto genericè , prout conuenit instantaneo & successiuo , quæ sunt species motus in se . Eorum enim quæ acquirunt aliquam formam , & transeunt à potentia ad actum , aliqua id consequuntur in *instanti* , vt cum aer illuminatur , oculus recipit speciem obiecti , forma substantialis acquiritur per generationem , vel deper-

ditur per corruptionem ; quia hæc omnia fiunt in momento , ideò dicuntur motus *instantanei* . Alia verò ducuntur in formam *paulatim* & *successivè* , quando scilicet lignum paulatim calefit, puer successivè crescit, & viator per partes temporis ad terminum peregrinationis pervenit; tunc motus isti *successivi* dicuntur .

Si *quærat*ur autem *quanam* harum divisionum motus sint *intrinseca* aut *extrinseca* . Responderi debet quòd illi motus sint essentialiter differentes , quorum quilibet terminus *ad quem* distinguitur essentialiter ab alio termino *ad quem* . Quia motus formaliter est relatio ut prædictum est ; *relatio* autem *specificatur à termino* : ergo motus illi distinguuntur essentialiter , qui habent terminum *ad quem* essentialiter distinctum . Ob hoc illi qui sumunt motum in generali acceptione , prout instantaneum & successivum complectitur , dividunt motum in *motum ad substantiam* , qui generationem & corruptionem continet ; in *motum ad quantitatem* , qui duplex est ; *accretio* scilicet & *decretio* ; in *motum ad qualitatem* , qui est *alteratio* , seu *acquisitio* aut *perditio qualitat*is , & in *motum ad ubi* , per quem aliquis transeundo ab vno loco in alium , novam acquirit præsentiam localem . Illi autem qui motum accipiunt *specificè* pro solo motu successivo , qui est sensibilior & apparentior , dividunt motum tantummodo in tria membra . Nempè in motum ad *Quantitatem* , *Qualitatem* , & ad *Vbi* ; dicentes generationem & corruptionem , quæ terminantur ad substantiam ; non esse propriè motus : quia fiunt in *instanti* , non verò *successivè* , quod tamen dicunt requiri ad essentiam motus , cuius contrarium habetur in quæstione sequenti .

Q V Æ S T I O III.

An successio sit de essentia Motus .

HOc contendit Raconius . Alij dicunt successionem non esse quidem de essentia motus sed esse propriam illius passionem . Alij fatentur quidem successionem non esse de essentia , nec proprietatem motus in genere , quia generatio , corruptio & illuminatio aeris , quæ sunt motus , fiunt in *instanti* : sed contendunt motum localem in specie esse essentialiter successivum . Scotus autem in 2. dist. 2. quæst. 9. Conim

bricenses, Toletus, Suares, & alij plurimi negant successionem esse de essentia, aut proprietatem motus. Quantum verò ad *motum localem* in particulari Doctor noster in 3. *dist.* 2. *quæst.* 3. cum Parisiensibus, & Conimbricensibus, & multis, negat successionem esse de essentia illius; affirmantque motum localem posse diuinitus effici in *instanti*: quidquid reclamet Raconius cum D. Thoma in 4. *dist.* 44. *quæst.* 2. *art.* 3. & 6. *phys.* ubi contendit repugnare, quòd corpus moueatur localiter in *instanti*.

CONCLUSIO.

Successio non est de essentia motus, nec illius proprietas, ut haberi potest de Scoto præcitato. Illud enim non est de essentia aut proprietate subiecti: sine quo subiectum esse potest; sed motus potest esse sine successione, cum Aristoteles 3. *phys.* *text.* 6. probet generationem, quæ fit in instanti, esse motum: ergo successio non est de essentia nec proprietas motus. Deinde Deus in *instanti* potest calefacere aquam: sed illa calefactio erit motus essentialiter, quoniam Deus patrandum miracula non tollit essentias & naturas à rebus, sed eas integras & illæsas conseruat: ergo potest effici motus in *instanti*, & proinde successio non est de essentia aut propria passio motus. Tandem virtute D. potest separari prius à posteriori, modò illud ab illo non dependeat essentialiter, ut videri potest de accidente, quod potest diuinitus separari à substantia; sed motus præcedit successionem, nec vlla est dependentia inter successionem & motum; cum motus in genere præseindat ab instantaneo & successiuo: ergo si interueniat diuina virtus, motus poterit esse sine successione.

Confirmatur nostra conclusio specialiter pro motu locali, quòd scilicet possit fieri in instanti per potentiam diuinam; ut docet Scotus in 3. *dist.* 2. *quæst.* 3. Philosophus enim 8. *phys.* *text.* 78. ait quòd si virtus in finita foret in magnitudine, moueret in non tempore, seu in *instanti*: & sic motus localis instantaneus non repugnat. Deinde idèò motus localis non fit in *instanti* quia vel datur resistentia contrarij, vel virtus mouens est finita, vel spatium per quod fit motus, debet successiuè transiri, cum sit diuisibile, sed virtuti D. nihil resistere potest, nec ipsa limites aut finitatem agnoscere

ergo ex hoc duplici capite motus effectus à Deo non erit *successivus*. Si enim ubi fortior est virtus, ubi motus sit velocior, motus effectus à Deo debebit fieri in *instanti*, cum potentia agendi in Deo sit infinita; unde 1. ad Cor. 15. de resurrectione mortuorum dicitur quod fiet *in momento, in ictu oculi*. Licet etiam spatium sit diuisibile, non minùs Angeli aut animæ separatæ possent localiter moueri de terra in cælum; vti docet Doctor in 2. dist. 2. *quæst.* 10. Non quidem transeundo per medium diuisibile, & deferendo vnam partem medij post aliam: quia hoc successionem argueret: sed, vt loquitur Scotus, *inpertransito medio*; ita quod in eodem instanti mobile illud esset in termino à quo & in termino ad quem; vti proportionem quadam seruata docet fides de adorando corpore Christi, quod in *instanti* adducitur è cælo in hostiam consecratam post prolationem verborum.

Obijcies 1. rationem ex Aristotele assumptam non probare conclusionem, quia generatio non tam est motus, quàm mutatio, quæ licet possit fieri in instanti, non tamen probat quod motus possit esse instantaneus; cum ipsemet Aristoteles 5. *phys. cap.* 1. rejiciat generationem à motu, propterea quod non sit successiua. Resp. nos iam antea dixisse generationem esse vnam ex sex speciebus motuum, quas enumerat philosophus in postprædicamentis, quod etiam confirmat 3. *phys. tex.* 6. vbi definitionem motus illustrat per exempla generationis, quæ est motus *instantaneus*, & alterationis, quæ est motus *successivus*; ex quo manifestè apparet, quod Philosophus admittat generationem pro motu *instantaneo*. Quod si dicat generationem esse mutationem, non opponit mutationem motui, sed per hoc vult distinguere generationem, quæ fit in instanti: à motu successiuo; licet mutatio & motus, seu generatio & alteratio conueniant in ratione generica motus communis, qui diuiditur in motum instantaneum & successiuum, tanquam in suas species. Quod autem generatio sit verè motus ex hoc colligitur, quod sit *actus entis in potentia*, seu transitus à non esse *substantiali ad esse substantiale*; in quo consistit ratio propria motus.

Obijcies 2. motus nihil est aliud quàm fluxus seu tendentia à termino à quo ad terminum ad quem, sed fluxus ille est acquisitio partis post partem, quæ successiua

siua est : ergo successio est de essentia motus . *Resp.* concedendo maioren, quia reuerà motus dicit essentialiter fluxum & tendentiam à termino à quo ad terminum ad quem . Sed negatur minor , quòd fluxus ille dicat essentialiter acquisitionem formæ *successiuam* & per partes ; talis enim fluxus seu transitus *abstrahit* à fluxu instantaneo & successiuo , tanquam genus à speciebus : & sic sicuti datur motus successiuus, qui est sensibilior & conformior principiis naturæ, de quo frequentius agunt philosophi ; sic etiam datur motus instantaneus , vt generatio , corruptio , illuminatio aeris , receptio specierum in potentiis , & sic de similibus : proindeque motus vt sic , & genericè acceptus, non inuoluit essentialiter successionem . Quòd si motus ab Aristotele dicatur species quantitatis continuæ successiuæ , ibi loquitur de forma per motum acquisita, quæ continua & successiuæ est . Si dicatur etiam quod tempus mensuret motum , qui proinde debet esse successiuus, vt sit *proportio inter mensuram & mensuratum* : Responderi debet quòd tempus mensuret motum *successiuum* , non verò motum in se .

Obiicies 3. quòd motus localis non possit fieri in instanti, quia ille motus supponit distantiam inter terminū à quo & terminum ad quem ; sed illa distantia est diuisibilis : ergo non potest transiri nisi per durationem diuisibilem , quæ est tempus . *Resp.* obiectionem urgere tantum de motu locali , qui fieret transiendo per medium , tunc enim spatium diuisibile non potest percurri , nisi per durationem temporaneam & diuisibilem . Si autem fieret motus in instanti , non transiretur per medium ; sed ille mobile in eodem instanti esset in termino à quo & in termino ad quem : non verò partim in vno, partim in alio , & partim in medio ; quia hoc est proprium motui successiuo , qui fit per partes ; vnde Angelus & anima separata in eodem instanti possent esse in cælo & in terra , non quidem per sui mutationem , sed per suum *mutatum esse* , quandoquidem in eodem instanti desinerent in termino à quo per primum sui non esse , & essent in termino ad quem per primum sui esse .

QVÆSTIO IV.

Ad quæ prædicamenta detur Motus.

QVI distinguunt motum à mutatione, per *mutatio-*
nem intelligentes motum instantaneum, & per
motum indicantes motum illum in particulari, qui suc-
cessivus est, habent dicere quòd ad substantiam non
detur motus, licèt ad eam detur mutatio; quia nimi-
rum generatio & corruptio, quas vocant mutationes &
non motus, fiunt in instanti, quandoquidem forma
substantialis non introducit nec deperditur *successivè*.
Nos autem, qui non distinguimus motum à mutatio-
ne, & qui in mente Aristotelis admittimus generatio-
nem & corruptionem tanquam species motus, posse-
mus non immeritò dicere, quòd ad prædicamentum
substantiæ detur motus, cùm generatio & corruptio,
quæ ad substantiam pertinent, sint veræ & propriæ
species motus; quia tamen à philosophorum solito de-
viare ineptum videretur, & authores communiter cum
Arist. 5. *Phys. tex. 10.* & Scoto in 1. *dist. 3. quæst. 7.* re-
stringentes motum ad illum qui *successivus* est, asserunt
motum non dari; nisi ad quantitatem, qualitatem, &
ubi: ideo cum illis erit,

CONCLUSIO.

Motus datur duntaxat ad quantitatem, qualitatem, &
ubi, si hoc intelligitur de motu *successivo*: quia ut
pluries diximus, nil vetat dicere dari motum ad sub-
stantiam, si motus sumatur in sua ratione generica, pro-
ut abstrahit à motu *successivo* & *instantaneo*. Ad illa
enim prædicamenta datur motus *successivus*, in qui-
bus videntur mutationes temporaneæ, quæ acquirun-
tur per partes, sed ad tria tantùm præfata prædicamen-
ta dantur mutationes *successivæ*: ergo ad illa tantùm da-
tur motus *successivus*. *Primo* ad quantitatem datur mo-
tus *successivus*: cùm videamus corpora crescere & de-
crescere, accretio autem & decretio sunt motus perti-
nentes ad quantitatem: cùm hac distinctione, quòd ac-
cretio sit motus *positivus*, & decretio sit motus *negativus*.
Secundo ad qualitatem pariter datur motus *successivus*,
cùm aqua ex non calida fiat calida, & de calida calidior.

Ter-

Tertio denique, ad *Vbi* datur motus similiter *successiuus*, quando sensibilibiter aliquis transit de vno loco ad alium transeundo per medium loci.

Obiicies ad substantiam dari motum cum Aristoteles *cap. de postprad.* dicat generationem & corruptionem esse species motus. *Resp.* vt autea, dari motum reuerà ad substantiam; si motus sumatur in sua generica acceptione, vt esset communis instantaneo & successiuo: si verò motus sumatur *specificè* pro motu successiuo, tunc ad substantiam non dicitur dari motum; quia videlicet *generationes sunt in instanti*. Quod si Aristoteles doceat vnā generationem esse tardiorem alterā; hoc euenit per accidens, ratione scilicet dispositionum quæ *successiue* præparant materiam ad receptionem formæ substantialis, quæ introducit in instanti. Si quis dicat vltèrius *ad relationem dari motum*; hoc negari debet absolute, quia relationes non efficiuntur, sed resultant ad positionem fundamenti & termini.

Quæres in quo prædicamento resideat motus. *Resp.* quod si motus sumatur *materialiter* pro forma per ipsum acquisita, tunc reponatur in eodem prædicamento, in quo ponitur terminus illius; ita quod si motus terminetur ad quantitatem, aut ad qualitatem, aut ad vbi; tunc motus sit *talis prædicamenti*, vt docet Scotus *quodlib. 11. post Arist. 1. Phys. tex. 10.* Si autem motus sumatur *formaliter*, reponitur in prædicamento *passionis*, quia per motum patiens refertur ad agens; sed id quo patiens refertur ad agens est *passio*: ergo motus formaliter sumptus est de prædicamento passionis, quandoquidem secundum genus relationum fundatur super potentiam actiuam & passiuam, seu super actionem & passionem.

Q V Æ S T I O V.

A quo defumatur Vnitas Motus.

Explicatis existentia, definitione, partitione, & successione motus, de quo diximus in quæstiuncula præcedenti, quod *formaliter sumptus* pertineat ad *prædicamentum passionis*; nunc agendum venit de *unitate & distinctione* motus: quandoquidem vnitas & distinctio sunt proprietates entis, quæ sequuntur illius essentialias, Entium autem naturalium alia sunt propter se, vt

substantiæ omnes, quæ specificantur à se ipsis intrinsecè, seu à sua forma, vt homo ab anima, & lapis à forma substantiali lapidis: alia verò ordinantur ad aliud, à quo suam specificationem desumunt; Vt potentiæ ab obiectis, & relationes à terminis. Cùm autem constet motum ordinari ad aliud, quandoquidem dicit tendentiam ad terminum acquirendum; ideo necesse est, vt specificetur & distinctionem desumat, non quidem intrinsecè à se ipso, sed à terminis quos respicit, vnde vnitas & distinctio motus generica vel specifica, vel numerica, debet sumi ab extrinseco.

CONCLUSIO PRIMA.

Vnitatis generica & specifica motus petitur à termino ad quem. Sic Aristoteles 5. Phys. cap. 4. tex. 31. cui subscribit Scotus in 1. dist. 13. quæst. vn. Motus enim ab eo habet vnitatem genericam & specificam, à quo habet esse, quandoquidem vnitas sequitur ens, vt propria passio; sed motus habet esse à termino ad quem, cùm motus sit tendentia ad terminum: ergo specificatio motus, seu illius vnitas aut distinctio repeti debet à termino ad quem. Deinde vnitas generica & specifica motus non desumitur à mouente, nec à medio, nec à termino à quo: ergo repeti debet à termino ad quem. Non repetitur, inquam, à mouente, quia plures concurrere possunt ad eundem motum, quando scilicet plures homines trahunt eundem currum. Non repetitur etiam à medio, quia medium se habet accidentalitè ad vnitatem aut distinctionem motus. Non repetitur denique à termino à quo, cùm idem terminus à quo possit esse respectu motuum contrariorum; color nimirum caruleus terminus à quo dealbationis & denigrationis. Et sic repeti debet vnitas & distinctio motus ab vnitatis & distinctione termini ad quem motus fertur. Tandem sicut scientia specificatur ab obiecto, sic motus à termino ad quem ordinatur, sed scientia ab obiecto capit suam denominationem, specificationem, & vnitatem: ergo motus suam distinctionem vel vnitatem desumit à termino.

Ob hoc duæ generationes habent vnitatem genericam, quia habent duos terminos substantiales eiusdem generis, in opinione illorum, qui dicunt dari motum ad substantiam. In opinione etiam communi, à qua

nos ipsi non dissentimus , augmentatio & diminutio sunt motus eiusdem generis ; quia habent pro termino *ad quem* quantitatem , ad quam tendunt . Alteratio vero , augmentatio , & latio , sunt diuersi generis ; quia termini ad quos tendunt sunt diuersi generis , nempe *Quantitas* , *Qualitas* , & *Vbi* . Ex aduerso illi motus habent unitatem specificam , qui habent terminos eiusdem species ; vt duæ dealbationes : è contra verò denigratio & dealbatio sunt diuersæ species , & eiusdem generis ; quia pro terminis habent albedinem & nigredinem , quæ differunt specie , & conueniunt genere .

Obijcies . Media pars montis potest terminare descensum lapidis qui moueretur à culmine ad medium illius , & eadem montis pars potest terminare assensum alterius lapidis , qui à radice montis ad superiorem illam partem projiceretur ; sed illi duo motus ascendens & descendens sunt diuersi specie , qui tamen habent eundem terminum ad quem : ergo falsum est dicere , quòd specificatio motus desumatur à termino *ad quem* . Resp. quòd media illa pars montis possit reuerà terminare diuersos specie motus ; sed per respectum ad tales motus illa pars montis , quæ enti tatiuè est eadem *numero* , formaliter tamen spectata sub ratione termini est diuersa : ratione scilicet diuersorum effectuum , quatenus nimirum motus diuersos terminat . Dices ; motus localis rectus & circularis , qui tendunt ad eundem locum , seu ad eundem terminum ad quem , differunt specie : & sic motus non sumunt præcisè suam unitatem aut distinctionem à termino *ad quem* . Resp. illos motus non differre essentialiter , sed tantum accidentariò ; cum curuitas & reatitudo sint differentie tantum accidentales linearum : vnde sicut homo albus & homo niger non differunt nisi accidentariò , sic nec motus rectus & circularis .

CONCLUSIO SECUNDA.

Vnitatis numerica motus sumitur ex triplici capite nimirum ex unitate subiecti , termini , & temporis : vnde vt motus sit idem *numero* , necesse est vt sit idem subiectum mobile , idem terminus *ad quem* moueatur , & quod absque interruptione vlla continuetur in eodem tempore : posito autem quòd varietur vnum ex his tribus,

bus, non remanet ampliùs idem *numero* motus . Ratio huius est quòd motus sit accidens tendens ad terminum, quod continuum esse debet; quandoquidem hic loquimur de motu *successivo*, qui cùm sit sensibilior, magis pertinet ad considerationem physicam: sed motus vt accidens, petit vnitatem subiecti, quia *omne accidens à subiecto indiuiduatur*: vt tendens ad terminum petit vnitatem termini, quoniam eadem via non ducit ad terminos diuersos; vt denique est aliquid continuum petit vnitatem temporis, cùm vnitatis continui saluatur per interruptionem, quandoquidem continuum diuisum non est ampliùs *unum*; vnde si aqua calefieret per vnum quadrans, & non calefieret in quadrante sequenti, postea verò reinciperet caleferi, non esset eadem *numero* calefactio, sed essent duæ, quoniam fierent in duobus temporibus discontinuis: ergo vnitatis triuni prædictorum requiritur ad vnitatem numericam motus.

Obijcies, variato subiecto, non variatur motus: ergo falsum est quòd motus sumat vnitatem numericam ab vnitatis subiecti, quandoquidem persenerabit idem motus, estò sit duplex mobile: vt videri potest in cane, qui præcipitatus ex alta turri in medio casus moreretur: tunc enim vsque ad medium turris caderet canis viuus, & de medio ad inum caderet canis mortuus, qui essent duo mobilia. *Resp.* in data hypotesi dici posse, quòd sit duplex motus, sicut duplex mobile; ita quòd à culmine turris ad medium sit descensus canis, & à medio turris vbi canis moritur vsque ad pedem, sit descensus cadaueris: sicut enim in illo casu cadauer succedit cani, sic motus & descensus cadaueris succedit motui & descensui canis. *Responderi* potest aliter quòd in casu supposito sit idem motus eiusdem corporis, quia est idem corpus quod descendit à cuspide ad pedem turris; licet non sit idem animal, quandoquidem initio motus cadebat animal viuum, & in fine cadit animal mortuum. Si quis instet dicendo motum illum non fuisse interruptum, & sic remansisse eundem *numero*: Responderi debet non fuisse interruptum interruptione temporis, bene autem interruptione subiecti, quod de viuo fuisset mortuum. Vltima præcedens solutio dari potest illis; qui obijciunt eundem arboris ramum, ex parte virentem & ex parte siccum, inoueri eodem motu: esse tamen duo mobilia: dicendo scilicet quòd sit idem *numero* ramus per respectum

Etum ad formam corporeitatis ; licet non sit idem per respectum ad vitam, quæ deest ab vna parte rami.

QVÆSTIO VI.

Quomodo distinguatur Motus à mouente , mobili , & termino ad quem .

IN motu sex notari debent : *Subiectum* scilicet seu *mobile* , quod moueri dicitur ; deinde *Forma* , quæ acquiritur per motum , & transit de non esse sui ad sui esse ; postea *transitus præcisè sumptus* ad ipsam formam ; quarto *Duratio* ipsius transitus , loquimur enim de motu *successiuo* , qui durat aliquantulum ; quinto notari potest *transitus* ille vt est ab agente cuius dicitur *actio* ; Sexto denique attendi potest ad eundem *transitum* , prout in *patientem* recipitur . Hæc omnia illustrantur per exemplum calefactionis, quæ est sensibilis motus . Aqua enim est *subiectum* quod mouetur . Calor est *forma* quam acquirit aqua & ad quam transit . Calefactio in se considerata præcisè est *transitus ad formam* . Tempus , quo Durante , aqua calefit , est *duratio motus* . Calefactio vt est ab igne est *transitus actionis* . Calefactio vt denique passiva , vt in aqua recipitur est veluti *passio* . Hic autem queritur singulariter de *mouente , mobili , & termino ad quem* , quomodo distinguantur a motu . Nominales nullam inter motum & hæc tria interponunt distinctionem ; Conimbricenses prædicta distinguunt a motu formaliter : Scotus verò docet illa distinguere realiter à motu .

CONCLUSIO.

Motus realiter distinguitur à mouente , à mobili , & termino ad quem . Sic Doctor noster in 2. dist. 1. quæst. 5. quod idem habet in 3. dist. 14. quæst. 1. Ratio primi est , quia causa efficiens realiter distinguitur à suo effectu , quoniam nihil potest esse causa sui ipsius ; sed mouens est causa quasi efficiens motus , cum motus exoritur à mouente : ergo motus realiter à mouente distinguitur . Deinde sicut agens potest esse sine actione & subiectum sine accidente , sic & mouens sine motu ; illa autem distinguuntur realiter , quæ separa-

taxistere possunt, ex Aristotele: ergo. Tandem relatio distinguitur realiter à fundamento, ut diximus in logica; sed motus est relatio mobilis ad mouens, & mouentis ad mobile: & proinde motus & mobile realiter distinguuntur. Ratio *secundi*, quòd motus distinguatur realiter à mobili, desumitur ex hoc, quòd motus sit in mobili tanquam in subiecto, cum motus definiatur ab Arist. 3. phys. tex. 9. *actus mobilis ut mobile est*; sed id quod est in subiecto realiter distinguitur à subiecto in quo residet, ut accidens à substantia, locatum à loco, & contentum à continente: ergo motus realiter distinguitur à mobili, quandoquidem mobile potest esse sine motu, & subiectum potest esse absque eò quòd moueatur actualiter.

Quantum ad tertiam partem conclusionis, quòd motus realiter differat à termino ad quem, colligi potest ex eo quòd motus tempore aliquo præcedit terminum ad quem, quoniam per illum hic successinè acquiritur, ut patet de motu locali, qui prius incipit, quam obtineatur locus; sed quod est tempore prius altero distinguitur ab illo realiter: ergo motus realiter diffidet à termino ad quem. Deinde terminus ad quem communiter est quid absolutum, nimirum substantia, quantitas, aut qualitas, sed absolutum realiter distinguitur à relatione: ergo motus distinguitur realiter à termino ad quem. Tandem, multa conueniunt motui, quæ non possunt conuenire termino ad quem, cum motus sit via ad terminum, sitque tardus aut velox; quæ non possunt competere termino: ergo realiter distinguitur motus à termino ad quem.

Obijcies philosophum dicentem 3. phys. cap. 1. motum coincidere cum rebus ad quas est, & sic non distinguì realiter à termino ad quem. Resp. per hoc intendere Aristotelem, quòd motus reponatur in eodem prædicamento, in quo reponitur illius terminus ad quem; ita quòd motus ad quantitatem sit de prædicamento quantitatis, & motus ad qualitatem de prædicamento qualitatis: hoc non impedit tamen quin inter se distinguantur realiter. Dices. Si motus distingueretur realiter à mobili, motus posset sine mobili existere, sed motus intelligi nequidem potest sine mobili, quandoquidem motus est alicuius mobilis motus; ergo motus & mobile non distinguuntur realiter. Resp. reuerà non posse intelligi motum sine mobili, pro.

propter essentialem dependentiam illius ab isto; quia tamen mobile potest esse sine motu, si nimirum quiesceret in suo centro, ideò motus, & mobile realiter distinguuntur.

Si queratur, qualiter à motu distinguantur *Actio*, & *Passio*. Respondebitur, actionem non distingui realiter à motu, & motum non esse differentem à passione susceptiva. Si enim accidentium distinctio colligatur ex differentia subiectorum, motus qui est in mobili distingui debet realiter ab actione, quæ agenti inhæret. Quantum verò ad passionem; motus sit relatio; sed secundum genus relationum fundetur in actione, & passione; ergo probabile est, motum non distingui à passione reipsa, cum non possit spectare ad actionem, ut prædictum est. Ad summum ergo, in hoc tantum distinguuntur passio, & motus, quod passio sit relatio extrinsecus adueniens passi adagens, & motus sit relatio extrinseca mobilis admouens.

Q V Æ S T I O VII.

*Quomodo distinguantur, & opponantur termini
Motus.*

IN omni motu duos dari terminos docet Aristoteles 3. *phys. cap.* & qui vocantur *terminus à quo*, & *terminus ad quem*. Cum enim motus sit transitus successivus ab uno ad aliud, in omni motu reperiri debent duo termini, quorum ille qui deseritur vocatur *terminus à quo*; ille verò qui acquiritur, dicitur *terminus ad quem*; qui est illorum principalior; cum ab eo specificetur motus, ut prædictum est in questione penultima. Uterque terminus diuiditur aliquando in positivum, & negativum. *Positivus à quo* est forma præcedens, quæ amittitur, & *positivus ad quem* est forma sequens, quæ acquiritur; ita quòd si aqua de frigida fiat calida, frigus sit terminus positivus à quo calefactionis, calor verò est terminus ad quem positivus. Sic etiam terminus ad quem positivus eiusdem calefactionis est calor acquisitus, & terminus ad quem negativus est carentia frigoris præexistentis.

CONCLUSIO.

NEdum termini motus distinguuntur realiter, sed etiam sibi inuicem opponuntur: Vt communiter pronuntiant Peripatetici. Quod termini motus distinguantur realiter, clarè colligitur ex mox dictis, quia scilicet motus est transitus ab uno termino ad alium; sed non potest fieri transitio, & tendentia vnius ad se ipsum, quia tendentia est relatio, & relatio dicit ordinem ad aliud; ergo ex definitione motus satis apparet, quod termini illius distinguantur realiter. Quod autem iidem termini sibi inuicem opponantur, saltem contrarietate impropria quæ in distantia, & in impossibilitate extremorum consistit, patebit euidenter omnibus illis, qui seriò considerabunt motus ad quantitatem, ad qualitatem, & ad vbi. Minor enim, & maior quantitas, quæ sunt termini motus ad quantitatem, opponuntur; calefactio, & frigefactio, quæ sunt motus ad qualitatem, opponuntur etiam; sicut, & duo loca, à quorum vno fit transitus localis ad alterum: licet enim talia loca entitatiuè considerata non habeant oppositionem, attamen si considerentur vt terminus à quo, & terminus ad quem motus localis, tunc sunt opposita, & impossibilia; cum vnum eorum non possit simul esse terminus à quo, & terminus ad quem.

Si obijciatur contra id quod diximus in omni motu reperiri duos terminos, à quo, & ad quem; hoc non esse verum absolutè: quandoquidem motus circularis cæli ab eodem termino egreditur, & regreditur ad eundem, vnde Philosophus 6. phys. dicit circularem motum cæli esse infinitum, seu finibus carentem. Resp. nos superius fuisse loquutos de motu recto, & finito, quem diximus habere duos terminos realiter distinctos. Quantum autem ad circularem motum cæli, termini illius distinguuntur tantummodo formaliter, quatenus nimirum eadem cæli pars intelligitur habere rationem termini à quo, prout ab illa incipit motus, & termini ad quem, prout motus redit ad eandem partem. Si obijciatur contra id quod diximus, terminum à quo deserui ut acquiratur terminus ad quem; hoc non esse vniuersaliter verum de omni motu, quandoquidem in motu augmentationis, qui est transitus à minori quantitate ad maiorem, deperditur aut abijcitur prima quan-

titas. *Resp.* ideò non dixisse quòd terminus à quo abijciatur, quia non remanet in eodem statu, in quo erat ante motum, licèt enim non abiiciatur minor illa quantitas, non tamen manet in simili statu in quo erat antea.

Si quaratur quodnam genus oppositionis sit inter terminos motus. *Resp.* illos non opponi relatiuè formaliter; quia ad relationem formaliter sumptam non datur motus, licèt *paruum*, & *magnum* materialiter considerata, sub ratione quantitatis, sint termini aliquorum motuum, nempe augmentationis, & diminutionis. *Resp.* 2. aliquando terminos motus deperditivos saltem opponi priuatiuè; vt patet de motu remissionis in qualitate, & diminutionis in quantitate, quæ priuant aliqua forma præhabita; licèt termini motus productiui non opponantur priuatiuè, quia priuatio est inter ens, & non ens, de non ente verò ad ens non datur motus, vt postea dicetur. *Resp.* 3. terminos motus non esse *contradictoriè* oppositos, propter rationem præcedentem, quia contradictio est inter ens, & non ens; sed non datur motus inter ens, & priuationem entis; sed datur tantum in mobili ordinato ad aliquam formam recipiendam; vnde dicit Aristoteles 1. *physa* text. 43. album non fieri ex non albo simpliciter, sed ex non albo quòd sit nigrum: & propter hanc rationem dicunt multi non dari motum in generatione, quia est transitus de non ente ad ens. *Resp.* 4. terminos motus aliquando opponi *contrariè*, cum scilicet sit de vna qualitate contraria ad aliam, nimirum de albedine ad nigredinem, quidquid sit de genere oppositionis interueniente inter terminos motus, semper constet, quòd inter eos sit in aliqua oppositio, seu incompatibilitas.

Quæres, ex occasione terminorum motus, an recessus à termino à quo, & accessus ad terminum ad quem, sint iidem numero motus; ita quòd quando aqua de frigida efficitur calida pariatur duplicem motum; quorum vnus sit defrigeratio, & alius calefactio dicatur. Ad hoc soluendum, prænotari debet quòd motus ille possit dupliciter considerari; ex parte nimirum *subiecti* quòd mutatur successiuè, & ex parte *forme* quæ acquiritur vel deperditur. Hoc posito, respondendum est quòd si motus ille calefactionis aquæ sumatur ex parte subiecti, tunc sit vnus, & idem motus, quia est idem numero
su.

subiectum quod motu non *interrupto* transmutatur de vna qualitate ad aliam : & sic cū etiam iidem sint termini à quo & terminus ad quem , proinde est vnus & idem numero motus . Quod confirmare videtur Aristoteles 5. *phys. cap. 5.* docens motum inter contraria , à frigido scilicet ad calidum , esse idem *re* : & sola *ratione* diuidi . Si verò motus ille calefactionis de aqua frigida in calidam consideretur ex parte formæ deperditæ & acquisitæ , tunc negari non potest quin sint duo motus ; cum sint duæ formæ , quarum vna deperditur , nempe frigus ; & alia acquiritur , videlicet calor .

Si hîc *quaratur* ulterius , quodnam sit subiectum motus *physici* , & quomodo motus & quies opponantur : Resp. ad primum , subiectum motus naturalis esse substantiam materialem , quia motus supponit quantitatem ; sed soli substantiæ materiali inest quantitas : ergo subiectum motus *physici* est substantia materialis . Quando igitur Angeli , & animæ rationales moventur localiter , hoc est tantum improprie : quatenus nimirum vnum locum deserunt vt alium acquirant : non verò dicuntur proprie moueri , & naturaliter ; quia motus *physicus* est successiuus , & per partes mobilis acquirendus , quod supponit quantitatem , cuius intelligentiæ sunt incapaces . Resp. ad secundum , motum & quietem opponi *pruatiuè* ; quies enim est permanentia subiecti mobilis sub termino à quo , vel in termino ad quem : vbi motus est transitus & tendentia actualis ab vno ad alium ; & sic quies opponitur motui *pruatiuè* , quandoquidem est priuatio seu carentia motus .

Quares an indiuisibile possit moueri localiter . Hæc quæstio non proponitur de indiuisibili substantiali , cuiusmodi sunt Angelus & anima rationalis ; constat enim illud indiuisibile posse moueri localiter . Non loquimur etiam de mobilitate indiuisibilis per accidens quatenus est coniunctum continuo , cuius copulat vel terminat partes : ad motum enim continui illud indiuisibile mouetur : cū moueatur punctum ad motum lineæ . Loquimur ergo de indiuisibili *præcisè sumpto* , quatenus intelligitur esse separatum à continuo ; & de illo quæritur an posset moueri per se localiter , si esset à continuo segregatum . Ad hanc quæstionem *negatiuè* respondent Conimbricenses , & *affir-*

affirmatiue cum Parisiensibus Doctor noster in 2. *dist.* 2. *quest.* 3. vbi docet indiuisibile quantitatis separatum à continuo posse moueri per se localiter. Quod enim mouetur per accidens potest per se moueri, vt patet de aqua, quæ quia mouetur per accidens ad motum vasis, posset per se moueri si separaretur à vase, tendendo scilicet in suum centrum; sed, moto continuo, mouetur per accidens (indiuisibile quantitatis: ergo posset per se moueri idem indiuisibile quantitatum, si existeret sepatum à continuo. *Deinde* si corpus perfectè sphæricum moueretur super planum, illud tangeret in puncto, quod dicit Aristoteles 1. *de Anima text.* 13. fieri posse, sed sicut corpus illud sphæricum moueretur localiter, sic tale punctum localiter etiam moueretur per se, etiam posito, quòd esset ab illo corpore diuisum, aliàs tunc esset immobile, quod est proprium Dei: ergo nil vetat quin indiuisibile quantitatis per se moueatur localiter.

Tandem potest Angelus existere in puncto, vt docet Scotus in 2. *dist.* 2. *quest.* 2. cum ipsis Conimbricensibus; sed in hac suppositione Angelus posset mouere illud punctum, & ipsum transferre de vno loco in alium: ergo indiuisibile quantitatis, quale est punctum, potest per se moueri localiter. *His addi potest* quòd indiuisibile quantitatis gravitatem aut leuitatem quamdam obtineat, tametsi exiguam; sed graue, & leue mouerentur localiter, & tenderent ad suum locum naturalem, si ab illo extraherentur: & proinde indiuisibilia quantitatis possent per se moueri localiter, si seiungerentur à continuo. Nec hanc rationem eludere potest Raconius, dicenstalem gravitatem aut leuitatem indiuisibilis non sufficere. vt punctum tendat deorsum vel sursum, quoniam *tendere deorsum* vel *sursum* est grauium, & leuium proprietas. Si ergo Philosophus 6. *Phys. cap.* 3 dicat indiuisibile non posse moueri per se; hoc dicit de indiuisibili existente in continuo, quod non potest moueri, nisi motu continuo, & diuisibili: sitamen quæsiisset aliquis à Philosopho, *an indiuisibile separatum potuisset moueri motu sibi proportionato*, sicut mouentur Angelus & anima; nulla videtur ratio cur hoc debuisset negare. cum nihil conuincat de immobilitate puncti, si foret à linea separatum. Quando etiam dicunt, id quod mouetur localiter, partim esse in termino à quo, & partim in termi-

no ad *quem*, quæ non possunt dici de indivisibili, nullas habente partes: hæc ratio urget tantum pro mobili & motu *divisibili* & continuo, non verò pro subiecto *indivisibili*: quod totum intelligitur esse in eodem instanti sub termino à *quo*, & in termino ad *quem*, ut diximus in *quest.* 3. ubi probatum est motum localem posse fieri in instanti.

QVÆSTIO VIII.

An quod movetur ab alio moveatur.

Effatum illud frequenter commendatum ab Aristotele pluribus in locis, & præsertim 7. *Phys. text.* 1. & 12. *Metaph. cap.* 8. *text.* 43. *quidquid movetur ab alio movetur*, non leue dissidium peperit inter Thomistas & Scotistas. Illi enim iuxta commentum Doctoris sui in præfata loca contendunt dictum Philosophi tam generaliter esse accipiendum, ut nihil omnino moveatur, quin motum recipiat ab alio. Nos verò cum Doctore Subtili 9. *Metaph. quest.* 14. & recentioribus plurimis tenemus propositionem Aristotelis esse tantummodo *indefinitam*, seu in aliquibus veram & in aliis falsam. Fatemur, inquam, omnem motum creaturæ esse ita dependentem à Deo, qui est primus omnium motor, ut reuera iure dicat Philosophus, *quidquid movetur ab alio movetur*. In confesso etiam habemus nullum posse dari genus, quod se moveat ad actum primum, seu quod sibi det existentiam; aliàs simul esset in potentia & in actu, quæ repugnant: proindeque hoc etiam sensu verè dicit Aristoteles, *quidquid movetur ab alio movetur*. Hoc non impedit tamen quin plura moveantur à seipsis, seu à sua forma, non quidem excludendo primum mouentem, qui est Deus; nec etiam dicendo, quòd aliquid possit se movere ad actum primum, sibi que dare existentiam; sed quòd agentium plurima habeant principium intrinsecum motus; ita quòd seipsa movere possent ad actus secundos, dependenter tamen à Deo: unde optimè docuit Scotus, hoc Aristotelicum axioma esse indefinitum, *quidquid movetur ab alio movetur*.

CONCLUSIO.

Non vniuersaliter verum est dicere, quod mouetur ab alio *mouetur*, vt docuit Scotus loco præcitato, & postea in 2. dist. 2. quæst. 10. Illa enim propositio non est vniuersalis, si aliqua moueantur à seipsis modo præ-explicato; sed animalia à seipsis mouentur, seu à propria forma & virtute sibi innata, vt expresse habetur 8. *Phys. text. 29.* ergo non est vniuersaliter verum, quod mouetur moueri ab alio. Deinde homo sponte se mouet & ad agendum se determinat, nedum producendo intellectiones & volitiones quæ sunt intentionales motus; sed etiam mouendo oculos, linguam, & reliquas corporis partes, in quibus extant motus physici & naturales: ergo quod mouetur non vniuersaliter mouetur ab alio. Tandem aqua calefacta, per quam propriam formam & innatam sibi virtutem se reducit ad natiuam frigiditatem; sed hoc est *se mouere à seipso*: ergo quod mouetur non mouetur ab alio. Nisi eo sensu, quo suum axioma proposuit Aristoteles, per illud indicans inter mouentia talem esse subordinationem, vt inferiora moueantur à superioribus, sublunaria à cælestibus, & omnia absolutè mouentur à Deo, qui *immotus manens dat cuncta moueri*. Nostra conclusio iterum confirmabitur in sequentibus, docendo graua & leuia moueri à seipsis.

Obiicies 1. Nihil potest simul agere & pati, quia esset simul in potentia & in actu; sed qui seipsum moueret esset in actu & ageret, & qui moueretur esset in potentia & pateretur: ergo nihil potest mouere seipsum. *Resp.* ad maiorem, nihil posse sub eodem respectu esse agens & patiens, aut in potentia simul & in actu, quia talia repugnantiam inuoluunt; hoc non impedit tamen quin vtrumque possit sub diuerso respectu accommodari eidem subiecto, quod diuersimodà dicetur agere & pati, & esse in potentia & in actu; vt patet de intellectu, qui est agens prout intelligit, & est patiens prout recipit intellectiōem: vnde idem intellectus est etiam in potentia & in actu respectu diuersorum; quatenus enim intelligit, est in actu; & prout recipit intellectiōem, est in potentia. Nil ergo vetat, si aliquid moueat seipsum, & si diuerso respectu sit simul agens & patiens, sicuti in potentia & in actu respe-

respectu diuersorum; quia repugnantia attenditur tantum, quando duo contradictoria enuntiantur de eodem sub eodem respectu, & eadem ratione considerato. Ob hoc multoties dicit Doctor noster idem esse in actu entitativo, quatenus scilicet existit, & in potentia subiectiua, prout agere, & se mouere potest.

Obijcies 2. Si aliquando verum esset dicere, *quod aliud se moueri posset*, non validè probaret Philosophus existentiam Dei ex motu creaturarum, quod tamen intendit facere; colligens existentiam primi motoris in eo quòd creaturæ se moueant, & non possint se mouere, nisi deueniantur ad existentiam primi motoris, qui immobilis manens alia vniuersaliter moueat. *Responsio* iam præcessit ad hoc argumentum. Fatemur enim ritè colligi existentiam primi motoris ex motione actuali creaturarum, quia essentialiter creaturæ ita subordinantur Deo quoad *esse*, & *operari*, vt sine illius concursu non possint existere aut agere; vnde in hoc sensu admisimus veritatem vniuersalem axiomatis allati. Posito tamen quòd Deus vniuersali concursu moueat creaturas, tunc creatura ipsa potest se mouere ex virtute sibi communicata, absque eo quòd ab alia moveatur. Ob hoc duplicem motum afferunt Philosophi, *intrinsecum* scilicet, qui fit à principio intrinseco, vt cum lapis propria virtute tendit deorsum: & *extrinsecum*, quod à principio extrinseco procedit; vt cum currus ab auriga ducitur, & cælum mouetur ab intelligentia. Si autem quædam agentia non mouerentur à seipsis, ineptè motum diuiderent Philosophi in intrinsecum, & extrinsecum.

Si *quærat*ur ergo ex occasione præcedentis questionis, *quanam sint causa motus*; Respondetur primò causam finalem proximam esse acquisitionem termini; quia motus est tendentia ad terminum: remotam verò esse perfectionem Vniuersi, quod ad sui conseruationem perpetuas exigit mutationes. *Resp. 2.* Causam formalem motus innotescere ex definitione illius; cum enim causa formalis rei sit ipsius essentia, & definitio sit explicatio rei per essentiam: proinde causa formalis motus patet ex eius definitione: In qua diximus motum esse actum entis in potentia, seu transitum ab vno termino ad alium. *Resp. 3.* Causam materiale motus, non quidem *ex qua*, cum solum compositum materiale habeat causam materiale *ex qua*, sed *in qua*,

qua, esse ipsum mobile: siue enim motus consideratur vt accidens, *mobile* est subiectum & materia in qua il lius; siue spectetur vt est relatio, *mobile* est illius fundamentum, quod vocari potest materia in qua. Resp. 4. Causam efficientem motus esse ipsum *mouens*, quod duplex dici potest; nempe *intrinsecum*, & *extrinsecum*, vt notauimus in fine obiectionis præcedentis.

Q V Æ S T I O IX.

An Graua & Leua moueantur à seipsis.

Præsentis quæstionis solutio præcedentem corroborabit conclusionem. Si enim probari possit vterius graua & leua moueri à seipsis, seu habere principium intrinsecum actiuum sui motus, confirmatum habebitur quod omne quod mouetur non moueatur ab alio. Cum D. Thomas præcitatus dixerit, *quasiutque mouentur moueri ab alio*, debet proinde negare quod graua & leua moueantur à seipsis: vnde 1. p. quæst. 18. art. 1. docet graua & leua per se moueri à generante, per accidens verò à re mouente prohibens. Scotus verò 9. Metaph. quæst. 14. in confirmationem eorum, quæ dixit in quæstione præcedenti, *omne motum non moueri ab alio*, ait, graua & leua moueri à seipsis.

C O N C L V S I O.

Graua & leua à seipsis mouentur: vt præcitatum est ex Scoto, Aristoteles enim 8. Physic. dicit graue & leue sic se habere ad suos motus naturales, sicut se habet *sciens* ad contemplationem, & *ignis* ad combustionem; sed *sciens* & *ignis* habent principium actiuum internum contemplationis & combustionis: ergo graue & leue participant principium intrinsecum sui motus naturalis, & sic graua & leua mouentur à seipsis. Deinde res in qua est causa sufficiens ad moueri, non indiget causa extrinseca ad sui motum; sed graua & leua habent in se causam sufficientem sui motus, ipsas scilicet grauitatem & leuitatem: ergo non mouentur ab extrinseco, sed à seipsis. Tandem si graue sursum detineatur & vincat virtutem impediētis nè

feratur deorsum, sublato obice, deorsum descendit; sed ille motus & talis descensus non fit à generante, quod supponitur absens: ergo efficitur ab ipso graui. Minorem confirmat Aristoteles 2. *Phys.* Vbi ait quòd omnis effectus actu causatus debeat habere actu causanti sui sibi coniunctam; sed lapis ille ex alio descendens non coniungitur actu cum generante: ergo quidquid reclamet D. Thomas, descensus grauium non est à generante, sed ab interna illius forma.

Obijcies Aristotelem 8. *Phys. cap. 2. text. 33.* dicere *grauia & leuia moueri à generante*; iuxta præcedentis quæstionis axioma, *quidquid mouetur ab alio mouetur.* Resp. grauia & leuia moueri à generante mediata & remota, à seipsis uero immediate & formaliter. Mouentur, inquam, remota à generante, quia generans communicat illis formam substantialem, grauitatem scilicet per quam mouentur; quando autem talem formam habent à generante, tunc grauia & leuia mouentur à seipsis, nempe à sua forma, quæ est principium intrinsecum motus: Vnde diximus, quòd licet mediata & remota grauia & leuia à generante moueantur, formaliter tamen & proximè mouentur à seipsis. Quantum ad axioma Philosophi cui nituntur Thomistæ; illud solum manet ex antecedentibus. Dices; si grauia & leuia mouerentur à seipsis mouerent se ut animalia; quod tamen negat Aristoteles 8. *Phys. text. 29.* dicens graue & leue non sic se mouere ut animalia: Respondet Scotus in 4. dist. 49. quæst. 14. motus grauium & leuium in hoc differre à motibus animantium, quòd animalia moueantur præuia cognitione saltem sensitiua obiecti: grauia autem & leuia insensitiuo pondere sibi tamen innato, prorumpunt in motus; & rectius dici debent moueri, quàm se mouere.

QVÆSTIO X.

An necessaria coniunctio requiratur mouentis cum mobili ut efficiatur Motus.

DVpliciter agens coniungi intelligitur cum passo, præsentia nimirum *suppositali*, seu *mathematica*, & præsentia *virtuali* & *physica*. Præsentia suppositalis est coniunctio substantiæ agentis cum patientis substantia, ut cum ignis in manum sibi appositam actionem suam

suam exerit : præsentia verò virtualis est coniunctio illa per quam agens , quamvis absens , diffundit suam virtutem per corpora intermedia , nec perueniat ad passum , sic sol calorem & influxum à se diffusum dicitur agere in visceribus terræ . Quia Scotus in 1. *reporr. dist. 37. quæst. 2.* dicit actionem dari in distans : ideo non desunt , qui imputent ei existimasse agens posse operari ubi non est præsens , nec *præsentia suppositi* , nec *præsentia virtutis* : si tamen attendatur ad ea quæ habet in 4. *dist. 14. quæst.* & in 2. *dist. 9. quæst. vn.* apertè videbitur nostrum Doctorem negare tantum , quòd necessarius sit contactus formaliter & mathematicus , ut agatur in passum ; sed sufficere contactum virtualem , quem physicum esse perhibet , quo agens per suam virtutem tangit aliud , ut sol terram per lumen suum . Ob hoc nos antea *cap. 3. de causa efficiētie quæst. 6. conclus. 3.* in finem diximus coniunctionem virtualem sufficere , ut agens producat suum effectum in passu ; cui assertioni præallegatæ conformiserit sequens

CONCLUSIO.

Non requiritur necessariò unio mathematica & suppositalis inter mouens & mobile , ut efficiatur motus , sed sufficit aliquando virtualis & physica unio , quæ semper requiritur . Hæc conclusio probata manet ex superius allegatis *cap. 3. de causa efficiente* . Quòd non requiratur contactus formalis , ex eo patet quòd sol agat in visceribus terræ , quibus suppositum solis non coniungitur . Quòd virtualis coniunctio sufficiat , eadem experientia conuincit , quoniam sol metalla & lapides pretiosos in præcordijs terræ generat , ubi sola virtus astri illius attingit . Quòd denique virtualis saltem coniunctio mouentis cum mobili necessariò requiratur , colligi potest ex eo quòd agens corporeum non possit agere ubi non est , vel secundum substantiam , vel secundum virtutem : ergo necessaria est coniunctio saltem virtualis mouentis cum mobili . Ob hoc Aristoteles 1. *meteor. cap. 2.* docet mundum hunc inferiorem contiguum esse superioribus corporibus , ut superna illa corpora ad nos vsque transmittant influxus suos per intermedia . Videantur ea quæ allata sunt præcitato capite , ubi obiectiones multæ solutionem suam habent.

Obijcies . Plura agentia videri agere in distans non agendo in propinquum : ergo mouens non debet necessario coniungi virtualiter cum mobili , quia si virtus extenderetur in distans , à fortiori extenderetur in propinquum , quod tamen falsum esse demonstrari videtur per exempla loco præcitato allegata ; quibus addi potest quod fundus lebetis sit tantum tepidus aqua ebulliente , & quod pomum charta inuolutum inter calidos cineres concoquatur , charta manente illaesa .

Resp. Solutiones haberi eodem loco , vbi proponuntur obiectiones . Quantum ad leberem , non ideo fundus illius tepidus manet . aqua efferuescente , quod ignis per illum non transmittat virtutem suam , sed quia calor dilatat poros ferri per quos egreditur calor , & pergit ad aquam , quæ maiori conatu obsistit , cum in ea non sint pori , per quos calor egredi valeat : & sic fundus lebetis manet tepidus . ebulliente aqua . Quantum ad pomum , non ideo charta illud inuoluens ab igne incombusta manet quod ignis non transmittat in eam actionem suam , sed quia comburi nequit , nisi prius exsiccetur : cum autem exsiccare non possit ratione humiditatis continuo decidentis è pomò , id circo de facili comburi non potest .

Q V Æ S T I O . XI.

A quo moueantur Proiecta.

Proiectorum nomine intelligi veniunt omnia corpora , quæ mouentur & pelluntur vi aliqua extrinseca & forensi , vt globuli expulsi bombardis , sagittæ arcu emissæ , rotæ manu circumactæ ; & quæcumque similiter à principio externo mouentur . De causa motus proiectorum tres fuerunt olim sententiæ , in quarum prima Plato valebat proiecta moueri per Anziperistasiun ; quam aliquando dicemus esse obsessionem debilioris & infirmioris corporis circumualati à potentiori obsidente : sed quia antiquata est talis opinio cuius meminit Aristoteles 8. *Phys. text.* 82. tumulo relinqui debet . Secunda quam amplectitur D. Thomas 3. de cælo ad *text.* 28. existimat motum proiectorum repetendum esse à medio , nempe à b aere ambiente proiectum ; ita quod ille qui lapidem vel alterum corpus simile contorquet priorem aerem commoneat , qui collisus

lisus concitat alium, & iste successiue alium, donec viribus deficientibus aer debilitatus alium non possit amplius propellere, & sic finem accipiat motus, & proiectum quiescat. Tertia tandem docet proiecta moueri à proiiciente per virtutem impressam ipsis proiectis; sic cum Conimbricensibus, Raconio, & alijs, Scotus in 4. dist. 6. quæst. 6.

CONCLUSIO.

Proiecta mouentur à proiiciente, tanquam à causa principali, & à virtute impressa, tanquam à minus principali; ita quod mouens imprimat mobili virtutem suam, qua deficiente, desinit motus proiecti. Ratio nostra ex hoc petitur quòd videamus proiecta actu moueri; sed non mouentur per antiperistasis, vt in confesso habetur apud omnes; nec per motum aeris pulsati à proiiciente: ergo superest, vt moueantur proiecta per virtutem illis à proiiciente impressam. Probatur talem motum non esse ab aere. Videmus enim globos tormentarios, qui mœnia & turres euertunt; sed incredibile est, quòd ille motus fiat ab aere impellente globum, cum aer sit corpus fluidum, leue, & rarum, quod non potest imprimere tantam virtutem in ipsis globis: ergo talis motus non est ab aere. Deinde si daretur aliquod vacuum, vtpotè si aer & omne corpus destrueretur ab hac aula, pilam posset quis mouere ab vna extremitate aulae ad aliam; sed ille motus pilæ non esset ab aere pellente, quem supponimus nullum ibi dari: ergo motus projectorum non est ab aere, sed à brachio proiiciente pilam, tanquam à causa principali, & à virtute impressa pilæ per brachium, tanquam minus principali à causa. Tandem nullo flante vento, si quis lapidem proiciat in aere, ille lapis proiectus mouetur, etiamsi aer immotus maneat: imò cymba contra rapiditatem fluminis ventumque aduersum procedit, vel liquet: sed dici non potest, quòd cymba moueatur per aerem, qui flat ex diuerso: ergo sustineri non potest, quòd proiecta moueantur à medio, seu ab aere, benè autem à virtute impressa proiicientis.

Obijcies. Si motus projectorum oriretur à virtute impressa; motus ille esset velocior in principio, quàm post initium, quia tunc virtus immediatè existens à proiiciente deberet esse impetuosior; sed motus pro-

iectorum tardior est in principio, ut optimè notunt instrumentorum bellicorum præfecti, quos videmus curare huiusmodi instrumenta in certa quadam distantia collocari, ut fortius mœnia excutiant: ergo motus talium proiectorum non est à virtute impressa, sed ab aere, cuius vna pars pellit aliam; & cum plures sint partes aeris concitati in medio, propterea motus est ibi velocior. *Resp.* Ex hoc posse tantum concludi, quod aer concitatus, & partes eius ad inuicem compulsa in medio, motum adiuuens & reddant citiorem; hoc non impedit tamen, quin principalius principium talis motus sit à qualitate impressa mobili per proijcientem: & hoc modo resolui debet Aristoteles dicens motum proiectorum attribui medio, nempe aeri, vel aquæ. Quod autem ab illa qualitate procedat motus proiectorum, ex rationibus præallegatis; quibus superaddi potest, quod quantò proijciens erit fortius, tantò citius mouebitur proiectum; per qualitatem scilicet, quam imprimit ipsi mobili, quæ ipsum determinat ad *moueri sursum*, vel *deorsum*, vel in *gyrum*, pro libito proijcientis.

Si quaratur autem ad quam speciem qualitatis reuocari debeat illa qualitas impressa mobili à proijciente. Respondebitur illam probabilius reuocandam esse ad primam speciem qualitatis, nempe ad dispositionem: quatenus scilicet à subiecto suo facilè mobilis est: illa autem qualitas oritur à proiecto seu à mobili à cuius potentia proijciens illam educit, ut moueatur proiectum. Talis qualitas dicitur conseruari in proiecto, per ipsam proiecti naturam, quæ ipsam aliquandiu retinet; & per virtutem proijcientis, cuius virtus, quantò fuerit maior, perfectius proiectum sibi subijcit, & illi diuturniorem imprimit qualitatem, secundum conditionem illius mobilis. Quando desinit eadem qualitas, talis desinitio non fit per contrarium; cum non habeat qualitatem sibi contrariam: nec ex defectu subiecti, cum mobile; quod est subiectum illius qualitatis, remaneat semper idem: sed desinit illa qualitas *positiue*, per medium resistens motui; & *negatiue*, per negationem concursus conseruatiui: Ut rectè notat doctissimus noster Frassenus.

Quæres; *quomodo omnia intelligantur incipere & desinere.* Cum nedum motus, sed etiam res omnes permanentes, qualescunque sint sub Deo, incipere & desinere

nere dicantur ; quatenus suæ durationis terminos actuales vel possibiles habent : ideo vniuersaliter querimus, quomodo omnia intelligantur incipere aut desinere. Quod vt intelligatur facilius. *Notandum* est duo esse genera rerum quæ incipiunt & desinunt ; quarum aliæ sunt transeuntēs & successiuæ, vt motus & tempus ; aliæ verò sunt permanentes, vt Angelus, homo, leo, calor, & similes, quæ suum esse totum simul possident : siue illud acquisiuerint successiuè & per partes, vt calor ; siue suum totum esse obtinuerint simul, vt homo, Angelus, materia prima, &c.

Notandum est secundò rerum permanentium aliquas accipere suum esse cum expulsiōe contrarij, seu cum expulsiōe formæ sibi contrariæ, vel disparatæ, cuiusmodi sunt formæ substantiales sublunarium, quarum vna non aduenit materiæ, nisi forma præcedens expellatur per contrarias dispositiones : alias verò acquirere suum esse sine expulsiōe contrarij, vt illuminatio aeris, productio Angeli, vel materiæ primæ creatio, quæ nullam requirunt dispositionem vt efficiantur.

Notandum est tertio rem aliquam incipere vel desinere duobus modis, *intrinsecè* nimirum, & *extrinsecè*, vt insinuat Scotus *quodlib. 12. arr. 1.* Vbi docet quòd res incipiat positiuè & *intrinsecè* per *primum instans sui esse* ; in quo verum est dicere, *nunc res est, qua immediatè antea non erat* : in tali enim momento positiuam & *intrinsecam* existentiam recipit. Res verò incipit negatiuè & *extrinsecè* per *ultimum instans sui non esse* ; quo momento verum erat dicere, *nunc res non est*, & immediatè post existerē incipit. Sic etiam res aliqua dupliciter desinit ex eodem Doctore nostro, positiuè videlicet, & negatiuè. Positiuè desinit esse per *ultimum instans sui esse*, in quo affirmatur, *nunc res est & immediatè post non erit* : negatiuè verò & *extrinsecè* desinit esse per *primum instans non esse sui*, in quo dici potest, *nunc res non est, qua immediatè antea erat*. His positis, iuxta diuersitatem entium, quæ incipiunt & desinunt, diuersimodè respondendum est, vnde pro permanentibus

Respondeo primò : res permanentes quæ simul & instanti producuntur, quales sunt Angeli, animæ rationales, & materia prima, incipiunt *intrinsecè* per *primum esse sui*, & desinunt eodem modo, *intrinsecè* nimirum & positiuè, per *ultimum esse sui*. Ratio primæ

est quia res incipit positiuè & intrinsecè per primum instans sui esse, in quo verum est dicere, *nunc res est quæ antea non erat*; sed pro eo instanti quo producuntur Angeli, anima rationalis, & materia prima, verum est dicere, *nunc existunt Angelus, anima, & materia prima*; ergo res permanentes, quæ *simul sunt esse* accipiunt, incipiunt intrinsecè per primum esse sui. Ratio secundi est, quia res desinit intrinsecè & negatiuè per vltimum instans sui esse, in quo verum est dicere, *res est & immediatè postea non erit*. Idem dici debet de indiuisibilibus quantitatis, de instantibus temporis, de *mutato esse* motus, de generatione præcisè sumpta & formaliter, de illuminatione, de receptione specierum in potentijs, & similibus, quæ cum habeant suum *esse simul*, quandoquidem est prorsus indiuisibile, proinde incipiunt intrinsecè per primum esse sui, & desinunt positiuè per vltimum sui esse, vt docet Scotus quodlib. 12. art. 3.

Respondeo 2. Res successiuas, cuiusmodi sunt tempus & motus, incipere & desinere tantummodò extrinsecè per primum scilicet sui non esse, & per vltimum sui esse; vt loquitur Doctor noster in 2. distr. 2. quæst. 9. Ratio huius est quod rerum successiuarum essentia saluari nequeat in instanti suæ inceptionis & desitionis earum, quandoquidem essentialiter consistunt in successione, & successio non potest saluari in aliquo instanti, cum successio exigit & prioritatem & posteritatem partium, sed instans non admittit prius & posterius, cum sit indiuisibile; ergo res successiuæ non incipiunt intrinsecè per primum sui esse, nec desinunt per vltimum sui esse: sed extrinsecè & negatiuè incipiunt per vltimum sui non esse, quo posito incipiunt existere; & desinunt per vltimum sui esse, quo dato existere cessant. Dicoes. Primum indiuisibile motus & temporis acquiritur in instanti, & vltimum indiuisibile vtriusque anittitur in instanti: ergo dici debet, quòd motus & tempus incipiant intrinsecè per primum sui esse, & desinant intrinsecè per vltimum sui esse. Resp. reuerà posse dici, quòd in instanti existat aliquid temporis & motus, quia reuerò existit aliquod indiuisibile, quod spectat ad tempus & ad motum, sed pro illo instanti non existunt tempus & motus, quia sunt quid successiuum, & illa indiuisibilia non sunt talia: ergo licet in instanti existat aliquid temporis & motus, non

tamen motus aut tempus censentur existere pro illo instanti, quandoquidem nihil adest successuum.

Respondeo 3. Idem dici debere de rebus permanentibus, quæ *successivè* acquirunt suas formas; quòd scilicet incipiant extrinsecè tantùm per *ultimum sui non esse*, & desinant similiter per *ultimum sui esse*. Cum enim calor, qui est qualitas continua, & successiva calefactione acquiratur, & quantitas per successivam, & diuisibilem accretionem, proinde in primo instanti, quo existit *primum indiuisibile* talium rerum, successivarum, dici nequit quòd existant res illæ ~~successivæ~~; quæ, cum sint diuisibiles, non possunt consistere in aliquo indiuisibili. Vnde dici remanet quòd res illæ *permanentes*, quæ acquirunt per partes suum esse, incipiant extrinsecè, & negativè per *ultimum sui non esse*, & desinant per *ultimum sui esse*. Ob hoc Philosophi dicunt esse quatuor instantia tam intrinseca quàm extrinseca inceptionis, & desitionis rerum. Primum instans intrinsecum inceptions, vocant *primum esse rei*; quia res, quæ toto tempore anteriori non fuerat, incipit existere. Instans desitionis intrinsecum, appellant *ultimum esse rei*, quia in tali momento res adhuc manet; sed illo elapso, toto sequenti tempore non existit. Instans inceptions extrinsecum vocatur *ultimum non esse rei*, eo quòd res in illo nondum sit; sed toto sequenti tempore sit futura. Instans denique desitionis extrinsecum dicitur *ultimum esse rei*, quia in illa res perseverat quidem, sed toto tempore sequenti non amplius existit.

Ex hac triplici responsione duo colliguntur breviter. Quòd scilicet Angelus, anima, materia prima, & res omnes permanentes, *positivè* incipiant per *primum sui esse*; quia in primo instanti quo aliquid eorum existit, censentur positivè existere, quoniam non habent partes: & sic quando aliquid eorum existit, tota illorum essentia existere censetur. Tempus verò, motus, & omnes formæ permanentes, quæ *successivè* acquirunt esse suum, *non censentur existere per primum sui esse*; quia quando existit *primum indiuisibile* temporis motus, aut cuiuscumque formæ per partes suum esse acquirentis, talia non dicuntur existere, quòd nihil eorum existat, nisi aliquod indiuisibile: ipsa autem sunt diuisibilia, & sic non existunt quando solum indiuisibile existit.

Quæres unde oriatur reflectio motus. Ne aliquid inexplicatum remaneat de ijs quæ motum concernunt, præcedentibus adijci debent aliqua de resilientia motus, & de illius acceleratione; quæ dici possunt motus proprietates. Circa *primum* experientia docet corpus motum, dum allidit alteri, resilire; ut videre est in pila, quæ allidens parieti non quiescit illicò, sed versus proijcientem reflectit cum aliquo impetu. Circa causam talis reflectionis, Carthesius dicit quòd paries non opponatur motui pilæ, nec impediat quòd ~~motum~~ *motus* absolute pila, bene autem impedit, quod progrediatur ulterius: unde, quia pila proiecta debet habere motum proportionatum virtuti proijcientis; cum non possit talis pila habere suum motum tramite recto, propter resistantiam parietis, tunc ipsa debeat suum motum proseguere tramite reflexo; & ex hoc resultat reflectio motus. Mariottus apud Gaudinum, agens de corporum repercussione, ait in corporibus innatam esse *vim elasticam*, qua suæ figuræ taliter sunt tenacia, ut cum ab ea dimota fuerint, in illam sese restituant, eo maiori impetu, quo fortior fuerit ille, quo dimota sunt à suo statu naturali; ut videre est in arcu, qui quantò violentius inflexus fuerit, validius sese eriget, si sibi fuerit permixtum: quod euidenter denotat, iuxta Mariottum, in corporibus singulis esse vim elasticam, quæ est causa repulsus ac reflectionis; quatenus scilicet in collisione duorum corporum partes utriusque, vel vnus saltem, violentè comprimantur, & sic redeundo in pristinam figuram, innata illa virtute elastica, sese ab inuicem repellunt, & produciunt novum motum, qui nihil aliud est, quàm reflectio & resilientia.

Communiter sententia docet eandem esse causam reflectionis per accidens, quæ ante fuerat causa per se motus recti; ita quòd proijciendo pilam in parietem producat per se motum rectum pilæ, & per accidens motum reflexum illius: unde quantò violentior fuerit impetus proijcientis, eò etiam fortior sit reflectio & resilientia illius, cum diminutione tamen aliqua ob resistantiam parietis, qui minuit aliqua in parte motum, & facit ut sit lentior. Quòd si dicatur eandem non posse dari causam motus impulsui & repulsui, nec proinde motum rectum & reflexum posse causari à proijciente, nulla in hoc apparet repugnantia, si sit causa per se vnus, & causa per accidens alterius, ut in proposito,

vbi

vbi proiciens causat per se motum rectum & impulsuum pilæ, qui per accidens degenerat in reflexum & repulsuum, propter occursum & resistantiam parietis. Hæc sententia mihi videtur probabilior, licet præcedentem non validè impugnet Gassendi, dicens non videri qualem depressionem possit efficere pila lanea parieti marmoreo, cui alliditur: licet enim in tali collisione partes marmoris non comprimantur per pilam, attamen partes pilæ comprimuntur ad occursum marmoris; quod denotat ipsas esse præditas *vi elastica*, quæ est causa, cur pila resiliat, vt partes eius se restituant in pristinum statum. Cum autem in mollibus & lentis corporibus nulla aut exigua sit virtus elastica, sic nulla aut parua reperitur in illis reflectio: vnde pila butyracea contra aliam non resiliret, licet partes vtriusque comprimerentur: quia nimirum destituuntur *vi elastica*, per quam inclinentur ad restitutionem suæ figuræ.

Quæres utrum in puncto reflexionis detur quies. Quoniam reflexio supponit duos motus, *rectum* videlicet & *reflexum*; ideo quadrupliciter potest ipsa intelligi, iuxta quatuor modos, quibus motus directus ad reflexum comparatur. Vterque enim vel est *naturalis*, vt patet de accretione & decretione viuientium, quarum illa est motus directus, & hæc motus reflexus dicitur. Vel vterque ex opposito est *violentus*, vt cum pila proiecta in parietem in altum resilit: vel motus directus est *naturalis*, reflexus verò *violentus*, quando pila proprio pondere cadit in lapidem, à quo repercutitur. Vel denique motus directus est *violentus*, & reflexus est *naturalis*, quando scilicet pila sursum mittitur, & postea proprio pondere in terram recidit. Quæstio præcedens specialiter intelligitur de motu *recto*, qui violentus est; an scilicet, cum pila proijcitur in parietem & contra proicientem reflectitur, in illo puncto reflexionis detur quies; ita quòd sit aliquod instans, in quo pila, dum tangit parietem, quiescat, nec moueatur motu recto aut reflexo.

Respon. posse intercipi quietem inter motum directum & reflexum, licet non semper detur talis quies. Primum probatur ex hoc, quòd si pila colorata proijciatur contra parietem, relinquat vestigium sui circa parietem, qui dealbatur; sed dealbatio, cùm sit alteratio, non potest fieri in instanti, quoniam debet esse successiua; ergo per tempus aliquod, licet

imperceptibile, quiescit pila contra parietem; proindeque in puncto reflectionis potest aliquando intercipi quies. Sine tali quiete globi tormentarij non possent castrorum mœnia euertere, nec urbium comburere ædificia, quandoquidem actio fieri nequit in instanti; & sic interdum datur quies inter motum rectum & reflexum. *Secundum* patet in sequenti suppositione. Si pila sursum proiecta occurrat molæ asinariæ descendenti à qua repercutiatur, tunc ille motus reflexus pilæ nullam admittit quietem; quia, si quiesceret pila dum tangit molam, mola etiam quiesceret, quandoquidem ea quæ se tangunt habent vltima simul seu extrema. Quando autem sic se tangunt, pila & mola, vel simul mouentur, vel simul quiescunt; sed ridiculum est dicere, molam asinariam manere suspensam in aere propter pilam sibi occurrentem; ergo necessarium est, quòd simul moueantur; proindeque non datur quies in illo puncto reflectionis, in quo pila tangit molam, aliàs pro illo tempore quietis mola non ferretur deorsum, non obstante suo immenso pondere.

Si uterque motus sit naturalis, potest in reflectione inter media dari quies. Inter accretionem enim & decretionem viuientium, qui sunt motus rectus & reflexus, admittitur status consistentiæ & quietis, in quo, nec augentur viuentia, nec minuantur. Similiter inter dilatationem & compressionem cordis reperitur quies, sicut & inter pulmonis aspirationem & respirationem. *Tandem*, progressio & regressio animalium sunt motus naturales, & inter vtrumque viuens potest quiescere, si scilicet non reuertatur in momento accessionis. Hoc tamen non impedit, quin aliquando non detur quies in puncto reflectionis motuum naturalium; cum possit quis se mouere localiter ad talem distantiam, & ab ea recedere nulla intercedente mora. *Quando motus rectus est violentus*, si ille fiat in vacuo, nulla intercipitur quies in puncto reflexionis. Lapis enim sursum proiectus tandiu mouebitur in altum, quandiu impulsus illi impressus præponderabit gravitati; eodem autem instanti, quo impetus ille dissipabitur per continuam remissionem, tunc idem lapis ad vnum decidet propter pondus innatum. *Si denique motus directus violentus fiat per spatium plenum*, probabile est, quòd in puncto reflexionis quies poterit intercipi; quando scilicet impulsus erit in eodem gradu, in quo

in quo se reperiet medij resistantia : talis enim vtriusque æqualitas poterit efficere quietem , & dari aliquod instans , imperceptibile tamen , in quo quiescet mobile, nec præponderabit resistantiæ medij super gravitatem eius , nec gravitas mobilis præualebit supra resistantiam medij. Idem dicendum est à fortiori, si verique motus sit violentus ; quod scilicet si pila proiecta resiliet in altum , tunc in puncto reflexionis daretur quies . Si possit enim dari , quando motus rectus est violentus , & reflexus naturalis , ob medij scilicet resistantiam ; debet à fortiori dari quies , quando medium resistit , & motus reflexus ad talem resistantiam sequens est violentus .

Quæres , unde repetatur velocitas & tarditas motus .
 Respondeo illam oriri ex triplici capite . primò ex *mouente* , quò enim validius vel debilius est mouens , eò velociorem , vel tardiozem efficit motum . Secundò ex *mobili* , quo enim ponderosius vel leuius est mobile , eò velocius vel tardius reuertitur ad centrum aut ad superiores partes euolat . Tertiò tandem ex *medio* , quò enim medium in quo fit motus est rarius vel densius, eò magis aut minus retardat motum . Cum autem experientia doceat motum esse celeriores in progressu & in fine quàm in principio , cùm lapis decedens , initio quidem segnius feratur , in progressu verò rapiatur celerius , tantoque validius percutiat , quanto cadit ex editiore loco ; super causam accelerationis motus varia est philosophorum opinio . Alij enim putant gravitatem mobilis roborari & crescere ex accessu ad centrum ; & sic tantò celerius lapidem moueri , quanto plus adpropinquat ad centrum , ut inquit Simplicius apud Gassendum . Alij docent terram vi quadam magnetica attrahere graua corpora ; vnde cùm illa magnetica virtus sit validior circa centrum , ideo validius & celerius trahit mobile in fine motus sui , quàm in principio vel in progressu . Alij denique volunt motum esse celeriores in fine , quia ibi minor est resistantia medij , nempe aeris , qui quanto est minor inter cadentem lapidem & terram, tantò celerius mouetur ipse lapis ; sed quò propius lapis cadens attingit terram , minor aer resistit illi ; ergo motus illius debet esse celerior in fine , quàm in principio, aut in progressu .

Verissimilior tamen sententia est hæc , quòd scilicet ideo velocior sit motus grauium in fine , quia vis loco-

motrix validius mouet corpus quod iam est in motu ,
quàm quod est in quiete . Nauta enim æquali conatu
utens, facilius cymbam iam emotam impellit , quàm
quietam . Rhedarii , dum graue corpus in loco difficili
vehunt , nihil magis cauent quàm ne motus interrump-
patur : quod aliunde non procedit , nisi quòd corpus
iam in motu existens facilius moueatur , quàm si esset
in quiete . Tandem si quis globum supra planum consti-
tutum repetitis , paribus tamen , ictibus vrgeat , mani-
festè sentiet velocius moueri globum ex secundo ictu ,
quàm ex primo ; & celerius ex tertio, quàm ex secundo,
sicque successiuè ; ita quòd in fine celerrimus erit motus
talis globi : quia scilicet res iam in motu facilius moue-
tur, quàm si esset adhuc in quiete. Germana autem huius
veritatis ratio , hæc afferri potest, quòd vis loco motrix
conatu continuo conferat aliquid ad motum; sed secun-
dus conatus , cùm iam reperiat motum esse productum
à primo , non potest illum producere , sed illum magis
vrget: & sic motus fit celerior per continuitatem , & la-
pis citius mouetur in fine motus , quàm in principio, aut
in progressu .

Idem dicendum est de aliis viribus loco motricibus ,
sicut de vi loco motrice grauium : quòd scilicet cele-
riorem motum causent in progressu quàm in principio,
nisi quid obstat : vnde inflexus ramus , dum se restituit
in pristinam rectitudinem, celerius mouetur in fine; sic
arcus & omnia elateria , de quibus supra diximus , re-
dendo ad statum illum à quo violentè dimota fue-
runt , sequius mouentur in principio : sic denique glo-
bus tormentarius celerius mouetur, in progressu, quàm
dum exitè sua machina ; vnde ad certam distantiam
ictum validorem edit : talis tamen acceleratio & va-
liditas motus subito desinit, quia vis loco motrix pau-
latim deficiens segnius vrget mobile. Si hic ex occasione
queratur , cur animalia citius moueantur in medio ,
quàm in principio , & fine motus . Responderi potest
quòd motus illorum sit tardior in principio , quia illo-
rum spiritus exercitatione calefaciendi nondum sint
diffusi in membra per nervos & musculos , qui sunt in-
strumenta motus ; in medio autem tales spiritus cale-
facti validius mouent : in fine verò lentescit motus ,
quia exhaustis spiritibus per agitationem continuam
debilitantur membra animalis ; & sic motus est debi-
lior.

Quares num detur primus motor. Quia Aristoteles in fine octavi physicorum loquitur de primo motore, cuius existentiam astruit *tex.* 56. Ideo hanc quaestionem proponere in eodem loco non negligunt philosophi. Respondemus ergo ad illam cum Scoto ad praedictum locum, dari unum motorem, qui nedum est immobilis & immutabilis, sed & spiritualis, omnipotens, & omnimode infinitus in quocumque genere perfectionis: ut amplissime diximus in Theologia, & dicitur inferius in Metaphysica: Quod detur primus motor, hanc veritatem probare contendit D. Thomas, ex communi axioma Philosophi 7. Phys. text. 1. *Quidquid movetur ab alio movetur*: ergo, inquit Doctor Angelicus, ne admittatur processus in infinitum, deveniendum est ad unum primum motorem, qui immotus manens omnia moueat. Hanc rationem esse validam contendit Scotus, cum plura seipsa moueant, ut graua & leuia, quae mouentur à seipsis; animalia, quae se mouent quocumque desiderant; & agentia libera quae pariter operantur & se mouent pro libito: sed de his sufficienter diximus *quest.* 8. *huiusce capituli*. Adde quod ex hoc axioma posset tantum inferri, quod omnia sublunaria mouerentur à primo caelo quod vocatur primum mobile, & ipsum caelum ab Angelo: quod tamen non probaret existentiam Dei, quem tenemus cum D. Thoma esse primum motorem.

Recurrendum est ergo ad alias rationes, quae haberi possunt ex *quest.* ult. cap. 1. tract. de Deo uno, ubi probauimus existentiam Dei posse demonstrari euidenter à posteriori per viam creaturarum; dicendo scilicet, *multa sunt producta quae continuo videmus generari, ut metalla, planta, animalia, &c.* Illa ergo omnia, vel sunt à seipsis producta, vel ab aliis producta fuere; primum est impossibile, cum nihil se producere possit, imò *quidquid producit ab alio semper producitur*, ex communi axioma, quod nullus Philosophorum vquam negauit: ergo remanet, ut ab alio producantur. Illud autem aliud, vel est à se, vel ab alio, non à se, ut diximus: ergo ab alio. Si ab alio illud tertium erit à quarto, quartum à quinto, & sic admittendus esset processus in infinitum, quod nullus vquam audebit admittere: vel deveniendum est ad aliquod primum ens quod erit omnium rerum causa, mouens, & principium, quod à nullo produceretur aut mouebitur: & sic

per

per viam creaturarum à posteriori demonstrari potest existentia primi motoris. Hunc autem esse prorsus immobilem innuit Aristoteles 8. *Phys. tex. 55.* cui subscribit Scotus in 1. *dist. 30. quest. 2.* conformiter ad S. Scripturam Malach. 3. *Ego Deus & non minor.* Cuius hæc ratio allegari potest, quod ens actualissimum & summè necessarium, nec moueri, nec mutari possit, quoniam mutatio supponit potentiam ad habendum id, quod antea subiectum non habebat. Cum ergo Deus sit ens actualissimum, summè necessarium, & perfectissimum vndequaque: ideo euidenter demonstratur ipsum nedum esse immutabilem, sed & omnimoda perfectione cumulativissimum.

SECTIO II.

De speciebus Motus in particulari.

IAM diximus multoties cum Aristotele *cap. de Post. Prædic.* sex esse species motus, quæ sunt Generatio, Corruptio, Augmentatio, Diminutio, Alteratio, & Motus Localis, de quibus nobis sigillatim, breuiter tamen, dicere conuenit. Verum quidem est, quod Peripateticorum ille Princeps non loquatur hîc de illis motibus, quorum explicationem reseruat post quatuor libros de cælo & mundo, in alijs scilicet duobus libris, qui vocantur de Generatione & Corruptione, quia illorum subiectum formale & adæquatum in mente Scoti statuitur corpus generabile & corruptibile. Quia tamen omnia quæ concernunt naturam motus non sufficienter cognoscerentur, nisi pariter ipsius specierum daretur intelligentia; ideo non incongruum duximus agere hîc de illis motibus, quos in præfatis duobus libris de Generatione & Corruptione tradit Philosophus: hoc autem fiet breui & tenui stylo, ut celerius attingatur finis nostræ Physicæ, quàm fortè nimium protraximus in iis, quæ huc vsque dicta sunt, & quæ complectuntur octo libros Physicorum.

QVÆSTIO PRIMA.

*Quid dicendum sit de Generatione , &
Corruptione .*

Generatio sumitur tribus modis. *Primò* nimirum latè, pro cuiuscumque entis productione, siue sit substantia, siue sit accidens, & hoc modo Aristoteles 3. *Phys. text. 7.* de Generatione sic sumpta dicit, quòd sit *mutatio de non subiecto in subiectum*: sicque de non homine generaretur homo, & de non albo generaretur album. *Secundò* strictè, pro sola productione viuentium, & taliter accepta generatio describitur *productio uiuentis à uiuente principio uitæ coniuncto in similitudinem naturæ*: hoc modo Adam non potest dici à Deo genitus, sed factus simpliciter; quia non est productus in similitudinem naturæ diuinæ. *Tertiò* tandem desinitur generatio medio quodam modo, pro sola productione substantiæ, siue id quod generatur sit viuens, siue non viuens, & tunc Aristoteles 1. *de Generat. text. 23.* loquens dicit quòd generatio sit *mutatio totius in totum*, nullo sensibili subiecto remanente. De generatione priori modo accepta loqui non intendimus, sub ea enim continentur creatio, & productio accidentium, quæ latioris considerationis sunt; nec etiam de generatione tertio modo accepta, quia ageremus tantum de viuentibus, & tunc strictior esset nostra explicatio; vnde nobis agendum venit de generatione accepta medio illo modo, qui omnem, & solam productionem substantialem complectitur. De generatione autem sic considerata dicemus decem, an detur generatio substantialis; quid sit generatio; quotuplex sit generatio; quomodo explicanda sit generatio viuentium; generationem fieri in instanti; ipsam non consistere in productione formæ, sed in unitiue illius; duplicem esse terminum generationis, qui, & quo: idem esse dicendum de corruptione, sicuti de generatione; quomodo intelligi debeat, generationem unius esse corruptionem alterius: compositum viuens in corruptione non resolui usque ad materiam primam, bene autem compositum simplex unicapraditum formæ. Hæc, inquam, videbuntur in hac vnica quæstione.

Dico primò cum Academicis, & Peripateticis, dari genera-
nera-

nerationem substantialem; contra Democritum, Empedoclem, Anaxagoram, & alios, qui omnem generationem substantialem negabant. Cum enim verissimum esse putarent hoc axioma, *ex nihilo nihil fit*, ideo volebant res omnes actu producere ab æterno, solumque moueri: per congregationem, vel per separationem; proindeque repudiabant generationes substantiales. Academici verò cum Platone, & Peripatetici cum Aristotele, generationem substantialem apertè sustinent; quibus subscribit Doctor noster in 1. dist. 31. *quæst.* 6. quem præiit August. 3. *contra Maximinum* dicens; homo generat hominem, & canis canem; quæ generationes sunt substantiales. Ratio eorum, & nostra est, quòd agentia naturalia producant sibi simile, quoniam est Arist. 2. *Phys. text.* 26. Ignis gignit ignem, & homo hominem; sed talis productio est generatio substantialis, cum per eam producatur compositum, quod est substantia completa: ergo repudiari non potest substantialis generatio. Deinde accidens generat accidens, ut calor calorem; sed substantia non est minoris efficacis, quàm accidens: ergo potest producere substantiam. Ob hoc Philosophi admittunt tria principia generationis, materiam, formam, & priuationem; quorum priora saltem sunt substantia. Tandem eadem species perpetuatur continuo, ut videmus; sed talis perpetuatio speciei non efficitur nisi per generationem substantialem multorum indiuiduorum, cum videamus granum frumenti corrumpi, ex eo corrupto procedere spicam, & ex spica multa grana eiusdem frumenti oriri: ergo concedi debet generatio substantialis. Non quod fiat talis generatio ex non ente simpliciter: *ex nihilo enim nihil fit*; sed quòd fiat ex ente in potentia ad formam aliquam, quæ ex subiecto educitur virtute agentis naturalis, quod propterea dicitur producere compositum substantiale.

Dico 2. cum Arist. 1. *de Generat. text.* 23. quòd *generatio sit mutatio totius in totum, nullo sensibili remanente subiecto eodem*. Dicitur primò *mutatio*, & est genus definitionis, in quo generatio ipsa conuenit cum aliis mutationibus, nempe cum creatione, alteratione & similibus; quæ mutationem innoluunt. Subiectum autem illius mutationis, seu res quæ mutatur, est materia, quæ transit à forma. Dicitur 2. *mutatio totius in totum*, id est totius compositi à quo fit transitus, ad aliud

aliud compositum quod de nouo producitur : quando enim generatur equus, semen equi generantis transmutatur in equum genitum. Per hanc ergo particulam, seu per *mutationem totius*, non debet intelligi corruptio materię, & fornix, quandoquidem eadem materia quę erat in corrupto manet adhuc in genito : sed per hoc designatur, quod vnum compositum, quod est quid totale, transeat in aliud compositum, quod est etiam quid totale : vnde iure dicitur, quod generatio sit mutatio totius in totum. Dicitur 3. *Nullo subiecto sensibili remanente*, & in hoc distinguitur generatio ab alteratione, in qua idem subiectum remanet sub diuersis accidentibus, eadem scilicet aqua sub frigore, & calore ; in generatione verò, licet eadem materia remaneat sub genito, & corrupto, licet etiam aliqua accidentia sensibilia remaneant sub termino vtroque, quandoquidem eadem materia affecta iisdem accidentibus superest, quia tamen idem compositum non est subiectum talium accidentium, sed aliud diuersum à primo quod de nouo productum est ; in generatione dicitur, quod nullum subiectum sensibile remaneat. *Si dicatur* quod præcedens definitio non sit legitima, cum non conueniat omni generationi ; quandoquidem aptari non potest ad Verbum D. quod generatur, non mutatur tamen vlllo modo. *Resp.* in hoc debere censerì validam, quod conueniat omni generationi physicę, & naturali.

Dico 3. *generationem diuidi in Creatam, & in Increatam, in Totalem, & partialem, in generationem viuientium, & non viuientium, in vniuocam, & Equiuocam, & in similes* ; quę de facili in transcurso Authorum cognosci possunt. *Generatio vita expertium* est productio compositi substantialis inanimati ab alio composito eiusdem speciei elicitā, vtpote productio ignis ab igne. *Generatio viuientium* tribus modis accipitur, latissimè nimirum, latè, & strictè. *Generatio viuientium* latissimè est *productio viuentis ab alio simpliciter*, siue sit viuens, vel non viuens ; eiusdem naturę vel dissimilis : & sic productio insectarum facta ex patris materia, vel ex virtute animalium dicitur generatio viuentis ; sicut, & productio Adami aut Euz ex limo & ex costā. *Generatio viuientium lata*, est productio viuentis à viuente sibi simili ; vnde communiter describitur origo viuentis à viuente principio vita coniuncto in similitudinem naturę. *Generatio viuientium strictissima,*

finia, est *productio viuentis intellectuālis ab intellectuāli viuente*, & hæc competit Verbi D. quod dicitur *verè & propriè genitum*, quatenus est ens intellectuāle viuens, productum ab intelligente etiam viuente, nimirum à Patre Æterno, qui Verbum suum produciens iure dicitur sibi *generare filium*, quia illum producit sibi similem, nedum in natura specifica, vti faciunt homines; sed etiam in natura singularissima, quandoquidem *Pater generans* est idem numero Deus cum *genito filio*; non enim illi communicat partem decidam suæ substantiæ, sed & totam suam naturam indiuisam prorsus numero.

Dico 4. pro explicatione præcedentis generationis viuentium, de qua diximus, quod sit *origo viuentis à viuente principio vitæ coniuncto in similitudinem naturæ*; quod talis definitio quatuor particulas contineat, quæ sic explicari debent. Primò dicitur *origo viuentis*: quia natiuitas pertinet tantum ad viuentia. Dicitur 2. *à principio viuente*, & per hanc particulam animalia quæ producuntur ab igne, vel à sole, vel ab aliis causis vitæ expertibus, non dicuntur propriè *generari*; vt ranæ & vermes. Dicitur 3. *à principio vitæ coniuncto*; id est, per aliquid, quod antea fuerit generanti coniunctum, vt potè per semen à generante decidens, & ob hoc productio Adami à Deo non fuit propria generatio, quia licet fuerit facta à Deo viuente, non tamen ortum habuit Adamus per substantiæ D. communicationem: sic etiam supposito, quod per dæmones incubos aut succubos animal aliquod oriretur; quod non crederem posse fieri, cum difficile intelligatur vim generatiuam posse conseruari in semine separato; tunc illa productio talis animalis non esset vera generatio: quia non fieret per decisionem substantiæ dæmonis, nec per aliquid quod antea fuisset dæmoni coniunctum. Dicitur 4. quod generatio sit *in similitudinem naturæ*; siue illa similitudo sit specifica; vt cum equus ab equo produciatur, & homo ab homine; vel saltem generica, qualis est generatio muli ab equa, & asino: quam tamen alii dicunt non esse generationem propriam, ex defectu similitudinis specificæ. Si in tertiam particulam dicatur quod gallina incubatu suo generet pullos, quibus non communicat partem suæ substantiæ; & sic videri falsum, quod generatio fiat à principio viuente coniuncto: Respondendum est gallinam, quæ educit pul-

pullos ex ouis sibi alienis, non esse illorum causam principalem, sed tantum instrumentalem, per suum calorem videlicet; aues verò illæ, quæ produserunt oua censerì debent talium pullorum causæ principales: vnde sæpius pulli referunt similitudinem auium quæ oua produserunt.

Dico 5. generationem non esse successiuam, sed instantaneam: vt docet Scotus in 2. dist. 2. quæst. 9. & alij communiter Scotistæ docentes contra quosdam in hoc distingui alterationem à generatione; quòd alteratio sit successiua, & generatio fiat in instanti. Ratio nostra sumitur ex Arist. 5. phy. tex. 9. vbi dicit substantiam non esse motum, qui successiuus est; sed generationis terminus est substantia, quia est transitus à non esse substantiali ad esse substantiale: ergo generatio est instantanea. Deinde generatio est permanens, & tota habetur simul, ergo non est successiua. Tandem si generatio non esset instantanea, eadem numero materia informaretur pluribus formis, & vnum indiuiduum participaret diuersas species, essetque multiplex & diuersum, cum in eodam tempore esset sub forma aquæ & ignis; sed hoc dicere absurdum est: ergo melius est, quòd dicatur generationem fieri in instanti, & in vno momento destrui formam ligni, cui succedit inmediate forma ignis. Adde quòd eodem modo ratiocinari debeamus de generatione, sicuti de illuminatione, sed illuminatio fit in instanti, ex Scoto 5. met. cap. 7. ergo generatio. Quòd si Aristotele in postpradic. & 3. phys. cap. 2. tex. 6. collocat generationem inter species motus, qui est quid successiuum; & dicat id quod mutatur mutari in tempore: In his locis & similibus loquitur Philosophus de generatione extensiuè sumpta, prout inuoluit dispositiones ad illam, quæ successiuè fiunt. Si ulterius dicatur actionem instantaneam soli Deo competere; vnde Scotus in 2. dist. 1. quæst. 2. dicit omnem creaturam agere in tempore. Hoc verum est de actione instantanea independente à subiecto, vti est creatio; falsum verò de actione instantanea, quæ à materia dependet, qualis est generatio, quæ dependenter à materia fit in instanti. Si adhuc quis instet, dicendo omnem generationem non dependere à materia; cum ex speciebus Eucharisticis generentur vermes, & nulla sub illis sit materia. Responderi debet tunc vermes non fieri ex speciebus, aut ex nihilo; sed

ex materia, quam Deus de nouo creat ad corruptionem specterum.

Dico 6. generationem formaliter non consistere in actione productiua forma, sed in actione unitiua illius cum materia. Quod generatio non consistat in actione productiua forma, ex eo patet quod possit forma longè produci antequam vniatur materiæ, attamen tunc non dætur facta generatio; si v. gr. anima rationalis crearetur antequam fierent corpora, ut aliquando voluit Origines. Quod autem generatio sita sit in unitiue forma cum materia, colligi debet ex veritate præcedenti. In generatione enim duæ tantùm interueniunt actiones, productio scilicet formæ, & unitio illius: sed generatio non consistit præcisè in productione formæ, ut dictum est; ergo consistit in unitiue formæ cum materia, ita quod pro eodem momento, quo formæ producta vel educta de potentia subiecti coniungitur materiæ, eo ipso generatio compositi efficiatur. Cum autem forma vniatur materiæ in instanti, hæc noua ratio confirmat præcedentem veritatem, quod scilicet generatio fiat in instanti per se; licet per accidens possit aliquando vñiri successiue, ratione scilicet diuersarum subiecti partium, quarum aliæ disponuntur ante alias, & proinde recipiunt, formam cum ordine aliquo. Si dicatur generationem non consistere in unitiue formæ cum materia, quandoquidem pater dicitur generare filium, qui tamen non est in vulua matris, ubi vnitur anima cum corpore. Resp. patrem esse in vtero matris, non quidem supposititaliter, sed virtualiter; quatenus nimirum semen à patre transfusum continet potentiam generandi fœtum, & vniendi animam tum corpore: Non quod producat actionem, quæ attingat per se unitiue animæ, quæ spiritalis est, ubi virtus formatrix in semine existens est materialis, & corporea; sed quod producat fœtum ad vltimam dispositionem, qua posita, Deus animam rationalem transfundit.

Dico 7. duplicem esse terminum generationis, nempe terminum quo, & terminum qui. Terminus quo generationis ille est qui terminat generationem; non quod ipse sit genitus, sed quia est id per quod genitum constituitur. Terminus qui est ille qui terminat generationem, & dicitur simpliciter generari Exemplum vtriusque termini afferri potest de homine, cuius si considerare.

deretur anima, ea dici debet terminus *quo* generationis humanæ; quia scilicet in hoc dicitur terminare generationem, quod sit id per quod perfectè constituitur homo genitus. Terminus autem *qui* eiusdem generationis humanæ est ipsemet homo, qui propriè principaliter, & ultimatè dicitur *genitus*, & adæquatè generationem terminare. Ob hoc ultimatè dicit Doctor noster in 1. dist. 3. *quest.* 6. terminum *quo* generationis esse formam physicam, terminum verò *qui* & totalem esse ipsum substantiale compositum, ex materia, & forma coalescens. Ratio *primi* est hæc, quod ille sit terminus *quo*, & formalis generationis, quo mediante constituitur compositum, estque principium illius distinctivum ab omni alio; sed forma physica est principium constitutivum, & distinctivum compositi physici: ergo est terminus *quo*, & formalis generationis physice. Ratio *secundi* est ista, quod illud debeat *cenferi* terminus *qui*, & totalis generationis, quo posito, intelligitur completa generatio; sed existente composito, existit generatio perfecta: ergo terminus *qui*, & totalis generationis est substantiale compositum ex materia, & forma resultans. Si dicitur formam non esse terminum generationis, quia ipsa non generatur; ut inquit Aristoteles. Resp. non dici terminum generationis, quasi ipsa generetur; sed quia est id per quod constituitur compositum, quod ultimatè dicitur generari. Hæc nostra assertio est contra Hurtadum dicentem terminum esse unionem materiæ, & formæ. Est etiam contra Complutenses, qui *disp.* 2. *quest.* 3. docent terminum *qui*, & ultimum generationis esse suppositum; unde volunt generationem primò terminari ad formam, tanquam ad terminum *quo*; deinde ad naturam physicam, tanquam ad terminum, *qui* non ultimum; ac denique ad suppositum, tanquam ad terminum *qui* ultimum. Hoc autem rejcit Scotus in 2. dist. 2. *quest.* 3. & in 3. dist. 4. *quest.* vii. cuius ratio est quod Beata Virgo verè, & propriè dicta sit genuisse Christum, cuius tamen suppositum non generavit.

Dico 8. de corruptione eodem modo loquendum esse, sicut antea diximus de generatione; cum Aristoteles 1. top. cap. 14. dica *oppositorum eandem esse sententiam*. Sicut ergo prædictum est dari generationem, & hanc substantialem; sic admitti debet substantialis

Corruptio : quando quidem videmus communiter interitus animalium & cæterarum rerum naturalium perniciosam . Sicut etiam generatio est mutatio totius in totum , nullo subiecto sensibili remanente eodem ; sic etiam corruptio est mutatio substantialis per quam trans fit ab esse totius substantialis ad non esse eiusdem , non remanente subiecto ; licet remaneat materia , quæ est vna pars subiecti : quæque remanet eadem sub utroque termino . Tandem , sicut generatio diuiditur in generationem viuentium & vitæ expertium , ita per corruptionem desinunt viuentia , quando vita priuantur ; & per eandem destruuntur ea quæ vita carent , vt lapides & metalla per ignem . Generatio & corruptio in hoc conueniunt , quod vtraque sit secundum formam substantialem ; in hoc verò distinguuntur quod generatio sit transitus à non esse substantiali ad esse substantiale , vbi corruptio est transitus ab esse substantiali ad non esse substantiale . Generatio & corruptio sunt quidem duæ mutationes , quia habent terminos diuersos ; cum illa terminetur ad formam substantialem de nouo acquisitam , ista verò terminetur ad priuationem veteris formæ quæ deperditur : probabilius tamen est duas illas mutationes fieri vniua actione , cum per eandem actionem noua forma producat , & excludatur vetus ; sicut eadem actione producuntur cineres , & consumitur lignum , iuxta vulgatum axioma , *generatio vnius est corruptio alterius* . Generatio est quidem naturalis , quia intenditur per se à natura , tanquam bonum vniuersi ; corruptio autem non est naturalis , nisi per accidens , non verò per se : natura enim aliter illam intendit , nisi quia necessaria est ad productionem alterius formæ .

Dico 9. hoc axioma commune , quod tradit Aristoteles 1. de generat. cap. 3. tex. 17. *generatio vnius est corruptio alterius* , non potest intelligi formaliter , aut identicè , sed illatinè tantum & concomitanter . Non debet , inquam , illa solemnis propositio intelligi formaliter , quia falsum est , quod generatio sit corruptio , vt patet per definitionem vtriusque . Non debet etiam sumi identicè , quia propositio identica est tantum inter terminos , qui sunt in eodem subiecto , vt inter albedinem & dulcedinem , quæ vniuntur in lacte ; sed generatio & corruptio non possunt residere in eodem sub-

subiecto, cum opponantur, & opposita sese inuicem oppugnent: ergo superest, vt commune illud pronuntiatur, *generatio vnius est corruptio alterius*, intelligatur illatiuè & concomitanter: quatenus compositum de nouo non producit, nisi corrumpatur præcedens. Vt enim agens producat aliquid, necesse est quòd priorem expellat formam à materia, & nouam introducat in illam, quoniam duæ formæ non possunt eandem numero materiam informare simul, sed expellendo formam fit corruptio, & introducendo aliam fit generatio; ergo concomitanter & illatiuè generatio vnius est corruptio alterius. *Si quis dicat* quando animal nutritur, corrumpitur alimentum; sed ad hanc corruptionem nulla sequitur generatio: ergo non potest dici consecutiuè, quòd corruptio vnius sit generatio alterius. *Resp.* distinguendo minorem, ad corruptionem alimenti non sequitur generatio; completa & perfecta alterius animalis, concedo: incompleta & imperfecta, nego: quando enim alimentum corrumpitur per vim digestiuam caloris natiuì, tunc ex alimento gignitur sanguis, & ex sanguine caro. *Si dicatur ulterius*, ad corruptionem specierum sacramentalium generari vermes, nullam tamen substantiam præcedere. *Resp.* in tali casu vermes generari, non ex substantia corrupta, sed ex noua, quam Deus miraculosè producit ad corruptionem specierum.

Dico 10. ad celeberrimam questionem, quam iam antea leuiter attigimus *sect. 3. de composito naturali*, an in corruptione compositi fiat resolutio vsque ad materiam primam; *Alensem, Albertum, & Thomistas*, velle, quòd in omni corruptione resolutio fiat vsque ad materiam primam. Scotus verò in *4. dist. 11. quest. 3.* agnoscens duo genera compositorum, quorum illa habent plures formas substantiales, vt viuentia quælibet, in quibus reperitur forma corporeitatis, & forma viuentis; ista verò vnicam formam substantialem sortiuntur, vt elementa, quæ ab hoc corpora dicuntur simplicia, docet in illis resolutionem non fieri vsque ad materiam primam, benè autem in istis. Prima pars probatur, quòd non fiat resolutio vsque ad materiam primam, quando corrumpitur corpus, quòd habet plures formas substantiales, ita quòd si corrumpereetur forma viuentis in planta, ipsa non resolveretur vsque ad materiam primam, sed remaneret adhuc sub forma corpo-

ris: sic etiam si occideretur homo, & separaretur ab illo anima rationalis, tunc remaneret forma corporis, quæ eadem numero esset, qualis erat ante occisionem. Ratio, inquam, conclusionis est hæc, quòd resolutio non fiat usque ad materiam primam, si aliqua remanent in ingenito, quæ antea fuerant in corrupto, sed in corruptione viventium aliqua supersunt in ingenito eorum quæ præexisterant in corrupto: ergo *in habentibus plures formas non fit resolutio usque ad materiam primam*. Minor negari non potest, cum forma corporeitatis & formæ accidentales remaneant in materia, postquam forma viventis desit; videmus enim idem numero corpus, easdem cicatrices, eandem quantitatem, figuram, & similia accidentia, quæ prius fuerant in vivente.

Nec mihi arridet vlllo modo responsio D. Thomæ lib. 1. de generat. lect. 10. Dicentis in corpore mortuo non esse eadem numero sed specie accidentia, quæ erant in viuo. Frustra enim natura talem accidentium congeriem destrueret, quam illicò deberet restituere. Deinde non parùm minuerentur religio & pietas, si hoc verum foret, cur enim tam deuotè deoscularentur Christiani & venerarentur martyris defuncti vulnera, si non esset eadem numero martyris quantitas & cicatrix. Tandem in triduo mortis Christi corpus illius erat idem quod natum est ex Virgine, pependit in cruce, & resurrexit: ergo remansit in illo eadem coarceuatio accidentium, sicut & eadem numero forma corporeitatis. Adde quòd non appareat à quonam contrario destrui possent vetera accidentia, nimirum cicatrices, oculorum figura, sanguinis fluiditas, & ossium durities in homine mortuo, nullumque possit afferri agens, per quod similis naturæ accidentia produci queant. Omne enim accidens producit à causa efficiente; sed ensis, aqua, aut ignis, quæ sunt sæpissimè causa mortis, non possunt producere accidentia illa, quæ in cadauere videmus, quandoquidem gladius non potest producere, fluiditatem in sanguine, calorem in visceribus, aut pallorem in facie: ergo accidentia quæ in cadauere videntur, eadem erant numero in vivente, quoniam non producantur de nouo: & sic in corruptione viventium non fit resolutio usque ad materiam primam.

Quoad secundam partem, in corruptione scilicet
cor-

poris simplicis fieri resolutionem usque ad materiam primam; hæc est communis opinio. Illud enim compositum, quod habet tantum unam numero materiam, & unam numero formam, in eam solummodo resolui potest; sed corpus simplex habet tantum unam numero materiam, & unam numero formam, ob hoc enim dicitur simplex: ergo quando corrumpitur forma substantialis, corruptum resolvitur in materiam primam, quæ sola est incorruptibilis. Deinde si post corruptionem corporis simplicis remaneret aliquid præter materiam primam, vel esset forma substantialis, vel forma accidentalis, quoniam inter utramque nil mediat; sed forma substantialis non remanet, quandoquidem corrupta supponitur; nec etiam forma accidentalis superest, quoniam accidentalis forma non subiektatur in materia, sed in composito, ut aliàs diximus: ergo in corruptione corporis simplicis fit resolutio usque ad materiam primam. Tandem hæc est mens Aristotelis 8. met. sicut & Doctoris nostri ad eundem locum, ubi uterque ait *corruptum usque ad materiam primam resolui*. Non quòd destructa forma substantiali aquæ, materia illius maneat sine omni forma, ut diximus in fine *disp. 3. de composito naturali*, sed quòd eodem instanti, quo compositum aquæ destruitur, generetur compositum aeris, vel aliquod aliud, in quo recipiuntur postea formæ accidentales.

Si contra priorem partem assertionis obijciatur Aristoteles cap. de substantia dicens *destructis primis substantijs, nihil aliarum remanere*: ergo destructa forma substantiali, resolutionem fieri usque ad materiam primam in quibuscumque compositis. Resp. Philosophum non loqui de forma substantiali, sed de primis & singularibus substantijs, quæ si destruantur non possunt reuerà remanere secundæ; nos verò volumus quòd destructa forma substantiali, remaneat forma corporeitatis & accidentium in compositis plures formas habentibus. Si ex eodem Aristotele corruptio dicatur transmutatio totius in totum, nullo sensibili remanente; & proinde nullum accidens persistere in genito, quod antea fuerit in corrupto, consequenterque resolutionem fieri usque ad materiam primam etiam in viventibus. Resp. corruptionem esse reuerà transmutationem totius in totum, quia compositum de nouo genitum non est idem quod antea fuit corruptum, sed

diuersum ab illo; ante corruptionem enim illud compositum erat viuens, & post corruptionem est tantum corpus, quod amisit formam viuentis, hoc non impedit tamen, quin corrupta forma viuentis remaneat forma corporis; sed non est amplius idem compositum, quod erat antea. *Si dicatur ex eo sequi* quod compositum illud non esset *unum per se*, si in illo essent plures formæ, quarum vna destrueretur per corruptionem, & alia remaneret; quia scilicet talis secunda forma adueniret enti in actu, quod facit ens per accidens; *Resp.* negando consequentiam. Ex pluribus enim formis subordinatis non resultat ens per accidens, sed tantum ex formis disparatis & perfectis. *Si denique afferatur ex Aristotele*, quod corruptis nobis corrumpantur omnia quæ sunt in nobis: hoc verum foret, si totaliter destrueremur; in proposito autem non destruitur totaliter compositum, sed tantum vna forma compositi; & sic nil mirum, si dicamus aliam formam corporeitatis remanere, & proinde corpus, quod est compositum adhuc, in quo subiectantur accidentia.

Q V Æ S T I O II.

Quid dicendum sit de Augmentatione & Diminutione.

CVM motus in sua generica consideratione detur ad substantiam, quantitatem, qualitatem, & ubi, vnde Aristoteles in postprædic. & 3. phys. cap. 3. tex. 6. dicit sex esse species motuum, quorum duo primi pertinentes ad substantiam, sunt generatio & corruptio; duo sequentes sunt accretio & decretio, quæ pertinent ad quantitatem, quintus est alteratio ad qualitatem pertinens: & sextus est motus localis: qui respicit prædicamentum ubi: ideo postquam loquuti fuimus in antecedenti quæstione de motu generationis & corruptionis, nunc agendum venit de augmentatione & diminutione in præsentia, & de isto sequentes referentur assertiones.

Dico 1. quod augmentatio in communi nihil aliud sit, quam motus, seu mutatio à minori quantitate ad maiorem: sicut diminutio est mutatio à maiori quantitate ad minorem. Augmentationis nomen sumitur latissime, latè, & propriè. Augmentatio latissime sumpta im-

importat quemcumque motum accretionis, siue illud augmentum fiat in quantitate *virtutis*, siue efficiatur in quantitate *molis*. Augmentatio *latè* considerata importat augmentum quantitatis corporeæ, siue fiat per iuxtapositionem, quo sensu lapides crescunt in visceribus terræ, siue fiat per intus positionem, qualiter viuentia augeri videntur per sumptionem alimenti. Augmentatio *proprie* usurpata significat acquisitionem maioris quantitatis corporeæ per intus susceptionem, seu per sumptionem alimenti, quod in substantiam aliti conuertitur: & de augmentatione hoc modo attenda specialiter agunt physici, de ipsa dicentes quòd sit mutatio à minori quantitate ad maiorem vitaliter facta.

Dico 2. in viuentibus dari potentiam augmentatiuam, & qua viuens ex alimento potest sibi maiorem quantitatem acquirere, & augmentationem actualem, seu acquisitionem maioris quantitatis. Viuens enim à principio natiuitatis suæ non sortitur magnitudinem sufficientem ad opera vitæ exercenda, cum gignatur ex semine, quod in quantitate modica à viuente decidit, vnde necessarium est, vt successu temporis viuens genitum nouam, maioremque sibi procuret quantitatem, adiungendo videlicet materiam alimenti propriæ materiæ, & ob hoc diximus in viuentibus dari potentiam augmentatiuam, & augmentationem actualem, quæ est actio animæ vegetantis mediante facultate augmentatiua & calore naturali.

Dico 3. augmentationem *extensiuè* sumptam sic posse definiri per quatuor causarum genera. *Augmentatio est motus vitalis, ab anima vegetante ortus, beneficio facultatis augmentatiuæ & caloris natini, per quem idem numero viuens suscepto intus & digesto alimento à minori quantitate ad maiorem promouetur, ut opera sua natura consentanea elicere valeat.* Res quæ augetur, est viuens. Motus quo augetur, dicitur accretio illa. Causa efficiens principalis est anima vegetans, Instrumentalis verò est augmentatiua facultas & calor nativus. Causa materialis ex qua fit augmentatio est alimentum, quod intus suscipitur ab extrinseco. Causa formalis est ipsa augmentationis essentia, in hoc consistens, quòd sit motus vitalis. Causa denique finalis est productio operum natura viuentis consentaneorum. Hæc omnia indicant quòd præallata definitio

tio iure dici queat *causalis*, quia importat quatuor genera causarum: *Quod autem motus ille augmentationis, debeat dici successivus* colligitur euidenter ex Aristotele qui 1. de generat. cap. 5. definit accretionem motum, ad quantitatem; motus autem communiter est *successivus*, vnde philosophi generationem potius vocant mutationem, quam motum, quia fit *in instanti*, non sic autem accretio, cum alimentum secundum omnes suas partes non æquè primò disponatur ad suscipiendam viventis formam, sed successivè; quidquid dicant Albertus, Toletus, & quidam alij. Si ab aliquibus dicatur augmentationem fieri *in instanti*; hoc debet intelligi de augmentatione prout confunditur cum nutritione; vnde quia nutritio sumpta *formaliter* pro conversione præcisa substantiæ in substantiam, fit *in instanti*; sic etiam augmentatio pro nutritione sumpta, posset dici *instantanea*: licet utraq; sint potius *successiva*, quia tum nutritio, cum augmentatio fiunt per partes alimenti.

Dico 4. In multis diffidere augmentationem à nutritione, licet in hoc conveniant, quod utraque versetur circa idam subiectum, nempe circa vivens, & circa eandem materiam, videlicet circa alimentum. Differunt, inquam primò quòd augmentatio superaddat, plus acquirendo quàm sit deperditum, & augendo proinde membra viventis, nutritio verò est tantum reparativa eius quod consumptum est per actionem caloris naturalis. 2. Augmentatio præcipuè auget in longum, vnde animal non censetur crescere, dum impinguatur, sed solum quando extenditur & maiorem acquirit staturam: nutritio enim de communi æqualiter nutrit omnia membra secundum omnem dimensionem longitudinis, latitudinis, & profunditatis. 3. Augmentatio certis vitæ temporibus definitur, quia ad illam calor naturalis fortior requiritur, vnde quia nonnisi iuvenes vigorosum habent calorem nativum, ideo in senectute non fit augmentatio, licet in quibusdam viventibus semper augmentatio durare credatur à Naturalistis, qui dicunt crocodilum, balenas, & plures pisces cetosos augeri quandiu vivunt: nutritio verò semper durat, quia ad illam sufficit calor naturalis languidior. An autem viventia & res aliæ naturales habeant terminum suæ magnitudinis & parvitatatis dictum est in fine capitis de Quantitate. 4. Augmentatio est motus ad quantitatem, quam pro

pro suo termino habet ; nutritio verò est motus ad substantiam , quandoquidem nutritio est mutatio substantiæ alimenti in substantiam aliti : vnde non immeritò dici posset quòd nutritio sit instantanea, quatenus scilicet sumitur pro conuersione substantiæ in substantiam ; vbi augmentatio intelligi debet *successiua*, quia consistit in additione quantitatis ad quantitatem , quæ sit per partes . Ob istas rationes contendit Doctor noster in 4. dist. 14. nutritionem distinguì ab augmentatione .

Dico 5. *Non mediocrem esse controuersiam inter Doctorum precipuos, an idem perseueret indiuiduum à principio sui ortus, vsque ad finem vita.* Magister enim sententiarum affirmat idem indiuiduum, quòd continuò nutritur, perseuerare à principio suæ natiuitatis vsque ad vltimam ipsius periodum; quia idem calor naturalis, idem humidum radicale, & eadem partes primigeniæ seu à parentibus acceptæ persistunt . Doctor Angelicus existimat idem indiuiduum remanere ; quia licèt partes illius per actionem & reactionem caloris natiui & humiditatis radicalis dilabantur secundùm materiam, perdurant tamen secundùm formam . Doctor verò Subtilis in 4. dist. 44. quæst. 1. docet idem indiuiduum viuens secundùm totum permanere à principio ortus sui vsque ad obitum, licèt partes illius non semper eadem maneant, & mutantur secundùm materiam & formam substantialem earum . Ratio nostra est quia sicut ciuitas dicitur semper eadem, quamuis nonnulli semper nascantur & moriantur alij, sic etiam idem indiuiduum viuens debet dici semper manere, licèt partes illius semper fluant & absumantur . Quando enim vna pars materiæ primigeniæ cum sua forma substantiali corrumpitur, & loco istius substituitur alia per nutritionem, tunc ista identificatur cum toto quod remanserat & facit vnum cum illo . Quando postea alia pars absumitur, noua sufficitur illi, quæ facit adhuc idem cum toto, & sic deinceps quæcumque fiat consumptio particularum materiæ, totum est semper idem : ergo licèt partes indiuidui secundùm materiam & formam corrumpantur, semper illud indiuiduum viuens manet idem secundùm materiam & formam ; & ob hoc de elementis dicitur quòd sint generabilia & corruptibilia secundùm partes, licèt sint ingenerabilia & incorruptibilia secundùm se tota ; quod idem dici debet de quolibet viuento, quòd sit corruptibile secundùm

partes quæ continuò fluunt, licèt dicatur incorruptum secundùm se totum.

Nec dici debet, supposito quòd fluant partes viuentis, tunc non esse idem indiuiduum per realitatem, sed tantùm per æquivalentiam, sicuti aliàs diximus, turrim in fluuio constructam remanere in eodem loco per æquivalentiam, quia partes fluuij partibus fluuij succedunt. Volumus enim quòd sit idem indiuiduum per realitatem, sicut arbor dicitur esse eadem realiter, quamuis eius partes abscondantur; & idem numero flumen, licèt partes eius fluant continuò. *Ad comparisonem autem allatam*, in hoc consistit disparitas, quòd partes fluuij, quem diximus esse locum turris in illo ædificatæ, omnes recedant simul; partes verò indiuidui viuentis non nisi successiuè abscedunt: & quando abit vna, succedit alia, quæ identificatur cum toto; & sic reuerà idem censetur persistere indiuiduum per realitatem, etiamsi partes viuentis exiguæ dispareant; sicut idem homo perseverat, cui capilli & ungues præscinderentur. *Siquis dicat*, nihil remanere de materia primigenia, quam secum attulit viuens nascendo; proindeque ipsum non remanere idem. *Resp.* nihil ampliùs reuerà superesse de illa materia, quam nascens attulit; attamen ipsam quam habet in interitu eandem censi debere, quia per particulas exiles vnita est cum toto corpore remanente: & sic semper fecit vnã & eandem numero materiam cum illo, & eandem numero formam substantialem cum primigenia.

Dico 6. quia quantitas videtur augmentari per rarefactionem, vt minui per condensationem, quæ sunt qualitates quantitati propriæ, vt distinctiùs innotescant augmentatio & diminutio: quod sciri conueniat, quid per rarefactionem & condensationem intelligatur. Cum autem Aristoteles 7. Phys. text. 21. dicat rarum esse id, quod habet parum de materia, seu de quantitate, sub amplioribus dimensionibus; & è contrà densum esse id, quod habet multum de materia sub angustioribus dimensionibus; proinde rarefactio potest in abstracto sic definiri, motus à minori quantitate ad maiorem per dilatationem & laxationem partium rei quantæ. Condensatio verò est motus à maiori quantitate ad minorem per compressionem partium rei quantitatem habentis.

Quòd dentur rarefactio & condensatio, demonstratur com-

communī experientia. Ideo enim d. olium frangitur alt-
quando, quia mustum intus contentum, dum calefit,
maiores extensionem habere postulat; pulvis tormen-
tarius igne accensus longe ampliorem appetit locum,
lac in lebece ebulliens vas supergreditur, ouaque &
castaneæ appositæ igni magno impetu sæpius rumpun-
tur, quia cum hæc corpora secundum partem superio-
rem sint densa & dura, id quod intus est rarefcit, ma-
ioremque locum querit, unde pellis frangitur cum fra-
gore: quæ omnia manifestè denotant dari rarefactionem
in corporibus. *Quod detur etiam condensatio*,
ex hoc patet quod aqua congelata minus spatium
occupet, quàm ante. Si etiam vas aliquod sit plenum
aere calidissimo & orificium eius deorsum immerga-
tur aquæ frigidæ, breui tempore aqua ascendet, non
alia de causa, nisi quia aer ille propter calorem rarif-
simus implebat totum vas, postea verò condensatus ex
frigore minorem locum occupat: quod denotat manife-
stè dari condensationem.

Possibilitatem condensationis & rarefactionis po-
stulabat bonum & commoditas vniuersi, vt eadem
materiæ portio nunc diffunderetur in maius spatium,
nunc colligeretur in angustius, & quantitas esset hu-
ius genij, vt posset suscipere varias dispositiones ac
modificationes; quibus modò fieret explicatior, mo-
dò contractior. Si enim omnia corpora essent exactè
tenacia suæ extensionis, fieri non posset, vt vnum col-
ligeret se in breuiori spatio ad concedendum alteri co-
plam loci localis: unde vt faciliteretur talis motus, quæ-
dam corpora creata suæ figuræ ac vniionis suarum-
partium minimè tenacia, & sese in omnem modum
vertentia ratione fluibilitatis. Talis est aer præ cæter-
is, quem experimento constat facile comprimi, rursus
que diffundi, vt sine vacuo motus fiat, quatenus scilicet
pro necessitate aer nunc se colligit ad præstandum
homini transeunti copiam, nunc se explicat & diffundit
ad occupandum loca, quæ homo ille reliquisset vacua,
post transitum suum.

Difficultas explicanda remanet, *quomodo fiant con-*
densatio & rarefactio, non tantum ea quæ fit ab ex-
trinseco, quando scilicet corpus aliquod spissum ex-
tenditur in latum, vel diffunditur in longum: aut
ex corpore longo vel lato efficitur aliud corpus con-
tractum & spissum, tunc enim illæ rarefactio & con-

densatio fiunt per actionem externam manus aut instrumenti, quod extendit aut contrahit corpus, & quantitatem illius diuersificat; sed *maxima difficultas*, quæ dissidium parit inter philosophus, est de *rarefactione & condensatione*, quæ *prouenit ab intrinseco*, utpotè quando lac ebulliens extremitates leberis supergreditur; & farinæ quantitas augetur multum ex fermento. Godfredus existimauit rarefactionem fieri per deperditionem antiquæ quantitatis & acquisitionem nouæ maioris; condensationem verò per deperditionem totius quantitatis maioris & acquisitionem nouæ minoris. Alij voluerunt rarefactionem fieri per aduentum nouæ quantitatis; absque nouo aliquo subiecto cui inhaereret talis noua quantitas; & condensationem fieri per deperditionem alicuius partis quantitatis habitæ manente altera, hanc opinionem proponit Scotus in 4. dist. 12. *quest. 4.* quam tamen non amplectitur. Alij denique docent raritatem fieri per additionem nouæ quantitatis cum nouo subiecto: quatenus scilicet per rarefactionem aperiuntur pori corporis quod rarefit, in quos poros intromittuntur quidam corpuscula ut vacuum impediatur: condensationem verò fieri per talium corpusculorum eiectionem. Quæ sit nostra resolutio mox aperietur.

Probabilius est rarefactionem fieri per intromissa corpuscula intra poros corporis rareficientis; & condensationem effici per eiectionem talium corpusculorum ex poris corporis rarefacti, qui comprimuntur & ad pristinam situationem redeunt, quando abscedit virtus rarefaciens, quæ communis ex calore oritur. Hæc conclusio non est expressè Scoti, qui suam mentem positiuè non exprimit, exponendo diuersas authorum sententias; sed magis accedit ad suæ doctrinæ principia: vnde è nostris eam amplectuntur doctissimi Poncius & Frassennus. Quod, inquam, à nostra assertionem non discedat Scotus, colligitur ex hoc, quòd in 4. dist. 12. *quest. 4.* expressè dicat: in quacumque opinione circa rarefactionem, ponendam esse nouam quantitatem; sed non potest aduenire noua quantitas, quin ipsa inhaereat alicui subiecto, aliàs non esset ens alteri inhaerens, sed subsistens per se; ergo si rarefactio fiat per additionem nouæ quantitatis, ut supponit Scotus; debet fieri per additionem nouorum corpusculorum, quibus adhaereat illa noua quantitas. Nec debet dici, quòd quan-

titas

titas illa superueniens in rarefactione inhæreat subiecto prioris quantitatis: quia duo accidentia absoluta eiusdem generis nequeunt esse in eodem subiecto: aliàs fieret naturaliter penetratio dimensionum, quandoquidem vna quantitas existens in eodem subiecto vbi existeret alia, existeret proinde in eodem loco: ergo ex hoc quod Scotus doceat in rarefactione acquiri nouam partem quantitatis, ritè concluditur quod debeat addi nouum corpus, cui illa quantitas insideat.

Confirmatur præcedens veritas per refutationem aliarum opinionum; si enim rarefactio non fiat per deperditionem antiquæ quantitatis & acquisitionem nouæ, nec per additionem partis cuiusdam quantitatiuæ sine subiecto, bene sequitur quod fiat per introductionem corpusculorum. *Quod autem rarefactio non fiat per deperditionem prioris quantitatis*, probatur ex hoc, quod per rarefactionem non pereant priora accidentia corporis rarefacti, cum species vini consecrati in Eucharistia, si rarefierent appositæ super ignem, retinerent suam dulcedinem, saporem & odorem: ergo non perit etiam quantitas, quæ est illorum subiectum.

Quod etiam rarefactio non fiat per additionem nouæ quantitatis sine subiecto quod de nouo superaddatur, iam probatum est; quia scilicet illa quantitas noua, quæ non inhæreret subiecto, esset ens per se subsistens; quod est absurdum dicere. Deinde, si per rarefactionem produceretur noua quantitas, aliquando talis quantitas crearetur ab agente naturali, si videlicet hostia consecrata rarefieret per calorem; in tali enim casu noua quantitas produceretur, non ex materia, quæ nulla est: ergo ex nihilo; & sic diceretur creari. *Tandem* si per rarefactionem specierum Eucharistiæ produceretur noua quantitas, vel corpus Christi esset in ea, vel non esset; *primum* dici nequit, quia corpus Christi est tantum sub ea quantitate, sub qua fuit substantia panis; sed substantia panis non fuit antea sub hac noua quantitate: ergo nec corpus Christi erit sub illa. *Aliud* etiam dici non potest, quod Christi corpus non sit sub quantitate superaddita per rarefactionem; quia Christi corpus debet esse sub ea omni quantitate, sub qua esset substantia panis si adesset: at si adesset substantia panis esset sub illa quantitate: ergo & Christi corpus deberet esse sub illa. Remanet ergo veritas tertie opinionis, quod *rarefactio fiat per intromissa cor-*

diuersificatur quidem dispositio cere, sed quantitas illius non augetur: cum non possit acquiri quantitas de nouo, nisi addatur subiectum cui inhæreat; in tali autem casu non acquiritur noua pars cere. *Resp.* 2. per rarefactionem ab intrinseco acquiri aliquam partem quantitatis, non quæ sit sine subiecto, aut quæ resideat in subiecto præcedenti, vt probatum est; sed quæ inhæreat corpusculis illis nouis quæ subintrant poros corporis rarefacti, quæ dilatantur. *Dices* posse probari, quod rarefactio non fiat per corpusculorum introductionem; quatenus scilicet si daretur vas aqua plenum fortiter obturatum; in quo congelaretur aqua, frangeretur illud vas ad impediendum vacuum; sed si condensatio fieret per egressum corpusculorum, non esset periculum vacui, quoniam locus derelictus ab aqua condensata occuparetur à corpusculis illis ab ea egredientibus: ergo signum est, quod condensatio non fiat per eiectionem corpusculorum, nec rarefactio per illorum introductionem. *Resp.* posse quidem vas illud frangi ad congelationem aquæ, sed non rumperetur ob metum vacui; quia tunc corpuscula illa egredierentur ad illud implendum: sed ideo frangeretur vas, quia magnum frigus comprimeret partes vasis, quod proinde frangi deberet.

Q V Æ S T I O III.

Quid dicendum sit de Alteratione.

Sicut qualitas in ordine prædicamentali sequitur quantitatem, sic motus qui terminatur ad qualitatem debet sequi ad illum qui ad quantitatem terminatur, & ideo postquam in præcedenti quæstione diximus de augmentatione & diminutione, quæ sunt motus ad quantitatem, in hac differere debemus de *alteratione*, quæ est motus ad qualitatem: & hoc fiet per assertiones sequentes.

Dico 3. quod alteratio ex vocabulo nihil aliud sit, quam rei altera ratio, seu motus per quem res habet quod sit altera accidentaliter, vnde Porphyrius in *Isagoge* cap. de differentia docet differentiam accidentalem facere subiectum alterum, & essentialem facere subiectum aliud. *Alteratio* sumitur tripliciter, latissime nimirum,

rum, latè, & strictè seu ad propositum nostrum. *Latè* sumitur alteratio pro quocumque motu successiuo aut instantaneo, qui subiectum alterat & immutat accidentaliter, quo sensu elementa dicuntur alterari, dum cœlesti luce perfunduntur: pariterque alterari dicitur homo, dum species obiectorum recipit, aut suas elicit operationes; sic Aristoteles 8. *phys. tex. 26. Latè* accipitur alteratio pro sola mutatione & tendentia successiua ad qualitatem spiritualem aut corpoream; & hoc sensu qui crescit de virtute in virtutem, *alterari* dicitur; seu fieri alter, acquirendo vel deperdendo gradum aliquem virtutis. *Strictè* intelligitur alteratio pro solo motu & tendentia successiua ad qualitatem sensibilem, quæ ad generationem conducit.

Dico 1. Supposita existentia alterationis, quam nemo reuocare potest in dubium, cum experientia sensibilis doceat, rem vulgò fieri calidam & frigidam, proindeque alterari; quod nihil aliud sit quàm *motus ad qualitates contrarias aut medias, eodem subiecto sensibili remanente*: ut eam definit Aristoteles 1. de generat. cap. 4. Quod etiam confirmat Doctor noster 9. *met. quest. 14.* Dicitur 1. *motus*, & hæc particula tenet locum generis, in quo alteratio convenit cum alijs motibus. Dicitur 2. *motus ad qualitates*, ut distinguatur ab alijs mutationibus, nimirum à generatione, quæ est motus ad substantiam; à augmentatione & diminutione, quæ sunt motus ad quantitatem; & à vicatione, quæ est motus ad locum. Dicitur 3. *motus ad qualitates contrarias*, & per hanc particulam alterationes perfectiuz, quæ non supponunt expulsionem contrarij positivi, non sunt propriè alterationes; ut illuminatio, volitio, & intellectio. Non enim necesse est, ut qui sit volens prius fuerit nolens, nec qui sit temperans prius fuerit intemperans; sed definitur tantùm hic alteratio corruptiua, tendens ad generationem & corruptionem; ut frigefactio, calefactio, & similes. Dicitur 4. *ad qualitates contrarias, vel medias*, ut denotetur alterationem non semper esse inter qualitates extremas, sed etiam reperiri inter qualitates medias; ut potè si paries fieret non de nigro albus, sed albus de cæruleo. Subditur denique *eodem subiecto sensibili remanente*, & per hoc distinguitur ulterius à generatione & corruptione, in quibus nõ remanet idem compositum, sed novum accedit recedente Veteri.

Dico

Dico 3. alterationem diuidi in impropriam & propriam. Illa fit ad qualitatem non habentem contrarium, qualis est illuminatio corporis, cui tenebræ non opponuntur contrariè & positiuè. Ista verò fit ad qualitates, quæ contrariam qualitatem expellunt à subiecto, vt cùm aqua de frigida efficitur calida. Alteratio propria diuiditur in perfectiuam & corruptiuam. *Perfectiua* ea est, per quam subiectum tendit ad qualitatem quæ ipsum perficit; vt cùm aqua calida ad frigiditatem naturalem mouetur & transit. *Corruptiua* est illa, per quam res transit à qualitate sibi conueniente ad eam quæ est contranaturalis: vt potè si aqua de frigida efficeretur calida. Alteratio perfectiua & corruptiua potest esse vel ad qualitatem simpliciter: vt si substantia denudata accidentibus illa reciperet de nouo, vel ea deperderet quæ antea habuerit: vel ad intensiorem aut remissionem qualitatis, dum scilicet subiectum transiret à minori qualitate ad maiorem, vel è contra: terminus enim alterationis est ipsa qualitas, quæ acquiritur aut deperditur, vel saltem augetur aut remittitur. In rigore tamen sermonis, quando subiectum non habens qualitatem vllam, eam postea recipit, non censetur propriè alterari; quia alteratio strictè sumpta est motus à qualitate ad qualitatem. Idem dicendum est, si subiectum habens qualitates eas omnes deperdat, tunc enim non mouetur de qualitate in qualitatem, sed in non qualitatem.

Dico 4. alterationem propriè & strictè sumptam dari tantum ad qualitates tertie speciei, nempe ad patibiles qualitates; quales sunt calor, frigus, & cæteræ. Primò enim non datur alteratio ad qualitates primæ speciei, quæ sunt habitus & dispositio; nam alteratio est motus, habitus verò & dispositio non acquiruntur per motum, qui continuus debet esse; sed per multos actus, qui simul sumpti non sunt quid continuum, sed quid discretum. Secundò alteratio non tendit ad qualitates secundæ speciei, quæ sunt naturales potentiæ; tales enim facultates non producuntur successiuè, sed in instanti dimanant à suis subiectis. Tertiò alteratio non datur ad qualitates quartæ speciei, quæ sunt forma & figura; nam istæ qualitates sequuntur quantitatem, cuius sunt termini ab ea indistincti realiter: alteratio verò sequitur qualitatem: & proinde non datur alteratio ad qualitatem quartæ speciei. Remanet
ergo

ergo quòd alteratio propriè sumpta sit ad qualitates tertiarum speciei; Non quidem ad omnes, sed tantum ad illas, quæ sunt cum expulsionem contrarii; unde dicitur communiter, quòd *illuminatio non sit alteratio propria*; quia non supponit contrarium positivum in subiecto, quod debeat expellere, ut introducat lumen successivè, quod tamen requiritur ad alterationem strictè sumptam, quæ debet esse motus successivus: per quod distinguitur à generatione, quæ est instantanea. Assertio præcedens est Philosophi 7. *Phys. cap. 3.* Quòd si ipse definiens alterationem exemplificatus fuerat de sanitate & ægitudine, quæ sunt qualitates primæ speciei: tales dicuntur pertinere ad alterationem per accidens, quia scilicet procedunt ex qualitatibus tertiarum speciei, quatenus scilicet ex alteratione calidi & frigidi factus sit æger.

Dico 5. posse afferri tres species alterationis, nempe mirum alterationem simpliciter dictam, intensiorem, & remissionem. Alteratio enim est motus ad qualitatem: sed tripliciter aliquid secundum qualitatem moveri potest: ergo potest dici quòd triplex sit alterationis species. Minor ex eo patet, quòd subiectum moveatur de vna qualitate simpliciter ad aliam, ut de frigore ad calorem; & hæc dicitur *alteratio specialiter*: vel proficit in eadem qualitate, ut quando ex minus calido fit magis calidum; & hæc dicitur *intensio*: vel demum deficit in eadem qualitate, ut quando corpus aliquod ex magis calido fit minus calidum; & hæc alterationis species nuncupatur *remissio*. Sicut enim subiectum potest transire de vna qualitate ad aliam, in quo consistit alteratio specialiter dicta; sic etiam qualitas habet quamdam latitudinem intra essentiarum suarum terminos, quam decurrere potest modò accedendo ad suam perfectionis culmen; & tunc hæc alteratio vocatur *intensio*, seu motus à statu imperfectiori ad perfectiorem: modò deficienti ab illo, & tunc est *remissio*, seu motus à statu perfectiori ad imperfectiorem. Quomodo autem fiant intensio & remissio, dicetur postea.

Dico 6. alterationem esse motum successivum, ut innuit Scotus 6. *Phys. quest. 6.* post Aristotelem 5. *Phys. tex. 39.* ubi docet motum esse continuum; & antea præmiserat *tex. 18. eiusdem libri* alterationem esse unam ex speciebus motus propriè dicti: ex quo evidenter colligendum est alterationem esse successivam. Deinde

communiter dicunt philosophi generationem in hoc differre a alteratione, quòd generatio fiat in *instanti*, & alteratio in *tempore*; sed mensuratum debet correspondere mensuræ: ergo cùm alteratio mensuraretur tempore, quod est continuum, proinde alteratio reputari debet motus continuus: Tandem motus ille est successivus, quando inuenit resistantiam in passo, cùm Aristoteles 4. *Phys. text. 71.* doceat successionem motus oriri ex passi resistantia; sed causa alterans plerumque inuenit resistantiam in passo, quod impedire nititur, ne forma sibi repugnans introducatur: ergo alteratio est motus successivus, cùm videamus aquam calefacientem non *primo instanti*, sed *successiuè* summum assequi calorem gradatim. Quòd si Philosophus 8. *Phys. text. 23.* reprobet eos qui tenent alterationem fieri continuo: ibi arguit tantum Heraclitum dicentem alterationem semper fieri, & nunquam desistere, omniaque esse in continuo, & perenni fluxu, aquamque ver. gr. semper calefieri, & nunquam obtinere terminum caloris; quod tolerare non poterat Philosophus.

Dico 7. *alterationem esse motum continuum*: quidquid reclamant Ægidius, Soncinnas, & Ferrariensis. existimantes alterationem effici per quasdam morulas, & instantia discreta; ita quòd ignis calefaciens lignum producat primum gradum caloris, & paululum quiescat deinde post exiguam quietem causet secundum caloris gradum; & sic deinceps alios gradus, donec vltimus attingatur. Sic cum omniis ferè Scotus in 1. *dist. 17. quæst. 3* quem præcessit Aristoteles 5. *Phys. text. 18.* vbi dicit alterationem esse vnam ex speciebus motus propriè dicti, & *tex. 39. eiusdem libri* ait omnem motum esse continuum: ex quo colligi debet alterationem esse motum continuum. Deinde, ex Aug. lib. 83. *qq. quæst. 9.* cùm capilli crescunt, sine ulla intermissione fit: ergo à pari, cùm aqua calefit ab igne, motus ille alterationis est continuus, & non interruptus; licet aliquando ignis, qui cœpit calefacere lignum, desistat à sua calefactione, si contrarium fortius ipsi obsistat; quia tamen remoto impedimento, perseveraret calefactio præcedens naturaliter, proinde dicitur quòd alteratio sit motus continuus. Tandem si darentur morula seu instantia quædam quietis, quando ignis calefacit aquam, in tali quiete ignis non ageret in subiectum

sibi applicatum, quod sustineri nequit: ergo admitti debet alterationem esse motum continuum. *Dices* si subiectum non quiescat paulisper, quando ignis calefacit aquam, in quolibet instanti producitur novus gradus caloris, & cum instantia temporis sint infinita, infiniti producantur gradus caloris: proindeque dabitur infinitum actu, quod aliàs reiicimus. *Resp.* quod possunt reuerà produci infiniti gradus caloris, *syn-categorematicè*, licet gradus infiniti *categorematicè* produci nequeant; sicut nec sunt infinita actu, & *categorematicè* instantia in tempore.

Dico 8. qualitates habere terminos suæ intensiōis, sicut quantitates habent terminos suæ extensiōis; ut probauimus cap. de Infinito. Loquimur enim de qualitatibus, quæ producuntur ab agente naturali; sed agens naturale est limitata actiuitatis: ergo infinitam qualitatem producere non potest. Adde quod talis qualitas reciperetur in aliquo subiecto; sed nullum est subiectum naturale receptiuum qualitatis infinitæ: ergo omnes qualitates habent terminos suæ intensiōis. Hoc intelligi debet nedum de qualitatibus naturalibus, sed etiam de supernaturalibus; cum Scotus doceat in 2. dist. 13. *quest. 2.* gratiam collatam animæ Christi fuisse quidem summam, sed non infinitam; *ut cap. præt. probauimus.* Imò ne per potentiam quidem diuinam, produci potest qualitas infinita; ut ibidem habetur. Cum autem qualitates habeant gradus determinatos, communiter philosophi intensiōem qualitatis cuiuslibet reducant ad octo gradus; ita quod ultra octauum gradum qualitas augeri non intelligatur; licet reuerà multò plures etiam sensibilibus discerni possent, & dari viginti aquæ, quarum vna percipiatur calidior alterà.

Dico 9. qualitatem esse formam intensibilem, & remissibilem ex Scoto 8. met. quest. 8. post. Arist. qui lib. de Prædicam. cap. de qualitate docet proprium qualitatis esse quod suscipiat magis, & minus. Videmus enim aerem lucidiorem, & parietem albiorem; tactu sentimus aquam calidiorem, & niuem frigidiorē; audimus cantum suauiorē, & experimur hominem doctiorē; quæ omnia euidenter demonstrant, qualitatem esse intensibilem, & remissibilem: fieri enim nequit, ut aliqua forma à multis participetur sub multiplici variatione graduum, nisi suscipiat magis, & minus; sed habere graduum

duum pluralitatem nihil aliud est, quàm posse *intendi* & *remitti*: ergo qualitas est intensibilis, & remissibilis, tum intensiue, tum extensiue. Accretio *extensiuæ* ea est qua extenditur qualitas per partes subiecti cui inhaeret; vt cum calor diffunditur ad calefaciendas omnes partes ligni. Accretio *intensiua* est illa qua qualitas maratur, & intenditur per nouorum graduum susceptionem; vt si calor habens quatuor gradus quintum recipiat, tunc dicitur *intendi*: si verò à calore quatuor graduum dematur vnus, tunc dicitur *remitti*. Quando tamen dicimus *qualitatem esse intensibilem*; hoc intelligi non debet de partibus essentialibus, & specificis, quæ cum consistant in *indiuisibili* non possunt suscipere *magis*, & *minus*; sed debet intelligi de partibus materialibus, & indiuidualibus, quæ sunt capaces extensionis & remissionis: vnde licet vna albedo non sit magis albedo, quàm alia: est tamen maior albedo. Porro multiplicatio graduum non facit vnum per accidens, sed vnum per se homogeneum ex partibus similaribus coalescens; sicuti ex partibus heterogeneis constituitur vnum per se heterogeneum, vnum corpus videlicet conflatum ex capite, collo, pedibus, & manibus.

Dico 10. quatuor esse philosophorum sententias de modo quo fit intensio qualitatis. Durandus enim cum alijs quibusdam ait qualitatis intensiorem effici per corruptionem præexistentis, & subsequenter productionem, ita quòd si albedo fuerit intensa vt quatuor, & accedat quintus gradus, quo reddatur intensa vt quinque, tunc intensio vt quatuor deperdatur, & producat de nouo intensio vt quinque; proportionem seruata idem sustinet de remissione, quòd scilicet qualitas imperfectior corrumpatur, & producat perfectior. Ægidius existimat qualitates intendi per remotionem contrarij, seu per depurationem ab illo; ita quòd sicut aurum perficitur, cum depuatur à fœcibus, sic intendatur calor per depurationem à frigore. Diuus Thomas 2. 2. *quest.* 24. *art.* 5. cum suis arbitratur intensiorem, & remissionem qualitatis fieri per maiorem, & minorem radiationem in subiecto; ita vt qualitas sit intensior, quæ perfectius afficit subiectum; & remissior, quæ imperfectius à subiecto participatur: vnde opusc. 48. tract. 2. cap. 4. ait non est intelligendum, quòd cum forma intenditur, augeatur, per additionem gradus ad gradum, ita quòd sint ibi duo gradus distincti, quorum vnus ad-

datur alteri, & possit ab illo distinctè signari; sed sit tale augmentum, in quantum forma imperfecta sit perfecta; ita quod ipsa perfectius habet quam prius, non secundum partes diuersas, sed virtute. Alij denique, & communius cum Doctore nostro in 2. dist. 17. quest. 3. Alensi, sancto Bonauentura, Ochamo, & aliis, docent, intensiorem formæ accidentalis fieri per additionem gradus ad gradum in eadem parte subiecti. Tres priores sententiæ nobis refutandæ sunt, vt quarta firmitus stabiliatur.

Dico 11. qualitates non intendi per destructionem veteris imperfectæ, & substitutionem nouæ perfectioris. Quidquid enim corrumpitur, à contrario corrumpitur; sed intelligi non potest, quomodo in intentione qualitatis præcedens qualitas corrumpatur à contrario, cum qualitas magis intensa non opponatur contrariè qualitati minùs intensæ: ergo velut iam antiquata debet repudiari hæc opinio Durandi. Ob hoc Scotus præcatus dicit, intensiorem qualitatis fieri remanente entitate præcedenti illius. Aristoteles verò 1. de generat. tex. 31. innuit augmentum esse præexistenti magnitudini additamentum. Ratio nostræ veritatis potest colligi ex intensiōis voce, quandoquidem non benè diceretur intendi qualitas, nisi præexistens qualitas remaneret; si enim qualitas præcedens destrueretur, non rectè diceretur intendi, sed noua produci simpliciter. Hoc confirmat Aug. ad Bonifacium scribens, *charitas mereatur augeri ut aucta mereatur, & perfici*; quod idem dici debet de aliis qualitatibus, siue materialibus, siue spiritualibus. Qualitas similiter non deperditur per depurationem à contrario, quia qualitas dum intenditur, perficitur intrinsecè, & non solum extrinsecè, per remotionem contrariæ qualitatis. Deinde lux in aere crescit, vbi tamen non habet contrarium, & in Beatissima Virgine nihil erat de peccato, & de cupiditate inordinata, quæ est contraria charitati; attamen eius charitas in dies crescebat, & facta est intensior vsque ad mortem. Tandem eques est armatior pedite, tametsi nihil ei sit contrarium: ergo intensio non prouenit per depurationem à contrario. Quod si Aristoteles 5. phys. tex. 29. dicat qualitates intendi, & remitti per minorem aut maiorem admixtionem contrarii: debet intelligi causaliter, & concomitanter, quatenus vna qualitas habens contrarium non possit intendi, quin

remittatur alia; non verò intelligitur in sensu formali, quasi intensio vnius qualitatis sit expulsio qualitatis contrariæ. Hæc conclusio est Scoti, vbi supra.

Dico 12. *Intensionem qualitatis non fieri per maiorem radicationem illius in subiecto*. Sic Scotus loco præcitato contra D. Thomam præallegatum 2. 2. *quæst.* 24. *art.* 4. Sicut enim, inquiunt Thomistæ, arbores dicuntur crescere, dum maiores agunt radices, & profundius terram penetrant; sic qualitas crescere, & intendi censetur, dum profundius penetrat subiectum, & ei firmitus adhæret. Ratio nostra in contrarium est, quod si nullus de nouo qualitatis gradus produceretur in subiecto, quando ipsa intenditur qualitas, talis qualitas deberet produci in subiecto secundum se totam in *instanti*; ita quod in toto sequenti tempore ignis, ver. gr. nihil produceret in ligno; sed hoc absurdum est dicere, cum motus ad qualitatem non fiat in *instanti*, sed *successinè*; ergo falsum est, quod qualitas intendatur per maiorem radicationem in subiecto; alias ignis desineret agere in subiectum sibi applicatum, quod est contra rationem agentis necessarii. Deinde qualitas magis intensa aliquando est minus radicata in subiecto, quam qualitas remissa; quoniam rubor ex verecundia ortus, est intensior rubore causato à natura; attamen iste magis radicitur in subiecto, quoniam difficili auferri potest: ergo intensio qualitatis non petitur ex maiori radicatione in subiecto. Tandem ipsemet D. Thomas 1. 2. *quæst.* 51. *art.* 2. ad 2. dicit subiectum intendi per maiorem participationem formæ, sed non potest intelligi maior formæ participatio, nisi intelligatur multiplicatio graduum talis formæ: Ergo non intenditur qualitas per radicationem in subiecto. Imò ex metaphora allegata à Thomistis, qualitas intenditur, sicut arbores crescunt, longiores ducendo radices; sed in augmentatione radicum additur gradus quantitatis ad gradum; ergo in intensione qualitatis debet fieri multiplicatio graduum, proindeque non intenditur qualitas per solam radicationem in subiecto.

Dico 13. *Intensionem qualitatis fieri per additionem gradus ad gradum, seu entitatis ad entitatem*. Sic Scotus in 1. *dist.* 17. *quæst.* 5. cum turba communi Philosophorum in hoc subscribentium Aristoteli, qui 4. *Phys. text.* 85. & 1. *de Generat. text.* 31. dicit augmentum effici ex additione nouæ entitatis præexistenti ad-

iunctæ. Veritas ista colligitur ex experientia communi, qua videmus aquam crescere per additionem nouæ aquæ; quantitatem augeri per accessum nouæ quantitatis; lumen intendi per aduentum noui luminis: ergo qualitas pariter intenditur per aduentum gradus ad gradum. Deinde quando agens agit in subiectum affectum qualitate remissa, debet suæ actionis producere terminum; sed non producit qualitatem præexistentem, hoc enim repugnat, ergo producit qualitatem nouam, proindeque intensio qualitatis fit per additionem gradus ad gradum, & entitatis ad entitatem. Tandem ipsemet D. Thomas 3. p. quæst. 7. art. 12. in corp. docet hominum viatorum gratiam posse augeri, tum ex parte formæ, quia homines non attingunt summum gratiæ gradum; tum ex parte subiecti, quia nondum peruenerunt ad terminum: ergo ex mente Doctoris Angelici gratia, & qualibet qualitas intenditur per additionem gradus ad gradum. Idem determinat Concilium Tridentinum sess. 6. cap. 10. Canone 24. gratiam augeri per bona opera; quæ verba clarè important latitudinem gratiæ, & cuiuslibet qualitatis. Dices ex Arist. 4. phys. text. 84. ex calido fieri magis calidum, nullo addito calido in materia. Resp. subiectum fieri magis calidum sine additione noui calidi, sed non sine additione noui gradus caloris. Dices. Si adderetur gradus ad gradum, adderetur ad actum; proindeque fieret vnum per accidens. Resp. Ex tali additione fieri vnum per se, non quòd componatur ex genere, & differentia, aut ex materia, & forma; sed quòd erit vnum per se integrale, sicut plures guttulæ aquæ faciunt vnā aquam vnione integritatis: pariterque vnus totalis calor ex pluribus caloribus minimis.

Dico 14. Gradus, per quos augetur qualitas, esse homogeneos, seu eiusdem rationis. Sic ferè cum omnibus Doctor noster in 1. dist. 17. quæst. 3. & quæst. 6. Resp. contra Suarezem, & Durandum negantes formam intendi per gradus similes. Iam diximus hanc esse differentiam inter totum homogeneum, & heterogeneum, quòd illud componatur ex partibus eiusdem rationis, & denominationis, cum omnes partes aquæ, & ignis sint, & denominentur aqua, & ignis; illud verò sic compactum ex partibus diuersæ rationis, vt homo ex capite, collo, & cæteris membris, quorum quodlibet in particulari, nec est, nec denominatur homo. Ratio
as-

assertionis est, quòd eodem modo ratiocinandum sit de toto integrali qualitatis, sicut de toto integrali substantiæ, & quantitatis; sed partes integrales substantiæ & quantitatis sunt homogeneæ, cum partes aquæ, & ignis, sint ignis, & aqua; sicut partes quantitatis continuæ sunt quantitas continua: ergo partes, & gradus qualitatis sunt homogenei. *Deinde*: Si secundus gradus per quem augetur qualitas esset perfectior primo, tertius secundo, & sic deinceps; quomodo fieri posset quòd octauus gradus summè perfectus destrueretur à primo, & infimo gradu contrariæ qualitatis, & vltimus gradus aquæ calidæ destrui per primum gradum aquæ frigidæ, qui esset longè ignobilior illo. *Tandem* si quis iustus actionem meritoriam de nouo eliciat, gratia illius debet augeri; sed ille gradus gratiæ de nouo superadditus erit eiusdem rationis ac præcedentes: ergo qualitas intenditur per gradus homogeneos. *Dices*. Si gradus intensiui essent similes, qualitas remissa esset eiusdem perfectionis ac qualitas intensa; quia tales gradus per multiplicationem non mutant suam perfectionem. *Resp.* negando hanc sequelam, quia licet tales gradus non mutant suam perfectionem particularem, mutant tamen perfectionem communem totius integralis, quod componunt.

QVÆSTIO IV.

Quid dicendum sit de Motu Locali.

INter motus naturales vltimum locum tenet ille, qui vocatur *localis*; quia pro termino habet locum ad quem mouetur corpus naturale: hoc non impedit tamen quin sit omnium apparentior, & sensibilibior, & ille quem solum admittit Carthesius dicens, composita naturalia non aliter generati aut corrumpi, augeri vel diminui, nec alterari etiam, nisi per motum localem atomorum; ex quibus sibi fingit omnia corpora constitui, per accessum scilicet vel recessum, vel per talem aut talem dispositionem. Iam multa in præcedentibus dicta sunt à nobis de motu locali, qui nihil aliud est quàm *transitus de loco ad locum*; probatido scilicet successionem non esse de essentia motus localis, quem diximus posse effici in instanti per potentiam diuinam,

& af-

& assignando rationes quæ faciunt velocitatem motus localis, & propter quas ipse motus localis sit velocior in successu quàm in principio; ac demonstrando denique, unde oriatur reflexio motus, & utrùm in puncto reflexionis intercipiatur quies. Superest ergo tantùm, ut dicamus in præsentì quæstione, *quid sit motus localis, quomplex sit, & quanam sint ipsius causa.*

Dico 1. *Quòd motus localis, quem demonstrat experientia, per quam videmus animalia de loco ad locum transire, quidquid dicat Zeno cum suis; nihil aliud sit quàm transitus ab uno loco ad alium.* In hac definitione transitus tenet locum generis, quia in illo transitu convenit motus localis cum alijs motibus, qui omnes sunt transitus quidam, vel à non esse ad esse; ut generatio; vel à minori quantitate ad maiorem, ut augmentatio; vel à qualitate ad qualitatem, ut alteratio. Dicitur 2. *ab uno loco ad alium*, quæ particula innuit partem differentię motus localis à generatione corporum, quæ licet transeant ad locum in quo non erant ante productionem, attamen ille transitus non fit à loco; & propterea generatio non potest dici motus localis. Dicitur 3. *ad alium locum*, & ista particula facit differre motum localem à corruptione, quæ reuerà est transitus à loco in quo est, non tamen est transitus ad alium locum; sed ad non esse illius corporis, quod corrumpitur, & esse definit. Propter defectum secundæ conditionis, quæ requirit, *ut motus localis sit transitus ab uno loco*; si corpus aliquod de vacuo transferretur ad aliquem locum, talis transitus non esset propriè motus localis, & propter defectum secundæ conditionis, quæ exigit ad motum localem, *quod sit transitus ad alium locum*; si aliquis desereret locum, & in vacuum transferretur, non esset motus localis stricte sumptus.

Dico 2. *Motum localem diuidi vniuersè in naturalem, violentum, mixtum, & neutrum.* Motus erit naturalis, si fiat secundum inclinationem formæ mobilis; ut quando lapis cadit deorsum, ignis tendit sursum, & homo graditur, sicut, & quodcumque animal. Motus localis violentus censetur, si fiat contra naturalem inclinationem rerum quæ mouentur; ut cum sursum proicitur lapis, vel ignis descendit à cælo. Motus ille est mixtus, qui partim fit à forma naturalis mobilis, &

par-

partim à proijcientis impulsu ; quando scilicet lapis prolicitur à vertice montis ad imum . *Nempe* denique appellatur motus localis , qui non est contra , nec iuxta inclinationem mobilis , & huiusmodi censetur esse *motus rota* , quæ in gyrum voluitur . *Quod dinisio præcedens sit uniuoca* , ex hoc patet quòd motus localis in se consideratus tribuat suis inferioribus præallegatis eandem rationem sub eodem nomine . Præter motus locales suprà dictos , potest vlteriùs ipsemet diuidi per respectum ad diuersa , & varia subiecta , quæ mouentur ; in *progressuum* scilicet , qui competit animalibus habentibus pedes : in *volatinum* , quibus congruit : in *natatinum* , qui competit piscibus : ac denique in *reptatinum* , qui vermibus , & serpentibus adaptatur .

Dico 3. *Causam motus proximè desumi à vi motrice* , quæ in actum reducitur . Virtus autem illa motrix , tum in corporibus simpliciter naturalibus , tum in uiuentibus , tum in sensitiuis , tum denique in intellectualibus , pro suo principio Deum agnoscit , *In quo uiuimus , mouemur , & sumus* . Cum enim vis loco motrix per se tendat ad efficiendam dispositionem quamdam in corporibus , & ad applicanda agentia corporalia proprijs passiuis , illa debet primò , & per se descendere ab eo , cuius est primariò ordinare corpora , illis præesse , uti virtutibus eorum actiuis , illas regere , & applicare ad agendum super passiuia propria ; sed primò , & per se competit Deo præesse corporibus , illa ordinare , ijs uti , ipsaque applicare ad actionem , cum præesse , ordinare , regere , & uti , cognoscenti , & sapienti conueniant : ergo Deus est primò , & per se fons omnis motus localis ac virtutis loco motricis , quæ est in substantia corporali , & ob hoc diximus quòd Deus sit *primus motor* , qui immotus manens dat cuncta moueri . Primus autem ille motor dedit virtutem hanc motricem valcuique entium naturalium , conformiter ad illorum naturam ; ita quod alia mouentur à forma , ut grauias , & lenias , quæ naturaliter mouentur deorsum , & sursum à seipsis ; alia mouentur per imaginationem , ut bruta animantia , quæ naturaliter mouent suum corpus per apprehensionem confusam obiectorum : alia verò se mouent per opus suæ intelligentiæ , ut homines , quorum anima mouet corpus ; vnde dicitur communiter , quòd corporea substantia moueantur à substantia spiritali .

Quia non nisi difficilè intelligitur causa, qua moveatur globus è tormento bellico tanto impetu excussus, aut sagitta tantà celeritate emissa, aut ventus impetuosè aliquando concitatus, aut ferrum attractum à magnete; non immeritò *responderi* potest quòd tales motus refundi debeant in Deum, substantiam illam spiritualem, quæ naturæ, & motus naturalis est conditrix: unde, non immeritò dicit Goudinus Deum triplicem indidisse corporibus naturalem vim loco motricem, *quarum prima est inclinativa*, per quam unaquæque res petit locum sibi proprium, vt lapis centrum; *Secunda dicitur elastica*, quæ res quædam nituntur repetere debitam suarum partium explicationem aut situationem, & hæc cernitur in arcu inflexo, & in aere nimis compresso; *Tertia nuncupatur sympathica*, quæ res quædam sese adiungunt alijs vel ab illis recedunt. Ex hac triplici causa nascuntur omnes motus locales rerum inanimatarum, ità quòd lapis per virtutem inclinatiuam deorsum inclinantem remoueat omnia obstacula, quæ suum motum impedire contendunt. Ex virtute elastica procedit, quòd flamma subito producta ex pyrio puluere inardescente, vt obtineat debitam explicationem, & extensionem suarum partium, obstantem globum pellat cum impetu, & eadem vi elastica arcus excutit sagittam, vt sese in debitum situm restituat; per eandemque virtutem exhalatio sese explicans conuertitur in ventum. Tandem ex vi magnetica fit, quòd ferrum occulto quodam modo immutatum à magnete, vi sua sympathica tendat ad certam dispositionem circa illum.

QVÆSTIO V.

Quid dicendum sit de Actione, qua est communis ad præcedentes quinque motus.

Cum multa dixerimus in Logica de actione, quæ vnum prædicamentum constituit ab alijs diuersum; vt videtur inanis repetitio, pauca tantum hic subiungemus; nimirum *an actio sit in agente, vel in patiente; an idem possit agere in seipsum, & simile in simile; an actio semper procedat à proportionem maioris inæqualitatis, & denique an admittenda sit Antiperistasis in actione,*

Dico

Dico 1. *Actionem diuersimodè consideratam esse, & non esse in agente.* Si enim actio sumatur *formaliter* pro forma respectiua, seu pro relatione extrinsecus adueniente transmutantis ad transmutatum, sub qua consideratione actio constituit vnum ex prædicamentis, tunc subiectatur in agente, vt innuit Scotus in 4. dist. 23. *quæst.* 3. In illo enim est relatio, in quo est fundamentum relationis; sed in agente est fundamentum actionis, nempe potentia actiua transmutatiua: ergo actio formaliter sumpta pro relatione in agente subiectatur. Si autem actio sumatur *materialiter* pro actione actu, seu pro termino productio per agentem; tunc aliquando potest dici, quod actio, seu actionis terminus ab agente exiens recipiatur in patiente: vt calor, qui per calefactionem productus egreditur ab igne, & in ligno recipiatur, à quo ipsum lignum dicitur *calefieri*. Aliquando tamen actio sumpta pro termino productio est etiam in agente, quando nimirum actio est *immanens*; quales sunt actiones intelligendi, volendi, videndi, & similes: intellectio enim, volitio, diuisio productæ recipiuntur, & remanent in intellectu, voluntate, & oculis; vnde propterea dicuntur actiones *immanentes*.

Dico 2. *Nihil posse agere per se in seipsum actione corruptiua, licet possit agere in seipsum actione perfectiua.* Sic Scotus in 1. dist. 28. *quæst.* 3. Prima pars est Arist. 8. *Phys. cap.* 3. *text.* 43. & ratio illius est, quod actio corrumpens sit tantum inter contraria; sed nulla res secundum se totam est sibi ipsi contraria: ergo nihil potest agere in seipsum, actione corrumpente; cum nihil seipsum destruere velit: imò tendit quantum in se est in sui conseruationem, iuxta Paulum ad Ephes. 3. *Nemo unquam carnem suam odio habuit, sed nutrit, & fouet eam*; vnde videmus quod vnumquodque fugiat quod sibi est contrarium. Quod si ignis sese extinguat absumendo oleum lampadis, hoc fit per accidens tantum. Secunda pars patet ex hoc, quod aqua calefacta agat in seipsam; quando se reducit ad natium frigus, quod est perfectio naturalis aquæ; Intellectus similiter agit in seipsum, quando producit in se intellectionem sui, aliorumque subiectorum à se: Non est tamen quod possit dici, idem agere in seipsum, actione *vninoca*; aliàs gigneret seipsum: bene autem actione *aquinoca*, producendo scilicet in seipso ali-

quod accidens, quod non participat rationem substantialem producentis: & hoc est quod dicunt alij, *nullum agens creatum agere in seipsum actione substantiali*: licet hoc faciat continuò agens *Increatum*: quandoquidem Pater diuinus producit semper in seipso Verbum D. substantiale.

Dico 3. *Quòd simile in qualitate & gradu non agit in aliud similis qualitatis & gradus, bene autem agere potest in aliud, quod est simile in qualitate, & dissimile in gradu qualitatis.* Ratio primi est quia omne agens intendit producere sibi simile: ergo si inueniat illud iam productum, non aget in ipsum. Deinde agens ex Arist. 1. de Generat. cap. 7. agit ex victoria quam habet supra passum; sed simile in qualitate & gradu non superat aliud, quoniam vtrumque supponitur æquale: ergo vnum non potest agere super aliud simile in qualitate & gradu. Tandem si agens omnino simile ageret in sibi simile, ab eo repateretur; sed simile non potest repati à simili, quia passio non potest esse, nisi à contrario: ergo simile nequit agere in aliud similis qualitatis & gradus. Ratio secundi est quòd agens conetur assimilare sibi passum quantum potest, & passum perficere sicut est agens; sed simile in qualitate & dissimile in gradu potest sibi assimilare illud, & ipsam reddere perfectum: ergo simile potest agere in id quod est similis qualitatis, & dissimilis gradus. Videmus enim per experientiam, quòd manus calefacta à calore solis, magis calefieri possit à calore ignis, qui est intensior; & sic simile agit in simile, si similitudo se teneat tantum ex parte qualitatis, & non ex parte gradus. Si dicatur in primum. idem agere in seipsum, quando qualitas per Antiperistasis suas vires auget, & seipsam roborat. Resp. In Antiperistasi non augeri qualitatem, sed solum vniri & ex vnione ipsam fieri actiuorem. Dices in secundum, manus æqualiter calidas sese calefacere mutuò; & proinde simile agere in simile. Resp. Vnam non posse alteri maiorem calorem dare, quia nemo dat quod non habet; vnde si inuicem iunctæ facilius retineant calorem, quàm si essent separatæ: hoc ideo fit, quia facilius resistunt agentibus frigefactiuis.

Dico 4. *Licet ex similibus in qualitate & in gradu vnum sit densius altero, non tamen vnum potest agere in aliud.* Quia vnum agens eatenus tantum agit in aliud, vt possit illud sibi assimilare; sed cum due

agca.

agentia sunt similia in *qualitate* & in *gradu*, neutrum nititur sibi assimilare alterum, etiamsi differant penes densitatem materiæ, quam nullatenus affectant, cum ferrum calidum non contendat producere densitatem in aere, sed tantum calorem: ergo quod est simile in qualitate & gradu non agit in sibi simile, etiamsi densiori materia constet. *Dices*. Densitas iuvat ad agendum: ergo simile potest agere in simile; si sit densius illo; & proinde ferrum calidum ut quatuor poterit calefacere aquam calidam ut quatuor. *Resp.* Densitatem iuvare quidem ad velocius & constantius agendum, non verò ad agendum efficacius; quia non est qualitas actiua; unde ferrum densum ut quatuor non calefaciet aquam calidam ut quatuor: non enim potest illi dare calorem *ut quatuor*, quia iam illum habet; nec calorem, *ut quinque*, quia *nemo dat quod non habet*. Quod si ferrum illud possit producere ignem, quem non poterit producere illa aqua; hoc non procedit ex densitate ferri, sed ex hoc quod in poris ferri candentis existant particule ignis; ut patet ex eruptione illarum, cum malleo tunditur.

Obijcies Radios solis conglobatos & addensatos in speculo caustico, seu vstorio, comburere; quod non faciunt in aere dissipati: ergo densitas iuvat ad agendum simpliciter, contra id quod prædictum est; & proinde simile potest agere in simile, si sit densius. *Resp.* Radios in speculo caustico non esse densiores quàm sunt in aere, sed tantum intensiores; quia sunt magis uniti, & *virtus unita est maior seipsa dispersa*: cum enim lux non sit corpus, sed qualitas; propriè non addensatur, sed intenditur. Ratio autem cur lux intendatur in speculo caustico, tantasque vires acquirat, ut eximum illud speculum causticum in Bibliotheca regia Parisijs existens, nedum ligna inflammer, sed etiam solidissima metalla dissolvat, coctosque lateres in vitreum fluorem colliquefaciat; non alia videtur quam quod sol agat iuxta dispositionem subiecti & medicij, à quibus eius actio dependet: beneficio autem speculi caustici fit, ut focus speculi, seu centrum illius, melius sit dispositus ad receptionem radiorum solis; ideoque nil mirum si fortius illuminetur. Hæc autem melior dispositio in hoc consistit, quod focus ille seu centrum speculi pluribus vijs ac modis collustret à sole. Sol enim illuminat speculum illum secundum lineam

rectam, ita tamen, vt cū radij eius per vitrum conuēxum traiciuntur, refrangantur, seu paulisper ferantur motu obliquo à circumferentiā ad centrum: vnde focus ille pluribus modis illuminatur per radios solis sibi inuicem vnitos, & fortissima illuminatio illa in causa est, eur beneficio talis speculi ligna illi exposita inflammentur, & in liquorem resoluantur metalla.

Dico 5. *Actionem semper procedere à proportione maioris inæqualitatis*, seu, vt magis explicetur propositio; ad hoc vt agens agat, actiuitas agentis debet esse maior resistentia passi. Quando enim agens & patiens comparantur, si actiuitas vnius sit maior resistentiā alterius, ista comparatio vocatur *proportio maioris inæqualitatis*; si verò actiuitas vnius est minor resistentiā alterius, hæc comparatio nuncupatur *proportio minoris inæqualitatis*; sed vt agens agat efficaciter, debet esse maior actiuitas agentis, quàm resistentia passi, aliàs agens quod non vinceret passum non haberet effectum suæ actionis in illo: ergo actio semper procedit à proportione maioris inæqualitatis. Si enim mœnia arcis talem haberent resistentiam, qualem actiuitatem haberent ictus bombardarum, mœnia illa nunquam lēderentur, illorum enim destructio procedit ex minori resistentia. Dices. Gutta aquæ durissimum lapidem cauat, & funis scindit putei viuos lapides, quos cauere videtur: sed maior est resistentia lapidis, quàm actiuitas guttarum aquæ & funis: ergo actio non semper procedit à proportione maioris inæqualitatis. Resp. cum Doctore in 2. dist. 2. quæst. 9. primam guttam aquæ, aut secundam, aut tertiam, non cauare lapidem, sed multas simul ad cauationem disponere lapidem, paulatim mollificando illum, & tandem vltima in virtute præcedentium lapidem cauat: non quod sit actiuior alijs, sed quia lapis ad cauari dispositus minùs resistit: quod idem dicendum est de fune, quæ lapidem scindit per continuam actionem. Resistentia quæ nihil aliud est quàm obstaculum actiuum aut passiuum quo patiens impedit ne agens agat in ipsum passum, cognosci potest ex eo quod res sit dura & densa: omne enim durum & densum resistit corrumpenti, vt patet de ferro: sicut rarū & molle non resistit, vt videre est de cera, quæ licet non destruat quantū ad entitatem, cessat tamen de facili quantū ad figuram in seipsa impressam.

Dico

Dico 6. *Dari reactionem & passionem ex Scoto in 1. dist. 17. quest. 3.* Actio enim est quidam victoria, per quam agens frangit & superat actionem patientis; sed in tali conflictu agentis & patientis agens repatitur à passo: ergo reactio & repassio admitti debent. Deinde datur elementorum mixtio ad faciendum compositum; sed in mixtione debent alterari elementa, & alteratio non fit nisi per reactionem, quatenus scilicet elementum temperatur per reactionem sui contrarij, quæ facit ut qualitates non sint in summo, sed in mediocritates; ergo reactio & repassio concedi debent. Tandem experientia docet, quod nix à manu compressa frigefaciat manum & calefiat ab ipsa manu; aqua frigida prunis ardentibus iniecta eas extinguit quidem, sed ab illis repatitur, in quantum calefit & soluitur in vapores; ferrum candens proiectum in aquam frigidam, eam calefacit, & calor ferri remittitur per frigiditatem aquæ: & sic non rectè inficiantur reactionem illi quos recitat noster Faustinus *theor. 43. cap. 4.* Reactio autem nihil aliud est, quàm *actio reciproca*, seu actio passi qua passum agit in agens. Dices. Si per reactionem passum agat in agens, virtus agentis minuetur per actionem patientis; & sic non poterit agens sibi assimilare passum, quod tamen est finis agentis. Resp. per reactionem reuerà minui virtutem agentis, sed non est necesse ut agens assimilet sibi passum quoad omnes gradus, quos continebat antequam ageret; sed sufficit quod illud sibi assimilet secundum gradus illos quos habet dum operatur. Dices. Astra agunt in hæc inferiora, à quibus nihil patiuntur; similiterque ignis comburit stuppam, attamen nihil patitur ab illa. Resp. Astra non repati à sublunaribus, tum quia maxime distant ab illis: tum quia non sunt capacia qualitatum sublunarium. Quoad stuppam, si proijceretur in ignem, illum paulisper extingueret secundum partes viciniores; licet statim victa consumeretur.

Tres præsertim conditiones requiruntur ut agens agendo in passum repatiatur ab illo. Prima est quod *agens & passum contrarijs afficiantur qualitatibus*, quales sunt calor & frigus; unde vinum agit in aquam sibi infusam per suum calorem, & ab ea repatitur, ob frigiditatem aquæ. Secunda conditio est ut *agens & passum sint capacia utriusque qualitatis*; unde inter spiritalia non daretur reactio, quia non possunt recipere

qua-

qualitates elementorum, quæ sunt causa actionis. Tertia conditio est quod ut resultet reactio, agens & patiens sint intra spheram suæ affinitatis; & ideo cum passum est in nimia distantia, vel est valdè debile, non resurgit reactio. Quando autem triplex illa conditio reperitur inter agens & passum, tunc semper admittitur reactio, ut docet Doctor noster in 2. dist. 44. quest. 1. Dices. Si daretur actio reciproca passi agens, vnum & idem esset simul fortius & imbecillius; fortius, inquam, quatenus ageret, & agens non agit nisi ex prædominio in passum, inquit Philosophus lib. de Motu animalium: imbecillius verò, quatenus repareretur; sed hoc dicere absurdum est; ergo non datur reactio. Resp. Vnum & idem esse simul fortius & imbecillius diuerso respectu, fortius siquidem in agendo, & infirmius in resistendo; non verò potest eodem respectu esse simul fortius & debilius: quotiescumque ergo agens agendo reparatur, agens est in agendo fortius, & in resistendo debilius.

Dico 7. Qualitatem agentis & patientis intendi per Antiperistasis, quæ est nomen græcum, quod latinè significat obsidionem, seu circum obsistentiam contrarij, per quam corpus obsessum euadit potentius ad retundendas contrarij vires. Antiperistasis negat Galenus lib. 3. de Facult. simpl. medic. cap. 7. Vbi scribit, quòd si aqua videatur æstate frigidior, & calidior hyeme; hoc procedit ex falsa apprehensione intellectus nostri, qui indicat aquam esse frigidior æstate, quia tangitur manibus calidis, licet à parte rei sit aqualiter frigida. Contrarium probant Aristoteles, Hippocrates. & reliqui philosophi per multas experientias; & præsertim per hoc, quòd aqua putei hyeme sit calidior, quàm æstate; quia scilicet exhalationes calidæ, quæ superfuerunt in terræ, per recessum solis & hyemis aduentum, occludantur à frigore, quod viget in superioribus partibus terræ & ex opposito aqua putei æstate est frigidior quàm hyeme; quia frigiditas terræ circumobsidetur à calore, qui tunc æstuat super terram: & si frigus remanens in terræ visceribus facit, ut aqua sit calidior hyeme, quàm æstate. Deinde, propter Antiperistasis venter animalium est hyeme calidior; unde Hippocrates aphor. 15. dicit, quòd hyems iunet digestionem, quam æstas enervat; & ob hanc rationem septentrionales nationes sunt voraciores ciborum, &

meridionales parciores notabiliter. Tandem ex Antiperistasi procedit, quòd media aeris regio frigidior sit æstate, vt testantur grandines, quæ gignuntur tunc temporis; quod aliunde non prouenit, quàm ex calore infimæ regionis, quæ tunc calida est; & proinde per antiperistasi, seu per pugnam contrariorum, auget frigiditatem mediæ regionis.

Hic notari debet, quòd res omnes taliter à natura conditæ sint, vt nedum per antiperistasi resistant suis contrariis; sed etiam quando opprimuntur & versantur in extremis, tunc facta conatu quidquid habent virium excitant & impendunt. Sic videmus candelarum flammæ in fine suo existentes, & ad suæ extinctionis vigiliam per breuissimum aliquod tempus augeri; quasi vehementius aduersus mortem suam colluctari tentent. Experimur pariter ignem frigidissimis diebus acriorem esse; calorem naturalem humoribus oppressum in animalium corporibus irritari & fieri vehementiorem; indeque nascitur febris, quæ nihil aliud est, quàm calor naturalis irritatus, & vehementius accensus ad debellandum humorem noxium. Ex his omnibus apparet manifestè dari antiperistasi in qualitatibus, quidquid dicant Cardanus 2. de subtilitat. versus finem, & Galenus loco citato. Ad hoc quod ille dicit falsè iudicare sensus, aquam esse frigidior æstate; loquitur contra experientiam: quæ cum maiorem illam frigiditatem experiamur tempore æstatis, quàm hyemali; pugnat etiam contra rationem, cum hyeme videamus aquas fontales exhalare fumum, qui calorem aquæ denotat in illo tempore.

Finis prima partis Physicæ

